

# Strolìc Furlan pal 2020





# Strolìc Furlan pal 2020

Societât  
Filologjiche  
Furlane



Società  
Filologica  
Friulana

Diretôr Responsabil	<b>Giuseppe Bergamini</b>
Redatôr / Strolegant	<b>Dani Pagnucco</b>
Revision dai tescj	<b>Elena De Sanctis</b>
Grafiche e impagjinazion	<b>Anna Maria Domini</b>

La ilustrazion de cuviertine, chês al inizi di ogni mê e chê di p. 288 a son gjavadis dal *Manuscrit 220* de Biblioteche Civiche Guarneriane di San Denêl. Il manuscrit su pergamene, cognossût tant che *Epistolari di Antoni Panciera*, al fo scrit dal gardenâl Panciera tor dal 1415.

In cuviertine:

I Paris de Glesie a mostrin simpri la *Simie* tant che rapresentante dal diaul, la incarnazion dal mâl. Chi al somee che cuasi si zui cu la peraule di riclam “ipsum”. Di fat e va cuintri des raccomandazions sapienciâls dal test e e incjarne il vueit dal mont menzonât tal test: “omnia statum mutant”.

P. 288:

Il *Jeur* al à in se la peraule “demum”, par visâ che il fassicul al è rivât insom, di mût di judâ la impagjinazion des cjartis che a vegnin daûr. Intai bestiaris medievâi al rapresente il mâl, il dubi, l’imprevist svoladi, incontrollabil, che al comparis di gnot. Nol è un câs se lis riis dal test a fevelin dal Schisme.

Finît di stampâ tal mê di Novembar dal 2019  
in Sincromia Roveredo in Piano (Pn)

© 2019 - Societât Filologjiche Furlane «Graziadio Isaia Ascoli»  
Vie Manin, 18 - 33100 Udin  
Tel. 0432 501598 - Fax 0432 511766  
[www.filologicafriulana.it](http://www.filologicafriulana.it)  
[info@filologicafriulana.it](mailto:info@filologicafriulana.it)

ISSN 1120-916X  
ISBN 978-88-7636-318-4



*A cui che al vîf l'emozion  
vuardant i voi di cui che al è denant,  
il cressi de lune,  
il jevâ dal soreli,  
il vierzisi di un flôr,  
la cjalade di un frut.*

# Strolic Furlan pal 2020

par cure di  
Dani Pagnucco

# 2020

de vignude di Crist

## Il 2020 al rispuint

- al 943 dal Stât patriarcjâl furlan
- al 2201 de fondazion di Aquilee
- al 2773 de fondazion di Rome
- al 5780 dai Ebreus
- al 1441 (par nô, 1394) dai Maometans
- al 2564 dai Budiscj
- al 74 de Republiche taliane

## Fiestis variabilis

- La Cinise (26 di Fevrâr)  
*Il miercus denant de prime domenie di Coresime*
- La Domenie Ulive (5 di Avrîl)
- Pasche maiôr (12 di Avrîl)  
*La prime domenie dopo il pleniluni dal ecuinozi de Vierte*
- La Sense di N.S. (24 di Mai)  
*40 dîs dopo de Risurrezion*
- Lis Pentecostis (31 di Mai)  
*50 dîs dopo de Pasche*
- Il Corpus Domini (14 di Jugn)

## Fiestis di precet

- Dutis lis domeniis
- Il Prindalan  
*Circoncision di N.S.*
- La Pifanie (6 di Zenâr)  
*Pasche Tafanie*
- La Madone di Avost (15 di Avost)  
*La Assunzion in cîl di Marie Vergjine*

- Fieste dai Sants (1<sup>n</sup> di Novembar)  
*Pasche dai Muarts*
- La Madone Imacolade (8 di Dicembar)  
*Imacolade Concezion*
- Nadâl (25 di Dicembar)  
*Nassite di Crist*

## **Fiestis talianis**

- La Liberazion (25 di Avrîl)
- La Fieste dal Lavôr (1<sup>n</sup> di Mai)
- La Istituzion de Republiche (2 di Jugn)

## **Ricorencis furlanis**

- Riviel dal Carnevâl dal 1511 (27 di Fevrâr)  
*La joibe grasse*
- Aprovazion de leç 15 dal 1996 (22 di Març)  
*Ricognossiment regjonâl de lenghe furlane*
- Costituzion dal Stât patriarcjâl intal 1077 (3 di Avrîl)  
*Fieste de Patrie dal Friûl*
- Aniversari dal Taramot dal 1976 (6 di Mai)
- Aniversari de muart dal Patriarcje Bertrant intal 1350  
(6 di Jugn)
- Sants Ermacure e Fortunât, Patrons dal Friûl (12 di Lui)
- San Martin Vescul (11 di Novembar)
- Aniversari de fonde de Filologjiche intal 1919  
(23 di Novembar)
- Sante Catarine di Alessandrie (25 di Novembar)  
*Presentazion dal Strolc Furlan*
- Sante Luzie (13 di Dicembar)
- Aprovazion de leç 482 dal 1999 (15 di Dicembar)  
*Ricognossiment statâl de lenghe furlane*

## *Anima et alia:* il bestiari dal Gardenâl

**L**is imagjins maraveosis presentadis tal Lunari e tal Strolc pal an 2020 a son stadis buridis fûr dal manuscrit 220 de Biblioteche Civiche Guarneriane di San Denêl.

Il manuscrit su pergamene, cognossût tant che Epistolari di Antoni Panciera, al fo scrit dal gardenâl Panciera midiesim intor dal 1415. Jentrât te colezion di Mons. Just Fontanini tal 1697, al è rivât te biblioteche di San Denêl midiant di un lassit testamentari. Al è un codiç interessanton e si trate di un testimoni di grande impuartance pe storie dal Patriarcjât di Aquilee. Di fat al ten cont documents e letaris che a rivuardin lis relazions tra il Patriarcjât e la Sante Sede intal prin cuart dal secul XV, documents che a son di fonde ancje par ricomponi la cariere dal Panciera, di cuant che, in grazie che al jere funzionari adet a la preparazion des bolis uficiâls inte curie dal pape Inocent VII, al vignì fat Patriarcje di Aquilee, fintremai che al fo nomenât gardenâl tal 1412.

Il Panciera stes al è rafigurât inte cjarte 1 recto, insiorade di decorazions, biel che iniziâls filigranadis di ros e turchin a inricjissin il manuscrit, ma ce che al da plui tal voli a son lis rafigurazions di animâi, bielonis, che a compagnin chei che a vegnin clamâts riclams insom dai fassicui che i dan cuarp al codiç, e che a son protagonistis di chest Lunari e dal Strolc pal 2020.

Inte sô struture, un codiç al è componût di une schirie di fassicui, leâts adun par formâ il cuarp dal manuscrit. Inte composizion dai codiçs, si faseve prime la scritture, un fassicul daûr chel altri, po si proviodeve a imbielîlu cun miniaturis e cu la decorazion des letaris iniziâls, e dome insom si pensave di dâ dongje il dut

inte forme classiche dal libri, come che si pues viodi ancje vuê. Par rindi plui facile la disposizion dai fassicui in maniere di dâur l'ordin just cuant che a vevin di sei cusîts, te ultime pagjine di ogni fassicul, par solit tal ôr disot, e jere scrite la prime peraule dal fassicul che al vignive daûr; si tratave di un riclam, par che al fos lât ben di controlâ che la sucession des cjartis e les indenant inte maniere juste. Insom di ogni fassicul dal manuscrit 220, lis peraulis di riclam a son imbilisiadis cu la miniature di un animâl: des voltis l'animâl "al cjape part", si fâs par mût di dî, de peraule istesse, tant che intal câs dal gjal che al dopre il so bec come che al tignîs des cjartis, o in chel de bolp che e à une scrite intorsi, o ancje tal câs de simie che al pâs che e vueli brincâle cu lis sôs çatis denant; altris voltis, impen, l'animâl al sta su lis sôs, disleât dal riclam, che al è scrit a drete, dal dut fûr o cuasi dal limit di scriture.

Une robe curiose: inte cjarte 24 verso, il leon, cun chê criniere cussî fisse e la lenghe rosse, in plui di vê marcât il riclam su la cuesse, al ten framieç des çatis la steme dal gardenâl.

Il codiç al è stât digjitalizât tal 2016 e si pues viodilu su la "Teca Digitale della Guarneriana" <[www.guarneriana.it](http://www.guarneriana.it)>.

**Elisa Nervi**

*Direttore de Biblioteche Civiche Guarneriane di San Denêl*

## Preambul: in ponte di pîts

Chest libri al è il prin jessût tal secont secul di vite dal *Strolic Furlan*, come a dî che al è il numar 101 di cheste golaine che, o cunfidi, al darà la cjarie a lis tantis personis che a crodin tal Friûl e al furlan, doprantsi no par propri interès ma par cunvinzion ideâl e pratiche.

Il pinsîr tal meti adun lis 288 pagjinis al è simpri stât chel di dâ vôs no dome ai tancj autôrs aromai plui che cognossûts tal nestri teritori, ma ancje ai tancj che a provin a scrivi, puartant gnove sostanze a la lenghe furlane.

A son ben 80 personis che a son presintis ta chestis pagjinis cun 183 scrits. Denti si cjatin oparis che a presentin il Friûl sot tancj aspiets e soledut si puedin lei scrits di bon spessôr e inovatîfs. Come simpri o lassi une façade al mêś par lis puisiiis: dutis premiadis tai svariâts concors che si davuelzin chenti, ma ancje fûr dai nestris cunfins. No si cjataran i tescj dal Strolegant; belzà preparâts, o ai preferîl lassâ il spazi a lis gnovis gjenerazions dal scrivi.

In zonte ai scrits a son presintis fotografiis une vore bielis: chês di Giuliano Borghesan (che nus à lassâts chest an) e chês di Dario Quattrin che a meretin une vere atenzion. Cun di plui o vin i disens di Annalisa Gasparotto che a dan colôr a cualchi biele conte. Straordenariis a son lis riproduzions dai disens che a compagnin i mêś dal an, la cuviertine e l'ultime façade dal libri! A son imagjinis tiradis fûr dal *Bestiari* di Antonio Panciera, metût adun tal 1415, e presint ta la Biblioteche antiche di San Denêl. A son figuris che a lassin smaraveâts; cui che al vûl al pues cjapâlis come

simbui par tatuâsi là che miôr al crôt. Baste domandâ il permès a cui di dovê!

Chest *Strolic* nus compagnarà par dut il 2020, cu la sperance che al puarti a ducj moments di vite passade in serenitât. Viodût che il di plui nol covente, o auguri a ducj di cjatâle e vivile. Lis zornadis a passaran sveltis come ogni moment di vite: il presint al è aromai passât, par la cuâl ognidun ch'al ciri di jessi se stes cun dignitât e cence seconts fins.

Chest *Strolic* al ven burît fûr cul jutori di tantis personis che a son di ringraciâ pe inteligjence e pe disponibilîtât che a àn dât:

- Carlo Venuti che cun insistence tal no fermâsi al à segnât il troi;
- Elisa Nervi par vê metût a disposizion lis imagjinis e spiegât il valôr dal libri di dulà che a son stadis gjavadis;
- Angelo Floramo pal accompagnament istrionic a lis figuris;
- Rem Spicemei, pe traduzion dai tescj fate cun profunditât di anime;
- Claudio Petris e Nerio Petris che mi àn marturizât cui Sants dal lunari;
- don Loris Della Pietra par vê poiât la sô sapience propit sui Sants;
- Anna Maria Domini che a à componût il *Strolic* cun passion e professionalitât;
- Elena De Sanctis pe atente revision dai tescj;
- La dite Sincromia che cun grande professionalitât e à metût ben l'ingjstri ta lis pagjinis;
- Ducj chei che a àn judât ta cheste fadie e le àn fate plui bieles.

Cul bon pro a ducj e bon 2020!

**Dani Pagnucco**

*Il Strolegant*

he gāut de Coitate mūgle  
t' gliliarijs lūg i pticlan mūtatis mū  
etitū in oculis pīsan p a pacha āquile

Patricha  
a in

Monte Aun. authore  
Lōis F. Petrarca



L

a Gru ripuartade e je par sigûr un presint al Gardenâl Antoni Panciera che al nassè a Puart, il puart de gru, juste apont. Il miniaturist al à volût incjarnâ la bestie in maniere pardabon naturalistiche, metint atenzion ai particolârs, ma disponintji lis alis tant che se al volès invidâ a zirâ lis cjartis dal manuscrit.



# ZENÂR

<b>1</b>	<b>M</b>	S.te Marie Mari di Diu	<i>Prindalan</i>	
<b>2</b>	<b>J</b>	S. Basili il Grant		
<b>3</b>	<b>V</b>	Non dal Signôr		☾
<b>4</b>	<b>S</b>	S. Ermis martar		
<b>5</b>	<b>D</b>	S.te Melie martare		
<b>2</b>	<b>6</b>	<b>L</b>	Pifanie dal Signôr	
<b>7</b>	<b>M</b>	S. Luzian martar	<i>Fieste dal Tricolôr</i>	
<b>8</b>	<b>M</b>	S. Severin abât		
<b>9</b>	<b>J</b>	S. Julian martar		
<b>10</b>	<b>V</b>	S. Aldo rimit		◯
<b>11</b>	<b>S</b>	S. Paulin di Aquilee		
<b>12</b>	<b>D</b>	Batisim dal Signôr		
<b>3</b>	<b>13</b>	<b>L</b>	S. Ilari vescul	
<b>14</b>	<b>M</b>	B. Duri di Pordenon		
<b>15</b>	<b>M</b>	S. Maur abât		
<b>16</b>	<b>J</b>	S. Tizian di Auderz		
<b>17</b>	<b>V</b>	S. Antoni abât		☾
<b>18</b>	<b>S</b>	S.te Prische martare		
<b>19</b>	<b>D</b>	S. Mario martar		
<b>4</b>	<b>20</b>	<b>L</b>	SS. Fabian e Bastian martars	
<b>21</b>	<b>M</b>	S.te Gnese vergjine e martare		
<b>22</b>	<b>M</b>	S. Vissent diacun e martar		
<b>23</b>	<b>J</b>	S.te Merenziane vergjine		
<b>24</b>	<b>V</b>	S. Francesc di Sales vescul		●
<b>25</b>	<b>S</b>	Conversion di S. Pauli		
<b>26</b>	<b>D</b>	SS. Tito e Timoteu, vescui		
<b>5</b>	<b>27</b>	<b>L</b>	S.te Agnule Merici muinie	<i>Zornade de Memorie</i>
<b>28</b>	<b>M</b>	S. Tomâs d'Aquin, dotôr de Glesie		
<b>29</b>	<b>M</b>	S. Costant vescul		
<b>30</b>	<b>J</b>	S.te Martine vergjine		
<b>31</b>	<b>V</b>	S. Zuan Bosc predi		

## Las salmueries dai Zuanes

**P**ar vecju i Asîns ai ere pal pi cjarvonârs e pastûers cun tant di vacjes, cjares e fedes, bergjes e passons. Il risultât di dut chest bazilâ davôr luvris<sup>1</sup> e tetes a si lu vedeve intal molzi. Tant lat intal poden e po butiro, scuete e formadi intal celâr<sup>2</sup>. Par conservâ e rindi il formadi pi saurît, a si meteve las formeles intalas salmueries<sup>3</sup>, vecjes brentones di laris, cun dente nome lat, sâl e un sbit di aghe, cu l'avertenze da tignî dut ben messedât e sbatût par almalcul doi meis. Po al surtive un bocon gulûes: il formadi salât asîn. Ma il non no vos imbroi, al ere fat nome cun lat di vacje, no di... musse. A nos al dîs clâr e net encje un poete nostran dal '600, Ermes di Colorêt: "Chest è un formadi che in Friûl prodûs / la mont di As e par chest si clame asîn, / al si mangje a gran' tocs gruess come uus, / e come polente il bon Feltrin". E ce formadi! Preseât encje dal vescum di Concuardie Jacopo Erizzo che tal 1749 al scrif sù a Clausê: *"Siamo ora al tempo delli formaggi*

<sup>1</sup> sacchi mammellari

<sup>2</sup> ripostiglio

<sup>3</sup> salamoie



*Clapadorie a scjalins par mus e cristians*

*Asini, non vorrei mi succedesse qualche disguido per tali frutti”.*

Un bocon gulûes par int di bocje fine, che i pridis, in fat di magnifiche, ai si son simpri tratâts ben. Ma par fâ formadi a vôl tant lat. Pal Cjanâl e Favidâl, par las Cjauianes e las Prades al ere dut un ronâ, une musiche di batadories<sup>4</sup>, cûets e falcets. Il bon nulî dal fen e dal ledan al emplave las stagjons. Ma in pûeçs ai faseve formadi salât di chel bon: i Rugo (Barzanai) di Cjampon, i Del Missier (Pirones) di Duminisie, Meneto di Belete dai Fornez, la Rine di Cichin di Prades da Dalt ma soledut Meneto Tosoni dai Zuanes cu la sô femine, la Mie di Rosseto, gjenitûers di Renato e nonos di Silvane, Carlo, Roberto e Domenico. Encje doi bassarôi di Codroip e un cjargnel di Soclêf ai si metèr tal cjâf da fâ asin. Dut dibant, a conferme che a vôl savût a fâ scliçots e che... a vôl doi furlans a fâ un cjargnel e doi cjargnêi a fâ un asin. Intalas salmueries ai meteve man simpri i omîns, ben di râr las femines par pore che al rivàs a tradiment il... siôr marchês<sup>5</sup>. Ai conte che Meneto al ere lavoradûer e di bon côr. Ai canais che ai si faseve dongje cuant che al disniçave<sup>6</sup> la brente al deve i fruçons e a las femines l’agadice di salmuerie par salâ la mignestre. Da chês antighes salmueries i nevûets di Meneto, enciemò vuê, ai gjave fôr l’asin salât che ai nos inmoluce intune bieie cjarte cun su Renato zovenet che al ten par la brene un mus. Cuasi a dâ flât a chel vecju e... saurît malintindût che, enfre àsino e àsino, al pâr niçulâsi<sup>7</sup> tanche la bole di un nivel.

**Gianni Colledani**

*Furlan di Clauset*

---

<sup>4</sup> incudinelle

<sup>5</sup> mestruo

<sup>6</sup> incignava

<sup>7</sup> oscillare

## Il cjamin dal asîlo

**n**ol è ambient pa canâe, masse blestemas, masse tristerias e malîcias...

L'ostarie à compagnât a lunc il scori da vite tai paisuts di mont: un element impuartant, une place vierte dulà che si podeve no dome bêvi, ma encje discori, giuâ, cavilâ, rasonâ, conossi, imparâ, fâ afârs, vendi, comprâ, cjantâ, ridi e vaî...

Da fruts ce che no si pos fâ al tice inmò di plui la curiositât e cussì, stant dongje di une ostarie, si lave a curiosâ enfre las gataradas dai balcons che ai dave su pa place.

Il sufît a volts, il bancjon, cuatri taulins e une gneule di fum che a balave cence poste a miege arie; intivâsi intune partide di briscole tra cuatri giuadôrs di chei babios al ere tant che viodi un alc di straordenari.

Certas sfidas àn storias lungjas e cussì ogni partide a davente une batâe impuartant, da vinci, e chês di peis as podeve encje contâ sul seguit dai presints che noi veve, in ogni mût, di meti lenghe.

Il tai dal vin tal riplan sot dal taulin, tun cjanton la lavagne cul riscjel o pietin già segnât cul gjes, tant che si massede las cjartas las ultimas batudas “cheste volte vin da fàure viodi a chei doi galiotei!”. “Intant, alce!” – l’aversari in rispueste – “E po’ tu pos già començâ a parâ jù da noste bande!”. Cuant ch’a tache la partide las cubias a si studiìn, tra compagns si mandin segnâi par intindisi miôr sul giûc da fâ e par cîri di capî ce cjartas che si à in man; i voi s’incrôsìn par roubâsi i segnâi che si fasin un cul âti; la bravure a è ta sveltece dal no fâsi viodi.

Âvris ch'a si bussin pa segnalâ l'as, la bocje ch'a si stuarç pal trei, i vôi ch'ai cjale il cîl pal re, la spâle ch'a si alce pal cjaual, la ponte da lenghe enfre i âvris sierâts pal fant... moviments che i giuadôrs plui vecjos ai rive a platâ cun bravure uniche, segnâi che dome un vouli atent al rive a viodi.

La partide no è di sigûr cidine e ansit tantas voltas il cjararâ al covente par cirî di confusionâ l'avversari; "Met un segnalut!" tant a dî giue une briscule piçule, "Giue caric!" "Cjame inmò! Gionte un'âti!". Un vecjut, Toni, cuant che al veve une briscule sigure al ere solit vosâ al compagn, cuntune biele ridade: "Met il cjamin dal asîlo!"; al sarès stât l'as di cope (che al faseve vegni indiment la forme dal cjamin dal asîlo dal paîs), ma in chel câs al intindeve clamâ un caric.

L'êsit da partide a dave vite a une rie di coments, di acûsas, di titui onorifics, di blestemas... plui o mancûl cjalcjâts secont cui che la veve vinte o cjapade tai comedons; cui che plui al tignive a no pierdi la mûse plui al s'inrabiave cuant che i ponts noi bastave.

Ma Toni, cence scomponisi, al diseve: "Parinle ju!" un flât di vin e po' bagnant il poleâr ta tace al lave a cancelâ ta lavagne une rie dal pietin a pro dal vincidôr da man.

**Celestino Vezzi**  
*Furlan di Çurçuvint*

**D**ucj i paîs dal Friûl une volte a vevin la passion pe musiche. No mancjave une canturië pes funzions in glesie e nancje une bande opûr une piçule compagnie di sunadôrs par balâ di scuindon. Soredut si cjantave in cjase, tai cjamps, in ostarie. Vicut Gobut, cjaliâr, e Tin Meneo, sartôr, a cognossevin a memorie dut Verdi, Rossini e Puccini e a fasevin a gare par viodi chel che si visave di plui. Italo Civon, cuant ch'al tornave in paîs de Austrie a cjatâ sô agne, sot il puarti al tacave cu la *Mattinata* di Leoncavallo: al jere il so mût di dî “o soi rivât”. Carlut al jere nassût cuntune cee blancje e une nere e l’idee di fâ il compositôr di musiche par diventâ plui famôs di Verdi. So pari, diretôr de canturië, e il capelan musicist lu vevin inscuelât par ben intes notis, ma in cjase, par vie che a tignivin ostarie, i mancjave l’ispirazion e al sintive lis maglis dal soreli. Dulà levino in chei agns i artiscj a cirî furtune? A Parigi. Alore al decît di partî pe capitâl francese. Si fâs subit notâ dal gjornâl *Le Moniteur* ch'al conte in croniche des acrobaziis fatis par tirâ sù intune mansarde de rue de Charonne un pianoforte, sintudis lis protestis de armade de salût che e steve in face. Ancje la vite di *bohémien* no i zovave a l’ispirazion e cussì al à scomençât a dî che si sarès butât inte Seine pluitost che tornâ cjase. Une dì, disperât, al cjape dut ce ch'al veve di libris, spartîts, cjartis e jù pal balcon... Framieç e jere ancje une sô fotografie che e va a finîle intune poce di aghe. “Mame, mame – un frut al viôt e al clame – Carlut si è butât inte Sene”. A rivin i pompîrs, i barcjârûi, dute une confusion. Nuie di mâl: inte sô lungje vite al è rivât ancje a insegnâ musiche intes scuelis mediis.

**Roberto Tirelli**

*Autun ingjanadour...  
Incjant sedutour  
a la fin dal dì,*

*il blu ornàt di soreli  
al regala lamps estìfs  
clarour sflandorous.*

*I rais morbinous  
a polsin sui flours,  
ciprès slusints.*

*Vision inreàl...  
Il grìs al transfigura  
si sfantin li' "muris"*

*e il "sun" delicàt  
si disfa tal Amour:  
la lùs a bussa il cour!*

**Angelo Bertoia**

*1° premi concurs "Giulietta e Romeo di Savorgnan", Udin 2018*

## Racolare prime dal terremoto

**R**acolare a l'ère un comun a sé fin al 1928, cuant ch'a l'ère stade costrete a unîsi a Sclûse, il paîs dilà da le Fele. Cheste borgade, ch'a l'è stade sconcuassade dal terremoto dal '76, cu le ricostruzion a l'à cambiât fisionomie: cjasis modernis, recintadis e cuntun piçul zardin, dolà che ognun al vîf par cont so. Dut il contrari di cemût ch'a l'ère prin dal sisma: un grum di cjasis dutis fatis in clap (le pui vecje a l'ère dal 1494), une tacade a chê atre, cu le' contradis di pedrât cussì strentis che une machine, par piçule ch'a le segni stade, a le rivave a jentrâ cun dificoltât dome par qualche stradute. Pai fruts al ere un continuo divertiment: corisi daûr, zuâ a platâsi, spietâ intun cjanton il compagn par fâi qualche scherz; tra le' fameis a l'ère armonie, nol mancjave mai un "bondi", o "cemût stastu vuei?" o "ce bon odôr di polente: ce fastu di cene?" e vie indavant. A proposit da le' cjasis dutis ingrumadis, al ere impussibil lâ daûr dai numars civics: l'uniche ch'a si podeve individuâ a l'ère le gleisie, cul numar 186. Une dì, une copie di forescj a l'ère passade davant dal Zaneto Sàuc, une persone in gamba su le otantine, ch'al ere sentât su le puarte di cjase. I doi ai cirivin une famee, ma no rivavin a cjatâ il numar di cjase. Ai vevin domandât informazions al Zaneto, che a ju aveve licuidâts cussì: "Eh, eh, Raccolana è una piccola Venezia!" e nue di pui. Il Zaneto al ere ancje un brâf marangon e a si ere preparât le casse di muart ch'a le tignive intal tinel. Cuant ch'al veve un pouc bevuçât, nol faseve le' scjalis par lâ sù inta cjamare, ma si distirave inta casse, "Tant – al diseve – jo ài di usâmi!".

**Antonino Danelutto**

*Furlan di Scluse*



*Il sghirat  
a San Zorç de Richinvelde  
(foto Dario Quattrin)*



## La cantine di Cormòns: l'art dal vin

**L**a Cantine Cooperative di Cormòns, une des plui impuartantis dal Friûl, e fo fondade ai 29 di Dicembar dal 1968. Tal 1983 al fo plantât un vignâl di 6500 risits rivâts di dut il mont e tal 1985 al fo vendemât il prin Vin de Pâs. Di li indenant, ogni an trê artiscj di no-mee internazionâl a forin inviadês a disegnâ lis etichetis des butiliis, inviadis a ducj i guviers ricognossûts dal Stât talian. Dal 1990, parie cul disen des etichetis, a son stadis metudis ancje poesiis e cjançons, cun chê di trasmeti miôr il messaç di pâs e di culture dal vin. In chescj agns a àn colaborât plui di 90 artiscj in rapresentance di dute l'art contemporanie. La Cantine e à un impuartant nucli di oparis di arts: lis botis di artist pituradis a partî dal 1983 dai plui innomenâts artiscj talians e dal teritori, il daûr da lis telis di Paolo Menon, i totem di Paolo Falaschi, i rilêfs dal gjeniâl scultôr Darko Bevilacqua (Biglie 1948 - Cividât 1991), la instalazion progjetade di Paolo Coretti, la decorazion dal pont di vendite cun oparis di Giovanni Cavazzon. Chest test al è il prin dai contribûts su lis oparis di art pituradis su lis botis de Cantine Cooperative di Cormòns: o'ndi cjatarê un in ogni mêis dal Stolic.



*Il scultôr Darko al realize,  
cu la ponte incandessent, la figure  
di Sant Urban suntune bote, 1983*

## L'orc da la Mariane

**S**u la mont Mariane, ch'al è un vulcan studât, oltre ai spirts e a la regjine da li' striis, intune caverne al viveve un orc, ch'al veve vût di lôr il permès di stâ aì.

Al ere grandon e pelous, cun dôs gjambis grandis, par no dî dai braçs, cun dôs çafonis e cu li' onglis lungjis. Al jessive fûr sul vignî gnot par controlâ dute la valade e al veve di ritirâsi prime ch'a la vignîs gnot scurade. Al meteve un pît su la Mariane e chel âtri sul Cjanin. Cu li' mans a si tignive dal Pisimoni e par chest la mont al à dôs gimis: la ponte di une a la à spiçade lui, par tignîsi miôr. Il so compit al ere chel di stâ atent se ducj i fruts, di sere, ai preavin l'Agnul custodi, l'Avemarie e il Requiem pai muarts. Chei fruts ch'a no preavin ai fasevin une brute fin: ancje se i balcon ai vevin i gatars, lui cu la sô manone e cun chês onglis lungjis a ju tirave fûr e a ju mangjave. Cuant che lui a 'n' veve masse, a ju deve a la regjine da li' striis, par boliju ta cjalderone dal vueli bulint, ch'al servive par fâ i bevarots pai striaments.

**Andreina Bulfon**

*Furlan di Mueç*

**Al sucêt che spes si reste tal cidinôr  
par vie che tancj no puedin capi  
e altris no mertin di savê.**

*Samuel Lyon Russell*

## Otto, un om di valôrs morâi e artistics...

**U**ne frecuentazion di cuarant'agns nus permet di fevelâ dal pitôr, ma soledut dal om. Otto D'Angelo al à cognossût l'emigrazion pôc dopo da la fin da la seconde vuere. Come tancj al veve scugnût partî. Dongje da la passion dal disen e dal pinel i sflameave dentri ancje la passion pal balon. Al veve zuiât in France e chest fat i veve permetût di colaborâ cun setimanâi ch'a fevelavin di fobal e lui, par tantis partidîs – no esistevin televisions chê volte – al disegnave lis azions ch'a vevin puartât a fâ un gol. Come chês che si podevin cjatâ su «Lo Sport Illustrato» in Italie. E a 'ndi capive di balon, tant al è vêr che cuant che al tornâ in Friûl, tai prins agns Setante, si metê a disposizion di une squadre par alenâ i piçui. Al jere calculât un mestri; al jere cussì precîs ch'al veve metût adun intun cuadernut ducj i schemis dai esercizi par la gjinastiche, il palegjo e il zûc! E li si sin incuintrâts: sul valôr grandonon dal sport, su la lenghe, su lis tradizions, su la culture contadine. Soredut in cont di chest, cuant ch'ô 'nt fevelavin, i lusivin i voi! I bateve plui fuart fintremai il cûr! E ce che nus à lassât, in plui di fânus gjoldi cui voi, nus môf emozions, chês tenaris emozions che lu fasevin tornâ ai siei siums di frut. Chei voi alore a àn podût ancje fissâ ta la memorie dut chel Friûl che in di di vuê, tal miôr dai câs, si po viodi in cualchi cartuline. Om grant ta la culture furlane, sempliç tai siei môts di rapuartâsi cun chei che lu frecuentavin, om di grancj valôrs etics. Nus restin i siei quadris, lis sôs pituris, tant che testimoniance dal grant amôr che lui al à pandût par la sô tiere e par la sô int. Si podin calculâ furtunâts chei ch'a àn podût fâ un trat di strade cun lui.

## ... UN ARTISTE DAL GRAN CÔR

### La stale

**L**is zornadis in Sie-  
rade a jerin cetant  
curtis. La campagne e  
jere in polse, la nature  
tal so moment “scûr”  
prime che il soreli dal  
so *dies natalis* al deven-  
tâs *solis invictus*. Il lavôr  
fis al jere però chel di  
governâ lis bestiis, la sere e la matine. E ta la stale po, dopo  
cene, si davin dongje chei da la famee; cualchi om al profitave  
par lâ ta l’ostarie a bati carton. Il rest da la famee a stavin tal clip,  
ma a cjatavin simpri alc di fâ. Lis feminis a pensavin a dâ cualchi  
pont a cjalcins sbûs, a guggjâ un pâr di cjalcis e po dopo metilis  
tal zeî di guggje, chel di venc blanc. E jere l’ocasion pai fantats di  
presentâsi cun cualchi scuse e “morosâ” la fantate, atentons a  
la mame che ju tignive di voli! No jerin poltronis in chel “salot”:  
i fantats sentâts suntune bale di stran, il pai sul bredul par molzi  
e la mame suntune cjadree di stale. Lis vacjis a soflavin calôr e  
cualchidune za si jere poiade a “pisulâ”. Il frut, s’al veve finît i  
compits, dopo che il barbe i veve insegnât, al provave ancje lui a  
creâsi i siei zugatuluts fats cu la cjane da la blave. Il pai al proio-  
deve pai zeis e al cirive di dâur un “tai” artistic, alternant il venc  
blanc cun chel scûr; dongje si tignive i siei imprescj par la vore:  
fuarfis di vît, tanais, fil di fier, un martiel.



**Gotart Mitri**

## La scrassule

**C**o vevi cuatri o sinc ains, la scrassule a ere par me une da li' ro-bis pì bielis dal mont, e i provevi invidie par chei frus ch'an vevin dôs... e no si podeve comprâlis: a erin robis fatis in ciasse ma miò pari nol saveve come fâ. I domandai alore a un veciu dal paîs, e lui mi disè ch'a nol ere bon di lavorâ il len, ma al podeve fâmi une scrassule di ciane gargane! La joibe sante, a la funsion da la sere, i ài spetât cun grande emosion il moment, e

co 'l plevan al disè ch'a si podeve sunâ, i ài tacât a fâ zirâ il "strument", ma il mani al è vignût fôr e la rode e la scrassule a son la-dis ator pal salîsu... Mi soi recuardât dal faliment da la mê prime scrassolade cialant la fotografie di Giuliano Borghesan, muart ai 28 di Setembar dal '19: ta la prime metât dai ains Sincuant al veve ritrat cun grande "pietas" il Friûl da la mê infanzie. Lu onorin cun chiste pissule antologie.



*Tamburins a Erto  
(foto Giuliano Borghesan)*

**Gianfranco Ellero**  
*Furlan di Frofean*

## Cjale ce câs

**E**jere la Vierte dal 1990. Jo o jeri nassude di un an. In chê biele zornade gno pari, cuinçant lis vîts tal vignâl daûr de cjase de none, al olmà une plantute di cocolâr di un an, cressude propit sot di une vît. Al crodè che une cocule e fos colade dal bec di une çore cjatant bon stâ in chê buine tiere. Alore cu la pale le gjavà fûr e le pastanà dongje dal muret de cjase, là che e varès podût cressi miôr in libertât. Tornant a cjase, i contà la biele scuvierte a mê mari e cussì a deciderin chechel cocolâr al sarès stât il gno arbul.

Daspò cuatri primeveris al capità un fat compagn. Mê sôr e nas-sè d'Unvier e gno pari, daspò un an, spedant lis vîts, al cucà tal vignâl un vuisinâr di un an, nassût tal stes puest dal gno cocolâr. Aromai sigûr sul ce fâ, lu pastanà a man drete dal gno arbul e tornant a cjase nus contà la maravee.

Plui il timp al passave plui si podevin viodi someancis: il gno cocolâr al veve tancj voi su la scusse e jo o jeri une osservadore atente, il vuisinâr cul aiar tra lis fueis al someave che al sunàs une musiche, come mê sôr cul so strument.

Lis lôr pomis, invezit, a contavin cemût che nô o sin: jo cul mût di fâ cualchi volte ruspi come la scusse des coculis, dentri o plati un câr tenar e bon, mê sôr, dolce e di biele maniere, e plate un caratar fuart come lis sepi des cjariesis.

**Anna Podrecca**

*Cors pratic di lenghe furlane di Cividât*

## I cjapons

**L**a Maria Petovela a era 'na femenona, almancul cussì a mi pareva cuant ch'i eri piçul. Simpri vistida di neri. I vevi vût il mout di cognossila da vissin 'na volta ch'i mi eri slogât un pols. Ma la Maria i la cognossevi encja par altri. A vigneva a cjasa nu-stra a fassi gussâ un curtissut da me nonu cun la muela di piera. 'Na matina, la Maria insiemit a me nona, me mari e me agna, a veva ingrumât un biel grun di polàs e, sintadis in tont cu 'na cjan-dela impiada tant ch'a someava ch'a disessin rosari, ju cjapavin un par un e dopo puc ju molavin ch'a someavin instupidîts. Par nualtris fioi a no erin robis da vuardâ, cussì ni fasevin stâ lontan. Ma propit in chei dîs da la slogadura i vevi sintût la nona dîghi a li' feminis che i gjai a vevin fât la pluma e ch'a era ora di fâ i cjapons. I vevi provât a domandâghi a me mari e encja a me agna Anzuluta se ch'a erin i cjapons. Mi vevin dita che a erin chei gjai ch'a vignevin grainç e gros parsè ch'a mangjavin tant. Ma allora se coventavia clamâ la Maria, bastava che la nona ai des di mangjâ di pi e basta.

Cussì, 'na matina a è rivada la Maria cu 'na scjatuluta di lata dulà ch'a veva i impresç ch'a ghi coventavin. Subit à dât il curtissut al nonu par gussâlu. Intant la nona e me agna a vevin sierât i polàs ta un stali.

Coma chê altra volta, sintadis in tont e 'na cjandela impiada, li' cuatri feminis a àn tacât a cjapâ i polàs un a la volta e dopo vêighi incrosât li' alis sora la schena e leadis li' satis cu 'na cordela, me nona ju tigneva tal grin cul cul par aria. La Maria intant a veva vierzût la scjatula dai impresç. Dentri al era un spagnolet di



fil blanc, un par di fuarfis, un tapon di sùr cun tanti' gusielis im-  
piradis, 'na butiliuta di roba scura ch'a podeva essi tintura e altri  
fiers. L'agna Anzuluta a spelotava la bestia dulà ch'a coventava e  
me mari la onseva cun la tintura. La Maria intant a veva metût i  
ocjâi e, passât il curtissut ta la flama da la cjandela, a faseva un  
tai vissin dal cûl dal polàs. Cun maestria a meteva dentri un deit  
dulà ch'a veva taiât e a tirava four 'na roba ch'a someava un bu-  
gjel. Me mari svelta cun 'na glain di fil di chel blanc a leava strent  
chel bugjel che dopo a taiavin cun li' fuarfis. Me agna intant a  
veva preparât 'na gusiela cul fil ch'al coventava a la Maria par  
cusî il tai dal polàs. Dopo cusî e dusinfetât cun la tintura, la pora  
bestia, che intant a veva continuât a lagnâssi, la molavin ta un  
serai preparât doma par lour. Eco parsè che, cuant ch'a ju mola-  
vin, a someavin instupidîts. Duncja, la Maria no era soul buna di  
indressâ slogaduris, a era encja un *chirurgo* e par chel a vigne-  
va a fassi gussâ il curtissut.

I vevi finalmentri capît che ai polàs, par doventâ cjapons, bisu-  
gnava gjavâghi un toc di bugjel. Me cusin a mi a spiegât miei.  
Nol era un bugjel chel ch'a gjavavin, al era il sesso. Difati, chê'  
bestiis a pensavin soul a mangjâ e ingrassâ e no vevin nissuna  
matitât cun li' gjalinis.

**Adriano Mariutti**

*Furlan di Cjasteons di Sopula*

## Fido

**L**a ostarie di Tin e je un sîl là che si va sì a bevi un taiut di blanc dal Collio, ma soledut a baratâ cuatri cjacaris e a cja-pâ cognossince dai peçots dal paîs.

Li si tarize il prossim che nol è presint, si da fûr plans di publiche economie che o podêns imaginâ di ce nivel, co a son dâts fûr di Bepo Stradin, in contrast cun Pieri Cuartut, che al è clamât cussì pal so esagjerât amôr pal “Succo d’uva” come che al use a clamâlu lui, il vin.

Ben, vuê a tignî banc a di un di chei inteligjents discors al jere propit Tin, il paron de ostarie.

Al jere inrabiât neri tant che une ruie co si le sticie cuntun fros: nol rivave a paidî il fat che i vessin metût la tasse sul cjan.

Si à di savê che il cjanut di Tin al è un bastardut che, se si volès lâ a cirî la sô divignince, bisugnarès tamesâlu par vignî a clâr di dutis lis semencis che lu àn gjenerât: lis orelis a pararessin chês di un Setter, la code bionde e spiumose chê di un Volpin, il pêl batût di un cjan di seguit e il colôr moron scussât di une pantia-ne viele. Paraltro chest campion des misturis, stant a ce che al conte il so paron, che al à par lui un afiet spropositât, al è di une intelligence grandeose.

Ben, vuê Tin al jere in bestie par vie che il cursôr dal Cumun i veve puartât la cjarte che i imponeve di paiâ la tasse sul so Fido. “Ma isal mai pussibil che a un i tocji di paiâ une tasse par une besteute che no fâs dam, no incuine, no sporcje, par vie che jo le ten tal gno curtîl, e mangje dal gno, no vîf cul redit di citadinance, no tire disocupazion, no à assegnis di famee e mi fâs

compagnie? Ce ur interessial a di chei cuatri scjalde bancs dal Cumun se jo i miei vanzums, impen di butâju vie, ju doi al cjan, sparagnant ancje su la spese de racuelte des scovacis?”.

“Ma – i rispuint jo – tu âs di capî ancje lis esigjencis dal Cumun. In curt a saran lis elezions e par indolcî il popul il sindic al varà di fâ cualchi miorament, ca e là e i coventarà cualchi francut in plui, e no podint tassâ chei che no àn nie, al met une tasse sul redit o sui lus dai citadins”.

“Parcè, secont te, saressial un redit il gno Fido?”.

“No di sigûr, ma ben un lus: di cjace nol è, di vuardie nancje, di difese mancul che mancul; al è, tu âs di convignî ancje tu, une besteute inutile, e par tant considerade un lus e alore sogjete a la tasse”.

“Sint po fantat – al de sù Tin dut invelegnât – se il gno cjanut daûr i calcui dal Cumun al è tassât trente euros par vie che al è inutil, il fi dal nadâr Melot, che al è dibot trent’agns che al va a scuele cence nissune risulte e a spesis di so pari e de societât che i da un puest a scuele, che no ’nd è nancje avonde par chei brâfs, cetant varessial di paiâ di tasse?”.

Jo no savevi nancje dâi tuart, e alore o provai a bonâlu cuntune rispueste butade sul ridi: “Ma, Tin, ce vûstu che ti disi, vadî a varan pensât che a vê un coçon in cjase al è za piês di une tasse!”.

**Roberto Ongaro**

## 'Na pescjada tal lâc inglassât

**S**e no mi crodeis, allora domandaighi s'a è vera ai me amigus di Cusan Bruno Turrin e Mario Moras. In Ontario di lâcs and'è tancj, basta sielzi, ma i lours amigus Remigio e Mario Fenos a vevin fat, sul *Lake Simcoe*, 'na biela baraca, cu li' so' bancjis e la stua a *propano* par parassi dal freit. "Al basta puoc par inglassate le... vorele" al ghi à dita Remigio. Par nualtris da Sopula, chi stin par de ca da la Selina, da simpri i cognossìn la fama dai folpus di Cordenons: a son simpri stâs grancj cjassadours e pescjadours e cuant ch'a son rivâs in Canada àn cjatât il paradîs par cjassâ e pescjâ. Ma encja Moras, ch'al veva la Lonca ch'a passava propiu vissin dal cjamp di so pari, al è simpri stât un brau pescjadour. So mari a si danava: "No sta andar de bessol che te son massa picol", a ghi sigava davori, ma lui al scjampava apena fou di scuola e no ti lu iodevis pi fin a ora di sena. A ven il dì che i Fenos a decidin cun Moras di zîa pescjâ tal lâc inglassât. Cuant che Bruno Turrin al è vignût a saveilu, al à dita: "Vegni encja mi, voi provâ almancu 'na volta ta la vita". Cussì un viners di sera, a cjasa di Mario Fenos, a si metin d'acordu, e bel ch'a stan preparant dut l'armamentari, la siora Gloria (coga cu la C granda), coma par augurâghi buna fortuna, a ghi à dita: "Tornait cu 'na biela truta che jo vi la cuoi daurman". Intant Remigio al telefono al veva patuît cun so fradi Mario, che l'indoman mattina al veva un impegnû, ch'al sarès rivât lassù prin di misdì. Cussì a li' siet a bunora di 'na domenica plena di soreli ingrisulît tal Fevrâr dal 1991, i tre amigus a son belzâ su la riva dal lâc inglassât. A si vevin ben infagotâs cun maions e giachetons, ma Fenos la prima roba ch'al à fât apena

dentri ta la baraca al à impiât la stua a propano; intant Turrin, encja par dâ coragiu a duta la cumbricula, cu la bossa da la sgna-pa al à tirât four un *ciket* (cussì lu clamin il bicerin i canadeis). Il Moras, bramous coma chi vevi dita, intant ch'al si deva da fâ cu la cjana da pescja al si lagnava cun Mario Fenos che secont lui il bûs ta la glas al ghi pareva pissul. "Al è vinç centimetri di diametro, tu pensa a pescjâ". Intant a son vignudis li' deis: ora di tirâ four pan, formai, salât e encja un tai di blanc. Moras, simpri cul vuli su la so cjana, nol veva nencja finit l'ultin bocon cuant che la cjana a taca a balâ: svelt al taca a zirâ il mulignel e dopo sinc minûs di tira e mola a ven four dal bus 'na truta che Fenos al sentensia: "Chista de sigûr a pesa doi chili". Ma no si sa coma, fra la contentessa e il movissi svelt par tirâ sù la bestia, fato sta che il telefonin di Moras al è colât dentri tal bûs. "Cjara la me truta", al si lagnava Moras. "Mancu mal che il bûs al era pissul", al diseva Fenos par toilu pal cûl. "Ti schersis tu, ma chel telefono li al mi costa votsentesincuenta dolars, comprât doma da dôs setemanis". Al era un dai prins vignûs four, di chei cun stropul di antenna e il scarnûssul di piel. Disgustâs da chel ch'al era sucedût, àn sierât baraca e barachin e son tornâs a cjasa. Intant, coma d'acordu, viers misdì al riva Remigio, e nol cjata nissun, ma dato ch'al era li encja lui, al met sù la cjana da pescja. Duta un moment, il lamp al si veva rimpinât su cualchi cjussa. "Ma se elu che nol se mouf coma un pes?" al pensa. Tira e tira, invessi di un pes al a tirât sù un telefono! Al decît di clamâ a cjasa di so fradi e a rispunt sô cugnada Gloria ch'a veva belzâ la truta ta la tecja. Dopo vei scoltât il fat, Remigio al ghi dîs: "Dighi a Moras che se il telefono al è neri e al à 'na piciula antenna, propiu adès lu ai pescjât jo!"

**Alberto De Rosa**

*Toronto (Canada) - Furlan di Sopula*

tñ nō lum' ita prudente  
ucit eō h̄ affectū impellim



**C**hest splendit Cierf rampant, che al à cun se la pe-  
raule di rclam "socii", al à picjâr tal cuel il simbul dal  
patriarcje Antoni Panciera. Animâl cjapât tant che  
segnâl cristologjic di rinassite e di resuriment, al è  
un riferiment stralusint a la santitât dal om di gle-  
sie menaçât de tristerie dai siei nemis.

# FEVRÂR

	1	S	S.te Brigjide di Irlande badesse		
	2	D	Presentazion dal Signôr	Madone Cereole	☾
6	3	L	S. Blâs vescul e martar		
	4	M	S. Gjilbert abât e Simon il vieli		
	5	M	S.te Aghite vergjine e martare		
	6	J	SS. Martars gjaponês		
	7	V	S. Ricart re de Inghiltere		
	8	S	S. Jaroni Emiliani predi		
	9	D	S.te Polonie vergjine		◯
7	10	L	S.te Scolastiche vergjine		
	11	M	Madone di Lourdes	Zornade dal malât	
	12	M	S.te Lalie martare		
	13	J	SS. Foscje e Maure		
	14	V	SS. Ciril e Metodi patrons d'Europe- S. Valantin martar		
	15	S	S. Faustin vescul		☾
	16	D	S.te Juliane vergjine		
8	17	L	SS. Martars di Concuardie		
	18	M	S. Simeon vescul		
	19	M	S. Conrât rimit		
	20	J	S. Zenobi martar	Joibe grasse	
	21	V	S.te Nore regjine		
	22	S	Catedre di S. Pieri		
	23	D	S. Livi martar		●
9	24	L	S. Sergjo di Cesaree martar		
	25	M	S. Cesari martar	Ultin di Carnevâl	
	26	M	S. Sandri di Alessandrie vescul	La Cinise	
	27	J	SS. Basili e Procopi		
	28	V	S. Roman abât		
	29	S	S. Gust Chapdelaine martar		

## L'Argagn da Vît

**A**l si clamave Gio.Batta Pasqualis, ma ducj ai lu conosceve come l'Argagn da Vît. Titute, come siò pari Tite, al ere un mestri tal cuinçâ vues, dreçâ cjadiles e conoles, meti in dret pi-cjecjaces<sup>1</sup>. Codarôl di siet fradis, al varès vût da zî pridi, ma al veve dute altre vocazion, chê da curâ e vuarî fedes e cjares, cjans e gjalines, nemâi e cristians. Al veve imparât dut da bessûel. Las mans ai veve come un eletric, dulà che ai tocjave ai vuarive. Ai diseve che Titute al faseve i ragjos cui piçs<sup>2</sup>. Al ere un mago. Intal siò ambulatori, che al ere ta la loze dal patûs in bande da la stale, al ere dut un corêir di int. Ducj chei che ai veve alc da dreçâ ai zeve a metisi ta las sôs mans. Sentât su la siele da molzi o su un scjalin dal taulât, dopo vîe fat... i ragjos, al smulisi-tave bel planc la gnervidure cu la sonze<sup>3</sup>, po, cidin cidin, al deve un tiron di chei, a si sintive une cainade... e dut al tornave a puest. Alore al on-zeve la conole o la cjadile cul larian, la pîes dai laris, che al zeve a toli ogni an in Cjargne



*Clapadorie un grum fruiade  
da talmides e scarpets*

<sup>1</sup> clavicole

<sup>2</sup> dita

<sup>3</sup> sugna



cuant che al puartave las vacjes in Malins. Su la macolade al me-  
teve encje, secont il câs, un panzel<sup>4</sup> di cjanaipe cul blanc d'ouf  
sbaziât tun cjadin. Par meti in dret il picjecjaces al usave poâ  
un glimuç di lane sot la spadole par tignî a larc il braç. Cussì al  
veve vuarît il Beloç di Celant e Bruno Bele, il marcantin di fedes  
det *Mangiafuoco* par vie che al veve las cees come une linde di  
stali, e la Madalene dal Boâr che, rivade dute plete e dulinçose,  
a tornà a cjase cuntun cos di rube lavade tal ru di Lavandarie.  
Insome, Titute, par savîe cussì ben... argagnâ su gnerfs e vues, al  
ere cetant inomenât e benvolût e al no domandave mai bêçs, al  
pi al acetave un tai o une prese di tabac.

Ma ben si sa che la int a è invidiose e maldicent. La nuvitât da  
las sôs vuarigjons... meracoloses a rivà encje a San Danîel. I mie-  
dis, cetants devots a dio palanche, alarmâts ai lu denunziâr par  
*“esercizio abusivo della professione”*. Ma, curiûes encje da vidîe  
cetant brâf che al ere chest biât analfabet di midisine, ai lu faser  
clamâ dai carabinêrs tal ospedâl. A front di un scarsanali<sup>5</sup> dut  
scomponût suntun tavoloç, ai lu invidâr a rimeti a puest ducj i  
vues. Ma chei galups<sup>6</sup> di dotorons, par cjapâlu pal cûl, ai veve mi-  
tût framieç un vues di purcel! L'Argagn al si fasè dongje, al cjalà  
dut benon e intun marilamp al metè adun il scarsanali, lassant di  
stuc i dotorons. E tignint in man il vues... restât, a i disè al miedi  
che a i steve pi dongje: “E chest, siôr dutûer, ch'al lu puarti pûr a  
la sô femine par fâ la mignestre”.

**Gianni Colledani**

*Furlan di Clausêet*

---

<sup>4</sup> pennecchio

<sup>5</sup> scheletro

<sup>6</sup> furbacchioni

## Il viaç dal lengaç

**P**lui di trente agns indaûr a Feagne no jere int foreste e, a cjase come ator pal paîs, si fevelave nome par furlan. Jo no cognossevi il talian: il furlan e je la mê lenghe mari. A scuele la mestre e fevelave nome par talian e jo mica o capivi dut! O misturavi furlan e talian e mi visi ancjemò trop di brut che mi à cjalade la mestre cuant che i ai dite che la aghe e jere *clipa*! Mi sintivi divierse e in pôc timp o ai scomençât a fevelâ nome par talian ancje a cjase. Propite a cjase, però, no acetavin chest cambiament e a àn scomençât a domandâsi il parcè che no cjararavi plui par furlan. Ancje gno cusin, pre Giulio, plevan che al dîs messe nome par furlan, mi diseve che o vevi di fevelâ par furlan parcè che e jere la mê lenghe; al jere insistent, talmentri insistent che cuant che lu sintivi a rivâ, mi platavi te cjamare. A scuele no mi cjalavin di bon voli e par me al jere come se o ves fat alc di sbaliât. Tes elementârs o ai cognossude une frute che e fevelave par furlan; o sin diventadis amiis e o ai tornât a fevelâ un pôc di furlan cun jê, ma a cjase no rivavi. Une dì al è rivât in cjase pre Giulio e mi à dit che se o volevi fevelâ par talian par lui al leve ben istès e che nol varès plui insi-stût, ma di visâmi che la mê lenghe e restave chê furlane. Planc plancut o ai rivât a capî che o vevi di jessi me stesse e o ai tornât a fevelâ la mê lenghe. O ai decidût di fâ un cors di furlan e li mi soi rindude cont ancjemò di plui che o soi leade a cheste lenghe. Cumò o soi braurose di podê fevelâ par furlan, parcè che o sai che chel lengaç dai puars mi rapresente di plui e mi vise di indulà che o soi e ce che o vuei jessi tal gno viaç.

**Serena Lizzi**

*Cors pratic di lenghe furlane di Tavagnà*

## Mai avonde

C'o se vent un teren de ciamp, l'aventour al à diritu da fâ do' sieltis: tuoilu a cuarp o a misura. S'al siels a misura, bisogna clamâ un tenicu par ch'al meti i cunfins in regula. Al pous sussedi che cualchidun, arandu, al aipi al vissiu da roseâ sui terens dei cunfinans, fin a rivâ, un puoc a la uolta, a scunfinâ de cualchi metru. A no lu fan pal bisui, ma... par ingurdisia o noma pal gust da fâlu. Chistu a i veva sussedût ancia a gno missier cuant ch'al veva vendût al siò ciamp in Ciarandis. Tuoltis li' misuris, a se veva ciatât cun cualchi metru in dentra si che, multiplicant pa' la lungiessa, l'aventour al varès piardût 250 metri cuadris. Par meti a postu i cunfins e rivâ al prin ch'al veva scunfinât, al tenicu al à duvût misurâ, in progression, i terens de cuatri proprietarius. Un contadin del paeis, paron de tanta tiara, al era famous pa' stu vissiu. Dal restu, al era un bon on, amât e stimât da dus pa' li' so' buni' cualitâts, ch'a erin cussì tantis da cuiarsi benon al siò difetu. Coma ch'al è al distin de dus, ancia par lui, dal ciampanili a i à rivât l'ultin bot. Parins, amigus e paesans de ugni fata a vevin inplinît la glesia; al plevan po', ta la predica, a no se veva sparagnât. Finida la messa, al furnerâl al à cuntinuât, in lungia fila, fin in simiteriu. A la fin de li' recuiis, a à vût seguitu la sepultura. 'Pena che la zent a se à muot par zî four, un on, che par cunfin al veva pi de cualchi ciamp, cun dut rispiet a se à vissinât al spissighin, che cu la pala al steva scuminsiant a butâ sù tiara e ta 'na vorela, cu' un fîl de vous a i à dita: "Buta, buta, che cuant ch'al era in vita a no 'nd'aveva mai avonde.

**Adriano Turrin**

*Furlan di Cordenons*

## Siôr Bepo

**S**iôr Bepo, siôr par vie che al veve studiât un pôc (no masse), e di sigûr no di sachete, par onôr dal so paîs, al faseve il poete. Cuatri peraulis in crôs, ditis cun sintiment, no mancjavin mai cuant che al jere di fâ ridi o ben par comovi e fâ vaî. Si meteve in pose, al sclarive la vôs e al tacave la sô liriche, plui o mancûl simpri la stesse, fossie di cjantâ la patrie o pûr i nuviçs, il muart o il frut batiât. Al jere vistût simpri di fieste, parcè che tal so calendari personâl no esistevin i dîs di vore, e la elegance e jere dut. Cjapiel, gjacute e golaine, scarpis di vernîs, al cjaminave cun dignitât tal mieç de int malvistude. Il so fuart al jere ancje la educazion, dulà che al podeve fâ scuele cui siei mûts rispietôs e lis peraulis ricercjadis. La poesie miôr sflorive inte ostarie e, se al coventave, ancje tal curtîl de ostarie, tal cûr de gnot cuant che dome pôcs a podevin gjoldi de sô miôr vene.

Di siôr Bepo la int e ricuarde soledut une poesie, chê de moscje e de furmie, destinade a passâ inte storie paisane par vê stufât trê gjenerazions. Se propit no si voleve sintî la repliche, il poete al veve simpri une di risierve: chê dal gjat e de surîs.

In chei agns al bastave pôc par vuadagnâ il favôr dai paisans, convints di vê une glorie in cjase, almancûl une. Siôr Bepo, al contrari di altris, al jere un dai rârs profetis in patrie, tant al è vêr che, cuant che chei fûr di paîs, cence cognossilu, a pensavin che al fos un pote, ducj lu difindevin: al è un poete e si rispiete. E pazience se, par ringraziament, a varessin sintude di gnûf chê dal mus di Jacum, il *mio capolavoro*.

**Roberto Tirelli**

## Mi soi insumiàt

*“Mi soj insumiàt di mangià ùa,  
un grignèl par volta,  
da un rap verdulìn e plomp...”*

**(P.P. Pasolini)**

*Mi soi insumiàt di mans neris  
ch’a distacâvin raps blancs di ùa,  
di fruts orientài ch’a zuiàvin a fâ la vuera  
in font a la sgiavina, e a sclissavin i rajs  
platàts tai bàmbui e lis fuois  
Mi soi insumiàt di mans blancis di soreli  
ch’a caressavin il vuolt dai gargnei  
neris di savòur, prin ch’a scopiàssin  
di vin dols e di langòur  
Mi à sveàt la bunora inmusonida:  
cul deit ch’al trimava a mi mostrava  
lis robis a ponta ch’a sbusàvin  
il telon dal dì.*

**Giacomo Vit**

*Furlan di Bagnarole*

*1<sup>a</sup> premi ex aequo al “Premi Noax / Navuàcs”, Cuar di Rosacis 2019*

## Il probarbe Vitôr

**L**e Gracie dai Nânis, racolanese, classe 1907, a le contave cun grande luciditât e cun tancj particolârs ducj i avveniments ch'ai erin sucedûts a Sclûse da le prime vuere mondiâl fin al 2000, cuant ch'a l'è vignude a mancjâ.

Al ere un grum interessant sintîle sui fats ch'ai vevin segnât le sô lungje esistence, che dopodut a no erin tant diferents di chei di ducj i paisans. A si impensave ancje di ce ch'ai vevin contât i siei vons. Come chest fat, sucedût al so probarbe Vitôr viers le fin dal Votcent.

Vitôr al veve pouc pui di vincj agns cuant ch'a si ere inamorât di un bieie zovine racolanese, le Malie. Ma nol ere l'unic morous: le fantate a le plaseve ancje a atris zovins! Chescj, di gnot, ai vignivin da le' borgadis vizinis, cualchidun ancje passant a pît le Fele, a si svizinavin a le cjase da le Malie, ai spietavin che il Vitôr al jessis par dopo cjàpâ il so puest. Al ere vignût il moment, però, che il Vitôr al veve scuvierzût dut. Sustât, al veve demolît il mûr dal so ort e vie pa le gnot al veve doprât le' piêris par stropâ le puarte di cjase da le Malie. Date sù l'ultime cjace di malte, a lavôr finît e prime ch'al jevâs il soreli, il Vitôr al ere partît par cjeris stranieri: prime in Svizare e dopo inta Ungjariis. Al ere tornât tal 1932, dopo cuarantedoi agns di aventuris e peregrinazions e par cheste sô lungje assence dal paîs al ere stât nominât "re dai emigrants".

**Antonino Danelutto**  
*Furlan di Scluse*

*La bolp a Lignan  
(foto Dario Quattrin)*



## Il restaur des botis

Lis botis, in len di rôl, a àn su lis testadis (cm. 235x195) dai disens, fats cu lis temparis e/o colôrs acrilics, dâts sù pal plui diramentri su di un supuart di len cence doprâ un strât preparatori. Il stât di conservazion de piture al jere une vore comprometût des condizions ambientâls, che a vevin puartât a la formazion di mufis, cun maglis blancjis e neris che a mudavin il plan de piture. Lis analisis di laboratori a àn classificât i nivei dal esemplâr di mufe plui presint (*Penicillium Corylophilum*) e duncje individuât il tratament plui adat. La pulidure des policromiis e je stade realizade doprant une misture di solvents a base di aghe, metude sù in mût di vê une azion detergjente sul plan. Là che la policromie e jere tant ruvinade, si à realizade une reintegrazion pitoriche a veladure o a “tratinament” par restituî unitât ae imagjin. Chest restaur al è il prin câs in Italie fat su botis che a vegnin ancjemò dopradis intes cantinis.



*Giovanni Cavazzon  
cu la restauradore Alessandra  
Bressan, e sul fonts la bote,  
metude cumò te sale riunions*

**Alessandra Bressan e Gabriella Bucco**



## Il riu da li' striis

Cuant ch'al ere la Madone di Lourdes, tante int di Ovedàs la lave a Lavoreit, parcè che là vie ai fasevin fieste. Di bu-nore a si lave a messe e dopomisdì a rosari e a gjespui. Ma si veve di stâ atents a no tardâsi a tornâ a cjase cul scûr, parcè ch'a si veve di passâ un riu, tra il riu Sec e il riu Mulin, ch'al faseve poure. Infati ai contavin che agns prime dôs feminis, finide la fieste, a li tornavin a Ovedàs, ch'al steve vignint scûr. Cuant ch'ai erin rivadis dongje chel riu, a li àn sintût come se cualchedun al metès li' mans ta lôr sportis. Si son fermadis e a àn vedût colâ abàs li' cjandelis benedidis che, par usance, ognun al comprave e al portave a cjase. A li àn sintudis a urlâ e a zigâ, intant che li' cjandelis a li sparivin. Al àn cjàpât tante di chê poure ch'a son scjampadis di corse a cjase. E d'in chê volte ai àn clamât chel riu "il riu da li' striis".

**Andreina Bulfon**

*Furlan di Mueç*

**È à tucât ae puarte la pôre  
al è lâ t a vierzi il coragjo  
e nol à cjàtât nissun.**

*Martin Luther King*

## UN ARGISTO DAL GRAN CÔR

### Copâ il purcit

**I**ntune zornade di frêt e di buinore al rivave il purcitâr cu la sô sporte plene di imprescj par purcitâ. Za l'aghe e jere scuasit prone ta la cjaldere seondade di un bon fûc di fassinis che il nono al tignive ben vîf; in particolâr il nono al veve di tignî di voli la cjaldere cuant che al dislidge il gras, impuartant par la conservazion da la cjar. Da la bolidure dal gras a rivavin po lis *fricis*, *litis* te Basse: strîçadis par ben e crocantutis a jerin une gjonde pal palât, ma no pal colesterolo!

Dopo la sgnapute juste par scjaldâsi un tic, i aiutants dal purcitâr cu la fuarce a tiravin fûr il purcit dal cjôt, che nol voleve savênti di lassâ chest mont e al dave fûr di chei zigos di sturni anچه chei fruts che par l'ocasion a jerin justificâts di no lâ a scuele. A davin anچه lôr une man a taçâ lis crodiis sul çoc e, soledut, al jere il moment di alte "comicitât" dal purcitâr ch'al mandave il frut magari là dal plevan o di une siore ch'al saveve lui, a domandâur la misure dal "salam"! I fruts po a profitavin par fâsi dâ la bufule dal purcit che po le sglonfavin e a zuiavin cun jê di balon tant ch'ê jere resistant. Al è di dî che i prins fobai in Inghiltere a vevin propit dentri dal corean cusît intor une bufule di purcit!

Al jere un grant lavorâ ator dal taulaç dulà che si taiavin lis parts: chês pai presuts, chês pai salams, chês pai sanganei, chês dai sotgoi e v.i. Un biel cefâ anچه par lis feminis a lavâ e netâ i bu-diei di doprâ pai salâts. E dopo finît, a jerin di netâ i imprescj, il pavement da la stanzie ben onts. Zornade fatureose, ma anچه di ligrie e sodisfazion par vie che si rivave in chê zornade a jemplâ la cantine cu la robe purcine ch'ê veve di durâ par cetancj mês.



Il camarin al podeve fâ alore un figuron cun dut chel ben di Diu!  
Tant lavôr, tancj savôrs: di un bon tai, di chel neri e di chel blanc,  
ma soledut cu lis bistecutis fatis sul spolert, che bastave une  
buine cisade par podê finî in bocje cuntun savôr che no si po  
dismenteâ... Savôr che nol veve di mancjâ tai salams e luianiis e  
ve alore ch’a coventavin pevar, sâl e cualchi dint di ai.  
I doi fruts a savevin ben che tal indoman a vevin di presentâsi li  
da la mestre cu la justificazion juste: une bieles luanie!<sup>1</sup>

**Gotart Mitri**

<sup>1</sup> Tiermin rivât dal venit *luganega* ma ch’al va indaûr ai Romans, cuant che si intindeve un salât origjinari da la Lucanie. Une testimoniance le vin di Varrone, che ta la sô *De Lingua Latina* (v. 22, 111) nus conte: “una salsiccia fatta con l’intestino crasso del maiale è chiamata lucanica, perché i soldati l’hanno imparata a fare dai Lucani.”

## La liberasion

**P**rin di Mai dal 1945, undis di matine a Frofean. “A rivin, a rivin” al sighe un on in biciclete davanti da la mê ciase, cialant viars la colone inglêse che plan plan a vignive in sù da la plasse. Li’ feminis dal Bando a tachin a teâ flôrs pai liberadôrs, e la Dine, une fantassine ch’a deve une man in ciase mê, a no rive a ciatâ la bandiere taliane. “Alore – a dîs mê mari – ciape tre stras, un vert, un blanc e un ros, ti ju lèis ta un baston cul filistrin e ti vens sul punt”. Dine a ciape sù il telo vert ch’al cuiarseve la radio (une raritât in paîs), il golf ros di mê mari poât su une ciadree, e a tire jù dal filistrin tirât tal curtîl une fassadure blance (bagnade e un pûc zalute) di miò fradi Gabriele (cuatri mêis): a ju lee sun tun forciàs e a cor sul punt da la roe, juste in timp par saludâ un inglês che, da la sinture in su, al steve fôr da la prime machine blindade. La Dine a tache a svintulâ chê “bandiere” e imboressade a vòl ch’a la bussi. Ai sbat alore in muse propit il colôr blanc: i recuardi encemò il “splas” e i voi di chel zovin che, lecant i lavris, al à di vê pensât che chel nol veve di jessi il savôr dal Tocai.



*La floriste (foto Giuliano Borghesan)*

## Bruno Badilin

Ularès fevelâ di Bruno, di Sarvignan, clas dal '29, ch'al veva una oficina di vetreria e al veva sovranon *Badilin*. Finuda la seconda vuera mondiâl, Bruno, cjapât da ideologjia, al à pensât di lâ ta alora Jugoslavia di Tito, par dâ una man fuarta al moviment socialist che al someava al Paradîs. Subita si à acuart che nol era cussì e al è tornât indaûr, di bon, parsè che al à riscjât di finîlis a Goli Otok, cjamp di rieducazion sot Tito. Al à partât però a cjasa la femina Maria, di gjinia croata, cognossuda là; cuant che a la cjatavi par il paîs, la saludavi e fevelavi cualchi paraula cun jê e a fevelava al furlan miôr di me. Bruno al è tornât a fâ al mistîr di vetrari e al à scomensât a interessâsi dai timps che a erin sot l'Austria, al è lât tai archivis statâi e dal vescul, publicant libris di storia che al à rabaltât se che si pensava in chel moment storic, al à partât documents che a mostravin che prima che vegni l'Italia, nô a no erin propria stupits, l'incontrari, a erin i talians i analfabets. Un ricuart personâl. Una volta un amic pugliês che al era pitôr di quadris al veva di bisugna di una curnîs: a sin lâts ta sô vetreria, al era cun altra int. E gi à domandati un spagnol al me amic, al me amic gi à diti sì, e in cambio ni mostrava la curnîs. "Eco – al à dit Bruno in sens bonari – se tu gi domandis alc a un talian, al ûl vê subita un plasê in cambio". Al polsa tal simitieri di Sarvignan, e tal placât da tomba al à fat scrivi ch'el murarà cuant ch'al vignarà dismenteât. Cun chist scrit a speri di vêlu tignût vîf ancjamò.

**Flavio Pellis**

*Cors pratic di lenghe furlane di Aquilee. Furlan di Flumisel*

## Lu gno gjat salvadi

**O**gni buinoro, cuant che intor siet i rivavi te gjavo di marmo, dulà che i lavoravi como cogo, i vedeve cori como uno sêto, in mieç dal bosc di peç e dano, un gjat grîs cul mussic gress e uno codo lungjo a vetos grîsios claros e scuros. E jero uno varietât di gjat salvadi un grum raro ch'ê vivevo e si riprodusevo in alto mont e dificilmente si svizinavo al om. Ce cu vanzavo da mangjâ dei operaris, crostos di polento e di formadi, i lu metevi difôr de legnero; l'indeman i cjatavi dut net!

Cul lâ dal timp, lu gjat al tacà a entrâ in cusino, encje se par naturo al ero salvadi. Sul plaçâl de gjavo al giravo enfro ju grancj blocs di marmo e svuelt a si tiravo dingjo lu riù a ceri surisins, vuarbos e cacu passer di mont.

D'invier la gjavo dal marmo e vignevo sierado parcè che las grandos neveados es cuviergevo dut. Tar chel cidinûor si vedevo ator cacu passer ingringinît pal frìot ch'al lavo a becotâ ca e là, lu cjavrôl cui cuars ch'al cerevo di gjavâ la scusso dei arboi par mangjâlo, l'ermelin ch'al vevo cambiât la mulduro e da maron al ero diventât blanc (nomo la ponto de codo e jero restado scuro) e parfin las çoros di alto mont ch'ê si ero sbassados par ceri da mangjâ.

Lu gno gjat a mi spietavo... I rivavi da cjaso su in Pirobec cui scîs da fondo e cul persac su la scheno; a no 'nd'ero anemo vivo, si sintivo nomo cori l'ago dal riù Sfleons. Mi fermavi a contemplâ ch'ê naturo incontaminado. Dopo i clamavi lu gno gjat e lui al saltavo fôr dal sô bosc, svuelt como uno sgjazio, e a mi fasevo las fiestos cu las sôs gnaularios. I poiavi da mangjâ sot un grant

peç e mi tornavi a inviâ a cjaso. Lu gjat a mi savatevo par un biel toc di strado. Saludentlu i disevi: “Torno indevôr tei tio lôcs!” e, gnulant como un salvadi, lui al sparivo tal bosc.

Par trio agns e jero durado chesto bielo amicizio cul gno gjat fedïol che simpri a mi spietavo, fin cuant che uno demenio di cjaço dal mîos di Ottobre un cjaçaduo dal paîs lu à copat cun tuno sclopetado. Pe sô bravuro al ero lât a vantâsi pes ostarios disint ch'al vevo copât un jever ch'al sameavo un gjat.

I lu ai insumiât ogni not par uno setemano: i lu vedevo soro uno çocato di dano como uno sentinelo, a spietâmi!

### ***Novella Del Fabbro***

*Furlan di For Davûatri*



*Disen di Annalisa Gasparotto*

## Cuan' chi Atile al è passât pa' li' nostri' bandis

**D**i Atile, cunussût ochi di nun come un personagju dai pi crudêi e sanguinâris da la storie, a si conossin une vore di contis e liendis. Parfin il siò cjavâl a si dîs chi dulà ch'al passeve no sarès pi crissût un fîl di arbe. Par no fevelâ dal siò tesoru, ch'al sarès soterât in ta ogni louc dal Friûl, cumprindût chel vissin l'antighe ancone di Sante Sabide di Frofean.

Di lui si conte encje chi, dopu vê distrut Aquilee, par zî viars Cuncuardie, al è passât pa' li' nostri' bandis, cuan' chi in lontananse al à vidût un païs e oli al à fat dut un rabalton, lassant intat pôc e nie, pa la cuâl il païs al à cjavât il non di Pocenie. Stesse sorte ai à capitât al païs dongje dulà chi al à lassât in peis un palàs sôl, da chest il païs al è stât clamât Palassôl, dulà ch'al esist encjemò vuest il palàs di Atile. Po al è zût di lunc un flun chi ore prisint si clame Stele e oli al à rot une rive che a tratignive l'aghe, inagânt il païs vissin ch'al è stât po clamât Rivarote.

Simpri zint indenant par chê strade, Atile al viôt un altri païs: "Encje ochi – al pense – i farai un stermini!".


Bisugne clarî che la înt di chiscju païs, apene ch'a sintive a dî ch'al riveve Atile cui sio' soldatas, a zeve a platâsi tai boscs; no cussî in ta chistu païs che Atile al steve par distrusi: une famee a à vulût restâ, pensant che Atile no fos propie cussî crudêl come chi a disevin. E cuan' chi i gjanissars di Atile a ju à cjavâts a ju à incjadenâts e menâts denant dal "flagellum Dei". Bisugne dî però che fra i components di chiste famee a jere une zovine une vore bieie, e Atile apene ch'a l'ha viudude al è restât fulminât da la sô belesse e ai à fat la proposte di sposâlu: in cambi al varès spa-



ragnât la vite ai gjenitôrs e lassât intat il paîs. La zovine, pur di salvâ gjenitôrs e il paîs, a à assetât, e alore Atile al à dit la famose detule: “In drio te lasso”. Par chistu fat il paîs al è stât clamât Driolasse-Durlasse. Come che Atile a savès za a fevelâ il talianot, al reste un misteri, ma si sa che li’ liendis no son la vere storie.

### **Benvenuto Castellarin**

*Furlan di Roncjis*



*Disen di Annalisa Gasparotto*

## Ce dal diau ano?

**L**e none, une volte rivade in France, e je lade a stâ no tant distant di sô sùr. Dopo, cuant che i frûts e son lâts ognidun pal so cont, il pai al leve a cjatâ un so cusin. Eco ce ch'al contave. Une sere, chest cusin al lasse il lavôr. Al sarà stât a arâ, che no sai. Distacâts i bûs, ju mene te stale. Dopo ur da un braç di stran ch'al are biel fresc. E duçî i doi e van a fâ un gîr, a viodi i cjamps e il vignâl. Cuant ch'e tornin, i bûs no àn mangjât nie.

Vie pal dì ai bûs si meteve i cos in mût che, biel lavorant, no stedin a mangjâ le blave, le vigne... ce ch'al è in bande de cumierie. Mi visi jo che i cos e jerin di fier, di filistrin. A 'nd'ere ancje di cuarde. Tantis voltis ancje jo o ài tacâts i bûs e ancje mitûts i cos. "Spiete che us doi un pôc di fen che lôr e àn miôr".

E dopo e van di chê altre bande, il cusin i fâs viodi le cantine. Bevûts un doi-trê tais, e tornin te stale prin di lâ a cene. E i bûs no àn mangjât nancje un fregul di fen.

"Spiete che cheste volte us an doi di chel bon".

E van a cene. Dopo cene, un gîr te stale come si fâs simpri.

"Malaie, nancje no lu àn cjercjât! Tâs tu che la sù a 'nd'ài di chel pi bon ancjemò. Lu tignivi di cont par Nadâl. Chel li o varès gust di mangjâlu ancje jo. Se no lu mangjin... guai!".

Biel durmint, cui sa ce ch'e varan pensât ducj i doi opûr ancje ducj i cuatri? Tal doman di matine, bevût il caffè e tornin te stale.

"Nie, no àn mangjât nie chei osteâts".

Alore al jentre intune rabie che Diu nus vuardi.

"Ju copi, ju copi!" e al va par cjapâ le forcje, "Po cjo", dissal il pai, "e àn i cos!".

Ancje chê e je sucedude te cjase dai cusins, cuant ch'ê jerin ancjemò in famee.

Cualchi timp dopo des vendemis chei oms e jerin in cantine a travasâ il vin, e vevin puartât fûr doi seglots di chel vin sporc ch'al stâ tai fonts des botis. Passe le agne e ti viôt i doi seglots. Cun chei propit di solit si puartave di bevi ai purcits. E vie jê, che are ancjemò in gjambe, a dâur di bevi ai purcits. Un moment dopo i purcits e tachin a berlâ, a sbavacjâ, a saltâ tal cjôt sù pes puartis e pai mûrs. Ducj e corin a viodi.

“Ma ce àno, ce àno chei purcits?”. E, cjò... e cjapin pôre.

Alore e van a clamâ il paron ch'al stave li dongje. No sai s'al veve studiât, ma al jere simpri ben mitût, vistût di fieste.

“Alore, ce àno?”.

“Nie, e son cjocs!”.

**Italo Scaravetti**

*Duran (France) - Furlan di Percût*



h patham p̄detm que oīn  
e affectōnis quā mltiplic



**E** je une maravee cheste Chimere che e à il riclam "nobis" su la cuesse: a volê dī i piēs vizis tant che la violence, la inicitât e la lussurie, imputâts al nemî Grivôr XII. La figure nus dīs che e je daûr a brincâ l'embleme dal Patriarcje, che al à il simbul de stele e il cjapiel di gardenâl.

# MARÇ

	<b>1 D</b>	S. Albin vescul	<i>I di Coresime</i>	
<b>10</b>	<b>2 L</b>	S. Cuint		☾
	<b>3 M</b>	S. Selmo di Cividât		
	<b>4 M</b>	S. Casimîr di Polonie princip		
	<b>5 J</b>	SS. Foca e Luzi		
	<b>6 V</b>	S.te Rose vergjine		
	<b>7 S</b>	SS. Perpetue e Felicite martaris		
	<b>8 D</b>	S. Zuan di Diu predi	<i>II di Coresime</i>	
<b>11</b>	<b>9 L</b>	S. Domeni Savio fantat		◯
	<b>10 M</b>	S. Simplici pape		
	<b>11 M</b>	S. Costantin re		
	<b>12 J</b>	B. Luîs Orion predi		
	<b>13 V</b>	S.te Cristine martare		
	<b>14 S</b>	S.te Mitilde regjine de Gjermanie		
	<b>15 D</b>	S.te Luise di Marillac vedue	<i>III di Coresime</i>	
<b>12</b>	<b>16 L</b>	SS. Elar e Tazian martars	<i>Patrons di Gurize e arcidiocesi</i>	☾
	<b>17 M</b>	S. Patrizi vescul		
	<b>18 M</b>	S. Ciril di Jerusalem vescul		
	<b>19 J</b>	S. Josef, spôs de Madone		
	<b>20 V</b>	S.te Sandre martare		
	<b>21 S</b>	S. Benedet abat		
	<b>22 D</b>	S. Benvignût vescul	<i>IV di Coresime</i>	
<b>13</b>	<b>23 L</b>	S. Turibi vescul		
	<b>24 M</b>	S. Romul martar		●
	<b>25 M</b>	Anunciazion dal Signôr		
	<b>26 J</b>	S. Manuêl martar		
	<b>27 V</b>	S.te Guste vergjine		
	<b>28 S</b>	S. Sist III pape		
	<b>29 D</b>	S. Firmin vescul	<i>V di Coresime</i>	
<b>14</b>	<b>30 L</b>	S. Secont martar		
	<b>31 M</b>	S. Beniamin martar		

## Cu la plume a s'ingrume

**S**ul finî dal '800 Luvigji Bascjere di Duminisie al ere paron a Venezie di une grande fabriche di furminants dulà che ai lavorave cuasi mil operaris. Une robone par chei timps. Cun rispiet al ere clamât da ducj *el re dei solfarini*. Al furnive di furminants no nome l'Italie ma encje la Grece e la Turchie. Bêçs come aghe. E cui bêçs dai furminants siôr Luvigji al... impià encje une grande fabriche di mæs, simpri a Venezie, une aziende vitivinicole a Lison e un alevament di ôcs a Meolo intune sô grande campagne a blave, forment e vacjes e soledut a prât, dulà che ai lavorave ben cuatri famees di fituâi. In chê volte i ôcs ai veve marcjât, ricercjâts par la cjar, pal gras e par la plume, cun dut che gno nono Zomarie, siò fatûer, a i repetès il det dai vecjus: "cu la plume a no s'ingrume". Cui prins di Mai dai païs dongje ai rivave i contadins a puartâ i ocuts. Gno nono al veve orden da comprâ nome chei di pelurie zale (che ai varès fate la plume blencje) e da scartâ i basolâts<sup>1</sup>. A sun di blave, di passonâ tai prâts e di svuatarâ<sup>2</sup> pai fossâi, i fituâi



*Barconele di une vecje stale tal borc*

<sup>1</sup> macchiati

<sup>2</sup> sguazzare

ai rivave a meti adun ogni an doi trops<sup>3</sup> di 400 ôcs l'un. In chest ai ere judâts da doi cjans scuelâts fats vignî a pueste da la France. Ma il grant lavûer al scuminçave su las vendemes. Bisugnave intamarâju<sup>4</sup> e prevedi a imboconâju di blave e di gnocs di farine. Par chest lavorut, no di fadië ma di responsabilitât (bisugnave stâ atents a no scjafoâ il nemâl mitint la plerute intal canâl sbaliât), ai vignive jù da Clausîet tantes garzones.

Cui prins frîets a partive la cjadene... di smontagjo. I becjârs ebreos dal ghet, impedîts da la lûer religjon da vendi cjar di purcel, ai vignive a toli las cuesses par fâ persut *kosher*. La piel e il gras ai vignive distrîts par tirâ fôr las frices e soledut un vueli cetant bon dal culûer da la mêl. La plume a vignive suiade e impachetade in grancj sacs di tele. A saressin ben passâts a comprâle i marcjadants dal Cjaduvri e i ambulants di Nert par puartâle in Tirol e Baviere, par imbutî cussins e plumins. La rata-tuie<sup>5</sup> e i gorbans<sup>6</sup> inveze siôr Luvigji a ju faseve rivâ a chei canauts bandonâts dal Pioluogo. E il 24 di Ugn, dì di San Zuan Batiste, a i mandave encje dôs informades di *zaleti* e di *bussolai*, ven a dî biscotuts e colaçs, par rindi un nin pi dolce la lûer biade vite che a ere belzà avonde amare.

Un om di inzegh e un galantom, recuardât a Venezie da una “Calle Luigi Baschiera” e da una “Calle del Solfarin”. E cumò encje a Clausîet da la plaçute da la sô cjare Duminisie.

**Gianni Colledani**

*Furlan di Clausîet*

---

<sup>3</sup> mandrie

<sup>4</sup> chiuderli nel recinto

<sup>5</sup> avanzi

<sup>6</sup> ossame

**S**e i siêri i vôi mi pâr di viodilu inmò ai da pît da vile sentât davant da vereade da buteghe di Ane cui siei bregons curts, ma une vôle comuts e ravoîâts come la cjamêse, tai pîts grandas scarpas peadas cul spâli e il so scuac sul cjâf.

Tin, un omenut piçul cuntun pâr di moschetas che i segnavin la mûse, al ere dibot simpri ai tal clip dal sorêli o tal rasinâ da plôe in spiete di passâ la sornade o di lâ a tindi a cualchi lavorut che la int i domandave di fâ.

Nol dave fastidi a nissun e la sô filosofie di vite a lu puartave a fâ juste chel tant che i coventave par vivi cul minim sfuarç, cence pratindi nue e lassant cori il timp e las oras cence ombre di presce.

Al ere nassût in Austrie, al ere tornât tal paîs das sôs radîs tal 1918 dopo vôi provât encje il cjamp di concentrament e d'in chê volte no lu veve plui bandonât e al viveve ta vecje cjase dai vons cence né lûs, né âghe, né nissune comoditât, juste un pajariç par butâsi a durmî.

Nol ere maridât e nol à mai lavorât, in plene sintunie cu la sô filosofie: al è dut nue; dibant spasimâsi a cori e a fâ, tant a la fin dut al si sfante. Nol ere un stupit, ben si intint, in Austrie al veve fat cun profit vot agns di scuele, e po al veve une finece tal rispuindi che al lassave di stuc.

Ta glerie al veve un fassolet di cjamp dulà che al samenave cartufulas, as dave mancul lavôr che no i fasûi che ai veve bisugne encje dai araclis; ai conte che las gjavave pal ordin che i coventavin e las faseve boli sul puest parcè che nol pierdeva timp a fâ



legnas pal Inviern. A cui che i domandave il parcè al rispuindeve: “cussì mi scjaldi doi viaçs!”. Al lave ogni tant a passâ une dade ta l’ostarie dulà che cualchidun i proferive un tai, ma lui nol domandave mai nue, al acetave e al ringrasiave cuntune biele ridade sot das moschetas.

Un an aì da Vire, d’inviern, ai ere atorn dal fogolâr e ai mangjave tistignas rustidas; Tin l’ere sentât e, come ch’a ere la sô indule, nol tocjave nue encje se al veve fan. I àn cussì dât un pugn di tistignas e lui al à fat bon acet, ma al faseve fadie a parâlas jù; i giovins ai faseve apueste par obleâlu a domandâ un tai. Ma lui nue, al girave il cucl e al gloteve cence dî verbo. A un cert moment un giovin i dîs: “Tin, buinas las tistignas?” e lui: “Buinas, buinas! Ma sutas!”. Cence pierdi la dignitât al veve vût cussì encje il tai dal vin.

Un’âte volte, conossint la condision da sô calope, un pâr di lôr si èrin ufierts par dâ une man di blanc e sistemâ la sô cjamare, Tin ur à rispuindût: “A vûl sum par durmî e no cjamaras sblancjadas!”.

“Tin doman vestu a fâ dôs legnas cun nou?” e Tin: “Si fâs mancul fadie a bati i dincj!”.

Une biele di a è rivade la pension sociâl e Tin si è cjatât a fâ i conts cu la disponibilitât di cualchi franc tramudât in vin e cussì, in curt, al è insindilât cu la sô filosofie. “Al è dut nue!”.

**Celestino Vezzi**  
*Furlan di Çurçuvint*

## Tite pitôr

Une volte al bastave dî “al è un pitôr” e si diseve dut. Tite, che al jere a stâ dilunc le roie dal Cjos, al jere pitôr par passion e par mistîr. E pitôr ancje di caratar: stramp e content di jessilu. Nol jere di academie, ma plui voltis al è lâ a Palme a imparâ là di un famôs sporcjetelis di chei agns, che al jere a stâ in borc Cividât. Nol cognosseve technichis: al viodeve dentri di se ce che il pinel al varès butât jù su la tele o sui mûrs. Al è stât fortunât parcè che la int dai nestris paîs e tornave propit alore ae devozion e aes pituris di glesiis, statuis, anconis, cjasis, telis che si jerin consumadis par vie dal timp passât, soledut chês in batude di soreli e di ploie. Bisugnave dâur une man di gnûf e adatâlis ai guscj di chei ch’a viodevin brute la ereditât artistiche dai lôr antenâts. Tite no si faseve preâ a cumbinâ pastîçs e cussì si è mantignût, scjampant cu la famee a la fam. La vite di artist e veve i siei sacrificis, come chel di stâ plui in glesie che a cjase, o ben il vivi a la largje des femenu-tis dutis prontis a fâsi piturâ come madonis. Insome un sant, plui di chei che al piturave sul mûr, lontan de ostarie soledut. Barbe e cjavelade sâl e pevar, al tindeva al sec, incjarnant la soference dai martars. Cussì si jere fat un non e duç lu clamavin, lant simpri di corse di un lavôr a di chel altri, impegnât a fâsi viodi plui che a fâ viodi ce che al faseve. Il so cantîr al jere un puest di ligrie: intant che al moveve il pinel e al messedave i colôrs al cjantave e al tabaiave, tignint sù compagnie, fasint ridi cu lis sôs contis. La critiche di vuê no sparagne judizis sevêrs sul so operât, ma Tite al à ancjemò di chei che i vuelin un ben sincîr: lis buteghis di restaur che a comedin i siei pastiei. Par lôr al è il miôr.

**Roberto Tirelli**

## *Un pôc al dì*

*Si vîf.  
Si vîf un pôc al dì,  
ma si vîf.  
E si mûr.  
Si mûr un pôc al dì,  
ma si mûr.  
Alore si à di vê un sium:  
un pont intal cîl dal mont,  
tant piçul ma visibil.  
Chel pont daurman nus cjale,  
nus cjale dì e gnot,  
chel pont nus da la fuarce  
di jevâsi ancje doman;  
e nus fâs dismenteâ  
il destin che ducj o vin:  
di vivi e di murî,  
un pôc al dì.*

**Ermes Dosso**

*1<sup>a</sup> premi concors di poesie "Vittorio Cadel", Fane 2019*

## Le ferade Pontebane

**M**etûts d'acordo par colegâsi cuntune strade ferade, Talian e Austriacs a le vevin inaugurade il 30 di Ottobre dal 1879 a Ponteibe/Pontafel.

Dute le linie a l'ere stade eletrificade tal 1935 e juste sessant'agns dopo, intal 1995, a l'ere lade fûr servizi di Cjargne in sù; cumò intal so puest a le passe le ciclovie Alpe Adria. No si pues neâ i vantaçs che le ferade a le veve puartât soledut ai paîs dal Cjanâl dal Fier, ch'ai erin i pui isolâts: a l'ere sî une grande comoditât pai spostaments, ma ancje une atrazion par chei ch'ai vivevin inta borgadis sparniçadis intai cjanâls di ca e di là da le Fele: incuriosîts, i cjanagleis ai restavin meraveâts a viodi chel lunc modrac di fier a sbufâ e a sparî dentri le galeriis.

Un personagjo originâl di Racolane, il Bastian Bigòç, al lave cuasi ogni dì inta stazion di Sclûse: al voleve capî cemût ch'al podeve funzionâ le machine a çuf. Dai vuei, dai doman, al ere entrât in confidence cui machiniscj e chescj, apene slontanâts da le stazion, ai molavin cuatri-cinc siviladis ben intervaladis. Il Bastian, dut content, a le' interpretave cussì: "Bighe, bigòç...bighe, bigòç..." tant ch'a si sintive in oblig di puartâ ai machiniscj le' miôr vergis ch'al veve. Le sô fantasie a l'ere cence limits: a si veve fat parfin un pâ di alis e, cuant ch'al veve decidût di svuelâ, a si ere butât dal balcon da le cjamare. No si ere ruvinât pui di tant parcè ch'al ere colât suntun grum di fascinis secjis!

**Antonino Danelutto**

*Furlan di Scluse*



*Cjavrûi a Codroip  
(foto Dario Quattrin)*

## LIS BOTIS PITURADIS

### Gigi Castellani e Luciano Ceschia

**L**is primis botis forin pituradis inte Istât dal 1983 pe rassegne *Arte in Cantina* e a son par solit firmadis e datadis. L'itinerari si vierç cu la bote di Luigi Castellani, non di art Gigi Castellani (Viene 1908 - Cormòns 1995), brâf pitôr di figuris e fondadôr di un Circul culturâl a Cormòns, frequentât ancje di Sergio Altieri. Al à dissegnât dôs figuris di feminis, forsit identificabilis cu lis cjastelanis de antighe Cormòns, cui cjavei dorâts e la pose maliziose. Tal coridôr si cjate la bote di Luciano Ceschia (Tarcint 1926 - Udin 1991), un dai plui grancj scultôrs furlans. Dopo une prime adesion al Neorealism, tai agns '60 si svicine al Informâl cun sculturis di ceramiche, bronç, marmul e pierre. La bote di Luciano Ceschia e je stade une des primis a jessi piturade, ai 18 di Avost dal 1983, e e rapresente i imprescj doprâts ogni dì dai contadins, suntun fonts vert smeralt, che al mostre clârs riferiments aes scomposizions des sculturis a disc e a totem. Il cjâf daûr de bote, vuê pierdût, al fo piturât di Gina Roma tal 1986.



*Gigi Castellani, bote dal 1983  
cun figuris di femine*



*Luciano Ceschia,  
bote dal 1983*

## Li' striis di Muntisel

**C**uant che erin fruts, par tignî lontan il demoni nus metevin intorsi madais, benedizions, il triangul e nus fasevin preâ “brununzie Satane” par fâ scjampâ li' striis.

Dì sere par lâ tal gabinet, ch'al ere di fûr, non mularie lavin in trei-cuatri, tignintsi pai cotui par paure che li' striis nus portassin vie. In chei agns i fantats da la borgade ai viodevin spes intune crosere di stradutis come un fantasma blanc: insegnâsi, “brununzie”, scjampâ di corse: al ere dut un.

Une dì ce ano fat? Ai àn benedît cu l'aghe sante un baston, a si son svizinâts al fantasma par scunzurâlu, par fâlu scjampâ: ai àn scomençât a petâi jù e ce eral sot i linzui? Une strie vivente, ch'al à scugnût clamâ misericordie!

**Agnese Moroldo**

*Furlan di Mueç*

**Insom a ogni spice si è sul ôr dal precipizi.**

*Stanisław Jerzy Lec*

## UN ARTIST DAL GRAN CÔR

### Une becjarie vive

**D**i là da la cort intune cjase furlane al jere il curtîl da lis gjalinis e i cjôts. Un capitâl par dutis lis fameis. E a governâ cheste *bancje* e jere la femine. Nol jere facil stâ daûr a dutis chês bestiis: gjalinis, gjai, dindis, cunins, razis, ocats, purcits, ognidune cu lis sôs esigjencis di alimentazion.

Pal purcit al jere di lâ in latarie a cjoli il sîr, zontâi un pocje di semule, d'Invier fâi il bevaron (une sorte di mignestron di semule e patatis che i fruts a spesseavin a gafâlis apene che si sfredave), dâi cualchi toc di coce; lis gjalinis e i dindis si rangjavin di plui, ma al coventave butâur cualchi grignel di blave, cualchi vanzum di cusine; i ôcs e lis razis a vevin dirit a lis lôr oris *di aiar* ator par la campagne: ur tocjave a lis frutis di menâju a passon; i ocats, par sveltîur la cressite, si veve ogni matine di parâur jù pal gosolâr cuntune plere cualchi zumiele di blave pussibilmentri umide: puarets ce torture!

Ai cunins ur plaseve tant la jerbe, cualchi lidric vecjo, alc di semule. Par ducj si veve di pensâ a la *procreazion*: si veve di pensâ a lis lunis par meti a clocji, a jerin di *menâ* lis cuninis, compit dai gjai al jere di *sistemâ* lis gjalinis.

Dut chel ben di Diu al finive in taule, ma une femine atente e cirive di rigjavâsi alc vendint cualchi bestie: cul compradôr, ch'al rivave cu la sô biciclete incolme di scjaipulis ch'a clamavin dal moment l'atenzion e la curiositât dai fruts, al jere un biel discuti par tirâ sul presit! E, se dal câs, comprâ une desene di razutis ch'al jere un spetacul jodilis cori daûr a la mame raze in file e ubidientis!





Cualchi cercje etimologjiche curiose: il talian *tacchino* al somee di derivazion onomatopeiche, di cemût che si lu clamave, toc-toc; par inglêš *turkey*, scurtadure par *turkey-cock*, gjal de Turchie, di dulà ch'al jere stât impuartât de Guinee; par todesc *Truthahn*, di Trut, droghe, de maniere di sglonfâsi menaçôs; furlan *dindi*, ch'al è la forme coerent da la divignince di chest poleç, gjaline d'Indie, dindie, come che Colombo al veve dit ch'al jere partît par lâ ta lis Indiis! *Becjarie*: dal gjermanic *\*bukka*, cjastron, bec, ch'al jere il nemâl ovin mancûl preseôs e si lu copave; il vendidôr, il *becjâr*, par talian *beccaro* e di chi il cognon *Beccaria*, volgarmentri macellerie!

**Gotart Mitri**

## Il filistrin

**R**oncis e Frofean, cian e giat!

Co si voteve, di spes i erin nun di Frofean a desidi il colôr dal consei comunâl, e la belanse no pendeve simpri da la stesse bande. Disìn ch'i vevin inventât il “bipolarisin”.

Bisugne parâtri recuardâ che il Cumun al veve pûc di fâ a Frofean, parsè che dut tal paîs al ere dal cont: ciasis e stalis, ciamps e ors, aghis e stradis, parfin la scuele elementâr, la glesie e il simiteri. Il stradìn al meteve rudine su li' busis da la strade ch'a traviarseve il “tenimento”, risclarade di not, par luminasion publiche, di trê lampadinis di vingesinc ciandelis: une al Bando, une sul volt da la plasse e une ta la Boschete!

Par fâle curte: chei di Frofean a erin in credit parsè ch'a paèvin la “tasse di famée”, ma no vevin cuasi nuie in gambio. I comunisç, però, a si vantevin di vê fat il lavadôr in siment su la roe, e une volte sì e une volte no a ripetevin: “Nun i vin fat il lavadôr, e vuâtris democristians se vêsò fat?”. Strac di chiste solfe, il rappresentant di Frofean, ch'al feveleve pûc, ence parsè ch'al ere barbot, al à dat une sere la sentense definitive: “E... nu... nun i vin ti... tirât il filistrin... par meti a suiâ!”.



*Trê feminis (foto Giuliano Borghesan)*

**Gianfranco Ellero**

*Furlan di Frofean*

## I roncjins

**I**na iesc di cjasa cencia roncjins, a è la prima rôba ch’i mi met a buinora e l’ûltima ch’i gjavi la sera, a mi pâ di esi nuda cencia. I ai propi la manîa, ind’ai di tantas sortas, di tanc’ coloros como la maia o il viestît chi met in chê dî, parfin cuant ch’i levi su pai crets cul gno omp, i na eri mai cencia.

Las bûsas par meti i roncjins, a mi e as frutas ch’as steva dongja di cjasa, a l’as à fatas vava Vigja. A leva a d’imprest di un pontapet d’aur, a dijinfetava la gujela cu l’aga ossigjenada, dopo a nu sentava tal scangnut, a nu meteva il cjâf tal grimp, cul pic’ a strengeva un pôc la vorêla e a sbujava ben plan fin cuant ch’a sintiva picâ la gujela sul dêt, e dopo a meteva su i roncjins.

Saben chi eri tant piciula, i mi impensi simpî di in chê dî. I na volevi fami sbusâ parcè che i vevi poua, cussî i scjampavi par no fâmi cjapâ e jê a na saveva cemôt fâ, cussî a mi à det: “Sa tu mi lassas fâ las bûjas, i cji doi 5 francs”. Orpo! cumò a mi comenciava a plajê l’idea, allora i mi soi metuda jù buina buina, iê a mi à sbujada, subit a mi à metût sù i roncjins ch’a mi veva regalât santula Wilma e a mi à dât i 5 francs.

Jo i u ai spiâtas un cimi e dopo i ai tacât a vaî. “Ce atu – a mi à domandât – cji dolia?”.

“No – i ai rispuindût – i voi encja chê âtis 5 francs: dos vorelas, doi becins!”.

Impuscibil par me dismenteâmi di in chê dî.

**Iside Del Fabbro**

*Furlan di Davoussa (Prât di Cjargne)*

## In chê domenie nol è lâ a servî messe

**U**ne dì Arduin, un frut svearin, cun pocje voie di lâ a scuele, ma cun tante gole di lâ a pescjâ, lant tal Cormôr e passant prime pal palût al viôt une casse in len, mieze soterade tal pal-tan. Planc planc al alce il tapon e dentri al viôt argagns che nol capive ce ch'a jerin. Alore al va a cirî so cusin Dolfo, ch'al veve un pâ di agns di plui. Rivâts sul puest e gjavât fûr le cassele, Dolfo al dîs: "Arduin, chestes a son bombes di mortaio, o soi sigûr! A 'nd à une compagne gno barbe *el vedran* sul comodin in cjamare e le ten tant che solemobil, e se le à smontade lui, o pues provâ ancje jo".

In chel che Dolfo al lavore, Arduin al va a clamâ un altri lôr amì, *el piçul*. Tornâts sul puest, Dolfo a 'nt veve bielzà smontades trê, une par om. Po, cjapade sù le cassele, le puartin intun bosc li dongje, taponade cun fuees e frascjes.

A cjase, ben si intint, nissun sa nuie. El piçul le veve platade sot dal jet e sô mari, cualchi zornade dopo, lant a fâ les vore, viodint le bombe e cole in svaniment pe pôre.

El pari, viodût le cundizion de femine, al clame di buride il miedi. El dotôr, dopo vê fat ripiâ le cristiane, al à volût scrusignâ su chel mancjament e di li e je saltade fûr dute le storie.

Rivât el vuardian, sequestrade le bombe e fate une buine ramanzine al piçul, al pareve finît dut li. Invezit, te domenie dopo, di prime matine tal curtîl di Dolfo, e rivin i carabinieri, al jes el pari e ur domande ce che al jere succedût.

El maressial, cun fâ autoritari, i rispuint: "Dov'è suo figlio?". Chest biât om, tornât di pôc a cjase dopo cinc agns di militâr e

doi passâts in cjamp di concentrament pes Gjermaniis, nol rive a proferî peraule. Furtune – si fâs par dî – che in chê al jes Dolfo, vistît di fieste pront par lâ a servî messe, ancje se al veve cutuar-dis agns e bielzà a vore sot paron.

El maressial alore i domande: “Dove sono le altre bombe?”. E Dolfo, par nuie scaturît, i rispuint: “Vignît cun me”. In chel jenfri e jere rivade une camionete militâr e daûr ancje el sindic; e vie tal bosc, i carabinîrs cun Dolfo devant, po le camionete e daûr el sindic.

Li che e finive le strade e àn fermât i motôrs e ducj daûr dal zovin te boschete. Rivâts sul puest, Dolfo al pare vie les fuees e al strissine fûr le casse viers le camionete, ma tal zirâ el cjâf nol viôt plui nissun. “Ce pôre, ma se no àn sclopât prin, no sclopin nancje cumò!”.

I carabinîrs e i soldâts daûr des machines e berghelavin: “Metti giù, metti giù!”. Dolfo, alore, al à poiât dut li e al è lâ a cjase. In chê domenie nol è lâ a messe, ma al à cjapât un biel frico!

**Giuliano Pascoli e Primo Chittaro**

*Furlan di Colorêt di Montalban*

## Primevere di une volte e di cumò

**D**opo ve bandonât l'emisferi austrâl, il soreli al passe l'ecuator celest ai 21 di Març, dî dal ecuinozi di Primevere, cuant che la durade dal dì e je avuâl di chê de gnot (*D'Atom e di Març, la gnot e il dì si spart*) e al continue la sô assension intal cîl dal emisferi boreâl.

Cumò la lûs e trionfe dabon sul scûr e la Pasche e je vicine. Une volte la int e spietave cun ansie la gnove stagjon ch'è puartave il tividin e ch'è vierzeve lis voris de campagne. I stes proverbis a segnalavin la sô rivade:

*Cuant che al cjante il siu-sau, il frêt a va a cjaldiaul.*

*Cuant che e cjante la parusse, la Primevere e je vicine.*

*Se insuride e sofle la buere, e je dongje la Primevere.*

*Fregul di maravee se la Vierte e polee.*

*A San Benedet la sisile e passe sot il tet.*

Lis cisilis a anunziavin la Vierte e la fieste di San Benedet, celebrade propit ai 21 di Març, e vierzeve simbolicamenti lis puartis a chescj uciei ritignûts sacris che a rivavin de lontane Afriche e che tornavin a partî dome in Setembar. Inte Vierte la nature e je cjapade te frenesie de mutazion, e je in ferment, e si prepare al grant destin dai amôrs e de riproduzion; la gnove energjie de tiere e jes sconvolzint minerâi, vegjetâi e animâi, puartant il cambiament ancje inte meteorologjie.

Di dut chest e jere consapevule la int e soredut i contadins che a vivevin a contat diret cu la tiere.

Vuê no plui. I contadins (il 2% de popolazion, a difference de cuasi totalitât dal mont rurâl di une volte) a continuin lis lôr coltivazions intes seris dut l'an e i lavôrs tai cjamps a son fats di grancj tratôrs che a àn lis cabinis insonorizadis, climatizadis e dotadis di filodifusion musicâl, pal totâl cunfuart di chei che vuê si clamin "imprenditôrs agricui".

No esistin plui i nemâi di lavôr e lis stalis. I zovins, intents a cjapâ e spedî messaçs cui telefonins, no cognossin i ritmis des stagjons e de nature e no alcin i voi tal cîl par osservâ se lis cisilis a rivin dentri dal mês di Març, anzit par lôr a puedin ancje no rivâ, tant al è distès. E i anzians che une volte a cjalavin l'orizont par capî ogni piçul cambiament de atmosfere e intuî il timp che al varès fat, a cjalin lis previsions meteorologjichis par television. L'antîc rapuart cul cîl e cu la tiere al è stât dal dut bandonât, tant che ancje i rituâi de "religjon de nature" sicu lis Rogazions de Vierte e lis Cuatri Timporis al è un biel pieç che no si tegnin plui e masse pôcs a son chei che a van in glesie pe Sense, pes Pentecostis e pal Corpus Domini.

Cui cambiaments climatics che a stan sconvolzing i andaments des stagjons, ancje il viesti e il disvesti no àn plui un regolâr svolziment, tant che in Març si viodin ancjemò capots e in Otubar bragonuts curts e maiutis. Cussì i clips de Vierte si puedin vê tai ultins di Avrîl o parfin dai prin dîs di Mai. Nissun nol spiete plui la Primevere, e cuant ch'è rive nissun i fâs câs.

**Mario Martinis**

## Emigrâ: une peraule colme di significâts e emozions

**L**a prime che mi ven tal cjâf e je nostalgjie, parcè che partî de patrie al è bandonâ i afiets, i amîs, il paîs dulà che si è cressûts, lis tradizions e lis usancis tramandadis.

La seconde e je sorprese, di cognossi tantis robis gnovis, la lenghe, lis personis, i marcjâts e lis usancis dal gnûf paîs.

L'emigrazion moderne e je une vore cambiade di cuant che a partivin i nestrîs antenâts, sburtâts de miserie; cumò si po partî ancje par fâ nome une esperience di lavôr fûr de Italie.

I progrès de tecniche dai ultins decenios a àn siguramenti rindût il lavôr plui facil di une volte; spostaments pui svelts che ti permetin ancje di tornâ dongje di tant in tant; comunicazions in direte cuntune “video clamade”: nome trent’agns fa, nancje di insumiâsi!

Jo cumò mi cjati in Vietnam, e di precîs a Ho Chi Minh City (ex Saigon, par capîsi), une citât imense di 12 milions di personis, tant lontane dai nestrîs paisuts furlans a misure d’om. Il Vietnam, cussì lontan dal nestrî Friûl e pôc cognossût forsi, tant che cualchidun, cuant ch’o torni in patrie, mi domande: “Ma sêstu tal Vietnam dal Nord o dal Sud?”. Jo o rispuint un tic stranît che cu la fin de vuere dal Vietnam tal 1975 i doi stâts si son unificâts. La robe che mi à colpît apene montât sù sul taxi al è stât il trafic, un flum continuo di motorins, come tun furmiâr, cuntun rumôr di motôrs e pivets ch’al intrunîs. Ma o soi restât che nissun si rabiave, come s’e fos une confusion controlade! Siguramenti, mi soi dite, a àn une pazience infinide, une dote che purtrop o stin pierdint simpri plui. Vêle nus fasarès vivi une vore miôr!



Alc di furlan ai colegas vietnamitas o vin insegnât: nome rivâ in ufici a binore e sentîsi dî “bundi” al jemple il cûr di felicitât.

Il Vietnam al è un paîs zovin, plen di fruts, l’etât medie e je basse, al è in fuarte cressite economiche, cun chel entusiasim che ti puarte a fâ e a riscjâ par rivâ a vê alc di plui. Siguramenti al è il ledrôs de medaie: povertât fûr de citât, diferencis sociâls fuartis, incuinament e pôc ricircol di scovacis, ma o pensi ch’è sedi nome cuestion di timp par ridusilis.

Ta chest contest cinc agns fa jo, Daniele, Francesco, Nicola e Eliano o vin fat nassi il Fogolâr Furlan Saigon. Si sin dite: “Ce fasîno par fâsi cognossi? Provìn cul frico!”. “Parcè no?”. E Daniele, par scherç: “Il frico al doventarà il plat nazionâl dal Vietnam!”.

Il frico a la fin al à vût sucès, ai vietnamitas ur plâs, ai talians ancje, no varessin mai pensât! Tal mentri il grup dal Fogolâr si è ingrandît e gnove int e je rivade

Dut câs i vietnamitas a semein ai furlans: tal imprin no ti dan tante confidence, ma une volte che ti cognossin ben e a capissin che a puedin fidâsi, a son pronts a fâti un plasê e a dâti simpri une man.

Par cheste reson, magari un dì, il sium di Daniele al deventarà realtât!

**Raffaele Somma**

*Ho Chi Minh City (Vietnam) - Furlan di Tresesin*

rege brm z nō erit ult<sup>a</sup> in ra  
z vnuz detmīnatis aut leīs  
entes dōtī dñi & p̄tu ostendē



**I**l Cjaval che al insuaze lis letaris che a reclamin la "rima" (la cjarte e finis cu la peraule "saluber") al è un riferiment clâr a la nobiltât dal contrast. Il Panciera al è daûr a scombatî tant che un cavalîr de Fede cuintri des bramîs dai siei nemîs triscj. Intal test si tire in bal Ezechiel: "Salvabimus gregem".

# AVRÎL

	1	M	S. Ugo vescul	☾
	2	J	S.te Elisabete Vendramin	
	3	V	S. Luîs Scrosoppi predi	<i>Costituzion dal Stât patriarcjâl</i>
	4	S	S. Isidôr	
	5	D	S. Vissent Ferrer	<i>Domenie Ulive</i>
15	6	L	S. Celestin I pape	
	7	M	S. Zuan Batiste de la Salle	
	8	M	S. Redent vescul	☉
	9	J	S.te Marie di Cleofe dissipule	
	10	V	S.te Madalene di Canosse	
	11	S	S. Stanislau vescul	
	12	D	Pasche maiôr	
16	13	L	S. Martin I pape	<i>Lunis di Pasche</i>
	14	M	S. Valerian martar	
	15	M	SS. Basilisse e Nastasie martaris	☾
	16	J	S.te Bernardete M. Soubirous	
	17	V	S. Nicêt pape	
	18	S	S. Galdin vescul	
	19	D	S.te Eme vedue	<i>Otave di Pasche Domenie in Albis</i>
17	20	L	S.te Sare di Antiochie martare	
	21	M	S. Anselm di Aoste vescul	
	22	M	S. Teodôr vescul	
	23	J	S. Zorç martar e B. Eline Valentinis	●
	24	V	San Fedêl di Sigmaringen martar	
	25	S	S. Marc vanzelist	<i>Fieste de Liberazion Patron di Pordenon</i>
	26	D	S. Marcelin pape	
18	27	L	S. Liberâl di Altin	
	28	M	S. Pieri Chanel predi e martar	
	29	M	S. Catarine di Siene, v. e dot. de Glesie	<i>Patrone d'Italie e d'Europe</i>
	30	J	S. Piu V pape	☾

## Ce bon il moscato di Lison

**S**iôr Luvigji, “il re dai furminants”, al ere paron encje di une bieie campagne a Lison. Dôs fameones di fituâi ai meteve blave par nudrî vacjes, purcêi e gjalines ma soiredut ai curave une vigne cussì grande di ues blencjes e neres che par clamâsi ai usave i megafonos. Il paron, par cerpî pi a la svuelte, al veve fat vignî da l’Inghiltere las primes fuarfes. La cjanive a ere grande come une glisie cun caratei, dumilianes e fiascos, brentes e pleres e, naturalmenti, une Plâf di vin. Dut al ere tignût par fîl e par segnu. Gjastalt di cheste proprietât al ere un omenut scuelât e di buines manieres, don Marcheto, ma al no ere pridi, nome che, rivât in somp dal seminari, al ere stât strolegât<sup>1</sup> dai vûei da la Ghite e, come che a si dîs, al veve molât la tonie par cjàpâ... la menie. Siôr Luvigji, za cuant che al ere a Duminisie, al veve une vere passion par prâts e boscs, stales e vacjes, vîts e pomârs. Ma une passion ancjamò pi mate al la veve pai ucei. Al ciscî di dordeis, luiers, montans, zenevrons e franzeis al restave come inmagât<sup>2</sup>. E da bon useladûer al tignive reclaims, scjaipiutes, viscjades,



*Gorle di piere par discjamâ aghe plovane*

<sup>1</sup> stregato

<sup>2</sup> incantato

sivilots e pivets<sup>3</sup> di ogni fate. Encje a Lison al veve une stanzo-  
ne par tignî i reclaims e une persone a pueste, la gnece di don  
Marcheto, par netâ las scjaipiutes e dâi da bevi e da mengjâ.  
Une volte, a doi amigons di Clausîet che ai ere vignûts a Lison a  
toli une vigjele e i solets caratei di vin, a i raccomandà da mandâ  
jù cuatri beviridûers pai ucei. Ma chescj amîs, fasint finte da vîe  
capît mâl, a i mandâr jù invezze cuatri bevidûers, cuatri scolelitros  
cetant inomenâts: il Cec, Sborio, il Borean e il Tato. Rivâts che ai  
for, siôr Luvigji al capì a colp da jessi colât intune vuata<sup>4</sup> e fasint  
muse da ridi al disè a Marcheto: “Metèli in cantina e deghe da  
magnar e da beber a volontà”. La dì dopo, belzà ben solforâts<sup>5</sup>,  
ai si metèr a cjantâ a plene cuele: “Volìn bevi e tornâ a bevi di  
chel vin che al è tant bon, al è moscato di Lison vendemât su la  
stagjon”. La terze dì siôr Luvigji al ordenà a un famei da cjamâju  
su une carete cun tante pae sore par no macolâ<sup>6</sup> i vues. La fieste  
a ere finide, a ere rivade l’ore da tornâ a cjase. Belzà distirâts sul  
scjalâr come purcêi, siôr Luvigji a i dè cuatri fiascos di neri pal  
viaç e, riduçant, a i domandà se ai volès pandi un desideri. “Ah, sì  
– al rispuindè il Cec che al pareve il pi sincêr – chel da tornâ uchi  
e da murî inegât intune vueste brente di moscato”.  
Cec, Sborio, Borean e Tato ai ere cuatri cjocheles ma, muarts  
lûer, a Clausîet ai no àn serât nissune ostarie.

**Gianni Colledani**

*Furlan di Clausîet*

---

<sup>3</sup> richiami

<sup>4</sup> rete, trappola

<sup>5</sup> alterati, ubriachi

<sup>6</sup> ammaccare

## L'agnel di Pasche

**D**i frute, inte setemane sante, o pensi di joibe, jo, mê mari, mês sûrs Mirella e Clara, mê agne Alice e mê cusine Luciana si cjpave la coriere e si lave a Palme par lâ a cjatâ e fâ i auguris di Pasche a la gnagne Marie. E jere in veretât la agne di gno pari e di Alice, sedi a dî la sûr di mê none Palmire. Lôr a jerin fiis di Gelsomino Boldrini, origjinari de Mareme Toscane, vignût a Palme a inferâ i cjavai dal esercit.

Ogni an sot Pasche si faseve cheste visite. Par me al jere come lâ a cjatâ une none, stant che di nonis e nonos no 'nd ai cognossût nancje un. Jê e jere zentîl, nus regalave un biscotut e une caramele, e ufrive il caffè a mê mari e a mê agne Alice. A un ciert pont mê mari e lave vie a fâ cualchi spese e no nus diseve nuie di ce che e voleve comprâ. Ma no steve vie tant. Cuant che e tornave e jere za ore di cjpâ la coriere par tornâ a cjase.

La spese misteriose di mê mari e vignive fûr la domenie di Pasche. Si gustave tal tinel, dulà che mê mari e preparave la taule dome a Pasche, a Nadâl e in cualchi ocasion speciâl. Tal mieç de taule al jere simpri un macet di rosis di cjarte che a someavin a chês dal pierçolâr che e faseve mê sûr Clara. Finît di gustâ, jo e lis mês sûrs si vierzeve l'uvut di cjocolate par viodi soledut la sorprese. A dî la veretât Clara, la plui bintarute des trê, inte setemane sante, cuntune sgrimie uniche, e vierzeve par sot l'ûf, par viodi la sorprese. Daspò e sierave dut e, se no si cjalave di fin, nissun si inacuarzeve dal lavôr fat. Dopo vê mangjade un pocje di cjocolate, e rivave mê mari cuntun plat di carton in man, chel dal scaletîr, e parsore un piçul agnel poiât, fat di paste di man-

dulis cuntun piçul standart di cjarte rosse in mieç des çatutis devant. Chest agnelut mê mari lu comprave a Palme dulà che e jere une scaletarie siciliane. Al jere propit biel... e bon! Mê mari nus taiave un tocut parom, piçul parcè che la paste di mandulis e je une vore sostanziose e po chel agnelut al veve ancje di durâ un pôc...

Al jere biel fâ Pasche cussì e ricuardâsi di Crist, l'agnel di Diu. Mi soi domandade cemût mai mê mari, bergamasche, e cognossès cheste tradizion siciliane e o pensi di vê cjatade la rispueste. Mê mari, cuasi ancjemò frute, a dodis o tredis agns, e je lade vie di Fiobio, un paisut de bergamasche, e e je lade a Milan, intune famee di sicilians, a fâ lis voris. Jê si è tant afezionade a chestis personis che cuant che si son trasferidis a Rome, tal imprin dai agns Cuarante, e à decidût di lâ cun lôr. Ta cheste famee e à passât un toc impuartant de sô vite fin ai 28 agns, cuant che si è maridade cun gno pari, cognussût a Rome in timp de vuere, e daspò a son vignûts a Morteau, dulà che e jere a stâ la famee. L'agnelut di paste di mandulis alore al conte un toc de storie di mê mari.

Al e propri vêr cuant che a disin che "il cibo è cultura". Il ricuart di un savôr, dal valôr di un mangjâ al pues contâ alc di impuartant de storie di une persone e di une famee.

**Gianna Nobile**

## Gusto l'atôr

**G**usto al jere un atôr de compagnie filodramatiche dal so paîs, il plui spiritôs e simpatic. Apene che al rivave in sene, la int e scomençave za a ridi. E dal moment che plui o mancûl dutis lis comedis par furlan a jerin scritis su la stesse canevace, lui si jere fissât il personaç dal sindic. Altris a jerin par esempi il plevan, la tabaiote, il biel zovin e vie indenant. Cuant che a tornavin a cjase, a la fin dal spettacul, lôr a tornavin a jessi lôr stes, un contadin, un marangon, une mari di famee... Gusto no, lui nol separave ce che al jere sul palc de vite normâl. Si sintive sindic ancje se mai nissun nol veve pensât di votâlu. A dî il vêr, al jere plui cognossût e stimât dal sindic che al comandave in municipi e lu clamavin il sindic de place, il puest dulà che vultintîr al continuave la recite, dispensant conseis e bon umôr. Se la storie si fos fermade, Gusto al varès continuât a dividi: la zornade, sul tart, in place, la sera-de inte sale teatri de canoniche par provis o pal spettacul. Ma la storie je lade indenant e la filarmoniche si è disfate. Gusto al è restât di bessôl e la int un pôc a la volte si è dismenteade di *siôr Pieri Catùs*, dai *Napoleons tal Cormôr*, dai *Amôrs in canoniche* e di dut il repertori. Al è capitât che, par cambiâ politiche, a àn pensât di metilu in liste par fâ pardabon il sindic. Elet a la grande, nol à vût bisugne di imparâ il mistîr, i bastave ripassâ lis batudis. E si è fat sù une bieie sale di teatri, che no coventave plui ancje parcè che il spettacul si deve in municipi. “Jo no sai fâ altri che il sindic” – al contave un dai ministris plui cognossûts dal Friûl e “Jo non sai fâ altri che interpretâ il sindic” – al ribateve il nestri.

**Roberto Tirelli**



## *L'insium de lisierte*

*Chest dal misdì  
çondar di timp  
l'è l'incjant gno  
des piçulis robis,  
ch'a fasin ombre  
minude di drâc  
sui claps dal mûr.  
Spac di lusôr  
tant ch'al cole  
intor il flât  
vueit dal spietâ.  
Flabe che scjampe  
sossedant al soreli  
tes tôs creturis.*

**Aldo Rossi**

*2<sup>t</sup> premi concurs di poesie "Vittorio Cadel", Fane 2019*

## Le crous dal Vinars Sant

**A** Sclûse le funzion serâl dal Vinars Sant par tradizion a le finîs cu le procession pa le' stradis principâls. Di front dal paîs, di là da le Fele, suntun prât ripit daûr le' cjasis di Racolane a si impîe une crous ch'a le reste inluminade, ben in viste, par dut il timp da le procession. L'idee da le crous a l'ere vignude intal lontan 1927 a doi fantats racolaneis, il Min dal Nan e il Vigji Prôci. Ai vevin tirât dongje sglofis di cais e a le vevin implenadis di vueli di samencis che le Munîne, le nône dal Vigji, a le veve procurât passant di cjase in cjase. Il pavêr al ere fat cul fîl di coton: inneât par metât intal vueli, al ere pront par jessi impiât. Le prime crous al ere stade fate dome cun 15 sglofis parcè che al ere a disposizion dome mieç litro di vueli. Cul passâ dai agns il Min e il Vigji, ch'ai erin judâts di âtris fantats, ai vevin di fâ i conts ancje cu le forestâl, par vie che il fûc al podeve scjampâ e brusâ prât e bosc. Ma il problema pui grant al ere chel di sistemâ le' sglofis in mût che, vedudis di Scluse, a le fossin stadis a le stesse distance fra di lôr. A lu vevin risolvût dopo tantis provis. I doi braçs orizontâi da le crous ai vevin sglofis distantis 60 centimetros l'one da l'âtre, mentri in verticâl, par cause da le pendance dal teren, a le erin distantis 100 centimetros: cussì, chei ch'ai erin in procession ai podevin viodi une crous regolâr, tipo chê latine. Intai agns Sessante le 129 sglofis di cais cul vueli e cul pavêr a le erin stadis sostituïdis cu le' cjandelis. Dopo il teremot dal 1976 il Min al veve passât il testimoni a un grop di fantats che vuei, no pui tant zovins, ai continuin le tradizion.

**Antonino Danelutto**

*Furlan di Scluse*

*Il verdon o cirant  
tai magrêts di Vivâr  
(foto Dario Quattrin)*



## LIS BOTIS PIȚURADIS Darko

**D**arko Bevilacqua (Biglie Slovenie 1948 - Cividât 1991), artist che al cjape sù elements de culture taliane e e di chê slovene, al colaborà fin dai agns '80 cu la Cantine di Cormòns, là che al lassà lis sôs oparis plui bielis: rilêfs di zes sul teme de vinificazion, la distilazion de sgnape e i lavôrs agri-cui; un grant *Sant Urban*, protetôr dai roncârs, fat in crep e fondût ancje in bronç, une etichete dal Vin de Pâs (1991) e tantis incisions cu la tecniche de *acquatinta*. Intes sôs dôs botis al dimostrà une cussience fine dal ambient, sielzint la incision impen de piture. Su la prime bote dal 1983 al realizà *Sant Urban*, ma vie tai agns e fo cambiade la dove centrâl, propit chê decorade. La seconde bote dal Vin de Pâs e fo sculpide doprant la sgoibe e la pirografie, marcjant cui colôrs i tais dal disen. In cheste maniere il lavôr, che al somee plui a un basrilêf che a une piture, si è conservât avonde ben. Su la bote a son figurâts doi agnui che a tegin sù une butilie dal Vin de Pâs, che e à su la etichete il steme di Cormòns.



*Darko, bote dal Vin de Pâs, agns '80, dopo dal restaur*



*Darko, bote cun Sant Urban, 1983, dopo dal restaur*

**Gabriella Bucco**

## La strie ta pigne

**U**ne volte duçj ai fasevin la spongje in cjase. Al podeve capitâ, però, ch'a si bateve la pigne, ma la spongje no la vignive. Alore a si crodeve che la colpe a la fos di calchi strie: a si scjaldave un palet, fin chal vignive ros, e dopo a si lu meteve drenti ta pigne, par scotâ la strie. A si scomençave un atre volte a bati e a si rivave a fâ la spongje.

Se tal borc ai sintivin a dî che cualchidun a si ere scotât, ah biaduce!, che al ere la strie scotade ta pigne!

**Agnese Moroldo**

*Furlan di Mueç*

**O vin simpri bisugne di dâ la colpe a cualchidun  
dai nestrîs malans o des nestrîs disgraciis.**

*Luigi Pirandello*

## UN ARGISTE DAL GRAN CÔR Puliziis da la Vierte

**L**a Vierte! La lûs e torne a paronâ sul scûr, si bandone il salot da la cjase, la stale. I oms a àn za prontât samencis e imprescj di doprâ par lis colturis da l'anade gnove. Dopo ch'a jerin stadis cuinçâts, lis vîts e i pomârs a tachin a dâ fûr. I curtîi da lis bestiis a son dut un vosarili: ancje in lôr la nature si disvee: il din-di al goglote, lis gjalinis a fasin cocodèe, segn ch'a àn fat l'ûf! Si spalanchin lis stalis e si ur dâ une bieie disinfetade cu la creoline. I fruts, metûts di bande i bregons luncs, chei pôcs che a podevin permetisai, vie cu lis barghessis curtis, vie i zocui e a podevin finalmentri liberâ i pîts par cori ator.

Ta lis cjasis, la robe tignude sierade par mês e à bisugne di aiar, di lûs, e je plene di polvar o di odôrs! E alore cul prin clip e jere l'ocasion buine di fâ pulizie, dentri e fûr. Ce che si podeve lavâ in cjase si lu faseve sul puest come panariis, gratulins, ma soledut i paviments da lis cjamaris ch'a vignivin spazolâts par ben cu la varechine e po dopo si spalancave dut. Il rest da la massarie al vignive puartât fûr ad ôr di un roiuç: i telârs dai barcons a jerin spazolâts cun aghe, i veris passâts cuntun straç; i pignats, i cits, lis pignatis, lis covertoris, chei di alumini, cun farine e un pôc di sâl e asêt.

Plui intrigôs al jere netâ la robe di ram (cjaldîrs, cops, tecjis). Achì, in plui di doprâ une paste di farine cun asêt e sâl, si finive la vore passant la robe cun polvar di tiere o cinise: a vignivin di un lusint spettacolâr! E veve di vê une buine passade ancje dute la robe di len come lis sedons, i pironi, i taulîrs, lis macis da la polente.



Al restave il spolert o il cjavedâl, vore un pôc plui pesant par une femine: i cerclis dal spolert si ju spazolave benon; il cjadenaç, cul so gras e cjalín, al jere un “lavôr” dai fruts che lu cjapavin e sal strissinavin daûr par la strade di glerie di fâlu diventâ dut lusint. Al jere timp di Pasche e, dopo Pasche, al varès vût di passâ il plevan a benedî: ce braûre fâi cjatâ la cjase biele e lindule! E in gambi, proferîi un tai di chel bon o un bussul di sgnape che nol mancjave di fâi companie ancje il muini.

**Gotart Mitri**

## Pre' Aghe

Jù ta la Basse li' aghis a corin in venis sot piel, a dèis o cuindis metros. A Frofean a bastève une cane di vot metros par supâ ta li venis pi altis cuntune pompe a man, ma par ciatânt une pi fonde, cu la fuarse juste par vê il "getto continuo", bisugneve clamâ il plevan di Ciarbonate: pre' Aghe. Co si sintive dî ch'al riveve par meti jù une pompe al ere spettacul. Al giaveve li' scarpis e, scissant cui poleârs un bachetut pleât a 'V',

al tacheve a ciaminâ ta un curtîl o ta un ciamp: co 'l bachetut al tacheve a zirâ, lui, plomp di sudôr, al conteve i zîrs. Se, par môl di dî, al veve contât vot zîrs, al diseve "vincecuatri" (metros). La profunditât a podeve jessi juste, ma il post par meti jù la cane a colps di martinet al podeve jessi masse centrâl o masse laterâl, masse donge da la stale o masse lontan da la ciase. Alore lui al torneve a ciaminâ di ca e di là, fin che un dai presints al diseve: "Ch'al scusi, pre' Aghe: al ae mai ciatât une vene di vin?". "No – al rispundeve ridint e suiant il sudôr – ma chel al è bielzà tal soreli. E cumò un got lu bêf volentêr!".



Ada (foto Giuliano Borghesan)

**Gianfranco Ellero**

*Furlan di Frofean*



## La civuito

Ogni not la sintivi cjantâ in Primovero. La naturo e tornavo a riflurî e pe civuito al ero tornât lu timp dal amûor. Par covâ, e vevo fat lu nît propi sot ju trâs dal tet de mê cjaso. Uno bielo di i sint a piulâ e i jôc trio cjavuts vivorts ch'i spiçavo for dal nît; i spietavo la lûor mari ch'e ur puartàs da mangjâ muscjits, viermuts, larvos. Biel ch'a si passevo, lu pi svuelt al colo jù dal nît. Marco, lu paron di cjaso, me lu consejno par ch'i ves fat jo da mari a chest piçul glumuç di plumos basiolados grîsios e blancjos, cul bec curvât, ju vuai giai, taronts e spiritâts, e lu cjavut ch'al giravo parfin indevôr. Cussi la vevi cjapado in consejno e batiado cun tun biel nom: Costanza! I la vevi poiado sul prât, in aricès de cjaso. Cuvierito cun tun gei voltât cul cûl in su, i portavi da mangjâ: tar uno scugjelo i metevi un tic di pan dismulît tal lat e tar un plat in bando i poiavi cjar masenado un grum fino. Par durmî, i vevi parecjado uno piçulo covo cul urtigôl sec. Vio pal di la mê mulario e giuiavo cun lio. Vio pe not la sô mari, dal nît, a la clamavo o si poiavo su di un pâl e cjantant ai tegnevo compagno. Dopo un mîos Costanza e jero diventado granduto: e jero rivado l'oro ch'e fos tornado te sô fameo. Aloro Marco al raduno la sô fiolanço e mi clamo me, como mari adotivo, pal ultim salût; cussì, domandado a d'imprest ai pompîrs uno scjalo lungjo lungjo par rivâ fintromai sot lu colm dal tet, a l'â savat denti tal nît, dulà che ju sio fradis i ero già sindelâts. Par dut l'estât i vin sintût cjantâ intor miegionot: e jero Costanza, cun sô mari, che, e sô maniero, nus saludavo e nus ringraziavo!

**Novella Del Fabbro**

*Furlan di For Davûatri*

## Çheco, il vuardian de gjave

Une matine, jo e il gno om o sin lâts a fâ une biele cjaminade sù pes monts; o vin pensât di fâ un troi a Cjas, dongje la dighe dal Vaiont, che si clame *Troi dai sambuch* e al puarte su la vie des cretis che a pochin infûr. Rivâts a Cjas, o tachìn a cjaminâ dilunc il paîs; a man çampe o viodìn la lavine dal mont Toc e sot di nô la dighe dal Vajont. Il nestri pinsîr al va a chê puare int che e à paiât cu la vite chel disastri.



Daspò une ore o rivin sot dai crets dulà che e o viodin cjasis fatis sù intor di chei sdrups. Di no crodi! Si domandìn cemût che a vessin podût vivi rimpinâts culì, cence nuie. Continuant dilunc il troi si scomence a lâ in sù tal bosc e o cjatìn tancj arbui distirâts dal vint dal mêsi di Otubar dal 2018. Nol è facil passâ, ma a fuarce di vitis o sin rivâts fin a 1200 metris di cuote indulà che e je une gjave bandonade. Chi si fermìn a polsâ sentâts su di un cret. Il panorame al è maraveôs, ma viodint il timp che si faseve sù, o sin partîts.

Subit i nestris voi si incrosin cun altris doi voi che nus cjalin. Par-sore chei voi, doi cuars stupents. Al è un stambec, fer, in pose par fâsi fotografâ. E nô o profitìn. O stin cidins, par no disturbâlu: di fat o sin a cjase sô. Bot e sclop si môf e intun lamp, cun cuatri salts su la erte cleve, al sparìs vie.

Un spetacul: nus fâs capî che chi il re al è lui e nus ven spontani clamâlu Checo, il vuardian de gjave. In pôc timp o sin tornâts al paisut pensant a dut ce che o vevin viodût.

**Daniela Schiavon**

*Cors pratic di lenghe furlane di Mortean*

**Nol è nissun troi che ti mene viers la contentece,  
la contentece e je il troi.**

*Buddha*

## Primevere tal ronc

**D**aspò finît di cuinçâ sù chês cuatri vîts, un cussio poetic mi vignì sù di bot. O butai jù une liriche sul gust di bevi tal butaz co si à tante sê di strachetât. E lu disevi tirant dentri chei fantats che mi judarin. “Bevìn insieme tal butaz cumò che o sin rivâts insom...” E vie cjantant, cul grant finâl di un “tai di neri atôr dal fogolâr...”.

Mi jere parude une robe ninine e dit e fat le ai passade al “Strolic”. Daurman il Diretôr mi rispuindè che al met intal librut “nome poesiis premiadis ai tancj concors leteraris”, parie zontant di fâine “conta sul che to sintî denant a li’ plantis, ai lavôrs che a domandin e a la natura che a regala emozions”. Bon, o pensai, le mê naine no je plasude. Pazienze! Mi restave le gole, però, di jessî tai stroleghets...

Ce fâ? O jes intal zardin a cirî l’ispirazion. Cjale di ca, cjale di là, nuie! Ve chi il jutori di un colp di aiar a sgarnassâ un emolâr in rose e fueis di fau e di bedois a zirâ intor a mulinel intune fieste uniche di pics... Ve là, cuatri maonis, cul cjapielut dut zâl, in grin-gule pe sagre come fantatis prontis pai morôs...

In bande, tant che une siore dal Votcent, le camelia cul cotolon dut vert a rosis rossis tant di parê matrone adalt di un cjadreon reâl, e suspire il cjant d’amôr che e si slontane. Il mont cussì nol va, e conte. “Jo mi intosseï... e mi covente tiare, tiare di nuvitât, frescje. E butimi un seglot di aghe cuant che tu mi passis par dongje... orpol!”.

I cjariesârs no si scomponin. Ju travuardi, ur buti le peraule, come che si fâs tra amîs... di nuie... Cidinôr e vonde. No tu sintis

nancje un butalâ distant tant che il barecocol ur à cjapât le volte. E no dome chest an. Chê atre anade, nancje un fregul di cjarie-sis, dome fueis e morcje dilunc dut il pidâl.

Sul pin, lontan des cunfusions, corvâts e crazin parvie di un pont piardût a more, tant di spaurî chechis e colomps che daprûf e faserin colazion.

Tal curnison de braide, intant, te lôr tribune zale, sacodin lis forsis, valentsi di chel aiar che al ven di tramontan. E voressin felvelâ ma l'ulîf lis scaturîs. Une e tente, fûr dal trop, di dâ un chic di cognossince, ma chel merlo dispetôs i fas piardi le volade.

A sdavàs, disordenâts, trops di violis, margaritis, tulipans e pestelacs... Lôr no vuichin pal peston, no domandin protezion. Lôr e abadin dut dal bas cul cjavut che al sponte fûr une volte lâ l'Unviar.

E ve ca che e je rivade le fadute che e fâs dut cul meracul de nature a proponi il so disen. Une man le da ancje l'om. Cualchi volte ancje dôs, cuant che al riscje di falâ, cul proposit di imparâ. Al è par chest che le puisie ogni tant e po servî par sbrocâsi cuant che il cuel... al reclame le sô part cul cartel di chel lavôr che al fâs parie cul sudôr...

Bevìn insieme tal butaz, frutats... un tai di neri atôr dal fogolâr...

**Giannino Angeli**

*Furlan di Felet*

## La semence dai cavalîrs a no je la semence dal lidric!

**V**igji Tavan, nassût tal Fevrâr dal 1903 a Sclaunic, comun di Listize, al vignì in France tal 1920. Al à lavorât in Lorene, dulà ch'al à cognossude la sô femine Louise Marguerite Blanc. A vevin decidût di sposâsi, ma il sindic dal paîs franceis nol à volût sposâju par vie ch'a jerin forescj, cussì a àn scugnût lâ te agenzie consolâr taliane di Saint Etienne, a 200 km di cjase, e lis lôr gnocis a forin celebradis in Jugn dal 1934. La cerimonie religjose e fo fate intune glesie di chê citât in presince dal nono di bande de femine e di doi testimonis no cognossûts e cjatâts pôcs minûts prime.

A Villeneuve de Berg Vigji al acetà di fâ il pichepiere, lavorant intune gjave cun macis pesantis par trasformâ blocs di pierre in cubets di diversis dimensions controladis cuntune sacume. Al jere un lavôr paiât a cotim, al vuadagnave une miserie par metri cubi lavorât. Tal imprin di cheste sô ativitât la int dal lûc no capive ce rumôr che al fos chel che fin des 4.30 di buinore al vignive des rivis dal flum Ibia, che al bagne Villeneuve prime di butâsi tal flum Ardèche. E jere la ore che lui al tacave il so lavôr dûr e faturôs intes gnots claris de Ardèche meridionâl. Al tacave prin dal cricâ dal dì, par spacâ claps e produsi il plui pussibil di metris cubis. Cundut che lis lungjis zornadis a finivin dispès dopo des sîs di sere, al leve indenant a lavorâ cricant mandulis par cont di un scaletîr de region.

Al diventà un specialist une vore preseât. Par chest lavôr delicât al veve sculpît, intun bloc di pierre, la forme ingjavadade di une mandule e cul martiel al rompeve il scus cence rompi il contignût

che, daûr des esigjencis dal scaletîr ch'al faseve i confets, la mandule a veve di restâ intate par podê fâ i confets ae perfezion.

La sô femine e leve a servî li dal farmacist dal paîs, e po cu la none e tirave sù i cavalîrs par produci la galete. Villeneuve de Berg e je di fat la patrie di Olivier de Serre, om di stât francês ch'al à modernizade l'agriculture, che tai prins agns dal XVII secul al à puartade cheste ativitât in France.

Tor la metât di Avrîl e scomençave la incubazion de "semence" dai cavalîrs; le metevin in sacuts clamâts ouets e lis feminis, clamadis *magnarells*, ju tignivin sul sen par mantignîju ae temperadure juste par uns cuindis dîs. Ae nassite i cavalîrs, *magnans*, a son minusculis ruies neris e pelosis di 1 mm di lungjece, ch'a mangjin fueis di morâr cuatri voltis in dî, intes 32 zornadis seguitivis par une once di "semence", vâl a di 30 grams: si veve di proviodi plui o mancûl 1.300 kg di fueis di morâr. La racuelte des fueis e jere lungje e fastidiose e dute la famee e jere impegnade. Cuant che i cavalîrs a mangjavin lis fueis, il rumôr produsût des lôr gramulis al sturnive, tant di no rivâ nancje a indurmidîsi, ma se dut al leve ben une once e produseve fin a 60 kg di galete.

Ma un an la nassite dai cavalîrs no je lade a bon fin, lis feminis a jerin disperadis: comprâ la "semence" al jere costât une vore; par cumbinazion nancje il lidric semenât dal nono nol nasseve tal ort. Par distrazion il nono al veve semenât la "semence" dai cavalîrs tal puest des semençutis de salate. Lis dôs feminis a vevin cirût dibant di fâ nassi i cavalîrs, tignint in cjalt la semence dal lidric sul lôr sen! Lis dôs semencis si someavin une vore e ancje lôr a son stadis imbroadis e a àn cjapât un mus par un cjaval, anzit semence di cavalîrs par semence di lidric!

**Danilo Vezzio**

*Lione (France) - Furlan di Buje*

oni z decreto inhibicōni Mon  
z B'alegacōi z alijs p'dictis d  
s executores fierent z age



**D**i chest Gjal maraveôs, che al à intal bec lis cjartis  
dulà che si cjate la peraule di riclam "connotaris",  
nus ven une impression une vore vive. Daûr des  
convenziions de iconografie medievâl, il bandidôr  
de zornade al ven inclapât biel che al cjante che-  
stis letaris, propit cuant che lis pant al mont.



# MAI

	<b>1</b>	<b>V</b>	S. Josef lavoradôr	<i>Fieste dal Lavôr</i>
	<b>2</b>	<b>S</b>	S. Atanasi vescul	
	<b>3</b>	<b>D</b>	SS. Filip e Jacum apuestui	
<b>19</b>	<b>4</b>	<b>L</b>	S. Florian martar	
	<b>5</b>	<b>M</b>	S. Gotart vescul	
	<b>6</b>	<b>M</b>	SS. Marian e Jacum martars	<i>Aniversari dal taramot (1976)</i>
	<b>7</b>	<b>J</b>	S.te Flavie martare	○
	<b>8</b>	<b>V</b>	S. Vitôr martar	
	<b>9</b>	<b>S</b>	S. Isaie profete	
	<b>10</b>	<b>D</b>	S. Antonin Vescul	<i>Fieste de mari</i>
<b>20</b>	<b>11</b>	<b>L</b>	S. Ignazi di Làconi frari	
	<b>12</b>	<b>M</b>	SS. Nereu e Achileu martars	
	<b>13</b>	<b>M</b>	Madone di Fatime	
	<b>14</b>	<b>J</b>	S. Matie apuestul	◐
	<b>15</b>	<b>V</b>	S. Isidôr contadin	
	<b>16</b>	<b>S</b>	S. Ubalt vescul	
	<b>17</b>	<b>D</b>	B.de Antonie Mesina di Orgosolo	
<b>21</b>	<b>18</b>	<b>L</b>	S. Zuan I pape	
	<b>19</b>	<b>M</b>	S. Ivon avocat	
	<b>20</b>	<b>M</b>	S. Bernardin di Siene	
	<b>21</b>	<b>J</b>	S.te Gjisele regjine	
	<b>22</b>	<b>V</b>	S.te Rite di Cassie taum.	●
	<b>23</b>	<b>S</b>	S. Desideri vescul	
	<b>24</b>	<b>D</b>	Madone dal Jutori	<i>Sense dal Signôr</i>
<b>22</b>	<b>25</b>	<b>L</b>	S. Bede Venerabil predi	
	<b>26</b>	<b>M</b>	S. Filip Neri predi	
	<b>27</b>	<b>M</b>	S. Agustin di Canterbury	
	<b>28</b>	<b>J</b>	S. Milio martar	
	<b>29</b>	<b>V</b>	S. Massim Vescul	
	<b>30</b>	<b>S</b>	SS. Canzi, Canzian e Canzianile martars	◐
	<b>31</b>	<b>D</b>	Visitazion de Madone	<i>Pentecostis</i>

## Nardin, favri da fin

**E**nfri chei 34 asîns che ai for cun Meni di Rope su la Transilberiane dal 1894 indenant, al ere encje Nardin. Par no jessi clamât militâr, a 15 agns al ere belzà in Romanie dongje sio barbe Pascon e une fole<sup>1</sup> a spiçâ pontes e stamps da mine. In munizipi al ere Colledani Leonardo, classe 1874, ma ducj ai lu clamave barbe Nato. Al ere bravon ma, come ducj i artiscj, al ere encje un tic sfornari<sup>2</sup> e ruspiûes, basti dî che, tornât da la Russie, al mengjave e al durmive intala stese favrie dulà che al lavorave, tra fum e faliscjes<sup>3</sup>. Dut il timp dal an al zeve in braghesses di vilût, cjamese penze di flanele e une baretone di lane, forsit pensant a dut il frîet che al veve patît sul Bajkal. Par fâsi une mignestre al tignive sore la fole une pignatute speciâl cun tant di cempli<sup>4</sup>, un elmet muc racatanât su par Orton. Dente al bulignave simpri cualchi vues e cualchi gner-von. Il sâl grues al lu macjave sul incuin, par bevi al doprave da agnorums simpri il sio crucil<sup>5</sup> comprât a Viene e pal caffè al si rangjave brustulant su la fole i cucs da la ue.

<sup>1</sup> forgia

<sup>2</sup> selvatico

<sup>3</sup> faville

<sup>4</sup> manico ad archetto

<sup>5</sup> boccale



*Clâf dal volt da la cjase dai Cjavaluts*

Al varès vût bisugne di une femenute che a i tignès indret la... cjase ma, dopo vîe morosât par pi di vincj agns la Binute, al la veve lassade parcè che, al diseve, a ere zude. “Ma zude indulà?” a i domandave la int curiose. “A è zude in... asîet” al rispuindeve sustât. Al faseve fuarfes par tondi las fedes, strighies<sup>6</sup> par netâ las vacjes, pontâi e vieries di falcet, pics di massanc, al açarave batadories, ma soiredut al ere bulo a fâ seradures cui segrets e clâfs cun doi pietins e doi mestris. Al ere favri da fin e par chest al si ere vuadagnât il sorenon di *Smit*.

La int a coreve a puartâi a comedâ cjaldêrs e calderins, a guçâ fuarfes e roncees. Ma Nardin al ere pegri e estrûes. “Ma parcè no comedâs la rube e tirâs un franc?” a i disè Ciso. E lui: “Mone, no sâstu che la rube par jessi preseade a à da cjapâ un nin da butighe?”. Al pridi, che a i prometeve che la Glisie a si sarès simpri recuardade di lui se al ves fat (dibant, si sa) la clâf dal cjampanîl, Nardin a i rispuindè: “Eh, siôr plevan, muart jo e il cjan di Buie, trie dîs e po pi nuie”.

A nol voleve vidîe garzons pa la butighe, però al permeteve a cualchi râr fantaçut, al prisi di un fiasco di vin al meis, da stâ in peis su la puarte a cjalâ. Nome cuant che a ploveve a lu clamave dente a fâ une clâf di plomp par no straçâ fier.

Chest al ere il barbe Nato, brâf da fâ cees di anzol, mestri tal temperâ pontes e scarpeï, lui stes temperât dal bon Diu intal brout di saete.

**Gianni Colledani**

*Furlan di Clausiet*

---

<sup>6</sup> striglie

## Bepo e Pauli

**E**rin doi fradis che, restâts avonde adore cence mâri, àn scuignût stâ daûr al vecjo pâri une vøre malferm in salût. Bepo, vint vût un probleme da piçul, al ere restât frut tal cjâf e cuindi i è tocjât a Pauli proviodi a regi la famee.

Une vite passade insieme, no jessint nissun dai doi maridâts: Pauli, om grant che al saveve lei e scrivi, al veve lavorât pa forestâl e po par cetancj agns pal Comun fasint il spissighet e tegnint a dovei stradas e cunetas. Bepo, une vøre plui piçul tant che la int lu clamave Beput, al lave daûr dal fradi e al veve une piçule pension di invaliditât.

Ai viveve dal lôr cence dâ fastidi a dinissun; ai coltivave insieme la grande passion das fiestas religjôsas: noi pierdeva une in dut il circondari. Ai partive par timp a pît in mût di jessi tal païs a orari di Messe, si fermavin a gustâ e po, tal dopomiesdi, al gjespui dulà che lu fasevin e a pussision.

Las lôrs figuras si conossevin da lontan: davant al ere simpri Pauli e cualchi pas indaûr, saltuçant, Bepo; ai veve simpri la gjachete e dispès sôre, encje fûr di stagjon, luncs capotons. Sot da gjachete ben in viste la golarine, magari simpri chê cui segnâi di scjarse cunfidence cu l'âghe, ma par ben ingropade atorn dal cuel da cjamêse.

Noi ere triscj! Beput al veve mantignût la gjenuinitât e l'ingjenitât di frut che i faseve viodi il mont ta sô suage plui bieles e cjandides e cheste sô indule lu rindeve simpatic a mularie.

No sai cuant e parcè che a ere començade cheste roube, ma al succedeve che i fruts cuant che lu incrosavin pa strade i disevin:

“Beput, fai un saltut!”. E lui subit al faseve un saltut e po al regalave a chel frut une bieie ridade; content lui e content il frut pal fat che un grant al ubidive al so comant.

E di chescj saltuts Bepo a ’nd à fats cetancj e a diviersas gjeneracions parcè che nol ere bon di dî di no a richieste di un frut encje se i saltuts, lant sù l’etât, ai daventave simpri plui piçui.

E cu la stesse simplicitât, gjenerositât e contentece al si presentave tas cjasas cuant che a colave un complean o un onomastic; mi lu impensi cuant che a San Giuan al rivave a binore in cjase a fâ i auguris a gno pâri: in man un macut di rôsas di prât o di ort, al tocave e cu la sô pachee al diseve: “Permeso! Bondì. Sei Bepo! Sei vignût a fâ i auguris a Batiste!”. Un bicjerin di sgnape, cualchi franc par lâ a tolisi alc e un grassie i fasevin lusî i vôi e segnâ la mûse cuntune sclete ridade che a pandeve dute la sô contentece come cuant che a un frut tu i dâs alc che al brame da timp.

**Celestino Vezzi**

*Furlan di Çurçuvint*

## Checo pessâr

**A** son stâts tims in Friûl dulà che par vivi bisugnave lâ cuintri la leç e fâ cuintribant. Il cunfin cu la Austrie al jere dongje e al sarès stât un pecjât no profitâ de grande difference di presit di chei che a vignivin clamâts “generi di monopolio”, sâl, chinin e soledut tabac. Lavorâ tai cjamps nol rindeve e si scugnive cjapâsi sù e fâ la stagjon in Gjermanie o lâ vie par simpri pal mont. Par stâ in Friûl bisugnave rassegnâsi o murî di fam o fâ a gare cu lis vuardiis cunfinariis e i finançots, riscjant la galere a prin colp o il jessi mandâts vie “al confino” jù pe Italie. Tite Cuc al jere stât prime puartât a Alesandrie e dopo, a vite, recidivo, su la isule di Ponza. Di gnot tai paîs e pe campagne al jere dut un moviment di int direte di là dal cunfin par cjoli il tabac e tornâ cjase prime da l'albe. I trucs par scjampâ a jerin tancj. Il plui cognossût al jere chel di Checo pessâr. A buinore Checo al lave a Maran a cjoli il pes cul so cjaruç. I siei fîs Cuirin e Codemo, invezit, di gnot, a lavin a fâ cuintribant. Si cjatavin pe strade e il tabac al vignive platât sot dal pes. Cuirin e Codemo a jerin i miôr cuintribandîrs, cence pôre, bogns ancje di frontâ cualchi vuardie e par chest plui voltis metûts in galere, ma subite tirâts fûr par testimoneance di lôr pari Checo (“a son stâts cun me a Maran”) e di un biel pes regalât a la int juste. Checo al à vût i siei fastidis, ma graciis al cuintribant al à maridadis dutis lis sôs fiis a... cuintribandîrs di grande esperience. Pe ultime al veve un pocje di dificoltât a cjatâ un bon partît, ma il partît al è rivât in cjase. Une matine al capite di corse disperât Zuan, chel che al stave tal curtilat, cun daûr di lui lis vuardiis doganâls. Par salvâlu, Checo lu à platât tal armâr. E tal armâr al è nassût l'amôr, cussì al à maridade ancje la ultime fie.

**Roberto Tirelli**

## *Lusôr di lune*

*Usgnot il lusôr de lune  
a mi à svuarbade  
e no rivi plui  
a vioditi.  
Tu sês culì:  
i sint il to flât,  
lis tôs mans,  
la tô vôs  
ma il to cûr  
al è bielzà lontan.  
Indulà ti setu piardût,  
sflandôr di une gnot  
scomençade cul cliput  
dai ultins rais di soreli  
e finide sul cricâ dal dì?*

**Iside Del Fabbro**

*3<sup>e</sup> premi concurs di poesie "Vittorio Cadel", Fane 2019*

## Prime le fieste cul bec e dopo le fieste al bec

**A**metât dai agns Sessante dal Nufcent a si scomençave a respirâ aiar di rinascite. Ancje i zovins ai erin contagjâts di cheste ondade di sperance e di bielstâ. Sclûse a l'ere plene di iniziativis. Di chestis, a divertî le int ai erin i torneos di balon fra ostariis. Intal '67 il torneo lu veve vinçût le scuâdre dal albergo Martina, che in finâl a le veve batût chê da le' dôs ostariis Sope-Matiol cun zuadôrs di Cjasesole e Vilegnove. Il Sope-Matiol al veve reclutât un bec come mascote da le sô scuâdre: a lu veve vistît cuntune maute dal Udineis, a striscis blancjis e neris, e a lu veve fat jentrâ intal campo in prime file insieme al arbitro e al so cjapitani, ch'al ere di Vilegnove e al veve cun sè un anghîr, ven a stâ une lungje piertie doprade inta menade dai lens, lunc il flum. L'anghîr al veve in ponte un spiron par parâ in là i troncs e un uncin par tirâju a rive. Ma i pui malicious ai disevin che agns indaûr chei di Vilegnove a lu dopravin par robâ qualche sac a chei che di gnot ai profitavin dal scûr par traspuartâ di platât cui cjars le marcjanzie, cence paiâ il dazi. Le sere, dopo le finâl, a Sclûse a l'ere fiestone e il bec al ere il vêr protagonist. A une certe ore i vincitôrs a lu vevin puartât ancje a Resie, inta discoteche. Dut sturnît, ài al veve fat i bisugns e un zuadôr, svelt, a ju veve recuperâts e metûts inta cope dolà ch'a si brindave cul verduç. No savìn se il bec a si ere divertît tant che i siei supporters! A si sa ch' al veve vût bisugne di une setemane par smaltî le fieste, il timp necessari par clamâ intor di sè par l'ultime volte ducj i participants al torneo: intun plat saurît preparât dal brâf Rico, il paron dal albergo Martina.

**Antonino Danelutto**

*Furlan di Scluse*



*Il gjalut de bieie creste  
a San Zorç de Richinvelde  
(foto Dario Quattrin)*



## LIS BOTIS PIGURADIS Vincenzo Munaro

Vincenzo Munaro (Funes di Chies d'Alpago 1947) al frequentà la Academie di Vignesie, al scomençà la atività espositive tal 1971 e dal 1969 al à une galarie di art a Grau. Dal 1975 si dediche anje ae scriture e a piture di afrescs. Tal 1983 al scomençà la sô colaborazion cu la Cantine di Cormòns: une da lis primis a jessi fate e je la bote dal titul *La gioia del paese*. Vincenzo Munaro al piturà figuris di popolanis che a vendin i prodots de tiere cuntun stîl figuratîf ideâl pai siei temis preferîts: il mont agricul e artesan, int dal popul, i paisaçs e lis cjasis dal Belumat. Simpri tal 1983 Vincenzo Munaro al piturà une altre bote dulà che al è dissegnât a maniere di ritrat il campion di ciclisim *Gino Bartali* (1914-2000). La rafigurazion dai champions dal sport e je une des carateristichis des botis



*Vincenzo Munaro, bote cun  
La gioia del paese, 1983,  
dopo dal restaur*



pituradis: si cjatin par esempi anje lis rafigurazions di Gustav Thoeni par opare di Enrich Demetz e chê di Dino Zoff fate di Mario de Tuoni.

**Gabriella Bucco**

*Vincenzo Munaro a vore  
su la bote cun Gino Bartali, 1983*

## Li' striis di Mujesse

**A**Mujesse, une piçule borgade di Mueç, une volte al an li' striis si cjatavin cul plen di lune e li balavin dute la gnot. Tal indoman la prime persone di Mujesse ch'a la saltave fûr di cjase a la vignive trasformade in une bestie salvadie. Dopo un an, intune biele gnot di lune plene, li' striis a tornavin a balâ e chel ch'al ere stât trasformât in bestie al cerive di tornâ a cjase sô. Se un da la famee lu cjoleve in cjase, al tornave la persone ch'al ere prime, se no al varès scugnût tornâ a provâ l'an dopo.

**Anna Maria Santarossa**

*Disen di Annalisa Gasparotto*

*Furlan di Mueç*



## UN ARTIST DAL GRAN CÔR Timp di rogazions

**T**al lunari gleseastic e ta chel agrari lis rogazions a àn figurât di agnorums tant che un dai moments plui significatîfs par lis nestris popolazions. Lis preieris, lis benedizions, lis invocazions di protezion e di jutori a jerin inalore il just impegn par la gnove campagne agrarie. Chestis pratichis propiziadoris a cjatin la lôr fonde lontan ta la gnot dai timps. In etis preromanis la pratiche religjose paiane e previodeve di cjatâsi a preâ dongje da lis aghis (flums o lâts) oben in splanadis intal mieçs dai boscs che la int e rivave li dai lôr vilaçs.

La Glesie e à recuperât chescj rituâi e ju à stramudâts inta lis rogazions. Tal imprin lis scompartive in *Litaniae maiores* (chê dai 25 di Avrîl) *et minores* (chês dai trê dîs prime de Sense): lis primis a jerin di riunde romane, lis secondis a jerin di riunde galiche.

La Rogazion dai 25 di Avrîl e jere clamade maiôr bielzà intune formule di invît dal 598 (*Liber Pontificalis*)<sup>1</sup> in oposizion a chês altris romanis mancul solenis, mancul impuartantis o antighis. A cjaparin il puest di chês paianis par implorâ aiût par une buine stagjon agrarie e in particulâr cuintri dal rusin intai forments.

Lis rogazions piçulis (*litaniae minores*) a jerin stadis metudis sù di san Mamert vescul di Viene intal Delfinât (muart ator dal 470); inta la realtât a son la continuazion dai antîcs *Ambarvalia* che a cjaparin un biel sburt cuant che la sô diocesi e patî gruessis calamitâts (fûcs, taramots, vueris, racolts grams), come che al cite San Sidoni Apolinâr (*Epistoles*, V, 14, VIII, 11).

---

<sup>1</sup> *Liber Pontificalis*, II, 36, Duchesne, 2 voll. Parigi, 1886-1892.



Lis rogazions piçulis si lis faseve seont trê itineraris difarents: ator da la vile, ator dai orts, ator par la taviele. La prupission e partive a buinore come par solit dopo messe: devant il Crist grant, daûr une di chês altris trê crôs piçulis, po i oms, il muini cul cjalderin da l'aghe sante, l'*asperges*, e il libri, il predi (in tonie, cuete e stole viole), e daûr lis feminis.

Ta lis croseris la prupission si fermave, il predi al leieve un toc di vanzeli, al alçave la sô crôs e al segnave i cuatri ponts gardenâi fasint la invocazion: *A fulgure et tempestate. Libera nos Domine*, e rispuindeve la int.

**Gotart Mitri**

## Il ciaval cu la tos

**C**o no ere la television a brusâ tun colp la pi bie-  
le storiute dal mont, contade  
tal stes moment a milions di  
personis (la clamin *audience*),  
si veve gust di contâ robis  
di paîs, ostarie par ostarie,  
famee par famee, o in file,  
dopu sene, ta li' seris di Un-  
viar, disìn dai Sans a Carnevâl.  
Une di chistis a ere chê di  
un contadin dal Gorc che al  
va dal spesiâr di Tisane a do-  
mandâ une midisine pal siò  
ciaval, ch'al à la tos. Co un  
ciaval al tos o al duar distirât, si lu saveve, nol è nuie di fâ, ma  
il spesiâr al dîs, tal dialet di Tisane: "Te fa una piria de carta, te  
meti te la piria questa polvere che te regalo mi, te ghe meti la  
piria tel dedrîo, e te sufi. Varda de far proprio come che te go  
dito". (Il spesiâr, babio, ai veve dat la stranudine). Un'ore dopo il  
contadin al torne, ruàn in muse, cui voi sglonfs, il fassolet in man  
par parâsi di une stranudade ogni minût, ch'a pareve une bom-  
be, e al domande alc par se: "Gastu fato come che te go dito?"  
al domande il spesiâr. "Sì dotôr, ma al à soflât prime il ciaval".



*Scuelârs a Baseglie  
(foto Giuliano Borghesan)*

**Gianfranco Ellero**  
*Furlan di Frofean*

## *Rose di Mai*

*Rose di Mai, sês tu Anna Rita  
nassude il 13 in ricuart di Fatima  
Creature celestiâl  
insieme ai nestrîs fîs  
Nella e Lorenzo  
Preait Jesù par noaltris  
restâts in chest mont  
a scombatî.  
Voaltris in cheste vite su la tiere  
vês vût sole  
tantis soferencis.  
Cumò gjoldê  
intal amôr pa purece  
des vuestris animis candidis.  
Intercedê cun Marie S.S. par noaltris  
restâts bessôi cu la tristece  
intal cûr.*

**Argeo Tomat**

## Grazie ae musiche

**D**al puint si viodeve il soreli lâ a mont che si spieglove inte aghe dal Tevere. Il scûr de sere a planc a planc al cjavave la lûs di chê che par me e jere stade une zornade di no dismenteâ. Jessi li a Rome cul gno coleghe, professôr di musiche ongjarês Tâmas Endre Toth, par partecipâ tant che relatôrs ae Cunvigne internazionâl di studis su la musiche de scuele de infanzie, organizade dal Ministeri de Publiche Istruzion ai 2 e 3 di Mai dal 2019: no jere robe di pôc.

Ce tantis emozions vivudis cul bati cûr di buinore fin gnot!

O vevi incuintrâts mestris, professôrs e esponents dal ministeri, int une vore impuartante. Ma soredut o vevi vût l'onôr e il plasê di cognossi di persone il professôr Luigi Berlinguer, za ministri de publiche istruzion (1996-2000). In chê volte si jere ocupât de riforme de scuele taliane cun chê di introdusi, intal cjamp de istruzion e de ricercje, profundis inovazions.

Al sintive profondamenti la dibisugne di un adeguament de risposte de scuele a lis gnovis pretesis di une societât improntade su la sveltece di trasformazion di dut un sisteme. Insumis, une riforme buine di jessi simpri plui integrate inte suaze europeane e mondiâl e segnade de economie de cognossince.


Zaromai a 87 agns, al è un om di grant spessôr uman e cuant che al fevele al trasmet dut il calôr e la sapience de sô vite di impegn, spindude a pro de formazion di cetancj zovins (sevi par vê insegnât par agnorums inte Universitât di Siene, sevi par vê scrit un grum di libris di storie, di dirit, di pedagogjie e di cetant altri).



Al merte marcât il so interessament pal insegnament de musiche te scuele taliane: in dì di vuê al è president dal comitât, di gnove istituzion, pe difusion de musiche e de culture sientifiche e tecnologjiche inte scuele superiôr. Daspò chestis riflessions, cumò dal puint si viodeve aromai dome un sblec di lûs che adasi si leve distudent. Rome la capitâl! Ce plasê gjoldi de tante bielesce e de sodisfazion di jessi stade li a contâ dal lavôr fat dilunc i ultins vincj agns inte scuele de infanzie di Rualis di Cividât, adun cui professôrs di musiche Edit Acs e Tâmas Endre Toth. Ducj i doi ongarês di divignince, ma bogns di cjantâ e fâ cjantâ i frutins par furlan. Vê fat musiche doprant ancje la mê marilenghe, par chei di Rome e i mestris di fûr region, e je stade une scuierte fûr dal ordenari. Testemoneance preseade che e met in lûs che par fâ buine musiche ogni lenghe e je chê juste. Ma dite fra di nô: vuelistu meti chê furlane?!

**Miriam Pupini**

*Cors pratic di lenghe furlane di Cividât*



## Presunzion e ignorance

**D**ulà e cun cui che o ai podût e o pues, o ai e o feveli simpri par Furlan, il lengaç che i miei a àn simpri doprât fevelant in cjase. Convint di fevelâlu e ancje di leilu avonde ben (lassin pierdi il scrivilu), no mi soi mai impensât di verificâ, in cualchi mût, se la convinzion e jere juste.

Za mê, il gno amî Dario mi à dite che al veve scomençât a frecuentâ un cors di lenghe furlane a Reane e mi à mostrât sfueis scrits par furlan che i vevin dât al cors. Inalore o ai scomençât a lei alc e a spiegâi il significât di cualchi peraule che jo o cognossevi e lui no.

Finide la leture i dîs: “Mi plasarès capî a ce nivel ch’al è il gno furlan!”. Simpri plui sigûr di savê e cognossilu benon. E lui, sintint chestis peraulis, mi rispuint: “Tu sâs lei. Tu cognossis il significât di peraulis e jo no; parcè no vegnistu al cors? No tu varessis di vê dificoltàts di sorte a stâ daûr!”.

Cualchi zornade dopo, mi soi notât e daurman o ai scomençade la frecuece, convint di no vê dificoltàts, simpri parcè che tant il furlan lu feveli di cuant che o ai scomençât a cjacarâ.

Bielzà des primis leziions o ai scugnût ricrodimi; inte leture mi capitave di imberdeâmi cun cualchi peraule: i voi a viodevin une robe e la bocje e diseve une altre; intal scrivi... al sarès miôr ch’o stès cidin. Intal prin scrit (un detât par furlan), acentis, pronons, adietîfs e articui...: meti jù chel just intal moment just al jere come cjapâ un terno al lot e no mancjave la complicazion – fra lis tantis – de letare “q” che par furlan si scrîf, gjavade cualchi ecezion, simpri “c”.

Mi semeave di jessi, in chei moments, intes scuelis elementârs, cuant che il mestri nus faseve provâ a scrivi i prins detâts e jo o sintivi une robe e o scrivevi une altre.

A dut chest mi soi rindût cont che o savevi pôc e nuie di acjadjaments, personis e int che a àn fate la Storie dal Friûl.

O pensavi di jessi a cjavâl, ma no jeri e no soi nancje a mus!

Gracie al cors, o sai alc di plui de storie e des personis che a àn fate la storie dal Friûl, o sai lei e scrivi un fregul miôr – almancul cumò o sai cuant scrivi “cu” e cuant scrivi “qu” –, sì che duncje disìn che o soi un che al crodeve di savê cori e che invezit al cjamine cul jutori des croçulis (vocabolaris, libris di gramatiche e ducj i tescj che a puedin judâ)... e che dispès si inçopede.

**Amelio Sirch**

*Cors pratic di lenghe furlane di Reane*

**L'om ch'al môf lis montagnis  
al scomence puartant vie i claps plui piçui.**

*Proverbi cinês*



*Une cartuline di Giovanni Battista Corgnali*

*Cheste cartuline e je stade scrite e spedide di Udin di Giovanni Battista Corgnali cun destinatari Riccardo Danelutto, che al steve a Racolane di Scluse. Il mitent, nassût a Reane ai 28 di Setembar dal 1887 e muart a Udin ai 28 di Otubar dal 1956, al fo soci fondadôr de Societât Filologjiche Furlane e bibliotecari in Udin fin tal 1953. La cartuline e je di proprietât di Antonino Danelutto.*

## *Souvenirs du Friûl: la scuola*

**I** miei gjenitôrs a son ducju doi di Secuals. A son vignûts in Francia, gno pari a 13 ains, e me mari a 29 cuant ch'a si è sposada. Gno pari al è stât un puc lungjût a decidisi, za ch'al veva 29 ains encja lui. Duncja i soi nassuda jo par prima, e i soi zuda a la scuola francesa, coma ducju, indulà chi ai imparât il francês, encja se a cjasa a si fevelava ducju par furlan, tant che nissun a induvinava chi eri foresta se i no lu disevi. Un dopudimisdì, i varai vût un siet, vot ains, i zuiavi intal curtîf da la scuola cu le' me' amighes a un zouc che in Francia a clamin *la marelle*. A si disegna par cjera cul zes un retangul cun drenti 6 cuadris compains e a si devi fâ zî indevant, da un cuadri a chel altri, 'na scjatuluta, pocant avant doma cu un piè. Spetant ch'a tocji a me da zuiâ, i stavi pensant a ce biel ch'al era da cjaminâ su pa la mont ch'a stava davôr cjasa nestra a Secuals, in mieç da le erbes altes e dai flôrs ch'a vevin un profumo di paradîs, cu l'aria frescja ch'a calava jù da la mont la sera. E i ai dit a le me' amighes: "Siu mai stades a cjaminâ pa le mons cuant chi sîs stades in vacansa?". E le' me' amighes a si son fermades di colp, a mi àn vardada cui vui spalancâs, e a àn dit: "*Hein!? Quoi!? Qu'est-ce que tu dis?*", ch'a sarès: "Ce!? Ce ditu? Ce sotu davôr a disî?". E i mi soi duta confusionada, capint ch'i vevi fevelât in furlan e no in francês. I mi soi scusada e spiegada, e i sin dutes scopiades a ridi. Sta storia a mi è restada in ment par tant timp, e dopu d'in chê volta i soi semprît stada atenta a ce peravoles ch'i stavi disint. E di fati, a è stada la prima e l'unica volta in duta la mê vita chi ai fevelât in furlan ai francês cença rindimi cont di nuia!

**Eleonora Mongiat**

*Versailles (France) - Furlan di Secuals*

n<sup>o</sup> l<sup>as</sup> v<sup>as</sup> effectuale g<sup>o</sup>tinentes no  
uz cuz illustei<sup>mo</sup> ducali d<sup>no</sup> Venecia



**I**l Pavon al à intorsi dute la sô nobiltât regâl, al pont che nol ven doprât par insuazâ la peraule di riclam "alienatonis", che si viodile su la pagjine interie. Chest esemplâr biel e maestôs, che al è un simbul cristologic par ecelence, al decrete il prudêl che Udin i proferis al Patriarcje.

# JUEN

23	1	L	S. Justin martar	
	2	M	S. Marcellin martar	<i>Fieste de Republiche</i>
	3	M	S. Carli Lwanga e compagns martars	
	4	J	S. Quirin vescul e martar	
	5	V	S. Bonifazi vescul	○
	6	S	B. Bertrant di Aquilee patriarche	
	7	D	S. Norbert vescul	<i>Santissime Trinitât</i>
24	8	L	S. Medart vescul	
	9	M	S. Efrem diacun	
	10	M	B. Indrî di Bolzan	
	11	J	S. Barnabe apuestul	
	12	V	S. Onofri rimit	
	13	S	S. Antoni di Padue frari	◐
	14	D	S. Liseu profete	<i>Santissim Cuarp e Sanc dal Signôr</i>
25	15	L	S. Proto di Aquilee martar	
	16	M	S. Aurelian vescul	
	17	M	S. Rainîr remit	
	18	J	S.te Marine vergjine	
	19	V	SS. Gjervâs e Protâs martars	<i>Sacratissim Cûr di Jesù</i>
	20	S	Cûr imacolât di Marie	
	21	D	S. Luîs Gonzaghe jesuite	●
26	22	L	S. Nicete di Aquilee vescul	
	23	M	S. Josef Cafas predi	
	24	M	Nativitât di S. Zuan Batiste	
	25	J	S.te Eurosie martare	
	26	V	S. Vigjli vescul e martar	
	27	S	S. Ciril di Alessandrie vescul	
	28	D	S. Ireneu vescul	◐
27	29	L	SS. Pieri e Pauli apuestui	
	30	M	SS. Prins martars de Glesie Romane	

## I bleons di Sunte

**L**a Sunte a morosave cul Nuti fin da garzonete. Jê a ere di Celant e lui di Prades da Dalt, un fantat come tencj, ma socio da la “Gioventù ribelle” une ghenghe<sup>1</sup> che dispès a la butave in staiare<sup>2</sup>, cun musiches e fiestes da bal che encje il pridi al veve vût di ce lagnâsi. Da cheste companie di fantats, plens di vite e di fiât, al saltà fôr il Delmo, un dai doi “Arditi” di Clausîet da la Prime vuere e diviers operaris da la Imprese CBZ (Concina, Brovedani, Zannier) che a lavorà tant di mûr e di clapadories in France. In viste da maridâsi cul siò Nuti, che intant al lavorave in Gjermanie, la Sunte a cirive da tirâ dongje un francut pal fat che la sô famée a no veve né vacjes né tiere. In Primevere a zeve intala Vile a voltâ orts, semenâ fasoi e a fâ raclis<sup>3</sup>, a tondi fedes<sup>4</sup> par vîe lane da filâ, intala colme da l’Estât a puartâ dente fen cu las cjarcoles, in Autun a tirâ mîei e cjàpâ sù cjastignes e in Unvier a puartâ legnes cul cos. A fuarce di dâi, a rivà a comprâsi une biele dote. Cun impegnu, tignint cont dal



*San Jacum, ta la piere da l’aghe sante  
di San Pauli*

<sup>1</sup> banda

<sup>2</sup> divertimento, festa

<sup>3</sup> paletti per i fagioli

<sup>4</sup> tosare le pecore



timp di dì e di not, a recamà bleons<sup>5</sup>, cussigneles<sup>6</sup> e suiemans cun tante bravure e puntilio che la Stele, la regjine dal *gossip* locâl, a diseve che une dote compagne a no la veve nencje la fie di Cecon. A veve comprât uì dal Bilit guseles e crochets di ogni sorte, spagnolets e rochei di fîl di mil culûers. Su ogni bleon a veve recamât la letare iniziâl G (Giovanni) dal Nuti e la sô A (Assunta), ben incjadenades tra lûer intun svualopâ di cerclis. Il bleon nuviçâl po al ere une mirivee: su la plete las letares iniziâi G e A ai steve dente un côr dut ros, cun sot scrit, a *punto erba*, “OGGI SPOSI”. Ma cul passâ dai agns il Nuti, che al ere simpri stât un nin discjaviestri, al si ere butât a bintar<sup>7</sup> e pierdût par las Gjermanies. Tantes sperances e tant lavûer, dut al ere zût intune bole di savon. Pecjât che chê dote, ben pleade intal comò e belzà marcade cu las letares G e A, a si sfantàs come la nîef tal soreli. Ma la Sunte a ere femine di snait e a no si pierdè. A si cjalà ator par cjatâ cualchi fantat malcumâl, pur che al ves ce che jê a cirive. Chei di famee a i meteve in lûs chest echel. Ma nissun a i zeve ben. Fintramai a si lassà morosâ dal Bepo (all’anagrafe Giuseppe Bidoli) e cun lui a si maridà. E cu la sô dote a fasè un figuron. Las iniziâls ai ere a puest! “Ma alore – a i disè sô santole – parcè no il Gusto, lavoradûer, sparagnin, fi bessûel cuntune biele stale di vacjes?”. “Parcè che il non dal Gusto – a i rispuindè la Sunte – in munizipi al cumince cun la A e no cun la G”.

**Gianni Colledani**

*Furlan di Clauset*

---

<sup>5</sup> lenzuola

<sup>6</sup> federe

<sup>7</sup> sfaccendato, perdigiorno

## La mê grande passion: la montagne

**n**ol è facil spiegâ cemût che e je nassude in me la passion pe mont, anzit, a pensâ ben, cuant che o jeri frut o vevi dut une altre idee. Jessint a stâ intun paîs dongje il cjamp di aviazion di Rivolt, si pues dî che o soi cressût a pan e frecis tricolôrs: il gno insium al jere chel di fâ il pilote militâr. O varès dât cuissà ce par podê rivâ a pilotâ un avion, ma vie che a passavin i agns mi rindevi cont che il gno insium al sarès restât li. Cui disevot agns e je rivade ancje la cartuline militâr: par podê “svolâ” o ai fat domande par lâ intai parecjadudiscj e cussì o soi lât a Pise inte “Folgore”. Li o ai fat un mês di istruzion militâr e daspò di vê passât lis provis par jessi ametût tal cors di parecjadudist, o ai fat un altri mês cun altris provis di superâ e ae fin o soi stât abilitât a saltâ jù cul parecjadudis. A Pise mi soi butât jù trê voltis. O vevi a pene finît disenûf agns e daspò mi àn mandât a Bolzan inte compagnie dai parecjadudiscj alpins, un cuarp militâr speciâl indulà che si veve il compit di saltâ jù di un elicotar sui monts e si veve di jessi bogns di movisi sul prât tant che su la nêf o di rimpinâsi sul cret. Li mi soi cjàpât bielis sodisfazzions, ancje chê di vê l'onôr e di meti il cjapiel di alpin. I nestris istrutôrs a jerin pardabon brâfs; mi àn insegnât cemût movisi sù pes monts e cemût evitâ i pericui, ma soledut mi àn fat cognossi un mont gnûf, che mi plaseve, propit tal mieç des Dolomitis.

Finît il servizi militâr, pôc daspò, o ai cjatade la morose, che cumò e je le mê femine, e o vin scomençât a lâ in feriis propri in Tirôl di misdì (par talian Alto Adige). Li, in chei agns, a jerin daûr a vierzi lis primis scuelis di parecleve, cul parecjadudis. Dal moment che

no vevi vût la sodisfazion dal svol che o cirivi, mi è vignude l'idee di lâ intune di chestis scuelis. Cuant che o ai contât a la femine la mê idee, jê mi à cjalât intai voi e mi à dite: "Varessistu il coraç di lâ a butâti jù, savint che jo o sarès chi a spietâti cul cûr in man?". No ai pensât plui di cualchi secont, i vuei masse ben par fâi un tuart cussì grant.

A chel pont no mi restave che la mont, une passion che e à a cûr ancje jê. O pues dî di sigûr che su pes monts o cjati dut ce che mi covente par stâ ben. Cuant che o soi su di une spice, o ben sentât su di une crete, e o ai sot di me la valade cul paisut, ator dutis chês altris monts, plui lontan la planure fin al mâr, in bande un mac di stelis alpinis e il cjamoç o il stambec che a saltin sù pai crets, jo o stoi ben dentri, mi sint in paradîs, in pâs cun

me stes e cul mont intîr. Cualchidun mi dîs che o soi mat: daspò vê lavorât dute la setemane, lâ a scanâmi su pes monts. Jo i rispuint che par viodi ce che o viôt là sù e par provâ ce che o provi dentri di me o soi pront a fâ dute la fadie di chest mont.



**Silvano Bertolini**

*Cors pratic di lenghe furlane  
di Mortean*

*Lis monts viodudis  
de capane des Cinc Pontis*

## Pre Nardin

**P**re Nardin al veve caratar. Caratar fuart, nuie di pôre, e al leve dret pe sô strade. A pene vignût fûr dal Seminari lu àn fat subit plevan e mandât dulà che i voleve un predi bon di frontâ i nemîs de Glesie e ancje chei masse amîs dai predis, che a finivin par dividi i paîs. Al ven po mandât intun paîs dulà che si scontrin dôs fazions di catolics. Nol à fat ingrès uficiâl, chel cui arcs, la bande, lis poesiis dai fruts. A cidin al è rivât di gnot e tal doman aes cinc di buinore si è presentât a dî messe, metint subit in clâr che ducj a varessin vût di meti il cjâf a puest. Par metilu a la prove, cualchidun al à cirût di tacâ barufe, ma pre Nardin al à tacât a scufiotâ di une bande e di chê altre fin a fâju rindi. Intes predicjîs nol leve masse pal diplomatic: nons e cognons e peraulis no propit di glesie. Il dì dai Sants dal Disesiet, passade la ritirade di Cjaurêt, a messe al ven fûr disint dai todescs: *“Adesso sono arrivati i castigamatti e cumò us drecin par ben”*. Ancje se al veve salvât il paîs e la sô int, cuant che a tornin i talians al ven metût sot procès tant che austriacant. E je lade ben. Intai agns des lotis politichis plui voltis lu àn spietât di gnot, cuant che al leve a puartâ il vueli sant, par dâi un sac di legnadis, che in un mût o chel altri al rivave a tornâ al mitent. Al spietave che a vignissin fûr de ostarie e... la colpe le cjapavin l’orcul o il vin. Deventât vecjo, lu àn fat monsignôr, ma no i tignive tant. Cussì, une sere al à lassât un biliet su la taule de canoniche: *“Torni cjase mê”*. E tal doman al è lât a dîlu al vescul. Pre Nardin al saveve ancje jessi di bon caratar e al veve un pont debil: nol saveve predicjà se nol fevelave sclet. E sclet nol à vudis simpatiis, rispjet simpri.

**Roberto Tirelli**

## *Il troi pierdût*

*Pieris fruiadis dal soreli  
e lis furmiis in file  
sul prât di urtiis  
tal gno paîs antîc.  
Zocui di cjavai  
sul pedrât di polvar  
e oms cu la scorie te arie.  
La lune tal toblât  
e il troi di saût  
daûr dal mûr di elare.  
Il profumo dolç  
di most tai caratei  
tes gnots di pôris  
e di siums  
sot di un cîl strapont  
di stelis.*

**Egle Taverna**

*3<sup>e</sup> premi concurs di poesie "Vôs de Basse", San Zorç di Noiâr 2019*

## Scaletis e bregons curts

**A** San Pieri, il 29 di Jugn, a Racolane a l'ère fiestone: messe grande prin di misdi, gnocs a gustâ e a le sere tirâ scaletis. L'usance da le' scaletis (in Cjargne a son clamadis cidulis) a l'è un grum antighe; in di di vuei a si rinove dome le sere di San Pieri, ma une volte a le durave fin a Sant Ramacul, il 12 di Lui. I fantats a si procuravin cualche setemane prime il baston di sangit che, secjantsi, al diventave pui robust; le' scaletis a le erin di len di fau, cuadradis e foradis intal mieç par podê infilâlis sul baston. Apene ch'al vignive scûr, a si impiavin i fûcs e le' scaletis a le scomençavin a svuelâ: "San' Piêri, San' Pauli, san' cidule, va là e tòrnimile cà!"... e vie, disegnant striscis rossis tal cîl. Une scalete a l'ère parfin rivade inta stazion da le ferade e cualchedun al scontint che une a l'ère entrade pal finestrin intun scompartiment dal treno diret Rome-Viene. Par evitâ situazions dal gjenar, dispes i carbonîrs ai vosavin jù dal punt di smeti e i zovins ai scjampavin. Une sere a tirâ le' scaletis al ere ancje il Bepi Mulinâr cui siei amîcs. Visâts da le int ch'ai stevin rivant i carbonîrs, ducj i zovins ai vevin taiât le cuarde fûr pai sterps e po intai prâts. Purtrop intal scûr il Bepi no si ere inacuart di un reticolât, al ere lât intor e al veve sbregât i bregons luncs. E dî che cualche ore prime, zuant a balon intal campo dut ingravât, al ere colât e al veve rot un âtri pâr di bregons luncs. Cuissà mai ce tant che i varès vosât sô mâri: in poucjis oris fats fûr doi pârs di bregons luncs, e no 'nt veve atris! Tal doman il Bepi al girave cui bregons da le zornade prime, ma scurtâts. "Ce cji al dit tô mâri?". "A mi à vosât: d'ore indavant tu cji contentis di doi pârs di bregons curts!"

**Antonino Danelutto**

*Furlan di Scluse*



*La masanete a Lignan  
(foto Dario Quattrin)*

LIS BOTIS PITURADIS  
**Ivan Crico e Alexander von Reden**

**F**intremai dal 1989 Ivan Crico (Gurize 1968) al met dongje la ativitât artistiche a chê di poete in lenghe bisiache. La bote che lui al à piturade tal 2005 e je une des plui bielis de cantine par vie dal so aspjet oniric e surrealistic: une muse di grandis proporzions si intaie in prin plan incuadrant il panorame dal Cuel. Il restauri al à puartat ae lûs lis veladuris e i particolârs dal paisaç che al cjape profunditât. “La idee di un personaç classic in prin plan – al dîs Crico – e volarès ricuardâ che la coltivazion de vît si puarte indenant, in cheste zone, di etis antighis, invezit il paisaç sul fonts al è chel dai cuei di Cormòns. E je une imagjin che e à vût tante fortune tai media”. Dongje si cjate la bote piturade tal 1983 cun stîl *naive* di Alexander Sixtus von Reden (Viene 1952-2004), grafic, scritôr e gjornalist, che al à vivût par tant timp a Cormòns, autôr cun Joseph Schweikhardt di *Furlanische Reise* (1980).

**Gabriella Bucco**



*Ivan Crico, bote cun muse di femine e paisaç, 2005, dopo dal restaur*



*Alexander Sixtus von Reden, bote cul viaç di Viene a Cormòns, 1983, dopo dal restaur*



## La strie di Cjampiûl

Une volte a Cjampiûl ai cjalavin di strie une femine ch' a la voleve che so fi al cjolès une fantate di Stai. Ma cheste a la veve za cjatât un atri, propit di Stai. Cuant che i doi ai àn decidût di sposâsi, lui al è lâ a Tumieç a cjoli la roube ch'a la coventave pa li' gnocis. In chê volte a si lave a pît pa la mont fin a Dieç e po jù a Tumieç. Tornant indaûr, il fantat a si è fermât a Dieç, al à polsât un pouc e dopo al è tornât a partî par vignî ai Stai. Ma a cjase nol è mai rivât. Tal indoman sô mari al è lade a cirîlu e a Dieç i an diti che lu vevin vedût a partî pai Stai. Alore dute la int da la borgade al è lade a cirîlu pa la mont: lu àn cjatât muart, cuntune ladrîs intor dal cucl. Ai disevin che la colpe al ere da la strie di Cjampiûl, ch'al à volût fâ dal mâl a chê fantate che no la voleve cjoli so fi.

**Elena Pugnetti**

*Furlan di Mueç*

**No stait mai a dî che o vês cjatât la veretât,  
disêt pitost che o vês cjatât une veretât.**

*Gibran Khalil*

## UN ARGISTE DAL GRAN CÔR I cavalîrs

**P**ai contadins, dopo che tal mês di Mai a vevin semenât la blave, il lavôr plui impegnatîf e impuartant par l'economie di une famee a jerin i cavalîrs. Di passe 4000 agns il cavalîr (*Bombix mori o sericaria mori*), al jere alevât in Cine e i Cinês par cirche 3200 agns a vevin difindût il lôr segret. Al jere stât puartât in Europe tor il 550: si conte che doi fraris di San Basili a vevin contât al imperadôr Justinian cemût ch'ê vignive fate la sede in Cine e par ordin dal stes imperadôr a jerin stâts mandâts un'al-tre volte in Cine e, cuntun truc, par vie ch'al jere un reât puartâ fûr il cavalîr, a vevin platât une buine cuantitât di ûfs tal vueit dai lôr bastons di cjane gargane. Ju àn puartâts a Costantinopoli e a àn insegnât a tirâju sù. Prisonîrs grêcs ju àn puartâts in Sicilie tor dal 1000; tal 1300 a jerin in Lombardie e dal 1400 Vignesie ju veve sparniçâts sui siei teritoris.

In 40 dîs si rive a vê la galete, passant par lis cuatri mudis dal vier. In chest period si à di dâur di mangjâ fuee di morâr: prin sutile sutile e po simpri plui gruesse; si à di gambiâur ancje il jet e insom si ur da ancje bachetutis intiris di fuee. Si à di tignîju tal clip (22-25° C). A mangjin 4 voltis in dì: a 4-8-13-22. Tor la 35<sup>me</sup> zornade, il cavalîr al ten sù e al niçule il cjâf: al ûl dî ch'al è pront par lâ a filâ. Si ur prepare il *bosc* cun pae di siale: a clessidre, a raier... La galete, dopo ch'ê ven secjade a 50° C, e va in filande, la prime industrie furlane che e à dât lavôr e *emancipazion* a ce-tantis fantatis furlanis, dulà che il fîl di sede si torne a disgrupâlu. Si ju comprave a telain o a once: un telain cun 20.000 ûfs al podeve dâ 20 kg di galete; 10 kg di galete a podevin dâ 1,08 kg di sede.



A coventavin tor ai 10 cuintâi di fuee.

Un cavalîr, di grant, al pese sui 4/5 gr, al è lunc 9 cm. Al da une galete ch'è pese di 1,8-2,2 gr, al bute fûr un fîl lunc di 1.500 a 2.000 m, sutîl di 10/20 milesims di mm.

Fintremai al 1800 a jerin in Friûl 212.000 morârs. Si faseve 2.500.000 kg di galete.

Il lessic colegât al presente tantis curiositâts: *cavalîr*, clamât cus-sì parvie dal moviment a onde dal cavalîr tal movisi sul cjalval; *galete*, peraule ch'è ven dal francês *galet*, francês antîc di *gal* (claput), galic \**gallos*, clap taront.

**Gotart Mitri**

## La confession curte

Un di Frofean, ch'i clamarai Gino, al va piligrin a la Mont Sante di Gurisse e dopo vingesiet ains al desît di confessâsi. Si inzenogle ta un confessionâl e al domande: "Podio fevelâ par furlan?".

"Come no – a rispunt une vôs masculine di là dal barcunut sbusât – duciu i fraris chî a san il furlan, il sloven, il talian".

Cunfuartât, al tache a contâ: "I ài blestemât Diu, la Mado-ne e i Sans". "Tropi' voltis?" al domande il frari. "Cui li à

contadis?!" al rispunt Gino. "Tropi' voltis in dî? Dèis... vinç... trente?" al continue il frari. "Eh – al rispunt Gino – trente al ore, no in dî". E il frari: "Vuàtris talianàs i blestemais simpri!".

Gino, ch'al veve fat l'alpin, nol podeve permeti a un sclâf di ufin-di l'Italie (ence s'al saveve che al veve dit une veretât).

"Talianât a mi?" al conteve Gino in ostarie: "Soi jevât in pèis, i ài tacât a ciapà a puins il confessionâl e a sigâ: ven fore s'i ti âs coragio, ch'i ti spachi la muse!".

Al è dibant dî che intant ch'al conteve, al blestemeve.



*Fradi e sùr  
(foto Giuliano Borghesan)*

**Gianfranco Ellero**  
*Furlan di Frofean*

## Un ricuart de infanzie dongje il Tiliment

**C**uant che o jeri frute o stavi a Vidulis, un piçul paîs tra Dignan e San Denêl, dacîs dal Tiliment. O stavi cui vons, gno barbe Menuti, mê agne Madalene e cui miei cusins.

Ancje i fruts a judavin in cjase: cuant che o vevi dîs agns (cumò o 'nd ai otantedoi) cul buinç e doi cjaldîrs di ram o lavi a cjoli la aghe dal Tiliment: aghe di bevi e par fâ di mangjâ. I cjaldîrs si picjavin te spacecusine e si beveve la aghe dal seglot cul cop. Par lavâsi e par altris ûs si doprave la aghe de roe che e partîs di Vilegnove e e va fin a Codroip.

Si mangjave ce che si cjapave sù tal ort (lidric, cesarons, pomodoros, blede); lis feminis prime di lâ tal ort a disevin: “O voi a cjapâ sù di cene”. O mangjavi ancje ûfs e formadi. La cjar si le mangjave da râr. Une volte al an a vignivin a purcitâ e e jere une grande fieste. La cjar si le tignive tal camarin, une stanzie a nord de cjase, e i fruts a jerin obleâts a mangjâ il sanganel, la sanc dal purcit indolcide cun le ue calabrie; ur disevin che al faseve cressi ben, par fâju stâ bogns.

Il gno von al veve le buteghe “I coloniai” e l’ostarie di Vidulis. E jere tante miserie che cualchi volte a vignivin lis feminis e a disevin a gno von: “Pieri, par plasê, dami doi ûfs di rîs...”.

Lui al veve ancje un grant ambient che al mantignive simpri cjalt dulà che al tignive i cavalîrs, che a mangjavin di dî e di gnot lis fueis dal morâr che jo o vevi di taiâ fin fin dut il dî. Cul gno von o puartavin lis galetis te filande di Dignan o di Cjarpât.

**Marina Leonarduzzi**

## Il zovin ch'al à menât a balâ 'ne musse

**T**ancju ains fa, in ta un paîs da la Basse furlane, al ere un zovin di non Toni. Lui al ere un bon e brao zovin, al ere encje un pûc mataran e cualchi volte a 'nt cumineve une da li' sôs. Vêd di savê chi il zovin al veve scumitût cui amics ta l'ostarie chi se la sô murose no sarès zude a balâ cun lui a la sagra dal paîs, al varès menât a balâ 'ne musse al post da la murose. I amics no i crodevin e i disevin: "Vedarìn, Toni, se ti sôs cussì bulo di menâ a balâ 'ne musse al post da la tô murose!".

"I starès ben a viodi se no la fai; intant jo i scommet 'ne sene par ducju: se però i meni a balâ la musse, vualtris i mi la paiês a mi" al rispunt Toni.

La murose di Toni a veve non Mariute; par dî la veretât no ere bune di balâ, e Toni, co 'l zeve a cjatâle a la sere, a i diseve: "Mariute, ti prei cun dut il côr, ven a balâ cun me a la sagra".

Ma Mariute a i rispundeve: "Cjâr il miò Toni, ti sâs ch'i no soi bune di balâ. No sta fâmi vignî par fuarse. I farès dome brute figure".

"La brute figure i la fai jo ch'i ài di stâ come un pipinot a cjalâ che' altris. Viôt, Mariute, se no ti vens a balâ, jo i meni a balâ 'ne musse tal tiò post".

Mariute, a sintî cussì, a si ere encje un ninin rabiade e a i dîs: "Valà, mataran, tu ti âs dome matetâts pal cjâf; no poi migu imparâ a balâ adès ch'a mancjin pûs dîs a la sagra?".

Al rive il dì da la sagra dal paîs, che a ere pai zovins une da li' puci' occasions par fâ cuatru salts sul taulàs, cussì encje al nostri Toni ch' i plaseve tant balâ: al ere un di chei balarins chi se 'l ves pudût al varès balât encje su la cuarde!

A la sere da la sagre, cuan' chi dut il paîs al ere tirât dongje dal siolo par balâ, a si viôt in somp da la strade a vignî indenant Toni cundune musse pa la cjavesse. Al rive dongje dal taulàs e al entre lui e la musse e po al si met a fâ movestis di bal a timp di musiche, insieme cu la musse.

E a cui ch'a i domandave il parsè ch'al ere lì a balâ cu la musse, a i rispundeve: "La me murose no à vulût vignî a balâ e jo i ài menât a balâ la musse!".

Ducju si son mitûts a ridi; pôc però a ridevin i siò amics ch'a vevin scumitût une sene cun Toni e chi adès a vevin di pensâ a tirâ sù i bêçs par paiâ; nuie invessi a rideve la murose di Toni, Mariute, chi cualchidun a i veve contât il fat e j a si ere rabiade tant ch'a no voleve pi savênt di Toni.

I doi a son stâts rabiâts par un biel toc di timp, ma dopu, a si sa come ch'a van a finîle li' robis, Toni a i à domandât perdon a Mariute. Chê, d'in prin, a à fat la muse dure, ma sicome ch'a si volevin veramenti ben, po a i à perdonât, a àn fat la pâs e dopu un pu' di timp a si son sposâts.

***Benvenuto Castellarin***

*Furlan di Roncjis*

## Astât di une volte e di cumò

**L**'Astât e vignive clamade la “stagjon dai puars” parcè che intai siei trê mêis ancje i puars a podevin mangjâ, magari dome pomis e verduris, e vistîsi cun cualchi svelandrin; cussì la stagjon dal cjalt e vignive benedide de puare int, tant che un proverbi al dîs: “Benedete la Istât cun ducj i siei pulçs”. Vuê, par furtune, di miserie no s'int cjate plui in Friûl e cheste e je la prime difference positive de Astât di vuê rispjet a chê di une volte. L'Astât di cumò, difat, no semee masse a chê dai nestris vons, ancje intal cjalt che stant a lis ultimis anadis al è fûr di mût e nol è plui concentrât intai mêis di Lui e di Avost, cuant che si sfogave la canicule.

Cumò ancje Jugn al à lis sôs scalmanis come dut Setembar, tant che la antighe cjaldure segnade de fieste di Sant Laurinç, il 10 di Avost, no à la sô ponte inte prime desene dal mêis (“San Laurinç gran cjaldure, San Vincenz gran criûre, l'une e l'altre pôc e dure”). Difat, come che al contave un altri proverbi, “la prime ploie di Avost e rinfrescje il bosc”, la ploie no faseve di mancûl di rivâ cu la Madone assunte (15 di Avost) a ristorâ cul fresc plantis, bestiis e personis.

Cussì no dome i vecjos paîs cu lis placis e la fontane o il poç, cul trop des feminis colmenadis di cjaldîrs e di seglots sul buinç a cjapâ l'aghe, e i fruts a zuiâ cul cercli e a brincâ lisartis no si viodin plui, ni vecjos sot i bersots tai curtîi che tes matinadis celestis a profumavin di mignestron che al buliçave intes citis sui spolerts: nancje il cjalt nol è plui chel che o jerin abituâts a gjoldi o a patî cuant che nô o jerin canais.



Fin a pôc timp indaûr, i plui fortunâts di cheste stagjon a lavin in feriis inte nestre montagne o intal nestri mâr, intant che in dì di vuê si po lâ in feriis dut il timp dal an: ancje d'Unvier cetancj a partissin pai mârs di chel altri emisferi dulà che a cjatin Astât. I verps de contadinance sicu seselâ e bati il forment, seâ fen, sraî il cincuantin, brancâ vîts de passade Astât di lavôr furlane no esistin plui e simpri mancul a son chei che si visin dal mont rurâl di une volte, che al veve l'Astât cul davoî des cialis sui pôi, il movisi dal sborf o de salamandre intai ricès, lis perucis di San Pieri e il penacul de blave par San Ramacul, i cjamps di papavars jenfri il forment, lis gnot di lusignis e fin tal cricâ di il cjant plui biel, chel dal solitari rusignûl. E cuant che a sintivin il gri avostan a clamâ cun marum *vistî, vistî*, a savevin che l'Astât e leve al mancul e che a rivavin lis vendemis; une altre biele stagjon e steve par finî, une des tantis di ognidun, ca jù sot il misteri dal cîl stelât.

**Mario Martinis**

**Fâs ce che tu puedis,  
cun ce che tu âs e dulà che tu sês.**

*Theodore Roosevelt*

## Amôr al è amôr

Teresine e jere une zovine – ma no tant zovine – che e viveve di bessole intun paisut su le culine. E veve un morôs che al lave a cjatâle trê volte par setemane, come che e jere usance in chê volte.

Severin – cussì si clamave el morôs – al faseve el marangon e al stave intun paîs dongje, insiemi ae mari anziane. Lui nol viodeve l'ore che e vignîs le sere di martars, o di joibe o di sabide, par lâ li de sô biele. Al saludave la mari e cu le biciclete, plen di morbin, al partive di corse.

Une sabide di sere come el solit si cjatave a morosâ: rivade l'ore di fâ fagot, stant che al pluviave a seles, Teresine pinsirose i dîs di restâ a durmî culî.

A Severin, sintude une tâl propueste, i à tacât a bati el cûr a mil pe ligrie; e sarès stade le prime volte di un intric dal gjenar.

“Eh!... però – al disè – mê mari e pensarà...”. E avilît nol saveve ce fâ.

Po, dal dit al fat, i dîs: “Teresine, spietimi, che o voi a visâ mê mari che mi fermi a durmî achî di tel”.

E di dute buride al è lât e tornât sot de slavine!

**Giuliano Pascoli e Primo Chittaro**

*Furlan di Colorêt di Montalban*

## Migrant furlan

Un furlan ch'al va via pal mont, al parta via cun lui pocja roba che si viôt. Ma 'l à cun lui un grun di robis che nissun no cjararà mai, e che nol è nancja necessari di declarâ a la frontiera. Incrostât sot da suelis dai soi scarpons, al è dut al polvar da stradis dal so paîs: li pi grandis che passin par Pordenon o par Udin, là che 'l è un tant biel cjiscjel cjantât ta ducj i lûcs, e par Guriza e al so cjiscjel dal Medioevo, fin a Triest, via al cjiscjel di Miramâr. Li' stradis pi piçulis, che van di Monfalcon a Palmegnov, la toronda sierada fra i mûrs, Sarvignan sul Aussa, in direzion di Aquileia, l'antica citât romana e la sô glesia tant famosa. Ma sot li' scarpis, sarà ancja al savalon di Grau e di Lignan, o i claps cjarâts sù su lis stradelis pa' li montagnis da li' Dolomitis fin ta Cjargna. Su la lenga, gi resta al gûst dal prossût di San Danêl, dal pes di Maran e dal bon vin blanc dai Cuei Orientâls dal Friûl implenâts di soreli. Tal so cûr, tant pi grant che la valisuta che 'l ten ta man, je duta la sô famea restada a cjas, i soi amîs che cjantavin in côr cun lui, dopo una taça di vin, e ancje chei che duarmin in pâs tal cimiteri dal paisût là ch'al è nassût. E sot al so capot a e platada duta la sô vita passada tal Friûl, spietant di podê fassi 'n'altra vita pi biela in cualchi banda, ator dal mont.

**Pietro Mazzuchin**

*Castelginest (France) - Furlan di Sarvignan*



expunus leas ueas quas leto aio legim' atq; vidim'  
 in quaz visione pma fluctuauim' int utiq; f. p. ga  
 y i intimis vos suscitare sps demissos zhuculq; sopi  
 z inimica puitas suis limitib' no g tenta ecia wy  
 quetos satagit gtruba. Sentim' emulos libe ta  
 cis nre fideles nros tuz tacitis q; aptis diffidacib'  
 ade' ut dilectos fideles nros nobiles doymum & Ca  
 directuz & euchauea z alios z psumpta ipoy scelera ia  
 pstiles mce in bona nre vtiney ece z loca eiusd' de  
 ctom comissa pp que z si taceret lre vre ex debito m



**O** vin ancjemò une Chimere, che cu la sò prepotence  
 diaboliche (orelis che a somein cuars e barbin di  
 cjavre) e je daûr a brincâ la peraule di riclam "ve-  
 stro": jê e vûl rapresentâ la crudeltât dai nemîs,  
 riclamâts, cun riferiments palês a la lôr tristerie:  
 "ipsorum scelera" e "manus hostiles".

# LUI

	1	M	S.te Ester di Babilonie regjine	
	2	J	S. Oton vescul	<i>Madone dal lat</i>
	3	V	S. Tomâs apuestul	
	4	S	S. Eliodôr di Aquilee vescul	
	5	D	S. Antoni Marie Zacarie predi	<i>Perdon di Barbane</i> ○
28	6	L	S.te Marie Goretti vergjine	
	7	M	S. Claudio vescul	
	8	M	S. Andrian III pape	
	9	J	S.te Veroniche muinie	
	10	V	S. Piu I di Aquilee pape	
	11	S	S. Benedet abât	<i>Patron d'Europe</i>
	12	D	SS. Ermacure e Fortunât martars	<i>Patrons dal Friûl V.J. e di Udin</i>
29	13	L	Dedicazion de Basiliche di Aquilee	◐
	14	M	S. Camil di Lellis predi	
	15	M	S. Buineventure vescul	
	16	J	Madone dal Carmêl	
	17	V	S. Alessi rimit	
	18	S	S. Fidri vescul	
	19	D	S.te Rine muinie	
30	20	L	S. Apolinâr di Ravene vescul	●
	21	M	S. Laurinç di Brindisi frari	
	22	M	S.te Marie Madalene dissepule	
	23	J	S.te Brigjide di Svezie muinie	<i>Patrone d'Europe</i>
	24	V	S.te Cristine di Bolsene muinie	
	25	S	S. Jacum apuestul	
	26	D	SS. Ane e Joachin	
31	27	L	S. Aureli vescul	◐
	28	M	SS. Cels e Nazari martars	
	29	M	S.te Marte di Betanie dissepule	
	30	J	S. Pieri Crisolic vescul	
	31	V	S. Ignazi di Loyola predi	

## I cjans di Zanierin

**T**encj ai la clamave Madalene o Madalin ma i pi nome la Siorate. A ere plene di bêçs e di rube e a veve tantes manîes, une soledut, chê da tignî une sdrume<sup>1</sup> di cjans par cjase, no par la cjace o par la vuardie, ma cussî par gust, cun dut che il Regio Deceto n. 1393 dal 1918 al prevedès une tasse di ben 150 lires al an par i cjans di lusso. A tignive a pueste une da las sôs dôs sier-ves, la Fumatine, par regolâju e godolâju. Par nudrî cheste chipe<sup>2</sup> di cjans la Siorate a no badave a spes: cjar gnervine e talpes di vigjel in becjarîe, lat, argjel e muset che dispès chê gjatevuaite<sup>3</sup> di Fumatine a pacucjave intal platât. Ma dut chest ben di Diu al ere mortâl pai cjans. Vidintju cussî flaps, cu l'orele vuache<sup>4</sup>, il vûli clopadiç, simpri incagnassâts su la plencje, a mandà a clamâ Zanierin che, a si diseve, al vès une midisine segrete e infalibil. Al vignè jù a Duminisie e, nome vidintju cussî sglonfs e massepassûts, al capì diret di ce cure che ai veve bisugne. A la Siorate a i disè da mandâju sù intai Zuanes cun furniment di cjar, argjel, musets e un bandin di lat ogni doi dîs, che intun meis a ju varès

<sup>1</sup> moltitudine

<sup>2</sup> squadra

<sup>3</sup> furbacchiona

<sup>4</sup> moscia



Ce che al reste di un altâr dal Pilacorte

vuârîts sence fal. Chest Zanierin al ere Zuan Zannier dai Zuanes (dovent al ere dut un... zuanament), nevûet da la Imperadore, che cussì a ere clamade sô none parcè che a veve vûts 16 fîs come Marie Terese d'Austrie.

Al ere un omenut minût, lizîer come une sghirate<sup>5</sup>. Par vivi al tignive intala stale di Aicjes cuatri cjares sôs e cuatri a invernâ e cul torniu al faseve salarins e oufs di legn par mendâ cjalcins. Insome, picje e dispicje.

Rivâts sù i cjans, a ju serà intun traglet da la stale di Aicjes cul proposit da tignî ben alte la... trisîet. Al cuminçave il ramadan. Prime e seconde di nuie, par spurgâju. Terze e cuarte di peleotes di vacje carampane<sup>6</sup> che i cjans nome ai nasâr. Cuinte di scuete frante e lat laît (che cun chel bon al mirindave lui). Sul zîr da la setemane a i puartà un poden di sîer cuntun baldan<sup>7</sup> di zocol dente, che par zî a gafâlu cuasi ai si negave. Se po Zanierin a i butave dente cuatri rufs di polente fride ai ju brincave par arie prime che ai colàs. La cure a cuminçave a fâ efiet. Tai dîs a vignî, nome a sintî vie pal bearç il uicâ dal cempli dal poden a i vignive l'aghegole. Finide la cure, i cjans ai tornâr a Duminisie, biei sclagns e tant lustris di pîel che la parone a no finive mai da laudâ la midisine di Zanierin.

Insome, ducj contents: contente la Siorate, content Zanierin, ma encjemò pi contente la Fumatine che a varès da nouf podût saurîsi il stomi.

**Gianni Colledani**

*Furlan di Clausîet*

---

<sup>5</sup> scoiattolo

<sup>6</sup> vecchia

<sup>7</sup> interiora

## Agosto

**T**al biel mieç dal vert enfre i peçs di Plan da Sine, Agosto al si stave fasint sù, bessol, un pouc a la volte la sô cjase e propit al plan cjere al veve viert l'ostarie "Al ciclamino" che so-redut vie pa Estât a clamave tante int a cjapâ il fresc. Chei di une certe etât ai passave oras a giuâ a cjartas o a balinet tai cjamps di boças adôr dal bosc, la gioventût si sgarsave fûr baluçant al son dal juke box che, se il timp lu permeteve, al vignive tirât di fûr. Agosto, a sô mode simpatic e estrous, encje cuant che al ere plen di int al començave a sunâ la fisarmoniche e al ere tant cjapât da musiche che i clients, che ormai lu conossevin, si rangjavin bessôi a servîsi.

In chest flic di pâs tal mieç dal bosc l'alegrie da armoniche si massedave as vous dai giuadôrs di balinet che, so-redut cuant che il pont nol ere trop clâr, si scjadenavin in vosarias infinidas, scurtant e slungjant las misuras enfre las balas.

Ma cuant che al entrave in funsion il "giûc proibît" i berlis, invesse di calâ, ai si multiplicave. In chei timps il giûc da morra no si podeve fâ, ma si sa che cuant che une roube no si pos fâ a stice in mò di plui la vôe.

Cussì achì, jessint fûr dal paîs, si davin apontament i giuadôrs plui acanîts; las partidas in cubie a cuatri as ere las plui gjoldibilas; il taulin ben salt, i tais dal vin tai cuatri cjantons, il pietin disegnat cul gjes diretamenti su pa taule e si partîs. Si bat il pugn e si va indavant fintramai che no si fâs il pont: a vûl prontece, sveltece e bravure a viodi il giûc dal avversari, a decidi tros deits meti in mostre e cirî di induvinâ la some totâl da giuade. Si sta



plui a dî che a fâ parcè che la bielece dal giûc a è propit la veloci-  
tât. Partidas cjaldas, cu las mûsas che as tire al paonàç, las gôsas  
che si sglonfin e, se las roubas no van pal troi just, une golaine di  
blestemas da fâ vegni ros encje il biât Crist picjât sôre dal ban-  
cjon. E par dâ fuarce i numars ai ven strambîts o ripetûts plui  
voltas: “Treî, treî, treî! Trema il mondo!” o inmò “Issa, issa, issa  
ancora!”, che al sarès il sîs. “Cinc, cinc, cinc!” e s’al va in puart  
“Cinc tal cûl!”. Ogni pont, un lamp di pouse, juste par parâ ju il  
“dint” tal riscjel e vie cuintre chel âti giuadôr.

Achì al ere il ream di Agosto, mûse invuluçade tai riçots dai cja-  
vei, artist a sô mode: al veve ingegn e mistîr tant che muradôr,  
ma al coltivave encje la passion pa poesie e pa musiche. Cuant  
che l’ispirasion a tocave, al molave dut, al cjapave la fisarmo-  
niche e al tacave a sunâ e, se la lune a ere chê juste, encje a  
componi vistint di musiche il so pensâ. Enfre il cjant dai grîs e  
dai ucej, tal trimulâ dal vint, al passonave enfre las notas e las  
compagnave cul las sôs cjantôsas; e une tra chês che plui i stave  
a cûr, o che plui a pandeve il so jessi, a diseve: “Cuore vagabon-  
do nella notte al chiar di luna, dimmi cosa fai che cosa cerchi tu?  
Dimmi cosa fai, che cosa vuoi dalla vita?”

**Celestino Vezzi**  
*Furlan di Çurçuvint*

## Toni barbîr

**L**a buteghe dal barbîr e je par solit il puest dulà che si puedin cognossi ducj i peteçs. Il mistîr al veve avonde fortune e di buteghis a 'nd jere plui di une, a seconde de simpatie che al reclamave il paron di cjase. La division si faseve par stât di sachete – di une bande i siôrs e di chê altre i puars – o pûr par idee – di une bande i benpensants conservadôrs e di chê altre chei che a vevin simpri alc ce protestâ. La buteghe dai rivoluzionaris e jere chê di Toni, vignût soldat sù dal tac de Italie pe vuere dal Cuindis e restât achì, cuc, par vê cjatât di fâ famee. Si capive che di furlan nol veve nuie, par jessi piçul e scûr di piel, ancje se al fevelave furlan miôr di tancj altris. Stant che nol rivave a sfogâ lis sôs ideis rivoluzionariis, al à finît par cjàpâse cu lis feminis che, secont lui, a jerin masse liberis di fâ ce che a volevin. “A cjase mê o comandi jo. E zito” al diseve dispès ai siei clients. Par dî la veretât, cun chei che si fidave al fevelave ancjemò di rivoluzion, mostrant il fusîl picjât sul mûr. Il disgraciât che in chel moment si cjatave sentât su la cjadree, a viodilu manezâ il rasôr, al cjàpave une grande pôre. Par vie de politiche i jerin restâts pôcs clients e la sô femine, par tirâ indenant la famee, e veve scugnût lâ a fâ voris a Udin. E alore lui di lunis, cuant che la buteghe e jere sierade, al tacave boton in place, ma nissun nol voleve vê a ce fâ cun lui. Ducj a disevin che la sô femine e jere une sante a sopuartâlu e le crodevin vitime dal cjacaron. Rivant cjase di Udin un lunis sot sere, lu à viodût tignî comizi in place: “File cjase, basoâl, che tu âs ancjemò di lavâ i plats!”. Ruvinade la fame di paronzon, no i à restât altri che spietâ la rivoluzion.

**Roberto Tirelli**

# *Rolls Royce*

*Tu jeris come une Rolls Royce,  
biele di murî.*

*La vernîs lusinte perfete  
nence un puntin*

*come une piel di vilût.*

*Doi lusôrs vêrs*

*che cuant che mi cjalavin fis  
mi incjocavin.*

*El cofano daûr*

*perfet fat cul compàs*

*taront come un'angurie.*

*El paracolps denant*

*biel in fûr*

*dividût in doi.*

*Ducj i rumôrs*

*des rovedis*

*dal mutôr*

*e jerin une musiche*

*o un cjant lisêr*

*come lis tôs peraulis*

*co tu fevelavis.*

*No jerin profums.*

*Ore presint dopo tancj agns*

*tu sês doventade*

*un otomobil "storic":*

*cualchi ciulament*

*e la vernîs un ninin*

*scussade.*

*Ma tu restis simpri*

*une Rolls Royce*

*biele di murî.*

**Edi Cudicio**

*1<sup>a</sup> premi seziun autôrs in furlan  
dal concurs "Giulietta e Romeo",  
Udin 2019*

## Il gîr di Patoc

**U**ne cincuantine di agns fa, cuant ch'a le stavin cjapant pît le' garis sportivis di marce in montagne, a Sclûse tancj zovins (ma ancje cualchedun un pouc indavant cu l'etât) ai vevin scuviert le passion di cori. Par chhest, cuant ch'a l'ere le fieste di sant Pieri, a le vignive organizade une gare fra chei paisans ch'a no vedevin l'ore di confrontâsi: le partenze e l'arîv ai erin stabilîts a Sclûse. I participants ai vevin di lâ sù fin a Patoc pa' le vecje mulatiere e ai vevin di tornâ in paîs pa' le strade provinciâl di Nevêe. Di solit il gîr al durave pouc pui di un'ore.

A une di che' garis al à volût partecipâ ancje il Livio Mut, un simpatic personagjo sordomut su le cuarentine ch'al viveve di bessôl e al stave vulintîr cui zovins. Intant ch'a si scjaldave i muscui dai polpaçs, un da l'organizacion ai veve grafetât su le canotiere, davant e daûr, un sfuei cuntun grant numar 1. Prin da le partenze il Livio al ere stât conseât di no fâ dut il percors, ma di fermâsi dopo une decine di minûts daûr dai sterps, di tornâ indaûr e di lâ a spietâ i concorints tal ultim trat, prime da l'arîv. Nue ce fâ! Al ere partit in cuarte e al veve fat dut il gîr. Cuant che ormai al ere cence fuarcis, lunc le strade provinciâl al ere stât cjariât sul cofano di un'auto R4 e al ere rivât al traguart tra i sbatimans da le int. Orgolious da le sô prestazion, a si ere presentât davant dal comitât a ritirà il premi: un cabarè di pasticins e un fiasco di vin. Al ultim rivât, il Bruno Cjanut, i ere tocjade une biele pergamene cu le scrite: "...e dopo di me, il vuoto!".

**Antonino Danelutto**

*Furlan di Scluse*

*La craçule tai magrêts di Vivâr  
(foto Dario Quattrin)*



## LIS BOTIS PITURADIS Giovanni Cavazzon

Une vore intense e je la ativitât dal mestri senograf Giovanni Cavazzon (Luino 1938) pe cantine di Cormòns, scomençade graciis ae amicizie cun Luigi Soini jenfri il 1994 e il 1997 cuntune serie di *Nature Morte* pal pont vendite “Il cantiniere”, dongje Cormòns. Tal 2003 al partecipà a la instalazion *Un grande tino per dodici autori* di Paolo Coretti, al decorà ancje il negozi de cantine cun cuatri taronts e dôs botis pituradis. La prime di chestis le piturà tal 2006 cun intervents a pirografie: la figure centrâl al è un grant *Bacco*, cun dongje dôs sacumis di len di *Baccanti*, une blancje e une nere, il simbul dal vin blanc e dal vin neri, che a crein un complicât zûc senografic.

Tal 2007 Giovanni Cavazzon al piturà un altri font di une bote antighe, vuê inte grande sale riunions de cantine. Ancje in chest câs al piturà une figure di *Baccante* metude intun curtîl di gji-rasoi e vîts, cun tancj particolârs iperrealistics, par esempi la ombrene puartade de cuarde.



Giovanni Cavazzon,  
bote cun Bacco e Baccanti,  
2006, dopo dal restaur

**Gabriella Bucco**

## La glogje e i poleçs d'aur

**U**ne volte une regjine al è passade pa la strade, lajù dal puint di Mueç, chel vecjo di len. Forsi al ere la regjine Ane, la femine di Carli IV, ch'a si ere fermade a Resiute a gustâ, in occasion dal viaç fat par lâ a Rome a incuintrâ il so om che l'an prime, tal 1354, al ere stât incoronât imperadôr dal pape. Ceste regjine lajù sul puint al à dit: "Moggio, sei ricco e non sai di esserlo"! A si riferive al tesaur che al è platât ta galarie dai fraris, clama-de cussì dopo fondade l'Abazie. La galarie, però, al ere ancjemò prime, al è stade fate ai timps dal cjasciel dal Cacelin e la survive par podê scjampâ, in câs di assedi, o par sicurece. In ceste galarie, duncje, al è stât platât un tesaur: une glogje cun siet poleçs d'aur. Ai disevin che la glogje la fos stade grosse come un purcit di grasse e che i poleçs ai fossin stâts grancj come gjalinis par fâ brût.

E cuissà ce tante roube di valôr che i fraris ai varan platât ta galarie vie pal timp! Su ceste glogje, su chescj poleçs, sul fat da la galarie a si è tant fantasticât, a si è tant lavorât parsore cul cjâf, a si è tant cirût ta Cjalderate, fra chês foranatis pericosis, tra chei poçs scûrs, cuasi neris, fra chês sclapaduris di crets.

Par dut al sameave di viodi l'ingrès da la galarie. E cussì sgarfe e picone, sgarfe e picone par cjatâ alc... ma no si è mai cjatât nie!

**Ugo Moretti**  
*Furlan di Mueç*

## UN ARGIST DAL GRAN CÔR

### La trebie

**I**l forment: “...Al è il pan de nestre taule / ch’al madrès cumò tal spi: cui ch’al are la sô tiare il so premi al cjate li / premi e glorie de fadie la taviele colôr d’aur; cui ch’al are la sô tiare lu console chel tesaur”. Cussì tal *Cjant dal forment* su peraulis di Enrico Fruch e musiche di Luigi Garzoni. Il pan, aliment di fonde e di benstâ (gjavâi a un il pan da la bocje – un sacrilegio!), al jere pôc su lis taulis furlanis s’o pensin ai agns Cincuante, cuant ch’al paronave il bon odôr da la polente. Une colture, chê dal forment, rivade chenti da la Tiere fertile da la Miezeline mesopotamiche su lis monts Karacadag, une cjadene logade jenfri i jets dal Tigri e chel dal Eufrate.

Il forment al jere la seconde jentrade da la famee contadine, un franc di meti di bande par frontâ cualchi spese par la famee. I contadins ch’a ’ndi vevin cualchi cjamp a clamavin la trebie tal lôr curtîl. Une zornade di polvaron cu la pule ch’è vongolave sui cjâfs protets di cjapiele e fazolet.

E coventave tante int: oms pal lavôr plui pesant su la trebie a messedâ balçs, taiâ la leande e compagnâju tal batint, feminis a cjapâ su pule e a puartâ alc di fresc di bevi.

Ancje i fruts a davin une man a prontâ i filistrins par leâ lis balis di stranc. Un grant sunsûr, cetant sudôr par spietâ insom la sentence dal decimâl: veval butât? No jerin grandis produziions. Si contentavisi di ce che Diu al mandave. Vino di pensâ a une rese dal 2,5, al plui dal 4, rispjet a la samence metude tal cjamp dal secul XII?

Vuê cetant di plui: ator ai 50 cuintâi par etar!





A son cambiadis lis technichis di lavorazion, si fâs rotazion tra lis colturis (tecniche za praticade tal 783 ai tims di Carli il Grant)<sup>1</sup>, ma soredut si doprin concims par judâ a vignî fûr da lis spesis. Si diseve “bati il forment”, se si ûl no cuntune forme corete: “bati” al jere riferît a prin ch’è rivàs la trebie, cuant che il forment slargjât suntun salizo si “bateve” cul batali o batadôr, dât dongje di un mani lunc (freulîr) e di un plui curt (vergule), unîts di une strisse di corean o cjadene (pedie). Vuê, dopo da la trebie di curtîl, e je rivade la mietitrebie ch’è va diretamentri tal cjamp e intun zornade ti “bat” desenis di etars di forment!

**Gotart Mitri**

<sup>1</sup> R. Chamberlain, *Carlo Magno Imperatore d’Europa*, Roma, Newton Compton, 2006

## Mans di fari

**S**econt l'anagrafe dal Comun di Roncis lui si clameve Domenico Paron, ma a Frofean al ere par duciu Meni Fari. Nol ere dome un brâf fari, Meni, al ere ence un galanton. E la dì dopo da la pension al ere lâf a ringrassiâ il cont, ch'ai veve dât la vôr e cussì, in veciae, al po-deve gioldi la pension.

A fuarse di bati sul incuìn da la farie, fra mûrs neris come il ciarbon, al ere doventât sort, ma li' mans a vevin imparât a doprâ li' boris. Une dì ta la farie, intant ch'i fevelevi cun lui, al ciarîe di tabac la pipe, la met in boce e, cun tune calme che a mi mi pareve masse lunge, al ciape une bore di ciarbon e a la poe sul fornêl di len par impiâ il tabac. Cuant che il fun al à tacât a rivâi in boce, cun dute calme al à ciapât la bore cui dês e, sense primure, a l'â mitude cun chês altris. E dome dopu doi o tre secons al à sgorneât la man come cuant che un a si scuete! Jo, tirant i vôi, i cialevi la sô man par viodi se a veve ciapât foc, ma lui ridint mi à dite: "Mans di fari. A son come chês dal diau. No àn pôre dal foc".



*L'accordo-truffa*  
(foto Giuliano Borghesan)

**Gianfranco Ellero**  
*Furlan di Frofean*

## Fruts tes valadis

**T**ancj paîs, ni tant dongje ni tant lontans. Int di confin, intune misture di lenghis, di fature, di tocs di lens sclapâts tal bosc sot la mont. Di peraulis che si pierdin lontan imberdeadis tra di lôr. Stefanut, un fantacin dal çuf scjavelât, al veve zurât che so fradi Martin, dai cjavei come la panole, al sarès lâ a studiâ a Cividât, in chê scuele là che si va vistûts di fieste. A lavorâ tai boscs si faseve tante fature, ma il pari nol cognosseve altris soluzions. La mari invezit e saveve che di là des montagnis al sarès stât plui facil cirî lavôr. Cussì une dì a buinore, cu la borse plene di fuarce e sperance, e rive te Basse par scomençâ chê pagjine, che e varès permetût ai fruts culture e projets.

Par jê mari, une grande braûre, ma tancj sacrificis su chê strade intorteadе. Di Invier la nêf e cuvierzeve dut; dome il fum dai cjamins, che si corevin daûr intun mantîl di cîl, al confuartave il so cûr. I fruts a cjase le spietavin. In Primevere dut al tornave a florî: campanelis, violis e primulis, maglis di colôrs tes valadis. La domenie amôr e tradizion a prontavin su la taule un mangjâ speciâl... e sintâts ducj a spietavin: il pari da cjâf, Martin in bande cui voi che a lusivin, Stefanut al cjalave. Ognun content a so mût. La mari, strache, e cirive cun tenerece i siei fruts... e il suspîr viers chel om che planc planc si slontanave. Dut al va ben, ma ancje no, parcè che tal cûr di mari e di femine, cualchi volte al faseve mâl chel dolôr simpri plui fuart. Ma la famee e je une vore impuartante: al è cussì che i àn insegnât e al è cussì che e va indenant.

**Anna Maria Negrini**

## L'istrice e il marchês

**V**igjut al ere un frutin sensibil e creançôs. Al viveve in Svuizare cu la sô famee, emigrade come tantis par lavorâ e mandâ i bêçs in Friûl par fâ la cjase e podê tornâ in Patrie. A dîs agns Vigjut al veve za all'attivo une broncopolmonite che lu veve cuasi copât e dôs operations ai voi, parcè che al jere nassût cui voi loscs, si che duncje za di piçul al veve scugnût puartâ i ocjâi e periodicamenti la bende come un pirata. Ma lui al sopuartave dut cun coragjo e al cresceve istès san e vivarôs, circondât dal afiet de sô famee e dai amîs. Cui siei vogluts loscs e la sô muse legre, al rivave a conquistâ la simpatie di ducj. I plaseve fâ sport, nadâ, zuiâ a hockey, e di grant al voleve fâ il telecronist des partidîs. Une volte a la setemane, come ducj i fîs dai emigrants, Vigjut al leve te scuele taliane, par tignî cont de sô lenghe e no dismenteâ lis sôs lidrîs. La sô vicine di banc e jere une frutine di non Irene Istrice: si clamave propit cussì, e nonostant chel cognon pôc incoragjant lui al veve fat di dut par sentâsi dongje di jê, i plaseve di murî... Nol capive ce che i succedeve cuant che le viodeve rivâ, cun chei voglons neris, i cjavei leâts cul foc, la borse su lis spalis... centenârs di paveis a tacavin a fâ il valzer tal so stomi; cuant che jê i sorideve, lui al sintive i voi che i loscavin pui di simpri... Une dì che le veve viodude cuntune cotulute di scai maron i jere vignût cuasi inzirli...! Si insumiave di jê, di tignîle par man, di scjampâ cun jê suntun cjaival blanc... ma nol olsave declarâ il so amôr, si contentave di stâi dongje un'ore a la setemane. Chê cotulute di scai maron lu veve instupidît dal dut.

Un dopodimisdi, intant ch'al faseve i compits di scuele, a cjase di Vigjut e jere rivade une amie di famee a cjatâ sô mari. Chel dì Vigjut nol veve tante voie, ogni tant al fermave di studiâ e si meteve a fâ la telecronache di une partide. Intant lis dôs feminis a babavin in cusine. "Âstu sintût de Irene?". Cuant che Vigjut al sintì chel non, al lassà i zuiadôrs al lôr destin e al spiçà lis ore-lis. "No – e diseve l'amie – ce isal sucedût?". "Sô mari mi à dite che e à za il marchês...". A chest pont a Vigjut si inglaçà il sanc... "Cemût? – al pensà – ae un Marchês e no mi à mai dite nuie?". Al sbassà il cjâf avilît. "Il gno sium al è finît... gno pari al è ope-raio, mê mari e fâs la sartore, no podarai mai competi cuntun Marchês...". In chê sere al lè a durmî cence nancje mangjâ e par dute la gnot si insumià di Irene che e faseve la telecronache dal duel fra lui e il Marchês...

Cualchi an dopo la cjase in Friûl e jere pronte e la famee di Vigjut e podè tornâ dongje.

Vuê Vigjut al à cincuant agns, al è simpri simpatic, creançôs e ancjemò un tic losc, soledut cuant che al è strac. La sô femine, cuant che e à voe di fâsi une ridade, i dîs: "Dai, Vigji, conte chê dal istrice!".

**Caterina Tomasulo**

# I amighi dei rospat



**N**a ventina de ani fa me son domandat che che se podega fà par duti chiei rospat, strithadi da le machine su la “strada nuova”, a primavera tarda. Co’ altres ài podut fai capì a chiei de la Provincia de Pordenon che se podega scuminthià co qualche cartel e cussì i à metut un segnal de pericolo “Possibile attraversamento rospi”. I avòn domandat del material par fà de le barriere, coi paleti e i teli da ombrià. Cusita le avòn fate e, quan che al sol al va dò e ancia col primo scur, se ciò sù i rospat co mastele e guanti par portali de là de la strada. Chiste prime barriere al è risultade no propio adate: i camion, passando, i fea slonfà i teli e i paleti no i tegneva al colpo de aria. In tel grupo dei volontari al è rivat un caposquadra dell’ENEL in pension che ’l à colaudat un tipo nuof de barriere, fate co picheti e nailon; chisto sistema ’l à funsionat e lo doperòn anciamò adès. I volontari i riès a fà traversà sol che in discesa rospat, rane rosse, tritoni, raganelle, bis de borc, ma no i puol salvà le bestiute cuan che le torna indriò par dî in mont, dopo avè pognet i guof. In tei ultimi ani al Comun de Borc (Comun de Polcenigo in provincia de Pordenon) ’l à proposto a la Region de fà un *biotopo*, un *strumento de tutela* stabilit da la lege regional nr. 4296 che la prevede par le aree pìthole, in tel nostro caso vintidoi ettari, la tutela de la natura e in tel nostro caso dei *anfibi*. In tel Dicembre 2017, la region al à istituit ’l biotopo “Palù di Livenza”, che secondo i “Amighi dei rospat” al clama de fà i *tunnel* sote la strada par fà traversà i rospat, come i aveva vedut in Austria. Son contenti, parchè finalmente i à scuminthiat a capì e a scoltàne.

**Mario Cosmo e Antonella Fantin**

*Fevelade di Polcenic*

## La Blancaia

**J**ara una volta “la Blancaia”. Li par li ven di pensâ a una persona o a una strada blancaia di chês, par intindisi, che vevin la caratteristica di vê la pavimentazion sestada cun clapigna otignuda di una gleria particulâr che si romp in scais spizadis bunis di fissâsi ben tal teren. Ma nol è cussì, la Blancaia jara una localitât da la Guriza dal passât e faseva part dal Borc Carintia. La divigninza di chista denominazion pôcs ormai la ricuardin, ma merita di cognossila. Ai tims dal imperi austroungaric esisteva a Guriza, ta plana che si slargja da pît da la Capela (Castagnavizza), una glesiuta dulà che si celebrava ta domenia in Albis, o sei ta domenia blancaia, l’at di rispiet dai sudits al Cont Prinzip di Guriza, event che partecipavin tancj gurizans. E ben la localitât ja cjàpât il non da la domenia leada al event: la Blancaia. No dome, dal moment che una volta lis stradis cjàpavin spes il non da la conformazion dal ambient o dai edifizis publics o di robis notevulis esistentis sul lûc, ve che ancja la stradela che di Plaza Catterini menava a la glesiuta passant dilunc dal Cuar ja cjàpât il non di “Strada da la Blancaia”. Cjatâsi e cjaminâ in compagnia dilunc da la Strada da la Blancaia par lâ a la Blancaia slargjava l’orizont da la fiesta che si trasformava intun moment straordenari di vita comunitaria. A rivin lis vueris e i cambiaments: Via da la Blancaia diventa prima Via da la stangia (Via Barriera) parzè che li jara una da lis barieris daziariis da la citât, la bariera da la Blancaia, e dopo Via Catterini. Tal ultin il *de profundis*: la Blancaia e cuasi duta la Via da la Blancaia no esistin plui, li esist Nova Gorica.

**Anna Madriz**

Furlan di Guriza

## Viers la Crôs dal Sud

**U**n daspò misdì dal mê s di Lui dal 1952 jo, mê mari e i miei fradis o cjaparin il tren a Udin par lâ a Gjenue, li che o rivarin vie pe gnot. I bancs de stazion si ju viodeve ducj ocupâts: “A saran come nô, no podaran paiâsi un albiere” e disè nestre mari. Cussì o jessirin in strade. Tal mût che o strissinavin lis valis e lis borsis, si viodeve in noaltris la strachetât, la fan e il sium. Ancje cumò, a distance di tancj agns, mi imagjini il disconfuart. Si cjatavin di gnot intune citât scognossude, disorientâts e cun pocjîs liris te sachete: ce vevino di fâ?

Par fortune o jerin in plene Istât e il clime benevul al permeteve di passâ la gnot di fûr. O scomençarin a cjaminâ viers la stazion maritime; nus compagneve un cuart di lune che nus faseve cucuche sparint daûr di cualchi grant palaç a ogni nestri pas. Si cjatarin cussì intune place li che mê mari e decidè di fermâsi e di sentâsi suntune bancje; di une sporte e tirà fûr alc di meti sot i dincj. La sflacje, il puest e la gnot nus invidavin a sierâ i voi: come che o poderin, o durmirin cuntun voli viert. Devant di nô, insiorant la place si intaiave un impuartant monument, nuie mancûl che chel di Cristofol Colombo. La muse frede e marmorine dal grant amirâl e pandeve la nestre stesse emozion e conturbie prin de partence. Cui momentanis clarôrs di lune o rivai a viodi il braç diestri alçât e il dêt indiç, pontât viers la part austrâl dal mont. In chel moment no vei nissun dubi, al voleve dînus: Par là, o vês di lâ!! Par là, o vês di lâ!

Si steve sclarint, la aurore e preannunziave il dì. Cjapâts sù i bagais, si inviarin viers il puart. Imponente e sigure nus spietave





*Cartuline de motonâf  
"Augustus", agns '40*

la motonâf "Augustus". Si imbarcjarin; doi voi a jerin pôcs cun tant ce viodi, jù par une

scjale, sù par chê altre, fin che o rivarin tal puint. Dal imbarcjadôr la int e saludave; a noaltris no nus veve compagnât nissun, in ogni câs o fasevin ancje nestris dutis chês emozions e chei cumiâts.

O jerin sot misdì, di colp o sintirin a sunâ la sirene, jerino par partî? I vosadôrs nus invidavin a lâ te "sale di gustâ". Sistemâts intune taule, o sintirin une altre sunade e inmò une altre! Dai oblò de sale si scomençave a viodi che l'imbarcjadôr si moveve, invezit e jere la nâf che planchin planchin e leve rasintant la banchine sbrissant vie, lassantsi lâ cuntune cierte pachee, dismolantsi ai cjarineçs di chê aghe celestine dal mâr Ligur.

O partivin. Mandi Italie, mandi Friûl! Di sigûr che in chei moments nissun de famee nol veve cjàpât cussience dal pas ch'ò stevin dant. Lis emozions dal viaç a jerin plui fuartis di chês che o lassavin daûr des nestris spalis.

Si vierzeve par noaltris come la glove di un ramaç, une gnove strade, une gnove vite in Argjentine.

**Galliano R. De Agostini**

*Buenos Aires (Argjentine) - Furlan di Tresesin*

Deu gducōnis exultat bonis possoni  
p Ecce aut ipud h aūo deliterat



**A**l va sù il Bo plen di vigôr pal troi ripit de mont dula  
che si olmin mascarâts uciei e flôrs, puartadôrs di  
glorie. Si trate dal vigni indenant, pazient e intri-  
gôs, tant che chel che al segne l'impegn politic dal  
Panciera, za dit tal test cuntun: "de immota tue  
fidelitatis constancia".

# AVOST

	1	S	S. Alfons Marie de' Liguori vescul	
	2	D	S. Eusebi vescul	<i>S.te Marie dai Agnui</i>
32	3	L	Rinveniment des relicuiis di S. Stieffin martar	<i>Patron de Diocesi di Concuardie-Pordenon</i> ○
	4	M	S. Zuan Marie Vianney predi	
	5	M	S. Svualt re e martar	<i>Madone de Nêf</i>
	6	J	Trasfigurazion dal Signôr	
	7	V	S. Gaetan di Thiene predi	
	8	S	S. Domeni di Guzmán predi	
	9	D	S.te Taresie Benedete de Crôs	<i>Patrone d'Europe</i>
33	10	L	S. Laurinç martar	
	11	M	S.te Clare di Assisi	◐
	12	M	S. Rufin Vescul martar	
	13	J	B. Marc di Davian	
	14	V	Ss. Felîs e Furtunât martars	
	15	S	Assunzion de Madone	
	16	D	S. Roc piligrin	
34	17	L	S. Eusebi pape	
	18	M	S.te Eline imperadore	
	19	M	SS. Marian diacun e Sare	●
	20	J	S. Bernart di Clairvaux abât	
	21	V	S. Piu X pape	
	22	S	La Madone Regjine	
	23	D	S.te Rose di Lime muinie	
35	24	L	S. Bartolomiu apuestul	
	25	M	S. Luduì Re dai Francs	◐
	26	M	S. Alessandri	
	27	J	S.te Moniche vedue	
	28	V	S. Augustin vescul e dotôr de Glesie	
	29	S	Martiri di S. Zuan Batiste	
	30	D	S. Felîs martar	
36	31	L	S. Aristide di Atene martar	

## Il Copari e la Comari

Cui diseve che chescj doi vecjuts ai fos fradi e sôr, cui om e femine. Ai si clamave Bastian e Pascute, ma par ducj ai ere nome il Copari e la Comari. Vie par la setemane ai zirave par dute la plêf, ma la domenie, colàs il mont, ai ere simpri a cjapâ messe e cumunion a Clausîet. Par la bocjade e un sotet ai si fermave a lavorâ ca e là. Ai zeve a fâ patùs e tirâ frent in Mezol, a fruçâ le-dan pai Tonis in Covereâts. Vie par l'Estât tantes zornades ai las passave in Turîet a seâ, spandi e incololâ. Dal soreli ai si protezeve la muse cuntune cjapiele e dai tavans cuntune garze fine fine ingropade sot il menton. Dal sagrât di San Jacum il pridi, cjalant jù dut chest furmiâr di int che a lavorave intal Plan da la Val, al diseve: "Povere anime condannate a purgare le colpe di Adamo ed Eva... gementes et flentes in hac lacrimarum valle". Bastian, pur fracât da la cjame dai agns, al faseve riscjei e falcjârs, al comedave tamers<sup>1</sup> e al stucave laips<sup>2</sup>. "Sîes simpri ch'â lavorâs" a i disè une dì il Felicin.

E Bastian: "A dîs pôr la Sacre Scriture, che ai lavori i vecjus che ai àn la piel dure".

Da San Zuan però, come a un segnâl misteriûs il Copari



Curisin tal portâl da la Cjase dai Pulîts

<sup>1</sup> recinti

<sup>2</sup> abbeveratoi

e la Comari ai molave dut e ai partive par la mont di Rosse cun pistoc<sup>3</sup>, russac<sup>4</sup> e gamelots di luminio. Scorsonant enfri i reps, ai zeve a racuei mugnees/frambole e cergnicules/glasigne par po vendiles al speziâr di Travês che parie al faseve scirops par distudâ la sîet e la... tos.

“Il bosc – al diseve Bastian – al è la panarie e la speziarie dal Signôr, al no domande nuie e al ti dà simpri alc”. Da la scusse dai laris ai cjapave la lagrime che a gotave, il larian, par onzi zenôi e cjadiles macolades. Ai racueeve encje la radîs da l’anziane da meti tal vin blanc par rinfuarçâ il stomi. Biel che ai ere dovent ai butave il vûli par olmâ scuares e volts di vuar di slite pleâts da la nîef, cuars di foradorie e maces di sanzet<sup>5</sup> par vecjus. Cu la roncee, simpri ben pleade intal siò agarut di bos par no ceâsi, la Pascute a taâve las buarzutes pai cisarons<sup>6</sup> di siôr Jacum che al las voleve nome di cuarnolâr. Zirulant par Raunie ai tornave simpri dongje cun alc: cocoles, noles, cjastignes. E cun cjames di brascais e bieles maces di noglâr. Parie, in timp di gjermarie, ai faseve scoves pai Cognei. Pur plens di dulûers ai ere simpri che ai darpave. “Vîes las mans sglonfes e sîes ducj plets” a i diseve il Felicin. Al rispuindeve Bastian: “ Eh, fantat, recuarditi che a nol è çoc sence furmîes e a nol è vecju sence dulîes”. Nissun dotoron al podarès contâle miêi.

**Gianni Colledani**

*Furlan di Clausiet*

---

<sup>3</sup> bastone da montagna

<sup>4</sup> zaino

<sup>5</sup> cornus sanguinea

<sup>6</sup> piselli

## Nono Duin

**M**e nono Duin al lavorave tai pôi pe Snia dal Tor. Al faseve fûr i carûi dai arbui, ju cimave e al controlave, cuant che ju plantavin, che lis filis a fossin dretis. Al veve ancje trê cjamputs di blave. Par bagnâju al doprave la irigazion: al capitave che a me nono Duin il turno di bagnâ al colàs as 3 di matine. Cuant che o jeri cjase di scuele, mi puartave cun se jù pe gnot. O montavi daûr tal puartepacs de biciclete, devant tal manuvri a metevin un zeut cun dentri un biel salam, un fiasc di vin ros, un struc di pome par me, une pagnoche di pan cuntun toc di formadi e une aradiute a pilis. Me nono al cjariave la pale e jo o tignivi un pâr di stivâi par man: un par me e un par lui. I mei a erin simpri masse grancj e difati tantis voltis mi inçopedavi e o colavi tal pantan. Une volte rivâts tal cjamp di bagnâ, o scjariavi dut l'armamentari e lu picjavin sot di un arbul, par che nol riscjàs di lâ sot aghe. O metevin i stivâi e o lavin bande de Ledre a spietâ che a rivàs la ore juste. Cuant che a bateve chê ore, o tiravin sù il portelon tal cjamp dal nono e o sieravin chel contrari. Ogni tant jo o lavi dentri te Ledre: la aghe e jere frede pardabon. Intant che il cjamp si inondave, il nono e jo o impiavin la radio, si fasevin un panin e o davin un dôs roseadis, tignint simpri di voli che la aghe no rompès i rivâi tal cjamp e che no finìs su la strade. A lavin almancul dôs oris, sintint musiche, gjornâl radio, mangjant e bevint e intant il nono mi contave la sô storie di vuere e da sô ziventût. Une volte finût il lavôr, o tornavin a sierâ il portelon, o gjavavin i stivai, o cjariavin lis vanziduris, o montavin su la bici e o tornavin cjase cun lis primis lûs dal dì. Jo o tornavi a durmî chi da none e il nono al lave a vore cui soi amâts pôi.

**Stefania Virginio**

*Cors pratic di lenghe furlane di Jalmic*

## La cincent di gno pari

Gno pari al jere une persone fantastiche. O spietavi che al tornàs cjase ogni sere par stâi simpri dongje; nol tabaiave tant, ma si faseve simpri capî. Al faseve il muradôr, un lavôr che i plaseve pardabon tant. La sere cuant ch'al tornave cu la sô cincent rosse o savevi che mi puartave simpri cun lui. Gno barbe al veve la stale dongje cjase nestre e lui ogni sere al veve il complit di puartâ il lat ta la latarie dal paîs. La stale e jere plene di vacjis ch'a sberlavin; par me ta chê volte mi sameavin pardabon grandis... cun chê lenghe e chei dincj che mi fasevin ancje un pôc di pôre. Gno barbe si clamave Andrea, ma ducj lu clamavin barbe Dree; nol jere sposât e si dedicave dî e gnot a fâ il contadin. Vie pal Astât al bagnave i cjamps soledut di gnot par podê rivâ jù pal dî a regolâ la stale. Cui siei stivalons al partive cu la biciclete e la pale e al controlave che la aghe e les de bande juste. Al molzeve a man; al strenzeve fuart cu lis mans lis tetis de vacje fin cuant ch'al vignive fûr il lat; lu faseve colâ tal podin e cuant che al jere plen lu struncjave tai bidons di alumini; dopo lu taponave e lu cjariave su la cincent. La machine e jere piçule; alore gno pari, par fâ stâ ducj i bidons, al tirave vie il sedîl dal passizîr. Jo mi sentavi daûr; mi someave cussì grande chê machine! Podopo o partivin. Mi sintivi une principesse, jo e gno pari insiemi. Rivâts in latarie, al struncjave il lat intune cistierne une vore grande. Al jere biel cjatâsi in latarie intant che il casâr al pesave il lat e lu segnave intun librut celest cul non e cognon dal contadin. Al jere un mût par stâ insiemi cence la premure che e je in dî di vuê. O jeri propit, contente ta chei moments. O vevi gno pari dut par me...

**Anna Paravano**

*Cors pratic di lenghe furlane di Morteau*

## Siore Talie

**V**uê e ven ricuardade tant che benefatore, ma nissun nol sa la sô storie o alc de sô vite.

Talie dal Rôl e jere siore, tant siore, parone di cjamps e di cjasis, di aurs e di altris bens, ancje se no saveve gjoldi dut chel ben di Diu. Di caratar no jere par nuie buine, e veve lis sôs maniis e si rabiave se no le ubidivin a bachete. Siore Talie e jere ancje gjelose, a scomençâ dal om, siôr Bepi dai Blancs, che al veve buteghe di telarie in place. Plui che par bisugne, Bepi al steve a vendi par tirâ flât, par stâ lontan de femine che lu tignive simpri di voli. A un ciert moment, Talie no podeve stâ dute la zornade di vuardie in buteghe e cussì Bepi al jere libar di misurâ su lis clientis la tele, a voltis dome a voli, a voltis, se a jerin bielîs e zovinis, ancje a man. Talie, a chest pont, e cjapà une decision, vint la cjase sore la buteghe. Tal biel mieç de plui grande stanze e fase fâ une buse taronde ch'ê deve jù, in mut di podê cjalâ ce che al faseve l'om. Cuant che al leve masse dongje di cualchi siorute, di parsore Talie e butave: "Bepi, e mi te cuco". Lui le mandave in chel paîs, ma intant al jere obleât a cjapâ lis misuris a distance.

A la fin de vite, Talie e à pensât di lassâ al Comun il grant curtîl e lis cjasis ator, par fâ un ospedalut pai vecjos puars dal paîs. In timp di vuere il Comun, spietant di fâ la sô volontât, al veve fitât lis cjasis a cualchi famee, puartant cussì tal curtîl la ligrie di une gjenerazion di zovins e fasînu diventâ un dai puescj plui vivarôs dal paîs tai agns Cincuante e Sessante dal secul passât.

Cui sa se siore Talie e à fate une buse ancje tal cîl par "cucâ" ch'ê bieles confusion?

**Roberto Tirelli**



## *Il furmint*

*Il ciamp di spics di oru  
al si nissula tal vint  
dispetous da l'estat.*

*Bogadis cialdis imbonbadis  
di boins odours  
ch'a si infondin tal cuarp.*

*Furmint zal  
Puntinat di gotis di papavers ros  
coma neos sparnissâs ch'a e là.*

*La trebbia  
si tira dongia par taiâ il raccolt  
e ta chel polvar ch'a alsa  
a sfanta che bielessa  
lassant il ciamp  
ch'al par un ciaf tosat.*

**Anellina Colussi**

*1<sup>a</sup> premi seziun autôrs dal concors "Gjso Fior", Verzegnis 2018*

## Il gjal da le nône Ane

**A**le conte le Ane Scufete, che a l'â novantesiet agns e a l'è incjimò in gamba, che a Racolane sô nône, ancje jei di non Ane, a le veve un biel gjalinâr, ben furnît di gjalinis e di un gjal. Ai erin timps di miserie e le int a le cirive di rangjâsi come ch'a le podeve: ogni famee a le tignive une o pui bestiis di lat, il purcit, cunins e gjalinis. Cussì ai erin garantîts il formadi e le spongje, ch'a si faseve inta latarie turnarie, alc di cjâr e i ûs. L'ort e il cjamput ai erin ben curâts e ce ch'a si cjapave sù al bastave par dut l'an. Di sigûr ce ch'a si mangjave al ere pui gjenuin di chel che vuei si compre inta buteghis. Par tornâ a le nône Ane, une gnot intal scûr i lâris ai vevin fat un'incursion intal so gjalinâr e ai vevin fat sparî dutis le besteutis, gjal e gjalinis. Inmagjinâsi cemût ch'a l'ere restade le nône Ane cuant che le matine dopo a le veve cjatât il gjalinâr desert! Passâts trei dîs, pa le' contradis di Racolane al girave un gjal cu le creste cjonçade. I lâris, vêrs matarans, no contents di vê fat fûr le' gjalinis, ai vevin picjât al cucl dal gjal un piçul carton cun sù scrit:

*Bondì, siorie e sior paron,  
di gjal che eri sei diventât cjapon.  
Sei stât fûr trei gnots e trei matinis,  
ai vedût fâ le fieste a dutis le' mês gjalinis  
e se stavi vie incjimò une dì  
m'a le fasevin ancje a mi.*

**Antonino Danelutto**

*Furlan di Scluse*

*Il mardar a Davian  
(foto Dario Quattrin)*



## LIS BOTIS PITURADIS Giorgio Celiberti

**G**iorgio Celiberti (Udin 1929) al è il plui famôs artist vivent dal Friûl e tancj a son i siei interventis inte cantine di Cormons: no dome lis dôs botis pituradis, ma ancje dôs lastris tal curtîl e une etichete pal Vin de Pâs (1990). Tal 1983 al fo jenfri i prins 19 pitôrs invidâts a decorâ une bote, là che al piturà in maniere direte sul len cu la tempare une cjavre, un dai siei animâi preferîts pe forme architetoniche e plui voltis rafigurât in piture, sculture e grafiche. Al realizà ancje la

iscrizion autografe, recuperade cul restaur, “In un giorno di sole e di amicizia a Luigi Soini con stima e simpatia Giorgio Celiberti”. Inte sale riunions si cjate la seconde bote, fate tal 1993 su un font fasint part dai brentiei storics rilevâts di Villa Varda. Pitura-de sul len a colôrs acrilics ros e neris suntun substrât une vore materic, e presente i cûrs, motîfs simbolics amâts di Celiberti e che a ripetin chei piturâts tal 1990 pe etichete dal Vin de Pâs.



*Giorgio Celiberti, bote cu la  
rafigurazion di une cjavre,  
1983, dopo dal restaur*

**Gabriella Bucco**

## Il Vorgnan e i crots

**I**l Vorgnan al ere un mercjadant di telis. Al veve une piece di stofe di vendi e sô mari, prin ch'al jessîs di cjase, i à dit: "Sta atent di no vendile a chei ch'ai fasin tantis cjacaris". Al è partît e dopo un pouc al è rivât intun borc di poucjis cjasis: ai si è fermât, par viodi s'al podeve vendile. Al à vosât par clamâ la int e ducj chei ch'ai vignivin a viodi la tele ai disevin cussì, ai disevin culà, ai fasevin mil storiis, insome ai volevin comprâ la piece par poucs bêçs. Alore il Vorgnan, stufât, a si è metût a vosâ: "Siôrs, seis dome bons di cjacarâ e no concludeis nie!". E cun chê al è lâât vie. Pa strade al à cjatât une maine cuntune imagjine da la Madone e al à viodût in bas une cassute pa li' ofiertis. Si è ricuardât da li' peraulis di sô mari, al à pensât un moment e dopo al à decidût di lassâ ai la piece ingombrante; in cambio al à vierzût la cassute e al à gjavât siet monedis. "Almanco tu no tu fâs tanti cjacaris", al à dit a la Madone. Al à tornât a cjapâ la strade di cjase, pensant che in ogni câs al veve fat un afâr. Intant che si consolave cussì, al è rivât dongje un riu e al à sintût dai crots che sgraçavin: "Vot... vot... vot". Il Vorgnan, crodint che i rispuindessin a lui, al à dit: "A 'nd'ai dome siet!". "Vot... vot... vot!". "Nol è vêr, jo ai dit siet!". "Vot... vot... vot..."

Il Vorgnan alore si è rabiât: "Jo ai dit che a 'nd'ai dome siet! S'a no crodeis, cjoleilis e contaillis...". Cussì al à butât li' monedis tal riu e al è tornât a cjase cence stofe e cence bêçs.

**Giulia Not e Severina Not**

*Furlan di Mueç*

## UN ARGISTE DAL GRAN CÔR

### Il curtîl

**T**ancj dai nestris paîs a àn lis cjasis liniadis dilunc dal cart-decuman, metût jù dai Romans e a rapresentin un model urbanistic unic in Italie. Cjalant lis mapis e ven fûr a clâr l'economie e la funzionalitât da la struture dai paîs: di ca e di là da la strade principâl, intune sorte di canâl, a son lis cjasis, come leadis, daûr dal zîr dal soreli cuntune jentrade principâl: il puarti. Di ca e di là si veve di une bande la stalute e di chê altre la cusine/fogolâr, po la cort ch'ê podeve vê altris stalis, altris cusinis par altris fameis. A 'nd jere corts cun fintremai 30-35 di lôr ch'a vivevin li, e Otto al à passât li la sô infanzie. La cusine par un metri e podeve vê devant un pedrât par lis streceariis e, disore, un bersò di vît par fâ ombrene. Sore da la stale al jere il toglât pal fen: al veve di une bande un barcon e di chê altre al jere in part sierât di une schirie di modons distacâts tra di lôr par permeti l'areazion. Disore da la cusine, ta lis cjaminis si rivave mediant di scjalis par difûr, colegadis di un puiûl, peât a sbalçs al mûr principâl mediant di trâfs. Disore ancjemò, al podeve sei un altri puiûl gjavât sot da la linde dal cuviert pal cjast, dispès doprât par meti a suiâ strecis di panolis e cuntune esposizion logjiche a misdî.

Ta la cort po si veve il gjalinâr, il cjôt e il mussulin, la cort dal ledan. Intun cjanton al jere metût il condot par lis dibisugnis corporâls. Sore dal cjôt a podevin stâ i çocs e lis fassinis dai lens. Separât di une palade o filiade (nol veve di sei "sbitiât" o "fiscât" da lis bestiis di curtîl), plui di fûr al jere l'ort, po il broili (peraule celtiche *broga*, passade pal tart latin *brogilum*) cui pomârs e, tal viert, il bearç (peraule gotiche, di *bigards*) e po la campagne o taviele.



Si trate pai nestrîs borcs di un model standardizât unic in Italie, dulà che ogni part e jere integrate daûr di une economie auto-suficient e abitative e alimentâr.

La semplicitât e la povertât (*rusticitas*) a son i caratars di chescj segns architetonics e urbanistics che, invecit di gjavâur valôr, a figurin propit il valôr arcaic dal model feudâl rurâl dai nestrîs borcs, dai nestrîs paîs, zaromai scuasit dal dut “platât” da lis “intonacature”, come ch’al denunciave padre Turolt.

**Gotart Mitri**

## Furlanisâ

**n**issun Latin al savarès  
cui ch'al è Cesare o  
Cesar (pronunsiât Sesâr in  
France), parsè che lôr lu cla-  
mevin Caesar: sin nun che  
lu vin talianisât! Pa la stesse  
reson nissun arabo al sa cui  
ch'al ere Maometto e nissun  
portughês al conos Magel-  
lano. Al è un procès normâl:  
co une peraule foreste a pâr  
masse foreste o a è masse  
difisile, si la rint domestiche.

I migrans di Tramonç tal Vot-

sent, mi à contât Gianni Colledani, co a lavorevin ta li' feradis  
dai Stâs Unîs, a clamevin "slipa" il "sleeper" (dormiente), il trâf  
di doi metros e vinç ch'al stâ sot li' sinis. Pa la stesse reson tal  
Mai dal 1945 il "chewing gum" al è doventât "la ciunga". Ma eco  
ca qualchi altri esempli di furlanisation. L'Inter a veve al centro  
dal atac un inglês ch'a si clameve Hitchens, e chei di Frofean lu  
clamevin Vincens. Un famôs curidôr in biciclete al ere Rick van  
Steenbergen, subit ribatiât Vastinberc. No stin po fevelâ da li'  
preieris par latin: mi recuardi une femine che, ta l'Ave Marie, a  
diseve "di lunc e tinora" invessi di "nunc et in hora". Cui sa s'a è  
lade in Paradîs instes?!



*Mari e fi (foto Giuliano Borghesan)*

**Gianfranco Ellero**

*Furlan di Frofean*



## *Il Strolìc dai Strolìcs* al fa meracui

**C**hi lu varès mai dita, e pur *Il Strolìc dai Strolìcs*, in pi da jessi lui stessu una robona, al à fât un veru meracul. Eco uchì la prova pa' la canonisassion. Al ven a stâ che la femena de Aldo a eà fât una pratica cul jutori dal Sindacatu. "Dut a postu – a j àn dita dopu oris de ciacarìs e dosenis de firmis – ch'a vadi tranquila siora che la pratica a è a postu e a varà risposta a la pi presta". Passa un meis, nuia, passa doi, nuia. Aldo e la femena a tornin dal Sindacatu. "Ma – a i disin – la domanda a è fata e a eà vut bon esitu, al è stranu che la rispuosta a no seipi anciamò rivada". Aldo al ciapa la femena e al cor a Pordenon in dulà ch'a son i ufficius dal Guvier. Seguint li' indicassions, a rivin da un impiegât cuasi soteràt da montagnis de scartafàs. "Nos sen u chì par via de che pratica...". Chel al consulta "l'ordenador" e al sentensia: "Veit da tornà dal sindacatu, e...". "Propitu da ulà vignin", al sercia da rebati Aldo. Nuia da fâ, l'impiegât al insist e a ju congeda. Aldo, sustàt, biel ch'al se leva da la cariega, a i cola 'l uoli su che montagna de ciartis. E – da no cruodi – al oia una copia de *Il Strolìc dai Strolìcs* publicàt da la SFF in ocasion dei sentu an de la fondassion. "Ch'al me scusi – al aussa – lui al à *Il Strolìc*...". "Eh si – al rispunt l'impiegât dal Stât – a me lu à dât un amigu de Darzin...". "Dani Pagnucco, jò pensi – al fâ Aldo – e ch'al uardi ch'a eàn mitut ancia una me' puisia...". Chel al uarda, po al ciapa la corneta e al domanda. "Ch'al me torni a dî l'in-non de la so' siora...", e al se met a cusionâ par telefonu. Po al met 'sù, al fâ un altri numer e al cusiona da nouf. A la fin al se volta versu i doi ch'a erin restâs a spetâ, senza savéir se fâ: "'Sit tranquii che la pratica 'a è a postu". E cussì a èis stada: in fuarsa de la puisia e de un meracul del *Strolìc dai Strolìcs*!

**Ubaldo Muzzatti**

*Furlan di Cordenons*

## Une corse in moto

**M**ê mari e jere une vore brave a cusî, tant al è vêr che nus cusive biei vistiduts sedi a mi che a mê sôr plui piçule. Si faseve ancje i vistîts par jê. Mi visi di un biel vistîf estîf dai colôrs verdin, rose e celestin. Al veve la cotule a ruede, stret in vite, lis maniis che a colavin a pene jù des spalîs, e une biele scoladure a taront sul devant.

Une domenie le viôt che si prepare a lâ vie in moto cun gno pari, une Benelli nere e rosse, cun chel biel vistîf a ruede. La sente daûr de moto e jere di fier e gno pari i à metût un cussin leât cuntun spali, in mût che e stedi comude. Metût in moto, il motôr al faseve un rumôr une vore fuart e tal acelerâ un fumaron neri. Gno pari al diseve ch'al servive par scjaldâ il motôr. Mê mari si sarès sentade dute di une bande, ma gno pari i à dit di metisi a cavalot e di tignî la cotule ben strete par che no ledi tai rais de moto. Dopo vê un pôc cuistionât sul fat che mê mari no voleve metisi a cavalot, par vie che nol jere biel par une femine di chel timp e po dopo parcè che si fruçave la cotule, a son partîts. No-altris sôrs ju vin compagnâts cui voi fin che a son sparîts daûr la curve de strade, ridint e contentis di viodiju lâ vie in moto.

Dopo cualchi ore, jo e mê sôr o vin sintût il rumôr de moto che e veve a pene passade la curve, e o jerin za sul puarton cuant che a son rivâts. Gno pari cuntune muse di ridi come un ch'al à fat alc di stramp e mê mari cuntune muse serie cuasi di vaî. Di fat il vistîf di mê mari al jere cence cotule e nô no capivin il parcè: lu vin capît subito dopo, cuant che mê mari e gno pari si son dâts la colpe un cul altri, disint che gno pari al coreve masse fuart e mê

mari no podeve tignî dure la cotule, che cussì e je lade a finîle tai rais de moto; gno pari al diseve che jê no veve savût tignîle ben strete par pôre di fruçâlê. La cuistion e je lade indenant un biel pôc ma a la fin, par fâ la pâs e fâ nus viodi che dut si podeve cumbinâ, te sere o sin lâts ducj a mangjâ il gjelât te ostarie dal paîs e li za cualchidun al veve savût dal fat. La robe e je lade indenant par dute la sere ridint e scherçant cun chei che si jerin tirâts dongje di nô.

**Elvia Jacuzzi**

*Cors pratic di lenghe furlane di Merêt di Tombe*



*Disen  
di Annalisa Gasparotto*

## Lu gjal di mont

**T**al Estât dal 2018 mi tocjà un'aventuro pi unico che raro! In t'uno zornado splendido dal mîos di Avost, biel a buinoro, cul gno persac cun denti un toc di salam fumulât e un bon flât di vin, mi inviai a pè par lâ a foncs. Lu lôc destinât al ero Navanzo, puest famûos un viaç pes sôs pradariôs e bergjos. Lu besteam al rivavo sù dopo doi dîs di viaç da Curnin, Peonos, Somplâc e Forgjario. Cumò es resto nomo las maserios de case-ro di Navanzo abas, fato cul clap ros, e chê pi piçulo di Navanzo adalt, che davo ricovero es mangios e ch'a si cjatavo propi sot la granda creto de "Krasjeno dal Kramâr", clamado cussì pe sô formo. I eri rivado a mieç cueston dingjo lu riù, dulà che la lescjo alto e cresevo cun vigùor, coltado dai ramats dal fau, colâts e fraidessûts, produsint l'humus adat pei foncs. Intant ch'i amiravi chê bieleço alpino dal bosc di peç e dano ch'al vevo cjapât lu spazi dei passons, tar un marilamp i sint un sorto fracàs di alos e aitrîs rumùors. Mi tocjavo dispès vedìo la poiano ch'a si alçavo in svual cacu giocol di cjavrôl ch'al fuivo. Fermo, cidino, poiado sul gno baston, i spietai, i cjali ator... a cuasi cinc metros da me al avanzavo cun bravuro un bielisim anemâl: lu gjal di mont (*gallo cedrone*, par talian).

Lu sariali, ch'al filtravo enfro ju ramats dei peçs, al indarintavo las sôs plumos lustros di calûor vert scûr e grîs sot lu cuel, niari basolât di blanc te ruedo spettacolâr davierto cun subierbio como uno carono. Lu cuel al ero biel slançât; ju vùai impiâts lusints, contornâts di un ros vîf. Lu bec, grant e curvât, al sameavo la ponto di un sapin. Mai vedudo uno bestio tant bielo!

Plan plan chesto creaturo regâl e continuavo a vignî viers di me. Ogni tant e fasevo un viers particulâr, come ch’è fasès fadîo a gloti... I ai pensât: e varà fan o sìot o mi ven a dî bondî! I eri cuasi cuasi par tirâi fôr de mê ciacolo un toc di pan. Intant che, fermo, i eri cuasi incantesemado a cjalâlo, la bestio e continuo a vignîmi dongjo. A un metro di distanço si fermo, mi cjalo cun tun’ario di sfido e, tar un marilamp, cun violenço mi dà cuintro cul bec. No me spietavi. In prin i ai cerût di difindimi cul baston; dopo i ai tacât a cori, a cori pi ch’i podevi su par chel pecôl di mont cul cor ch’al sameavo ch’a mi ves di sclopâ da un moment a chel ati. Strasameado e pleno di poro, cuant che mi soi sintudo avondo lontano, mi soi fermado a tirâ lu flât e ai pensât che di sigûr chel puest al ero lu sô areâl, lu loc dal sô passonâ, la zono dal sô cortegjament e nol volevo intrusions! In chel moment i ai capît



parcè che a un om intim-pât dal For i vevo metût nom “gjal di mont”: al lavo a consolâ las vedovos imò che lu lùor om nol ero nencje disfredât, e chestos poleços, se pur stagjonados, es restavo simpri buinos... tal sô areâl!

**Novella Del Fabbro**

*Furlan di For Davûatri*

*Disen di Annalisa Gasparotto*

## Grau... ce paradîs!

Cuant che o jeri piçule, gno pari nol veve timp di puartâmi di nissune bande, parcè che al lavorave cincuante cjamps e al veve di molzi ogni dì trente vacjis. Al faseve ancje il sensâr e in plui al judave il veterinari a vacinâ lis bestiis. E cussì al jere simpri impegnât e di domenie nus podeve puartâ dome al cine a Romans o a mangjâ un glaçât al “Leon d’aur”, ma no lavin mai fûr dal paîs. Però tal mê di Avost dut al gambiave, parcè che a rivavin de Inghiltere mê agne Brune, gno barbe Berto e i miei doi cusins Antoni e Catine. Alore e jere veramenti une grande fieste par me, parcè che lôr mi puartavin a Grau. Mi visi che gno barbe al veve une machinone che o stevin fintremai in vot personis: trê devant e cinc dâur. Une dì mi visi che a Aquilee nus àn fermât i carabinieri e gno barbe si è subit metût a cjacârâ par inglês. Alore i carabinieri nus àn lassât lâ vie sence dânus la multe, parcè che no capivin nuie di ce che al diseve. Pe strade jo o cjalavi fûr de barconete e o pensavi: “Ve cumò, dopo il puint sul Lusiņ o sin a Rude, plui in là e ven La Vila cu lis casermis e al passaç a nivel su lis feradis dal tren, po dopo Aquilee cu lis ruvinis romanis”. Infin o viodevi il mâr e o disevi: “Oh ce biel, o sin rivâts a Grau!”. Cuant che o jerin inte rasule o corevi subit inte aghe e dopo vê une vore nadât o vevi tante fan. Alore mê agne mi dave pan cu la fortaie e i pierçui. Di sere, cuant che o tornavin a cjase a Romans, o jeri une vore contente e propit strache mi indurmidivi subit inte machine. Par me, in chê volte, lâ a Grau al jere come lâ in paradîs.

**Daniela De Alessi**

## *Balonut*

*Tu sês di mil colôrs,  
amî di ducj i fruts.  
Se lassât lâ, tu svualis tal cîl  
sedi di dî, che di gnot.*

*No tu âs une destinazion  
fintremai che no tu ti imbredeis tra i pins.*

*Tu sês stât il gno amî.  
Ti moli, ti lassi lâ,  
ti dîs: "Trancuile, une dî  
ti tornarai a cjatâ."*

**Martina Celine Crosilla**

*1<sup>n</sup> premi seziun scolastiche dal concurs "Gjso Fior", Verzegnis 2018*

## Al è stât un miracul si no soi muart di un colp

C'hê altra dì al è passât par cjasa mê, coma ch'al fâ di spes, il me amigu e paesan Toni Gasparotto. 'Na cjacara a tira chê altra e, coma ch'al susseit dispès, il discors al cola scuasi simpri su li' nustris esperiensis dal passât.

Chista volta il discors al è colât su l'Australia indulà che, dopo trentatrê dîs di nâf, al era emigrât tanç ains fa. Al mi à contât l'esperienza vivuda in prima persona; podarès someâ 'na roba da ridi, ma bisugna capîlu: nol è fassil rivâ tal puart di Sydney, dulà che no ti varès mai crodût di cjatâti e nol è nissun a spetâti. Pardipì senza cognossi la lenga e doma cu la speransa di cjatâ cualchidun ch'al ti dedi 'na man: e lui, ringrassiant il Signour, lu à cjatât. Al era l'an 1961, al veva apena finît vinç ains e chista persona a lu à partât in stassion a cjàpâ il treno ch'a lu varès partât tal Queensland, ta 'na zona dulà ch'a erin *farms* cun slambris di cjamps di cjana da sucher, da taiâ a cotim. Ma ta chiscju cjamps a erin tanç madràs e sarpints velenous di ogni specie, tant che il dì prima di scuminsiâ a taiâ ghi devin foc par liberâ li' cujeris da li' arbatis e dai sarpints. La squadra a era formada da seis personis: Giorgio Santel, un trevisan il capo banda, Mirco, Dino, Matteo, paesans dal capo, coma encja un ciert Mario Gavel ch'al era rivât propiu chê matina.

"Quà fioi, se no se taia cana, e anca tanta, se va a casa tuti".

Par spauriti, il sens al era: no lavôr no bêçs. Stant che chistu Mario al veva viazât duta la not, al ghi à domandât al capo dula ch'al podeva zî a riposâsi almancu par 'na miesa ora. Il capo a ghi à fat iodi: "Vedutu quela specie de baraca la in parte, dentro a destra



al è un materàs par tera, un sgabel e na carega: quel lì el sarà il to posto fin quando varen finio de taiar cane”. Mario al si à inviât, ma dopo nencja un quart d’ora lu àn jodût saltâ four spagutî in mudantis e canotiera. Lour a serciavin di cuietâlu: nuia da fâ, nol rivava a cjacará e al continuava cul: “Ta... ta... ta... ta...”. Pre-ocupâts, a son zûts a jodi se ch’al era ta la baraca e, appena che si son rindûts cont, a son scopiâts a ridi. Purtrop nissun al veva visât il puor Mario che il paron da la fatoria, il *farmer*, al tigniva atôr pal curtîf e encja par cjasa, un sarpint lunc cuasi doi metris e gros coma un branc di morâr! La bestia a no era trista, anzi a netava surîs, pantianis e altris besteutis ch’a ziravin pal curtîf. Doma trê dîs dopo Mario al à scuminsiât a cjacará, cuant ch’al à jodût Mirco e Dino ch’a vignevin four da la baraca cul sarpint in bras e l’àn molât tal curtîf. Allora al à spiegât il fat: “Me gere appena impisolio quando che sente sora el stomego un peso che me pareva de sofegarme, verzo i oci, e te vede sta bestia passarme desora. Te giure, se no soi mort de un colp l’è sta un miracolo”.

**Alberto De Rosa**

*Furlan di Sopula*



Comes cuncti et quod plures alij nobiles et magnates no-  
 pti remanserunt insuper Sexaginta fereba cum fulci-  
 gentibus remanserunt inter que Tentorium Ladislai cum  
 alijs rebus remansit et remansit etiam captivus in  
 pulcherrima festinans Ultimus per Tubianum Serenissimum domini Regis  
 et quendam alium nuntiant S. V. Vexilla Ladislai et de  
 in conflictu isto remanserunt. Unde exultet  
 quia suavissime meliora sperant. Nam crastino  
 credentium ultimum sequendo victoriam iam pa-  
 ure alia. S. V. habuissim intimae que in conflictu



prefato

Si scuarnin i Cjavons dantsi cuintri rabiôs inte baru-  
 fe mate e feroce come te lote fate di Ladislau "cum  
 gentibus suis et finale dato bello".  
 La peraule di riclam, "prefato", e sta bessole in ban-  
 de sul ôr de cjarte, par no gjavâi dramaticitât a la  
 sene.

# SETEMBAR

	1	M	S. Egjidi abât	
	2	M	S. Elpidi abât	○
	3	J	S. Grivôr il Grant pape	
	4	V	S.te Rosalie vergjine	
	5	S	S.te Taresie di Calcute muinie	
	6	D	S. Zacarie profete	
37	7	L	S.te Regjine vergjine	
	8	M	Nativitât de Madone	<i>Perdon di Madone di Mont</i>
	9	M	S. Pieri Claver predi	
	10	J	S. Nicolau di Tolentin predi	◐
	11	V	S.te Theodore martare	
	12	S	Non di Marie	
	13	D	S. Zuan Crisostomi vescul	
38	14	L	Glorificazion de Sante Crôs	
	15	M	Madone Dolorade	
	16	M	SS. Corneli e Ciprian	
	17	J	S. Robert Belarmin gardenâl	●
	18	V	S. Josef di Cupertin	
	19	S	S. Zenâr di Napuli martar	
	20	D	S. Eustachi martar	
39	21	L	S. Matieu apuestul e vanzelist	
	22	M	S. Maurizi martar	
	23	M	S. Piu di Pietrelcine frari	
	24	J	S. Pacjific frari	◐
	25	V	S. Aurelie piligrine	
	26	S	SS. Cosme e Damian martars	
	27	D	S. Vissent de' Paoli predi	
40	28	L	S. Venceslau martar	
	29	M	SS. Micjêl, Gabriel e Rafael arcagnui	
	30	M	S. Jaroni predi	

## Morandini

**D**omenico (Meni) Cescutti al steve intai Norâts, une borgade enfri i Mulinârs e i Trielires, dulà che a cumince a rampinâsi la strade dal Tul. Da zoven al veve lavorât cu la “I.C.E. Morandini”, Impresa Costruzioni Edilizie, une dite da la Basse. E a fo par ches che il non dal paron al diventà il siò sorenon. Meni, par sô nature, a nol veve né la fuarce né il snait né la fortune di tencj paisans che, par cjapâ un franc, ai ere zûts fôr pal mont. E pensâ che al ere nassût cu la cjamese! Al ere un paston di om che al viveve cu las sôs cuatri cjares e il gjat. Mengjant pûec e bevint malcul. “Da la mê panarie – al diseve – encje las surîs ai ven fôr vaint”. Par ches Meni al ere simpri in vuaite<sup>1</sup> par meti alc in bocje. Cualchi paisan di bon côr a i paâve a pueste un cascrut<sup>2</sup> in Coperative, pal pi pan, mortadele e un dopli. E Morandini, che al ere franc di leture, al gradive cetant. Al si inclucjave ben e no mâl e dut al sparive jù pal gargat come intune fûes<sup>3</sup>. “No stît a mengjâ cussi di corse che a vos fâs mâl” e lui: “Fin che ce n’è viva il re e quando non ce n’è più viva Gesù”. Uì da Pezete al si rondolave sim-



*Colones di bieles fature par tignî a govèr alc di dut*

<sup>1</sup> allerta

<sup>2</sup> spuntino

<sup>3</sup> foiba

pri dapiè di Tinarie, un omenon ben furnît di panze e di bêçs. Al Tis che a i domandave parcè che a i stès tant dongje, Meni al rispuindè: “Om di panze om di sostanze”. Tal siò torzeonâ al passave encje in latarie e cul permès dal casaro al raspave i vanzums da la conoglade<sup>4</sup>, al lecave la pegne e al beveve la batude<sup>5</sup>. Dongje la cjasute di Meni al steve un gjardan<sup>6</sup> di om, ferbint e svuelt di man, il Bepo di Simon, un fassiston. Cuant che al vignive sù intai Norâts, rumorant par la clapatorie cui scarpons imbrocjâts, al cjantave: “Giovinezza giovinezza primavera di bellezza nella vita e nell’asprezza il tuo canto squilla e va”. E Meni, di idees socialistes, a i rispuideve dal paâl cun: “Bandiera rossa la trionferà, viva il comunismo e la libertà”. Il breon cun sù il “Sole nascente” che Meni al veve inclaudât sul barcon, il Bepo a i lu fruçà cu la picje. Ai si faseve ducj i dispiets e ai catanave sù dut, no nome sui cjermens.

Il cjavon dal duce che il Bepo al veve piturât cun tant puntilio su la puarte da la stale, Meni a i lu smaltà cuntune buiace. Savint di ce piè che al zeve çuet, la mularie dai Sgnacs a veve scrit su la puarte dal condot dal Bepo, in stampatel e cul zes, “DUCE”. Meni al si ingloreà e al pensà che reonzint alc a si podeve fâ miei. Al slungjà jù la aste da la letare D che a diventà une P, cussì da permeti al Bepo, “nel momento del bisogno”, da preseâ mièi il bon nulî dal Fassio.

**Gianni Colledani**

*Furlan di Clausîet*

---

<sup>4</sup> cagliata

<sup>5</sup> laticello

<sup>6</sup> burbero

## La Costanse

**A**ere un biel bacon di femine, a cjalâle a faseve poure, ma di une bontât e di une gjenerositât cence fin. A vignive in file da nou e nou da jei i erin 'di cjase'; in undis fradis ch'i sin, ducj sin passâts da Costanse, une cjadene tintude ch'a si è crevade dome cuant ch'a è vignude a mancjâ. Cu las sôs manonas, sentade su pa bancje ad ôr dal balcon, nus braçolave cuntune delicatece uniche e tal so grim, da piçui, a sameave di pierdisi. No passave di che no si las a viodi di jei, ta sô cjase si podeve fâ dut, a no diseve mai nue. A 'nd ere dome un cjanton che no si veve da tocjâ: il taulin. Ai ai cjatavin puest ducj i orlois da comedâ parcè che, tra i tancj lavôrs che jei a saveve fâ, al ere encje chel dal orloiâr.

Dispès metudas par ben in rie as ere chês sveas vecjas che cul lôr tic tac as compagnave il so stentât tirâ il flât. Chês viertas, in prove, cun chê incrosadice di ingranagjos ch'ai girave un contrari di chel âti a metevin a dure prove la vôle di lâ cui deits a tocjâ. No simpri si resisteve a tentasion, ma la Costanse a saveve encje dâ il content: cun pasiense, a tirave su la suste di chês sveas vecjas e nou si passevin di chel son.

Cuant che si entrave ta sô cuisine/laboratori si la viodeve ài pleade cul cjâf sôre di chei orlois, cun chel vouli mobil, la lent, che jei a clamave il vouli di acuile par discerni la minuçâe: tas sôs manonas chei orloiuts si pierdevin tant che cun passion a sbisiave cun chês pinsutas tra i deits. L'êsit al ere sigûr, finide la ripara-sion ju meteve in file e ju tignive in prove. E si sintive dut un tic tac, cu-cucs ch'ai cjantave ogni moment e sveas ch'as sunavin a

cualsisêti ore. Se a vansave cualchi rodele sdenteade dai orlois plui grancj, nus insegnave a fâle pirulâ e cussì si passave la dade a giuâ cun nue.

Entrant in cjase sô, il prin lavôr 'l ere chel di lâ a viodi dal cjalde-ruç da polente e s'al ere sul spolert a voleve dî che la veve fate e di sigûr las crostas as erin inmò aì che nus spietavin. Alore a si viergeve la gare; a toleve il masjinin, nus meteve in rie ta bancje e un pouc paron si las fruçave dutas; dopo jei a faseve las parts par ducj chei ch'i erin aì: sentâts par ben, nus dave la cjicarute in man cu la farine di crostas indolcidas da une prêse di sucâr. In chel moment nissun dolç al sarès stât plui bon!

Se i erin un pouc masse vîfs, a tirave fûr un curtissut di chei ch'ai si ten ta sachete e tignintlu sierât tal so pugnion nus buligave, cul deit, tas gjambas disint: "Viodeit che us gjavi il bugjel da gjambel!". Nou, ducj cjamâts di poure, si bonavin almancul par une dade.

S'i la cjatavin pa strade, cori incuintri e saltâi intorn al ere un lamp. E jei cun pasiense a dreçave il fasolet, ch'a no distoleve mai dal cjâf e che nou regolarmente i gjavavin, a slargjave i siei braçs e nus tirave dongje. Cetant afiet in chel gigant cul cûr in man.

**Celestino Vezzi**  
*Furlan di Çurçuvint*

## Madalene

**S**ui gjornâi di fin Votcent stampâts a Udin, lis feminis no centravin cu la politiche. Cence dirit di votâ e di jessi votadis, a stevin a cjase, al plui judant pe caritât de congregazion comunâl. Madalene e je stade la ecezion, graciis a la sô zoventût e a une bielege rare e pluitost bondante. Doi sorestants dal timp, un dai intransigjents e un altri dai iredentiscj, a jerin a la sô cort e nemîs fra di lôr. Le àn butade alore in politiche, tacantsi su dut, ben savint che daûr al jere il peteç che Madalene e fasès, a so plasê, la vere politiche de provincie e dal comun di Udin. I clients a àn scomençât a lâ là di jê a domandâ di judâju, e jê e rivave a contentâ il plui pussibil. Un moment fortunât par une clamade ruvinefameis e ruvinepartîts. Il sindic dal so paîs si cjatave cence scuele e nissun lu judave a fândi sù une: alore, pûr savint dal scandul, si è rassegnât a lâ là di cheste femine inmagadore che, nancje dîlu, lu à contentât. La scuele e je vignude sù bieles e grande, ma cemût clamâle? Scartadis Anita Garibaldi e la regjine Margarite, al è restât il non di Madalene. La stagjon dal scandul e de fame e je passade vie, e cul timp nissun al saveve plui cui che e jere cheste innomenade femine. Cussì, cuant che al è rivât il moment di meti neri su blanc pal ministeri ce ch'è faseve inte vite cheste Madalene, lis mestris a son diventadis matis par cirî notiziis su di jê. Nissun plui al saveve nuie e alore bisugnave inventâ. Pense e torne pense, a àn finît par scrivi: "educadore". E cussì ancjemò e ven ricuadade. No si sa se i varès plasût passâ a la storie cussì; vêr al è che intun mût o chel altri Madalene e je restade a lunc une des pocjîs feminis che a àn contât inte politiche furlane. E tignive cont des sôs amiciziis par fâ dal ben.

**Roberto Tirelli**



## *Sé ch'al rèsta a Eluana Englaro*

*Sé ch'al rèsta  
di un rìdi distudàt  
o di un respiru smavìt  
ch'al sbusina ta li timplis.  
Sé ch'al rèsta  
di 'na stela  
'bandonada da la vita  
ch'a no riva a murì.  
...Al resta dòma  
un flour incandìt  
ch'a flurìs in unviàr  
e, coma il calicàntus  
il so bon odòur  
a si sparnissèa  
nènfri l'agàr da la tiara  
e i portèi dal sièl.*

**Eraldo Ius**

*2<sup>nt</sup> premi seziòn autôrs dal concors "Gjso Fior", Verzegnis 2018*

## Ma èsal propi il Vigji?

**C**hest fat al è sucedût tancj agns fa. Le Dele dai Carlôcj, une femine di Racolane, a l'ere lade inta braide a fâ fen. Le bunore a le veve seât un biel toc di prât e prin che il sorêli al fos lât a mont a si ere date di fâ par meti in cagol il fen, par ch'a nol cjàpàs l'umit da le rosade. Fat ancje chest lavôr, strache, a le veve cjàpât sù il gei e il riscjel e a si ere inviade par tornâ a cjase. Pouc lontan dal troi al ere un biel cocolâr: le Dele no si lassave scjampâ nissun Atom par cjoli sù le' sôs coculis, grossis e cence bau. Man man ch'a si svizinave al cocolâr a le diventave simpri pui spasimade e no le voleve crodi ai siei vôi: ator ator dal arbul un om al girave cence pâs, come s'al balàs. A si ere fate coragjo, a si ere fermade un moment, chel ch'al bastave par ricognossi in chel om il Vigji, un vecjo dal païs ch'al ere muart un pâr di agns prime. Eh, sì, al ere propi il Vigji! A lu cognosseve ben: cuant ch'al ere in vite si incuintravin dispès e si cjacaravin dal pui e dal manco. Cjapade da le poure, le Dele no si ere sintude di clamâ il Vigji, e nancje di saludâlu: tant lui no le varès abadade, intent come ch'al ere a baluçâ ator dal cocolâr. A le veve pensât ben di slungjâ il pas e cul cûr in bocje ogni tant a si girave par viodi se il Vigji al vignive daûr. A l'ere rivade a cjase fûr di sè, a le veve davant dai siei vôi il Vigji ch'al balave. Ma eral dut vêr? Intant ch'a si sfuarçave a cirî une spiegazion, le' cjampanis a si erin metudis a sonâ i bots: a le visavin ch'a l'ere apene muarte le femine dal Vigji!

**Antonino Danelutto**

*Furlan di Scluse*



*La lipare dal riçûl  
tal Cjanâl da la Ciline  
(foto Dario Quattrin)*

## LIS BOTIS PITURADIS

### Marino Cassetti e Mario De Tuoni

**M**arino Cassetti (Piran 1947-Triest 2005) al è un artist triestin che al aderì al Espressionisim dal secont Nûfcent. Al à piturât tal 1983 la bote *Gjat cun cjaliç* là che al à disegnat la muse di un gjat, un animâl che il pitôr al amave tant. Lis critichis dal timp a contin di “un grant gjat, dai voi penetrants, che al riclame cun imediatece la atenzion dal visitadôr e al somee che al vedi voie di invidâlu a cerçâ un cjaliç di chel gustôs netar”. Ancje la testade de bote piturade di Mario De Tuoni (Spresian 1910-1986) tal 1983 e fo tra lis primis a jessi realizadis su la bote completade po di Darko inte seconde metât dai agns '80 dal Nûfcent. E rapresente il portîr de Juventus, allenadôr di balon e dirigjent sportîf Dino Zoff, cjapitani de nazionâl taliane (Marian 1942), intant che al alce la Cope dal mont vinçude tal 1982. La bote e pues someâ a chês cui ritrats di Bartali e di Gustav Thoeni e e fo esponude tal 1990 intal paveon dal ERSA di Vinitaly.

**Gabriella Bucco**



*Marino Cassetti,  
bote cul Gjat cun cjaliç, 1983,  
dopo dal restaur*



*Mario De Tuoni,  
bote cul zuiadôr Dino Zoff,  
1983*

## La Bela

**A**Mueç une vôle a l'ère une fantate un grum biele, cui cjavei luncs e bionts che lusivin come l'aur, cun doi vôi che ti instupidivin, cuntune maniere di movisi che la striave ducj i fantats. A l'ère cussì biele che l'àn clamade la Bela. In chel timp a Mueç al ere ancje un fantat bielun, ch'al instupidive ancje lui dutis li' fantatis. Ducj e doi a si son inamorâts. Ma al improvîs tal cûr dal zovin al è nassût un amôr dal dut diferent, pui grant, un amôr che nol podeve controlâ: a si è sintût clamâ da la vous dal Signôr e a si è fat preidi. La dîs la legende che la Bela no si è date pui pâs e in chê dì che lu àn fat preidi a l'â maledîl lui e la sô religjon, a l'è montade su di un cret dulà ch'a l'ère poiade une crous, a l'â cjadade e a l'â butade jù tal buron, e dopo a si è butade jù ancje jei. Cun dutis li' lâgrimis che a l'â vaît pal so amôr, l'â fat nassi il riu Pissande, ch'al è chel riu ch'al plombe jù in tun grant salt, no trop distant da la stazion di Mueç. Ancje dopo muarte la Bela la girave tal claustris da l'abazie par viodi il so amôr. Alore un sant frâri a l'â scongjurate, a l'â mandade a scontâ la pene eterne là jù dal riu Bârber, e lajù la Bela ti bute jù clapons e ti vôle dute la gnot. Ai dîsin che viers la fin dal Votcent emigrants di Mueç che tornavin a cjase dopo fate la stagjon, passant cul cjar, un pouc becâts e plens di ligrie par vie che levin a cjatâ la femine, ai dal riu Bârber ai vèssin clamât la Bela. No lu vèssino mai fat! Àn scomençât a sintî un âer fuart, un rumôr di clapons che colàvin jù da la mont e ti la sintivin a urlâ e blestemâ. Daûr di lôr si svizinave simpri pui une grande ombre nêre. Di bon ch'a son rivâts in timp fûr da la zone di domini da la Bela, se no... A si dîs che no sedin mai pui passâts par chê bande pa la tante paûre cjadade!

**Ugo Moretti**  
*Furlan di Mueç*

## UN AGRISÛ DAL GRAN CÔR Vendemis

**D**i ogni dontri al jere un vosarili di ligrie e cjants vie par lis campagnis e pai vignâi di cheste stagjon. La nature zaro-mai e à fat il so: e je pronte a dâ fûr chel che vie pal Istât e à madressût e salvât a *fulgure e tempestate*. Vuê, contentînsi: nus à restât il vin *trebiât*, che pal vêr, o vin imparât a fâlu cetant miôr di chei agns.

Di simpri il Friûl al è stât tiere di vins. Tant che i scrits come ancje lis *tantis anfuris dissoteradis* ancjemò cun rescj di asins di ue, a testemonein che Aquilee e jere diventade un empori enologjic grandonon e di tant trafic.

Erodian, storic grêc dal III secul, nus da une imagjin dai vignâi di chel timp inta la sô *Storie dal Imperadôr Massimin* e al conte che inta la campagne di Aquilee “i arbui a son metûts a distancis compagnis e, adun cun lôr a son lis vîts e a dan dongje un quadri cussì gaiôs di someâ chês tieris incolmis di coronis di frascjis”. Ancje Plini il Veli intal libri XIV al cjapitul 6 da la sô *Naturalis Historia*: “Augusta lxxxij annos vita Pucino retulit acceptos non alio usa” (Julie Auguste e metè in cont al vin Pucin i 86 agns di vite che no ’ndi beveve altri).

E “La Patria del Friuli” istesse e ven identificade come une biele femine cuntun cjâf a tor, sintade suntune cornucopie, cerclade di vidiçons plens di raps di ue: “...Sta appoggiata alla verdeggian-te, e feconda vite, perché la qualità de’ vini è tanto abbondante in questa Provincia...”<sup>1</sup>.

---

<sup>1</sup> Cesare Ripa, *La Patria del Friuli*, Roma 1593



Su la storie dai nons si à vûl scrit tant. Par no lâ daûr da lis modis (prosec, tokai, chardonnay...) nus plâs tornâ ai nestris vins “puars”, come il bacò, par esempi. Il *Bacco*, par analogjie fonetiche (cabernet, pinot e v.i.) al diventà pai furlans bacò; al è un vin zaromai scomparîf parcè che al à pocje gradazion e nol è comerciabil e, si scuen dîlu, i abocâts a son diventâts plui finuts. Cualchi cualitât al veve e tant al è vêr che ancje Carducci lu laudà: “l’italo bacco empia il bicchier”. Al jere, chest vin, fintremai dai agns Cincuante, il prin vin da la stagjon. Imagjinaitsi cun chei suts e cu lis botis vueidis cetant che al jere spietât e, cussì, la ue e finive tal brantiel za in Avost!

**Gotart Mitri**

## La sesule e il martiel

**C**o la Sinistre (la Çampe, a disin i furlanisch integrâi) a veve par simbul la sesule e il martiel incrosâs, duciu a capivin ben il sens dal rclam (a la lote, a l'union dai pùars), ma vuei chei impresç a somein tirâs fôr dal "Museo delle arti e tradizioni popolari"! I contadins a doprin i tratôrs e i operaios a somein siensiâs (a doprin martiei e menevîs, clâfs inglesis e tanaîs di ogni tipo e misure) e i zovins no capissin chê simbo-logie. Nol ere cussì sessante

ains fa, co Stalin al ere muart di pûs ains. In chel timp chel simbul al faseve pôre a tante int e cualchidun al tenteve, ridint, di dâsi coragio. Eco come. Tun dopu di misdî i rivi dal Bando a Frofean paîs par viodi alc da li' Olimpiadi di Rome (dome in ostarie a ere la television, e tal palàs dal cont), e su la puarte i ciati Toni Pistrin ch'al rît bessôl. "Parsè riditu, Toni?" i domandi. "I ài apene vidût un rus ch'al à vint la madae di oru cul martiel" al rispunt. "E alo-re, se 'l èe di ridi?". E lui: "Cumò soi curiôs di viodi se la sèsule ai torne in davôr come un boomerang!"



*Un om di Navarons  
(foto Giuliano Borghesan)*

**Gianfranco Ellero**  
*Furlan di Frofean*



## Il cunin di cjocolate

**L**ivie e jere contente finalmentri: sô sôr Nucci e sarès tornade vuê de Svuizare par passâ la Pasche cun lôr. Ta chei agns la Svuizare e rapresentave une vie cuasi obleade par chei che a vevin voie di fâ sù une famee. Lis letaris che a mandavin i emigrants a contavin di une realtât avonde dure, par vie da la lenghe che no jere semplice di capî e imparâ e pal mût di fâ dai svuizars... Ma e contave ancje de bondance di robis di mangjâ che tal so paîs a jerin riservadis dome ai siôrs: bananis, narancis grandis come balons e soiredut la cjocolate, che lôr le vevin cerçade dome cuant che a jerin rivâts i merecans a la fin de Vuere. Si che duncje o podês dome immaginâ la sô felicitât cuant che Nucci e tire fûr de valîs une scjatulute di carton ros ben confezionade cuntune biele gale di colôr aur... Planc plancut le vierç par scuvierzi che dentri al jere un cuninut di cjocolate une vore biel, cun dôs bielis oreglutis a spice. Si jere metude tal cjâf che e veve di tignîlu di cont il plui a lunc pussibil. Il pinsîr di mangjâlu no i jere nancje passât pal cjâf. Ogni matine lu meteve sul barcon a cjapâ un fregul di fresc fintremâ che une matine tal spostâlu e sint che i dêts i jentrin ta la panze tal cunin... Di sclop e busine: Dinoooo!!! Invezit so fradi Dino, golôs come che al jere, il so lu veve fat fûr intun lamp, e dopo al veve tacât a sgjavâ cuntun curtissut la base dal cunin di sô sôr, ma al jere stât cussì brâf che jê no si jere necuarte di nuie. Bon, vere papà? Dopo tancj agns chê storie chi e vignive fûr di spes e la lûs che ti vignive tai voi cuant che tu le contavis nus à simpri maraveât. Al sameave che tu sintissis ancjemò il savôr di chê cjocolate li.

**Lorena Colautti**

## Une cimiade

**n**o si stufisi mai di cjaminâ dilunc dal nestri flum, il Tiliment. Viodint la bieles fotografies su la cuvierte de guide ae Vie dal Tiliment<sup>1</sup>, mi è vignude voie di là a viodi cui miei voi d'insom di Cime Pale i braçs dal flum che si incrosin su la glerie blancje e che a corin viers il mâr, ondulâts tant che i cjavei de Venere dal Botticelli.

Ae jentrade di Peonis, o cjapi il troi che al puarte a mont di Prât e po dopo une vecje mulatiere che e va viers cualchi stali semenât su la mont, piçui templis di pieres e di len, trasformâts in seconde cjase par lâ a stâ li d'Istât o par dâle in afit. Une di lôr e à un mosaic su la parêt, une bieles muse di femine che e somee a chês di Aquilee (montanârs int inculte?!). Mi pâ che chês muse e rît e alore o mi jempli di braûre e o continui a lâ sù.

Dopo de localitât Ledranie, e partîs une piste che si piert intal bosc. Al è scuasit scûr e al mancje ancjemò un biel pôc par rivâ insom. Cuant che no viôt plui indulà lâ, no mi reste che distirâmi e spietâ che e torni la lûs dal mont. Cirivio la aventure? Vele ca. Di bessole intal bosc, o vierç lis oreles e o scolti ducj i rumôrs che a rompin il cidinôr.

I ramaçs a cricin sot dal pê dai ucielats che si preparin par lâ a cjace. Vôs che no cognòs, come un tossi di frut, mi fasin pensâ a bestiis stranis, ma lis formis si messedin e si sfantin intal scûr de gnot.

---

<sup>1</sup> Marino Del Piccolo, *Il Cammino del Tagliamento sull'antica via di Allemania. Verso Gerusalemme, Roma e Santiago*, Udine, Gaspari, 2017.

A buinore o mi svei fra i noglârs, cu la lûs dal soreli che e passe jenfri i ramaçs. O mi incjamini fiduciose, ma il troi no si viôt plui. Cjamine, cjamine, o rivi a doi stalis dirocâts, po dopo mi rassegni: o mi soi pierdude! Ancje tornâ jù nol è facil. O impari la umiltât cirint inte tiere lis mês olmis. Maledete la mê curiositât! A fuarce di zirâ, di crodi di vê za viodût chel clap, chel morâr o chê liane, mi cjati di gnûf in localitât Ledranie e o passi denant de cjase cul mosaic dal ritrat di femine. Mi pâr che mi cimie: “Ti è lade ben, par cheste volte”.

Mi impromet di no lâ plui di sere par un troi mâl segnât. Ma ancje se mi displâs di no vê viodût il flum, no soi lade lassû di bant:



o ai imparât la umiltât, o ai scuviert la vôs di une besteute che no cognossevi, il glîr, e o ai fat amicizie cuntune biele zovine romane. O pensi ae ricjece di cheste esperience e o sint une vôs che mi dîs: “Cuant che tu crodis di vê pierdût dut, tu cjatis plui di ce che tu cirivis”.

**Cristina Noacco**

## Ben petade e ben tornade

**C**uant che o soi stât a puartâ il lat, a judâ il casâr al jere Tin, cussì vuê a fâ formadi a son chei di Balot. Sperìn che a dâi une man a rivin i siei a dâ fûr il sîr. Sî, sperìn propit, par vie che Tin, cuant che i capite di sei a cjolilu, al cjate simpri a dî cun chês feminis, nissune lu sapuarte e no nome chês feminis!

Metûts sul manovri de biciclete i doi bidons, metude la man te sachete par sigurâmi di vê cjapât sù i vincj francs dâts di mê none, mi soi inviât a cjoli il sîr. Content parcè che dîs francs mi van pal sîr e dîs par cjoli il bobolino li di Guerin. Rivât sul puest, o ai metût i bidons in file e dopo a cjoli il goloset.

Sot de lobie e te stradele in bande de latarie a son une schirie di seglots e bidons a tignî il puest. Feminis, fruts e zovenutis a son rivâts, cuiets, si fevele sot vôs, no si sint strissinâ i bidons sburtâts come se ducj a bramassin che nol rivi Tin a dâ fûr il sîr. Intant e je rivade une zovenute clamade Pie de lenghe sclete, une che no si lasse meti i pîts sul cjâf. Ducj si son zirâts a cjalâlê: biele e cuntun vistîf di gale. E va indevant cui bidons fin a mieze file e a vôs alte e dîs: “O ai di lâ vie cun mê mari cu la coriere, mi lassaiso passâ denant?”. Nissun al dîs nuie e jê si met là denant, la prime. Ma nissun al ven a dâ fûr il sîr. Chês feminis a scomencin a businâ, a tucâ sul veri dal barcon de latarie; passât un biel moment al rive Tin. Chest, muse dure e malcreançons, al rive li de vascje cun dute calme, al alce il tapon e la Pie ch’è veve premure di cjapâ la coriere i à dite che si movi che jê e à za pierdût masse timp. Tin, sburtantji in bande i bidons, al met il sîr a chê daûr. No lu vessial mai fat, la zovenute si è lassade lâ a cualchi peraule plui

fuarte. Tin che al veve plen il seglot di sîr jal tire intor: lavade da cjâf a pît, gotant come un stricei cence dî une peraule, cjapâts sù i bidons vueits, e je lade a cjase.

Mi è passade devant, tai soi voi tu leievis che no sarès finide li. Il fat si pandarà di corse pal paîs, soredut par tantis feminis che a son ca in code. L'om nol veve fat ben i conts, la zovenute e je corude vie cul pinsîr dal svindic. Tin tornant indaûr al veve di passâ sot de cjase de zovenute, cu la biciclete a man par vie che e je cjamade di spongje e sîr. Cheste puartant di sore doi seglots plens di aghe ju à metûts dongje dal barcon, viert i veris, spalan-câts i scûrs, si è sentade a spietâ il bulo. Scuindude, e tirave la orele sintint i çucui di un cjaival; cucant e viôt il cjaival blanc e Tilio sentât sul cjar e daûr Tin che al vignive indenant sot dal mûr de cjase. Cuant che si cjate sot a plomp dal barcon, cheste e cjape il prin seglot e lu svuede sul cjâf di Tin. Lui berghelant al cjale adalt e jê cul secont seglot i jemple ancje la bocje. Tilio che al jere daûr, jentrant tal so curtîl, i à dite: “Ben petade e ben tornade, tu vevis di molâi jù ancje i seglots!”.

**Carlo Zanini**

**La maravee e je il sburt di ogni scuvierete.**

*Cesare Pavese*

## Autun di une volte e di cumò

**I**l soreli, che dal solstizi d'Astât si è une vore sbassât sul orizzont, tra il 21 e il 23 di Setembar al tocje la linie dal ecuinozi e lant di là dal ecuatôr celest al parifiche la durade dal dì e de gnot (un vecjo proverbi al conte: Di Atom e di Març la gnot e il dì si spart). A chest pont la grande Astât e je dal dut finide e al comence il pigri e languit Autun. Cumò l'albe e ritarde e la soresere si anticipa puartant i prins sgrisui intal cîl che si discoloris. Ancje i cuadris de nature a diventin pasteis e i paisaços si viestin di delicatetis regalant sensazions languidis. In tâl maniere al començave l'Autun dai nestris vons. Ma isal ancjemò cussì?

A part il discors dal clime che nol permet plui il Setembar blâf e l'Otubar temperât di une volte, al somearès che o l'Autun (clamât ancjemò Sierade, Atom o Soreunvier da part di cualchi vieli) al sedi la stagjon che plui si è conservade a motif des vendemis gjondosis che costituissin la sô fonde. Ma no je propit cussì. Simpri di plui i vignai a vegnin bandonâts o cambiâts cun altris coltivazions, tant che aromai ator vîts s'int viodin pocj in quant concentradis intes grandis aziendis vitiviniculis che a fasin milionaris i lôr parons (che no si clamin plui contadins). Cussì tai nestri paîs chei che a vendemin la ûe a son simpri mancûl, intant che i zovins no dan nancje une man parcè che a lavorin intes fabbrichis e tai uficis e cussì a racui i sgjonfs raps ros e blancs si cjatin dome i pensionâts. E chei, cu lis penis de pension che no je mai vonde e dai cetancj programs dineâts par tal motif, no ridin e no cjantin plui come che invecit si podeve sintî une volte tra lis spaleris des vîts dai nestris cuei e des nestris planis. E dopo

a vignivin ducj chei altris prodots de campagne: pomis, patatis, blave che a puartavin altris gjondis tai curtîi, tes ariis e sui cjascj; vuê no plui parcè che a vegnin cjàpâts sù cu lis machinis agriculis e subite “stocâts”. Tant plui prodot, tant mancûl savôr e nissun licôf. No si fevele des conservis e des marmeladis fatis des feminis di cjase: vuê si lis cjate biel fatis tal supermarket ancje se no àn propit chel savôr e chês sostanze.

Podopo, no stin nancje a fâ un paragon tra lis cerimoniis e la partecipazion a lis grandis fiestis dal Autun di une volte cun chês di cumò: i Sants, i Muarts, lis visitis tal cimiteri, lis cjampanis che a sunavin dute la gnot, lis tradizions dal rosari e des messis pai defonts, de aghe frescje intai cjaldîrs par distudâ la sêt des animis, dal plat e dal jet parecjât pe lôr acolience, dal otavari, e par finî la grande fieste di San Martin e chês dal Ringraziament cuant che si benedivin i tratôrs dai contadins e lis vespas, i motos e lis machinis dai operaris par concludi dut cuntun grant gustâ comunitari. E par finî, lis grandis sagris-mercjâts di Sante Catarine a Udin e di Sant Andree a Gurize a la fin di Novembar e chês di Sant Nicolò, di Pontebe fintremai a Tarvis, ma ancje a Triest e in Istrie, e la universâl Sante Luzie che za e saveve un pôc di Nadâl e de jentrade dal Unvier. Di dut chest vuê in pratiche nol reste nuie; il progrès al à netât vie dut, e se e reste cualchi fieste, cheste no à l’atrat de atmosfere di une volte parcè che e ven fate dome par revival turistic o par interès comerciâl.

**Mario Martinis**

## I me doi furlans

**M**ê mari, cui sôs fradis e sôs sûrs, a è vignuda in Fransa intor dal 1935, lassant Ramussiel, paîs vissin a San Vît dal Tiliment, indulà ch’a steva la famea Gardin. Àn scugnût lassâ i gjenitôrs e la cjasa nova ch’a no vevin rivât a finî di fâ sù par mancjansa di bês e encja parsè ch’al era stât un problema cu la malatia ch’a vevin cjapât i cavaleis.

A son rivâts tal Gers, regjon a ’na sincuantina di chilometri da la sitât di Tolosa, in mies dai cjamps, lontan dal paîs, in ta ’na zona di culina. La tiara a era magra, trascurada, dura da lavorâ, ’na tiara par fâ madons, dut il contrari da la tiara nera da la planura verda e umida ator di Ramussiel. Encja la cjasa no era in stât di essi abitada, in mies dai spins ch’a erin pi als dai murs. Par vêi l’aga par fâ di mangjâ e lavâsi, bisugnava lâ a piè a un chilometro da cjasa. Cuant ch’a vevin di lâ di cuarp a scugnivin lâ a finîle tai cjamps: ta la vigna d’Unviar e in mies a la blava d’Istât. Dut il dì a lavorâ tai cjamps e la not, invezit di durmî, nustra mari a plansi pensant al Friûl, ai paesans e parinç lassâts, al punt di scrivi sui trâfs da la cjamara i nons dai paîs par no dismenteâ li’ radîs.

L’unic plasê al era di lâ al marcjât par jodi zent e guadagnâ un puc di bês par podê comprâ il pan ch’al era tant bon. Il fornâr al era content di vendilu ai talians parsè ch’a ’n’ mangjavin tant e al era sigûr di essi paiât. Cussì a era finida la bruta polenta cul ricuart dal paîs.

Un dì di marcjât nustra mari, ch’a era zuda a vendi cualchi ouf e polès, a jot ’na contadina vissin un zei di oufs cu ’na scritta in franseis parsora: *“Oeufs frais”*.



Tornada a cjasa, a ghi conta a sô sôr: “Vuarda coma ch’a son puars i franseis: a vendin ancje i ous frais!”.

I contadins franseis a cjacaravin fra di lor pi volenteir in ocitan, par nustra fortuna. Par nu al era pi fassil di capî dal franseis par-sè ch'al someava un pûc al furlan. A disevin: “*O vai tal ort*” coma par furlan, invessi par franseis a disevin “*jardin*”!

Nualtris frus nassûts in Fransa, i vevin cualchi dificoltât a capî certis peraulis parsè che nistri pari, vignint di Colorêt e di Trese-sin, al cjacarava un furlan un pûc different di chel da la Bassa, di fati lui al ‘fevelava’ invezit di ‘cjacarâ’. Par esempiu, nustra mari a la matina a meteva ‘butiru’ sul pan e il pupà al meteva ‘spongje’ fate cul lat da li’ nestrìs vacjìs. Nualtris i vin simpri sintût fevelâ o cjacarâ furlan in cjasa, chel da la mari ch’a si misturava cun chel dai nonos, furlan di ‘na banda e di chê altra dal Tiliment!

Cussì jo, co soi rivât a l’etât di cuaranta ains, i ai scugnût lâ a scuola di sera par imparâ la lenga taliana! Par fortuna, pi avant al è vignût il mument dai gemelagios fra i paîs dal Nord-Est da l’Italia e il Sud-Ovest da la Fransa e cussì i soi rivât a fâ pratica cu la lenga.

**Mario Canciani**

*Castelginest (France) - Furlan di Ramussiel*

...uz grassonū. Naz audium' a pluib' cū c  
...m' magn' p'ditō z gluenit talia facē n' un  
...z q' est fallificatō monete z al' deceptum  
...decept. Satis ē dolem' q' sic dimissis te de  
...<sup>re</sup> dñi nū dñi auditeū z honore tui plūne  
...os uenirez z nuq' uenisti ex q' ut mītag a p  
...ō ne tabilib' vius i tēa nēa vtini qui tñ sup



B

ielonon il Drac juste a pene saltât fûr dai paisaços di flabe dal imaginari medievâl, cun tant di alis di gnotul, code di sarpint, orelis lungjis e lenghe rosse. Al è il spieli vif e elocuent de Bestie, dal Dâl, che si fevele intal test: "Alia de eundem vituperando et querulando".

# OTUBAR

	1	J	S.te Taresie dal Bamin Jesù	○
	2	V	SS. Agnui Custodis	<i>Fieste dai nonos</i>
	3	S	S. Gjerart abât	
	4	D	S. Francesc di Assisi frari	<i>Patron d'Italie</i>
41	5	L	S. Luís Scrosop predi	
	6	M	S. Brunon abât	
	7	M	Madone dal Rosari	
	8	J	S. Demetri martar	
	9	V	S. Dionîs martar	
	10	S	S. Denêl profete	◐
	11	D	S. Zuan XXIII pape	
42	12	L	S. Serafin frari	
	13	M	S. Edoart Re de Inghiltere	
	14	M	S. Calist pape	
	15	J	S.te Taresie di Jesù muinie	
	16	V	S.te Edvigie religjose	●
	17	S	S. Ignazi di Antiochie martar	
	18	D	S. Luche vanzelist	
43	19	L	SS. Martars canadês	
	20	M	S.te Rene martare	
	21	M	S.te Ursule martare	
	22	J	S. Zuan Pauli II pape	
	23	V	S. Zuan di Capestran predi	◐
	24	S	S. Antoni Marie Claret vescul	
	25	D	S. Crispin martar	
44	26	L	S. Evarist pape	
	27	M	S. Fluring martar	
	28	M	SS. Jude e Simon apuestui	
	29	J	S.te Ermeline vergjine	
	30	V	B.de Benvignude Boiani vergjine di Cividât	
	31	S	S. Volfanc vescul	○

## Il taur di siôr Jacum

Cuant che a si è in place dal Domo a Milan a tocje pûr fâ cuatri pas intala Galerie Vittorio Emanuele II par vidîe il splendûr dai cafès e da las butighes di mode e profums che ai tire sdrumes<sup>1</sup> di talians e cinês come âfs su la mêl.

Ma soiredut bisugne zî par preseâ i salisos<sup>2</sup> a teraç e mosaic, intune fieste di bocoi intorteâts di fascas di roses, di revois<sup>3</sup> di rori e di fuees di aurâr. Une fieste di culûers da restâ a bocje vierte, sul model dai mosaics fats da Gian Domenico Facchina di Sequals pal Théâtre National de l'Opéra di Parigji screât il 5 di Zenâr dal 1875.

L'autûer di chest saliso al à il non di Giacomo Fabricio, nassût a Clausîet il 13 Novembre dal 1876. Jacum al rivà a Milan encjamò zovenet, nome cu la terze elementâr, ma armât di tante buine volontât e di dôs mans di aur. Vidût che il teraç al tirave, cul aût da la sô femine Anita Martinoia, di une famee siorone di Milan, al fondà la dite “Fabricio e Biasoni” indulà che ai lavorave encje tencj fan-



*Portâl da la vecje latarie:  
ce tant lat no esel passât là sot!*

<sup>1</sup> schiere

<sup>2</sup> pavimenti a terrazzo

<sup>3</sup> tralci

tats di Clausîet. In laboratori Jacum al preparave di persone i *emblemata* in mosaic da insedâ tal teraç. Tra chescj, al centri da la Galerie, sot il cupolon, il famûes taur, “d’ira ardente acceso” al varès det *messer* Torquato, simbul di fuarce, fortune e feconditât, tant che ducj ai i van a balinâ<sup>4</sup> e a sfregolâ i doi di avost<sup>5</sup>. In bande dal taur al reste scrit cu las pierutes il siò non: “G. FABRICIO”.

Tal 1950 al vendè cjases e laboratori al paisan Pietro Fabrici e al tornà a vivi intala cjase dai Tonis, i sîei vons. Siôr Jacum al ere un galantom. A sôs speses al fondà la cjase di ripôs e l’asîl infantîl. A conte la Lide che cuant che al vedeve passâ i canauts a i vignive jù las lagrimes, lui che a no ’nd veve vûts. Al costruì la sale parochiâl e, sot la scjalinade da la glisie, al metè in dret la plaçute e la poçute da l’aghe in non da la sô femine Anita, encje jê tant di côr, che a cusive, a scurtave e a slungjave vistîts pai puarets. Al metè in peis la scuele da cusî e al fasè dreçâ e slargjâ la strade da la Dote. Da ultim al si ere butât infermo par vie dai zenôi, il talon di Achille dai teraçêrs. Ogni dì Meni puistin a i puartave il gjornâl e il mestri Mino al vignive a fâi companie. Al nos lassà il 12 di Fevrâr dal 1964. A Clausîet ai recuarde il *commendator* Giacomo une vie e la cjase di ripôs, ai lu recuarde i paisans par dut il ben che al à fat, ma soredut ai lu recuarde, pur sence cugnizion, ducj chei che ogni dì a Milan ai baline e ai sprece<sup>6</sup> i doi di avost dal siò taur, il taur di siôr Jacum.

**Gianni Colledani**

*Furlan di Clausîet*

---

<sup>4</sup> pestare

<sup>5</sup> testicoli

<sup>6</sup> schiacciano

## Ve la conte di vite vivude: "O ai non..."

**J**o o ai non Beppino, parcè che mio pari, cuant che al à dât jù la mê nassince in Comun, al à dât chest non al segretari e chel no lu à cambiât, come che a fasevin a chei tims. E cun chel non mi àn ancje batiât. In cjase, mê mari mi à simpri clamât Beputi; mio pari invezì, di frutin mi clamave "Piçul, ven ca". Cuant che o soi vignût grant: "Ven ca, dami une man".

Cuant che o jeri te scuele elementâr, tancj fruts mi clamavin Josef o 'Sef.

Tornant ai tims des elementârs, la pagjele che mi davin, un an e jere intestade a Beppino e un an a Giuseppe. Dal moment che dongje dal mio non e cognon la pagjele e veve la date di nassite e ancje i nons di mio pari e mê mari, nissun di cjase al à mai protestât. Tes superiôrs il professôr di inglês al à scomençât a clamâmi Pinin e di chel moment ducj chei de mê classe mi àn clamât cussì... e ancje dopo.

Finût i cuindis agns o soi lât in Municipi a Udin a fâ la cjarte di identitât. Il secretari mi à fat compilâ un sfuei... jo o ai tacât a scrivi ce ch'â mi domandavin e cuant che o soi rivât li dal non mi soi fermât... vevio di scrivi Beppino o Giuseppe? Stant che ta chel ufici al jere scrit dut par talian, o ai pensât ben di scrivi il mio non par talian... Giuseppe duncje! Passade la setemane o soi lât a ritirà la cjarte: il secretari al à scomençât a dîmi sù di dut parcè che il mio non nol corispuindeve, no jeri Giuseppe, ma Beppino. Jo o ai cirût di justificâmi contant la storie des pagjelis, ma chel mi à dât la cjarte e mi à mandât vie cun brute maniere e cun di plui mi à dite che se o tornavi a scrivi Giuseppe, mi varès denun-

ciât par “fals intun at public”. A dî la veretât jo o soi restât mâl, ma ancje un pôc content: almancul o vevi savût il mio vêr non. Plui indevant, cuant che mi soi sposât o ai firmât sul libron de glesie cul non Beppino e ancje li il predi nol à vût ce dî, forsi parcè che, cuant che o jeri lât a prenotâ la cerimonie i vevi dât come ufierte pal disturb un pâ di biliets di liris talianis, forsi masse a pensâi dopo, ma avonde parcè che la firme sul libron e fos buine pe Glesie.

Di fat cualchi an plui indevant, che o ai fat di copari di anel a di une cusine de mê femine, intune altre glesie di Belum, o ai tornât a firmâ Beppino sul libron de cerimonie. Ma chest plevan, viodint il non, al à scomençât a dî che Beppino nol jere un non cristian e che la firme no veve valôr legâl. No savevi ce fâ di me. O jeri ancje ospit intun stât forest (par vie dal Concordât), alore o ai pensât ben di tornâ a cjapâ sù la pene e di scrivi tal puest de firme ancje Giuseppe dongje di Beppino. Dopo mi soi voltât di bande dal plevan e i ai dit: “Va bene così?”. Chel al à cjalât e al è stât contenton.

Cheste volte o ai il sospiet di vê fat pardabon un “fals intun at public” cambiant il mio non, ma chest “delit”, se lu ai fat, lu ai comitût za cetancj agns, e cun di plui intal Forest (il Vatican) e alore o speri che al sedi za stât perdonât.

**Beppino Pravisani**

*Cors pratic di lenghe furlane di Aquilee*

## Cornelio stranîr

Cornelio, furlan al cent par cent, partît a vore pal mont, nol viodeve la ore di tornâ cualchi zornade cjase, tal so paîs, in mieç a la sô int, a sintî di gnûf il bon aiar de sô zoventût. La sô vite e jere dure, di un cantîr a di chel altri, di un scûr a di chel altri, cun faturis nancje di immagjinâsi, sparagnant su dut, cence polsâ. Cjase, par lui, e voleve invezit dî dut altri. Ancje se i soi fradis lu spietavin a pueste par fâlu lavorâ tai cjamps inte stagjon dal bagnâ. Passade la contentece dal rivâ e dal viodi ce che al amave di plui, al tacave a oselâ ce che nol leve ben. “Lâ che o soi si fâs cussì, si fâs culâ, si lavore miôr, bisugne fâ di plui...”. Alc in lui al jere gambiât tal mût di vivi e di pensâ e no si inacuarzeve di cjatâsi a criticâ propit ce che al veve spietât dut l’an. Parincj e amîs, fatis lis fiestis cuant che al rivave, a tornavin a la lôr vite di simpri, cul fastidi di sintîlu bruntulâ parcè che nol funzionave nuie. Ducj a pensavin: “Cuant isal che al va vie? Se no si cjate ben achì, ce stiaial ancjemò a fâ?”. A Cornelio i vignive rabie parcè che il Friûl nol someave a un paradîs in tiere. Al varês volût che al tornàs indaûr e, intal stes timp, sbruntâlu indenant. Cussì a àn finît par clamâlu di sorenon “stranîr” zontant “cui crodial di jessi?”. La robe e je rivade ae orele di Cornelio e al someave che al ves capide la solfe parcè che al è stât cualchi an a la largje e par dâle sul nâs ai soi paisans al à pensât di fâ pardabon il stranîr. Al capite dal ’76 il taramot e al è za vecjo, ma al sa lavorâ ancjemò. Al met adun cuatri dai soi compagns di cantîr e al ven in Friûl a dâ une man cence domandâ nuie. Lezion salutâr par la famee e i paisans, che lu clamin ancjemò stranîr, ma cuntun pôc plui di rispiet.

**Roberto Tirelli**



## *Timp passât*

*Tornimi, timp,  
i dîs che tu âs robât  
a une frute minude  
das strecis lungjis,  
e dai vôi spalancâs  
sul avignî.  
Tornimi, timp,  
lis gnots vajudis  
su tantis disfurtunis  
cence redensie.  
E lis stagjons plui bielîs,  
chês che no ài vivût,  
piedude tun destin  
cence pietât,  
dulà sono scuindudis?  
Mi bastaressin, cumò,  
une grampe di siums  
e un pognut di sperancis,  
par no lassâ passâ,  
dibant,  
l'ultim tocut di strade.*

**Franca Mainardis**

*3<sup>e</sup> premi seziun autôrs dal concurs "Gjso Fior", Verzegnis 2018*

## Curiosant intal archivi parochiâl

**I**l libri storic parochiâl nus à lassât un grum di notiziis su le vite paisane di Sclûse intai agns da le prime vuere mondiâl.

Atent osservatôr e critic, cence pêi su le lenghe, il plevan al scriveve testualmentri: “Le braide di Sclûse e le campagne di Racolane a le erin dutis ocupadis di barachis e depuesits di munizions. Soldâts dapardut, di ogni arme, e fruts ch’ai corevin a cjoli il rancio ch’al vanzave. Pa’ strade ai passavin in continuazion camios, autos, bicicletis, cjavai e mui, ch’ai erin un pericol par cui ch’al girave a pît. Le’ cjasis a le erin invadudis dai militârs. Militârs intai curtii, militârs inta stalis, militârs inta cusinis, inta cjamaris, intai coridôrs, sul cjast...

Le’ primis dôs-trei zornadis a si compuartavin cun creance, dopo ai erin lôr i parons. Indolà che i militârs ai erin stabii a si ere creade une certe familiaritât a scapit da le moralitât, da le’ praticis religjosis e da le’ ideis. Tantis fantatis inespertis a si inludevin pensant a le’ gnocis... A le speravin di lâ cui a Turin, cui a Milan, cui a Rome... Figurâsi po’ a Napuli... Al ere dut fazil pa’ le’ fantatis che intal cjâf a le vevin dome cjavei, e i militârs, cuant ch’ai partivin, ai cjantavin: ‘Ma non ti lascio sola, ma ti lascio un figlio ancor, sarà quel che ti consola, figlio del primo amor’ (o dal secont o dal tierç). Al sarès ancje alc ce dî da le’ sposadis, ma al è miôr tasê.”

**Antonino Danelutto**

*Furlan di Scluse*



*Il cjamoc  
tal lât di Dobardò  
(foto Dario Quattrin)*

## LIS BOTIS PIGURADIS

### Gastone Marizza e Stefano Ornella

**L**is dôs botis a àn in comun une fuarte adesion ae corinte artistiche *naïve*.

La bote di Gastone Marizza (San Lurinç dal Lisunç 1937 - Gurize 2010), piturade tal 1983, e à un plasevul stîl popolâr: a son rapresentâts doi vecjuts che, intant che a tornin a cjasse, spierdude te nêf, si passin une butilie di vin. Tal 1997 la stessee ambientazion e fo piturade di Marizza sul cjâf gjavât a une bote, che si cjate cumò tal pont di vendite de cantine.

Le bote di Stefano Ornella (Monfalcon 1969) e je dal 2008 e e presente une *Maternitât*.

Inte opare l'artist al à leât i siei studis des iconis bizantinis al steme di Cormons "che a mi plaseve tantissim par la simbologjie de lune metât rosse e metât blancje e il cûr". Lis figuris bi-dimensionâls dai grancj voi si ispirin ancje ai manga gjaponês e ai ritrats egjizians dal Fayum.



Gastone Marizza,  
bote cun paisaç invernâl,  
1983, dopo dal restaur



Stefano Ornella,  
bote cun Maternitât,  
2008, dopo dal restaur

**Gabriella Bucco**

## La val dai loufs

**D**oi omps, tornant dal lavôr, si erin fermâts ta ostarie a bevi un tai. Al ere tart e un dai doi al à dit a chel atri: “Jo m’in-vii, la strade par Muntisel al è lungje”. “Poben, tu invîiti, jo beif ancjimò un taiut e dopo ti darai la vus pa strade” a i à fat chel atri. Dopo un pouc, chel ch’al ere partît par prin al à clamât il compagn e al à sintût rispuindi une vus, che pa la veretât a la sameave un ululament, e cussì al à pensât ch’al stave par cja-pâlu. Al à tornât a clamâlu e la rispueste a l’ere simpri pui vizine. A un cert moment si è voltât e al à viodût un louf che ululant a i coreve daûr. L’omp alore si è metût a cori e par fortune al à cjatât un stâli. Al à sierât la puarte cul clostri e al à tacât a vosâ cun dut il flât: “Aiût... Aiût... Il louf cjurvint mi mangje...!”. Il louf al ere simpri difûr ch’al ululave, ma par fortune la int di Mujese cun forcjîs e cun falcets al è rivade a copâlu e a liberâ l’omp: dal spavent, a i erin vignûts i cjavei blancs.

**Giulia Not e Severina Not**

*Furlan di Mueç*



*Disen*

*di Annalisa Gasparotto*

## UN AGRISÛ DAL GRANÛ CÛR

### A cjàpâ sù blave

**P**uartade in Italie dal 1560 da lis tieris gnovis merecanis, la blave e je la seconde risorse agricole tal mont cun 600 milions di toneladis di racolt tal 2000. Il non *mais-mahis* al diven da la famee lenghistiche dal Tain, une da lis lenghis da lis Antilis, cjàpât sù dai Spagnûi ta la forme di *maiz*, cemût che si lei tai diaris di Cristoforo Colombo. Ce che al è di gnûf su la blave, a son lis sôs origjins: no je une plante salvadie. Par une lungje dade di timp, miârs e miârs di agns, l'om al fo nome cjaçadôr e po dopo al diventà contadin. Il fat che no je une plante salvadie, al po judânus a vê une rispueste. Ta la sô forme "modificade" dal om, la blave e ven di une zone gjeografiche ch'è cjape dentri il Guatemala e il Messic. La divignince "salvadie" da la blave – daûr di George Beadle, premi Nobel pai siei studis di gjenetiche – e starès ta la plante clamade "teosinte" ch'è cres naturâl in tantis bandis in Messic. Beadle al è rivât a isolâ un gjen responsabil da lis diversitâts tipichis di cheste plante. Sicheduncje al è sigûr che lenti, in chê lontane zone tal Messic, l'om le vedi discuierte e imparât a coltivâle. Varessino se no mai sintût, vie pai borcs, chel bon odôr di polente?!

Ancje par la blave, vuê la raccolte e je mecanizade, scuasit computerizade cun chês gnovis trebionis! E però e reste l'immagine clare tai voi di Otto. Si partive buinore: un cjar di int, pronts a stâ fûr dute la zornade. Co al rivave misdì, su la sgjave al jere za pront il gustâ puartât di une femine di cjase: une tavuae, la pignate cul mignestron, il salam, il formadi, il botaç dal vin. A lavôr



fat si fasevin i balzûi di cjanis e s'indi fasevin lis tamossis che plui indevant si vignive a cjamâ daûr da la necessitât da lis bestiis. I imprescj: lis dôs sesulis, chê par la panole e chê, cul mani plui lunc, par taiâ la gjambe lassant sot il clari.

Intant a jerin za stadis cjapadis sù ancje lis cocis: chê verde, di mangjâ intun bon 'zuf e chê zale, pai purcits e... pai fruts che, dopo di vêur gjavât lis picjis, a 'ndi taiavin po disore une muse cui voi, il nâs e la bocje e, par daûr un biel bûs grant, par metiur dentri une cjandele e fâ... halloween! Robis nestris di sessante agns indaûr. Altri che merecanadis!

**Gotart Mitri**

## La predice dal Passio

**J**oibe sante. Funsion dopu sene. Leture dal Passio e predice (che no ài mai capît: nuie di pi poetic dal Vanseli). Meni fari, otantesiet ains, nol po manciâ a la funsion, ma a la sô etât la digestion non perdona, e lui s'indurmidis a pene scomensade la predice. Cuant ch'al si svee, curvint di vê durmît par cuisà tropi' oris, al ciale il plevan e, sicome ch'al è sort, cun vôs alte e vôi spaventâs al domande: "Al è encemò tal ort, chel lì?". Toni Pistrin, sintât donge di Meni, al scugne fevelâ cun vôs alte par fâsi capî, e cun grande calme al spieghe: "Sì, al è encemò tal ort parsè ch'a nol rive a ciatâ il portel par vignî fôr!". "Ben ben fantàs – al dîs Meni paciant, e simpri a vôs alte – jo no sai s'i soi vîf un altri an, ma s'i soi encemò in chistu mont, chel lì no mi ciave pi!". Inutil dî che, intant che il plevan al zeve in serce dal portel, li' bandiadis donge di Meni a ridevin come par un film di Ollio e Stanlio.



*La mirinde  
(foto Giuliano Borghesan)*

**Gianfranco Ellero**  
*Furlan di Frofean*



## A ere une vôte...

**I**l prim di di Otober si incominçave la scuele e l'orari al ere das nûv di binore fint miesdì e das dôs fint as cuatri di dopo miesdì e il joibe a ere fieste e si scriveve cul penin.

Ogni tant mê mari mi mandave a fâ la spese in da Pichi in dulà che tante mangjadorie a vegneve vendude sioe e il vin si trava-save da une damigliane e metû in une butilie che tu puartaves da cjase. L'aghe di Vichy a ere la novità scopiade une estâ: in tune butilie ca si podeve sierâ ermeticamenti e plene di aghe si metevin dôs bustines e... a nasseeve l'aghe minerâl! Come ducj i canais si spietave il Nodâl pai regâi. Un an à avû un dubi: i doi mandarins (che a erin il regâl) invuluçâs a vevin la stesse cjarte dal Tavio, il becjâr, e cemû podeviel vê Babbo Natale, ch'al riva-ve da cussì lontan, la cjarte uguâl dal Tavio? Toni, il muini, ch'al stave dongje di me, di spes al mi dave 100 francs par toli un pachet di sigarets Alfa ch'a costavin 90 e cul rest di 10 francs, par ringraziament, mi podevi toli 10 goliutes! (golia). La television no ere imò pas cjases e la canaie a passave il timp cun zucs che non costavin nuie: la bite, il cuc, las tatiches, i soflets, i batons, guardians e laris e il classic balon. D'Invier il slissasi cu la loge a ere la robe plui biele e si passavin las ores a bati la zitere cui pîs in tripe e las mans glaçades.

...e il Tonino da Marie al passave cjantant "cuore matto" da Vile di Mieç fin in da se passant sot da mê cort: timp pasâ, timp ch'a lè svolâ, timp cence pinsîrs...

**Paride Radivo**

*Furlan di Paulâr*

## Une zornade fûr dal timp

**L**a nestre cjaminade e scomence a Mueç disore, par un troi tal mieç dal bosc cun destinazion i doi paîs di Muiesse, che dome a pît si po rivâ. Une ore e je svolade intun moment tra une tabaiade e cjalant ator di nô i faiârs, i peçs e ancje une capele votive dedicate ae Madone. Rivâts a Muiesse di Ca, lis primis cjasis dal paîs a vevin i barcons vierts e si sintive fintremai a vosâ, forsît cualchidun ch'al ven a passâ il fin setemane. Pal rest al è dut bandonât, pustot e il bosc al torne a cjolisi ce che l'om i veve puartât vie. A veglâ sul borc a son restâts dome i vuardians, ch'a no son altri che pieris a forme di muse. Aromai o sin bielzà sul troi ch'al puarte fûr dal paîs, di corse o traviersin il puint dal riu Mulin e intun bot o sin a Muiesse di Là. Chest lûc al à alc di magjic e misteriôs. La mestre Anute Marie Mansute e conte tai siei scrits che tal 1920 a jerin a stâ 110 animis tra oms, feminis e fruts. Il soreli al inlumine lis cjasis, sul jentrâ dal paîs une bieles fontane, sul mûr de scuele une meridiane cun sù scrit "sile sole sileo". O curiosin ancjemò un pôc par andronis strentis e dut un moment si inacuarzîn di une cjase ben tignude e di un om vieli, sentât fûr de puarte ch'al fisse doi parussui ch'a becotin saîn sul rampaç di un miluçâr. Silvio al vîf bessôl aromai di tancj agns ta cheste borgade in compagnie dome dai siei gjats. Sentâts dongje di lui, nus conte di quant ch'al lave a cjace sù pe mont, dal gjal cedron, che no si viôt plui di chês bandis, di gjats e di surîs, e jo intant o pensi ch'al sarès biel vivi ca sù e che nol covente tant par vivi ben e in pâs. Intant ch'o pensi o sin za sul troi di cjase, ma chel siôr bessôl lu puarti tal cûr e lu viôt cumò sentât tal so cjanton di paradîs.

**Stefano Fabro**

*Cors pratic di lenghe furlane di Jalmic*

## Lane di gjat

**U**n Invier di cualchi an fa o sei lade a cjatâ une femine che o cognòs un grum ben. Catine, cussì si clame, e je une femine lavoradore, lis sôs passions a son lis rosis, l'ort e la gucje. Le ai vedude simpri a gucjâ, soledut di Invier. E je buine di fâ di dut, cjalçuts, baretis, siarpis, maiis, e se pussibil e torne a doprâ simpri la lane da la robe che e veve disfât se e ere diventade piçule o rote.

Alore cu la sô fantasie a faseve diventâ il gnûf lavôr di mil colôrs. Intant che o bevevi il cafè, le viodevi a gucjâ un pâr di cjalçuts che mi à dit che ju faseve pal nevôt. Tabaiant dal plui e dal mancûl, mi à contât che agns prime a veve fat un golfut dut neri a la fie cu la lane di pinguin. Tirant i voi par chel che o vevi a pene sintût, i ai rispuindût che chest no ere pussibil, che dal pinguin no si pues tirâ fûr lane. Ma jê, simpri pui convinte, mi confermave, disintmi che cuant che e sarès rivade la fie mi faseve dî di je se chest nol ere vêr. No vevin nancje finît di tabaiâ che a rive la fie a cjatâ i siei vecjos. La mari i dîs dal discors che si ere daûr a fâ. La fie mi cjale e ridint i dîs a sô mari che e jere la marcje da lane che si clamave “lana pinguin”. La mari, restade un pôc mâl, no saveve ce dî.

Inalore jo par scherçâ i ai domandât se mi faseve un golfut cu la lane dal gjat. Jê svelte mi à dite che e je la marcje da lane che si clame “lana gatto”. Dutis e trê si sin cjaladis e o vin fat une bieie ridade.

**Laura Fabro**  
*Furlan di Mueç*

## *Sunt nomina rerum: le polente*

C'e tante magjie te Polente. Ancje il so non al rive di lontan. I latins di Aquilee a preparavin il *pulmentum*, messedant insieme vuardi, lin, mei, curiandul e sâl. Ma a vevin robade le recipe ai marinârs grêcs, che a zontavin al paston ancje brût di cjar (agnel o bec) e vin, un vin dolç di mîl ch'al veve di non "sapa", ch'al sarès, ancje tal non, le mari de nestre sope furlane! Un plat talmentri bon che secont le tradizion adiriture le dee Proserpine, fie di Cerere, lu preferive a ducj chei altris, dopo che une vecje femine (sarà migo stade une furlane?!) jal veve fat cerçâ, testimoniant che un gustâ come chel al mantignive un significât simbolic e rituâl di grandissime impuartance, stant che le dee e jere le siore dai Muarts, lis animis che a savoltin le Tiere mari.

Il plui grant cogo dal Patriarcje di Aquilee, il Mestri Martin, tal so straordenari libri *De arte coquinaria*, al fevele propite de polente come di un plat ch'al merte di sei servîl su le mense di un princip. E o sin bielzà tal 1456, ma nol è rivât ancjemò l'ingredient ch'al varès fat dute le difference. Cuant che i ferments religjôs si plachin, tra le fin dal Sietcent e il Votcent, le polente e restarà il mangjâ dai puars, specialmentri i contadins, che no vevin nie altri, dal moment che le lôr vite e jere cuaresimâl par dut il timp dal an. Une culture, une civiltât, chê contadine, che e à disegnade le forme de culture furlane intune maniere prevalente, almancul fin al timp dal grant scjas dal taramot dal 1976, e che cumò o scugnìn in cualchi maniere tornâ a fâ vivi

come forme di resistance, chê de Tiere, de lentece, dal bon sens, cuintri une crisi dal marcjât globâl ch'è masane dut tal so ingranagjo devastant.

Impastâts di blave nô furlans lu sin simpri stâts. No si butave vie nie de panole. Ce ch'al restave, il scart, al vignive dât a lis ocjis o a lis gjalinis. Il panoglat al brusave ben tal fûc, par scjaldâ le cjase e par cuei altris polentis. I jets fats di sclofes a àn sostignude le fadie di zornadis duris, di vore. Li parsore a son stâts concepîts fruts, li a son muarts i nestris vecjos, in cjase, preservâts de disinfetade e anonime corsie di un ospedâl.

E d'Unvier, in file, spanoglâ tes stalis al voleve dîsi tramandâsi grignei di sapience, tignî le trame di une narazion orâl, là che le lenghe si fâs memorie, identitât, insegnament. E bon acet ancje pal forest ch'al tuche su le puarte, par difindisi dal frêt e de fam. Se i latins antîcs, cuant che a mondavin lis favis, *fabae*, a “fabulavin”, ven a stâi a aprofitavin par contâ storiis peadis a le lidrîs dai lôr vons, i furlans, cuant che a specolavin panolis a fasevin le identiche operazion culturâl. Spanoglâ e podarès sei le voltade in furlan dal verp latin *fabulare*. Forsit al è propite li che o vin di tornâ, par rivâ a capî cui che o sin e costruî le nestre storie di doman.

**Angelo Floramo**

## Atent al Ritmo!

Chest fat al è sucedût te mê famee tancj agns indaûr, cuant che o jeri ancjemò a stâ in Basilicade, a “Sant’Ilario comune di Atella provincia di Potenza” (cussì nus vevin insegnât a dî, a nô fruts), un paisut di contadins là che si saveve dut di ducj. O jerin a stâ intune cjasute di front dal edifici de scuele elementâr, o vevin dai bogns vicins di cjase e si devin une man un cun chel altri. In famee o jerin in cinc: la mame, il papà e trê frutis: mê sôr Maria, jo e chê altre sôr Carmelina, fin cuant che tal 1976 al è rivât il mascjo: Tonino. Nô o jerin za grandutis cuant che chel glimuç al è vignût al mont: e jere une gjonde par nô podê dî “gno fradi”, al jere il nestri “ciccio bello”. Cuant che i disìn ch’al è un paiazzo, lui al dîs ch’al è par vie che lu vin tirât sù nô.

Par lâ a fâ bosc gno pari al veve cjolt un motocjar di seconde man, un pôc plui grant di une Ape, ma cun cuatri ruedis. Tonino al leve spes cun lui... pôs crodi, l’unic mascjo, lu segueve in ducj i siei lavôrs e come ducj i fruts i domandave il parcè di dut. Al jere un frutin curiôs e cuntune grande fantasie, dolç e altruist, un piçul San Francesco, ancje lis besteutis plui salvadis i levin dongje.

Une dì, al veve cirche cuatri agns, intant ch’al zuave bessôl davanti di cjase, j è colât il voli su la machine dal nestri vicin di cjase, une Ritmo grise metalizade gnove di pache (in chei agns e leve di mode, la Ritmo) e si è impensât di chê volte che gno pari, par vernisâ il motocjar, lu veve passât prime cu la cjarte di veri, par gjavâi la vernîs vecje. Te sô grande gjenerositât il frut al à pensât di fâi un plasê al vicin... e come che al veve viodût a fâ il papà,

al à cjàpât sù un toc di cjarte di veri e al à tacât a passâle su la Ritmo: prime il daûr, po la flancade, dopo il devant... un lavôr di fin, e za al gjoldeve il moment che i varessin dite “Bravo!”.

Cuant che al jere par tacâ chê altre flancade, cualchidun lu à viodût... e si è scjadenât il putiferio! Ducj che a berlavin, i àn gjavât di man il lavôr, e a son lâts di corse a clamâ mê mari. E lui, puarin, nol capive parcè che il paron de Ritmo al fos cussì inrabiât, al crodeve di fâi un plasê! Chê dì, rivadis a cjase, o vin cjatât Tonino ch’al vaive parcè che lis veve cjàpadis e mê mari che e vaive pai 500.000 francs di dams che a vevin di paiâ.

Gno pari, savude la notizie in place, al è tornât di corse a cjase. Al jere aiar di tragjediè, il frut al jere distirât sul divan, avilît, mortificât, cui voi plens di lagrimis. A pene ch’al à viodût il pari, cence nancje alçâ i voi i à dit: “Lis ai za cjàpadis de mame!”.

**Caterina Tomasulo**

## In Nuiàrs

**D**urant l'Estât, prima ch'al nasses soreli, me nona Richeta e agna Giovana di Menon as geva sù in Nuiàrs, un lô sora Vildimieç [Tramonti di mezzo] a seâ il fen. Nos canais, vers las nouf e miegja, gean sù a spandi i flochis, a zuiâ e a impiâ il fô par cusinâ il mangjà di misdì. Rivâs in Nuiàrs: una cjasa cun la stala tacada e la stanza dal formai, una vasca pa l'aga plovana e un poç cun l'aga stagnant, cumincean a zuiâ a fâ salts sul fen e a spandi i flochis. Dopo entrean intala cucina: intal mieç al jara il fogolâr cu la cjadena e su la pareit di sinistra as jara picjas la rimina, il cjaldirin dal cafè, la cjalderia, la fressoria, las cjacjas e su una brea di legn ai jara poias i plas, i gos e las posadas. Dovean impiâ il fô e cussì gean in cercja di stechis sechis e gimas e cun un po di ciarta di gjornâl e un furminant al cjapava subit. Cuant ch'al cricjava, butean sù legnas secjas par fâ il borest e metean sora la fressoria par brustulâ la polenta e su la cjadena picjean il cjaldirin cun l'aga par fâ il cafè. Bel planin gjavean il cjaldirin da la cjadena e lu lassean riposâ, cussì i fondacjus ai geva in fons. As rivava las dos vicjutas, stracas e siliadas, as beveva un goton di gasosa e a si sentavan sui scagns. "Seis stas braus e ades mangjan intor dal fô" a diseva me nona. Dopo a si contava: "Su la mont di Celant al vîf un modraf ch'al cjanta e al svuala comi un gjal, al è furbu, al cor devôr ai canais mascalcjons e sa ju cjapa a ju beca. Bevean il cafè cun dentri una feta di fuiacja, butean l'aga sul borest par distudâ il fô e tornean a cjasa cidins cidins plens di paura, ma il modrâf ch'al svuala no l'avegn mai vidut.

**Irma Marmai**

*Furlan di Vildimieç*



## Il figâr di Angaran

"**V**en dentri mame ch'a bombardin". Il rumôr sort da lis "fortezze volanti" al sorestave il gno reclam e dovevi vigni jo di persone a tirâti jù dal figâr che, in chel Autun dal 1944, al jere straplen di fics, par fâti jentrâ tal rifugjo rigjavât tal ort. Tai bombardaments su Codroip, oltri a la cjase, une bombe e à centrât ancje il figâr. Soi sigûr che tra lis tôs lagrimis a 'ndi jere cualchidune ancje pal arbul! E scomence da chel dì la nestre diaspora: da Codroip a Buri, Pordenon, Udin, Vittorio Venit, Bassan. In dutis chestis localitâts, tal ort da lis cjasis che ti âs abitàt ti âs simpri cjatât un figâr.

Mi ricuardi la tô contentece, fin a chel dì che, par slargjâ la cjase di Bassan, ai dovût gjavâ il figâr. No podarai mai dismenteâ la olmade plene di displasê che tu mi âs dât. Cumò tu mi âs lassât, par simpri, e ta la fotografie che ai fat meti su la lapide mi è someât di viodi un strani surisut, cuasi braurôs, surian. Grande e je stade la mê sorprese cuant, dopo cualchi mêse da la tô sepulture, ai viodût une plantute, fine fine, nassi e menâ di buride, propite daur de lapide e a ret de tô fotografie. Cun grande maravee, al vierzisi da li' primis fueutis, il zovin pulin altri nol jere che... un figâr!

Cumò lu ai trapiantât tal spazi su la tombe rigjavât par li' rosis e za da un pôc di timp li' fueis, movudis dal aiar, a somein ch'a mi cjacarin. Po dâsi ch'a vuelin dîmi che là che tu ses ti àn riplantât l'arbul che tu âs tant amât; no rivi a capî ma cuant ch'ò cjali l'espression ta la tô fotografie, soi sigûr ch'a è propit cussì.

**Renato Cella**

*Bassan dal Grapa - Furlan di Buri*

pulere gliblano eu lleimo erig q'adat lubrica felu  
 is te felices fateã morete  
 nichil dulce dum viuimus  
 ndat locus gorge vbi habitabat et eius fontem  
 nos ad votoz modestiaz z ad electōnes meliois uite  
 ppetui z e valde pulc<sup>r</sup> z notabiliy ad nō peraltinādus  
 impacēs more festinacōis appetens n̄ ulla tātū celeri  
 ne non tarditas sit amanti.  
 leio sit qd' saluamētē sit nā z si rephensione dilacio.  
 mendacō tñ laudē digna ē Turpe ē variancia non fir  
 na.  
 agis q' mopia metuenda est.



Hic scribitur

**I**ntal boscam des peraulis al scjampe il Purcit Salvadi. Al  
 pâr dibot che i cori daûr a la peraule di riclam "hic scri-  
 bitur", che e je stade scrite a drete. Stant che si trate di  
 une cjarte di indicadôr o tablele, ve mo che il significât  
 simbolic e alegoric nol è propit impuartant come il zûc  
 dal miniaturist, che cussì se gjolt.

# NOVEMBER

	<b>1 D</b>	Ducj i Sants	
45	<b>2 L</b>	La dì dai Muarts	
	<b>3 M</b>	S. Just martar	<i>Patron di Triest</i>
	<b>4 M</b>	S. Carli Borromeo vescul	<i>Zornade de Unitât nazonâl</i>
	<b>5 J</b>	SS. Martars di Aquilee	
	<b>6 V</b>	S. Lenart abât	
	<b>7 S</b>	S. Ernest abât	
	<b>8 D</b>	S. Gofrêt vescul	☾
46	<b>9 L</b>	Dedicazion de Basiliche di San Zuan in Lateran	
	<b>10 M</b>	S. Leon il Grant pape	
	<b>11 M</b>	S. Martin di Tours vescul	
	<b>12 J</b>	S. Josafat vescul	
	<b>13 V</b>	S. Diego frari	
	<b>14 S</b>	S. Clementin martar	
	<b>15 D</b>	S. Albert il Grant vescul	●
47	<b>16 L</b>	S.te Margarite di Scozie regjine	
	<b>17 M</b>	S.te Lisabete regjine di Ongjarie	
	<b>18 M</b>	Dedicazion de Basiliche Vaticane	
	<b>19 J</b>	S.te Matilde muinie	
	<b>20 V</b>	S. Otavi martar	<i>Zornade de infanzie</i>
	<b>21 S</b>	La Madone de Salût	<i>Zornade nazonâl dal arbul</i>
	<b>22 D</b>	Crist re di dut il mont	☾
48	<b>23 L</b>	S. Colomban abât	
	<b>24 M</b>	S. Crisogun di Aquilee martar	
	<b>25 M</b>	S.te Catarine di Alessandrie martare	<i>Compatrone di Udin</i>
	<b>26 J</b>	S.te Dolfine vedue	
	<b>27 V</b>	S. Valerian di Aquilee vescul	
	<b>28 S</b>	S. Mansuêt vescul	
	<b>29 D</b>	S. Saturnin vescul	<i>I di Avent</i>
49	<b>30 L</b>	S. Andree apuestul	○

## Amadio, che al ciscave a las âfs

**L**a agne Bete a steve intai Scjefens, intune cjasute di legn e di clap che a pareve surtide da une flabe dai fradis Grimm. Biel zint o tornant mê mari a si fermave encje tal Bisin, uì dal Amadio. La Zepin a nos clamave in cjase a cercjâ un gotisin di cirisies sot sgnape, di chê buine fate dal Amadio cu la trape<sup>1</sup> dal siò vignâl. L'Amadio, nassût tal 1906, al veve 50 agns cuant che jo 'nd vevi 10. Al ere tal flûer da la vite ma al mi pareve belzà vecju. Al ere un om di grant inzegn e dongje di lui passavi volentêr bieles dades<sup>2</sup>. Tal lavorâ il legn al ere un mestri. Al mi mostrave la stanze dai imprescj, raspes, seghets, splanes, sesolets e al mi sentave a cavalot da la bencje musse. Al faseve cjarcoles, sieles da molzi cul planâl di aunâr e i trie pecoi di aer, musaroles di sgrenes di noglâr pai vigjêi e sampogns<sup>3</sup> par las vacjes che ai zeve in mont, brencjes, maces di riscjel e dincj di cuarnolâr cu la dintarie fate dai Gjarisos. Al me-teve adun scjalutes musses par zî a cerpî cun biei spargoi<sup>4</sup> di cjustignarie. I manis dai imprescj a ju faseve di legn ladin<sup>5</sup> di



*Pieres fates une volte  
e destinades a un ûs diferent*

- 
- <sup>1</sup> vinaccia
  - <sup>2</sup> periodi di tempo
  - <sup>3</sup> campanacci
  - <sup>4</sup> pioli
  - <sup>5</sup> facile a lavorarsi

spac, frassen e vuâr, taât in debil di lune. Ai sarès stâts pi fuarts – al diseve – e ai varès durât di pi. Al plantave il conî tal mestri e al petave jù di voe cu la maçuele che a veve il cjâf fat tun çoc di ciriesarie gropolose e tuartice e il mani di savût. Al preparave encje lungjes maces cuntun carnêr<sup>6</sup> in somp, tipo la borse dal muini, par tirâ in Autun i mêi da las pontes. In somp di une mearie di rose mantovane al ere restât un mêl tant biel e colorât. “Amadio, parcè nol tirâvos?”. E lui: “Eh, jo fâs come la bolp cu l’ue: a nol è encjemò madûr e no vuei tirâlu garp<sup>7</sup>”. Ma la passion pi grande al la veve par las âfs. Al preparave lui stes i boçs e i telarins cun breutes di cjastignarie e di povol. Al conosseve ducj i timps e i segrets da la lûer vite meraveose. Tignint bon il det dai vecjus: “A San Vissens (22 di Zenâr) la gran criûre e a San Laurinç (10 di Avost) la gran calure”, d’Unvier al stucave las sfissidures dai boçs cu la buiace e d’Estât a i faseve ombrene cu las frascjes. Prime da meti las mans tai boçs a ju fumulave e, come par pasâ las âfs, al ciscave belplancut cheste filaine: “Sence sîet e sence fan zirarai pal gno ream par cirî la mê regjine, madone di grant rivuart in non di Diu e di San Bernart”. Peravoles misterioses e antighes che ai sintût dî encje da Tite Lene di Almades e dal Doardo di Prafuart. L’Amadio, recuie, al mi voleve ben e a Nadâl al mi deve simpri un verut di mêl di cjastignarie.

**Gianni Colledani**

*Furlan di Clausiet*

---

<sup>6</sup> sacchetto

<sup>7</sup> acerbo

## Il sant dai cjocs

**L**'ostarie al ere un mont plen di vite, di colôr, di curiositâts e di strambetâts in gracie das personas che achì as passave dadas plui o mancul lungjas. Par solit une gneule di fum a balave sôre vie dai taulins dulà che i guadôrs ai bateve il carton e se d'Estât a giovave, al mancul un tic, tegni viert il balcon, d'Inviern cul freit chest no si podeve fâ a lunc.

Cualchi probleme al si presentave cun cui che, dopo cualchi tai, al començave a fumulâsi i sentiments e a cjatâ da dî cun ducj e par dut; achì a entrave in vôle l'autoritât dal ostîr o da ostèrie che par solit, cun grinte e cun pols, a si dave da fâ subit par bonâ sul nasci cavî o discusssions masse impiadas.

La fantasie popolâr par piturâ cui che al alçave masse il comedon a ere coloride e a variave secont la cjame di vin che un al veve; si partive, tant par dî cualchidun, da lêgri, pontât, cjochit, çûful, bevucjât, becât, passant, daûr da gradasion alcoliche, par impiât, pontât sot di une svuale, cjàpât tal vin, cjochele, fint a rivâ a plen disfat, cjamât, cjoc nêri, cjoc disfat.

Cussì chel che al jessive da ostarie triculant al passave tal tameis da int che cence tancj gîrs di paraulas a sentensiave: “Al è cjamât inbande”, “Al à cjàpât une parusse!”, “Viout ce sissule ch’al à intorsi!”.

Si sa che cuant che a si esagjere cul vin a cres la fumate tal cjâf, si fumulissin pinsîrs e rasonaments, i riflès noi son simpri pronts, las gjambas as van a trabucs insome il cjoc, il cibiscul nol à âti il control das propias capacitâts e i riscjos di incidents di ogni sorte noi mancje.

Scuviergi dopo che pa grande part nol succedeve nue al faseve pensâ a un sant che al ves un vouli di riguart propit pai cjocs; al ere un sant che al veve il so cefâ e al veve encje bogns êsits, cunsiderât che la int a diseve che “Il sant dai cjocs al è un grant sant”: nol à un non ma, secont la tradision popolâr, al travuarde chês personas che as àlcin un tic masse il comedon.

Tra i personagjos curious, che noi mancjave, ricuardi 'Sefut, acanît giuadôr di scarabocjo cun nissune passion pa sconfite che, cuant che al stave giuant e las roubas nos lave secont i siei conts, al inventave alc par no pierdi la mûse. Une volte al à studiade propit penge; il taulin al ere tal cjanton subit dongje dal balcon, la partide a si ere scjaldade e a veve tirât atorn atorn l'intarès di âtas personas che as comentave e as sfoteve. L'umiliation da pierdite a sarès stade masse grande e cun masse testimonis e alore 'Sefut, sul plui biel, poant las cjartas sul taulin, al vòse: “Fermis ducj! Achì a 'nd è alc che nol cuadre!”. Ducj si cjalin. 'Sefut al sposte il cûl suntun cjanton da cjadree e al mole une scariche di pedots da fâ trima i vêris berlant: “Fûr chei che noi pâe fit!”. Ridade gjenerâl, balcon che si viergin e int che a cor di fûr a cjapâ arie.

**Celestino Vezzi**

*Furlan di Çurçuvint*

## Cinirine la strie

**E**scugnive jessi strie une che in municipi e jere stade dade jù cul non di Cinirine. In glesie no si sa cemût che le àn batiade. Cjatâ une strie tai pâis dal Friûl nol jere dificil, anzit, si cjatavin in bondance. Ancje se no lis brusavin plui, bisugnave vuardâsi di lôr e fâ dut un rituâl di mots e segnâi di crôs par slontanâ il mâl. Cinirine e jere clamade la strie dal sotpuarti, parcè che la sô cjase e vierzeve la puarte sot un puarton e chei dal curtîl a slungjavin il pas plui che a la svelte, par no vê a ce fâ cun jê. Tal curtîl no passave zornade cence che cualchidun nol ves di cjapâsi da dî cun chei dongje, e la strie no mancjave di fâ la sô part. Di caratar no jere tant buine. Tra i siei striaments, il plui cognossût al jere chel di fermâ dispès il lat a lis vacjis di Pieri, obleant il plevan a cori subit a benedîlis. Passant denant il pulinâr di Miute, e deve une spudade, si che o une raze o une gjaline a finivin muartis. Di gnot po si sintive dute une fracassine par vie che il diaul al vignive a cjatâle. Insome, e jere une vere strie e cuintri di jê no valevin preieris o altri. Chel che al maraveave al è il fat che e ves cjatât om, un bon, sant om, che a disevin che al veve i cuars par vie che la femine se le faseve cul diaul. Ma lui al rispuindeve che il bec al jere propit il diaul che si presentave sot dal puarti in figure di cjavron cun tant di cuars. No si sa se e fos vere, ma si contave ancje che Cinirine e svolàs par aiar cuntune scove. E l'om a difindile: "Figurînsi. No fâs un colp e no sa nancje ce che e je une scove". Miôr al è ancjemò, passant sot il puarti, slungjâ il pas.

**Roberto Tirelli**



## *Vitimis*

*A ducj chei che no son tornâts,  
vitimis des vueris e des persecuzions*

*Ce âstu pensât,  
cuant che ti àn bendât i voi  
e leât lis mans  
e ti àn sburtât là jù  
in font al cret,  
o cuant che ti àn lassât  
murî planc a planc,  
in chel cjamp cul fîl spinât  
a consumâti di fan e patiment?  
O cuant che ti àn fat sgjavâ la fuesse  
prin di sburtâti dentri  
cuntun colp a tradiment,  
o che tu sês saltât pal aiar  
sot dal fûc dai bombardaments?  
Âstu clamât Diu  
come che al à fat Crist in crôs  
o tô mari  
come cuant che tu jeris frut,  
jevant i voi al cîl par domandâ:  
Parcè, parcè?  
Ce âstu pensât  
cuant che ti àn... copât?*

**Egle Taverna**

*1<sup>n</sup> premi Premi leterari internazionâl "Storie in cammino", San Quarin 2019*

## Rangjâsi in tîmps di miserie

**I**agns di grande miserie che le int da le' valadis dal Cjanâl dal Fier a le veve passât fra le' dôs ultimis vueris a no si puedin inmagjinâ. Le' fameis a si rangjavin miôr ch'a le podevin e ognune a le veve almanco une vacje che – a si diseve – a le butave tant che un operaio. A succedeve parfin ch'a si vaive pui pa le muart di une vacje che par un di famee! In chê volte i prâts ai erin tignûts ben, coltâts cul ledan e cence jerbatis o sterps: guai a no rispietâ i cunfins o a pescjâ le jerbe prime dal sfâlç! Il prin tai, ch'al ere chel dal fen di côlt, al vignive fat viers le metât di Mai, il secont o antigûl a le fin di Lui e, se le stagjon a l'ere favorevule, in Setembre al ere pront il muiart, che però nol rindeve tant. Al capitave dispes che le' feminis a le partivin bunore par lâ a fâ fen in mont cui scarpets armâts di grifs, tant di no sbrissâ su chei flecs di prât secs e ripits, e a le tornavin a cjase cuntun misâr braç di jerbe. Ancje i cjamps ai erin une risorse indispensabile. Di solit ju lavoravin fruts e feminis che, cuant ch'ai vevin di polsâ, a si sentavin sul ôr dal cjamp e ai fasevin un segno di crous tal agâr par slontanâ i spirts dal mâl ch'ai giravin ai ator. Par chei stes agârs ai passavin chei ch'ai lavin daûr dal preidi inta rogazions le di di San Marc. Chel al ere ancje il percors ch'ai fasevin i muarts le gnot dai Sants, cuant che a Racolane si scampanotave par dute le gnot fin a le matine dopo: ogni tant une soste par un got di vin, rês cuets e cartufulis lessis! Le Munîne, tornant strache dai cjamps, a le diseve che l'om, cuant ch'a nol varès pui fat lavôrs pesants, a si sarès talmentri indebulît che ai vevin di jessi in siet par gjavâ un râf!

**Antonino Danelutto**

*Furlan di Scluse*



*Il çoi a San Zorç de Richinvelde  
(foto Dario Quattrin)*

## LIS BOTIS PIGURADIS

### Tono Zancanaro e Paolo Meneghesso

**A**ntonio Zancanaro, in art Tono Zancanaro (Padue 1906-1985) al è un famôs pitôr talian, amì di Antonietta Raphael Mafai, Aligi Sassu, Giulio Turcato, che al scomençà a piturâ tai agns '30 dal Nûfcent.

Al lavorà par ciclis artistics tal ambit di un realisim dai tons sureâi e grotescs, segnalantsi pe sô grande competence tal disen.

Tal 1985 Tono Zancanaro al piturà ta cheste bote une serie di musis di feminis, un dai siei sogjets preferîts, rimarcant la sô grande abilitât grafiche. Il restaur, particolarmentri difil, al à in part sistemât i dams patîts de superficie piturade, tornant a dâ visibilitât ai ritrats e recuperant il font.

Di Padue al è ancje il pitôr figuratîf Paolo Meneghesso (Padue 1932), che al fasè la bote pe cjantine di Cormòns tal 1986. Al rapresentà dôs figuris une vore grandis intun vignâl, che a àn un grant impat cromatic e senografic.



*Paolo Meneghesso,  
bote con figuris e vît,  
1986, dopo dal restaur*



*Tono Zancanaro,  
bote cun musis di feminis,  
1985, dopo dal restaur*

**Gabriella Bucco**

## Fûc a Dordole

**C**hest fat al è sucedût a Dordole, secont la legjende viers il 1500. Al ere une sere un grum freide e al tirave un aer di fâ spavent. Al ere une di chês zornadis che li invîdin a stâ ator dal fugolâr, vecjos e zovins fasint alc. In chê sere, sentâts suntune bancje propit ator dal fugolâr, doi fantats di Dordole ai erin daûr a morosâ. Dongje di lôr al ere covaçât il gjat, un amì che nol mancjave mai ta cjasis, specie une volte, e par tancj motîfs: par compagnie, pal gust di vêlu e ancje par vie da li' surîs, che li varessin regnât cence di lui. Chescj doi fantats, dopo vê morosât, plan plan a si son indurmidîts, cocolâts un dongje chel atri. Il gjat, cun chel silenzio, a si è stufât e al è lât par scjampâ fûr di cjase. Tal jessi, al è passât dongje il fûc e la code a si è impiade. Pa la paûre e pal mâl, al à scomençât a cori pai toblâts, tal fen, par cirî di distudâ il fûc da la code, fasint diventâ dute une sflamarie i puescj dulà che al passave. La int, vedint chel fûc, si è dade subit dongje e cun selis e dut ce ch'a la veve par man, la portave aghe par studâ l'incendi ch'a si slargjave simpri di plui. I vecjos che no podevin movisi par lâ a judâ ai erin restâts in cjase e ai preavin il Signôr par che al mandàs la ploe a studâ il fûc. Sta di fat che pouc dopo al à scomençât a ploi e a ploi propit fuart, tant di distudâ il fûc in manco di miez'ore. "Nol pues jessi che un miracul" a si son dits, e cussì a àn ringraziât san Florean, il sant dal fûc, ch'al è diventât il protetôr di Dordole. Cuant che plui tart, viers il 1850, ai àn fat la gleisie, chei di Dordole ai àn volût dedicâle a san Florean.

**Maddalena Tolazzi**

*Furlan di Mueç*

## UN ARTIST DAL GRAN CÔR Oh cjampanis de sabide sere...

**U**n bancon cualchi volte di marmul, bielîs cjadreis di pae, taulis bielîs di len penç, il fogolâr cul cjavedâl par vê un pôc di clip vie pal Unvier. Un dai lûcs di socialitât “esclusive” pai oms ta lis nestris comunitâts e jere l’ostarie. In di di vuê no si clamin plui ostariis, ma bars, cafès, dulà che oms e feminis, fantats e fantatis si cjatin a cjoli alc. E chest al figure tant che un segn dal grant gambiament dal pont da la socializazion da lis nestris comunitâts tal gnûf Mileni.

I grêcs a vevin come centri da la lôr comunitât l’*agorà*, i romans il *foro* e i furlans – dal sigûr un tic plui modescj, ma no par chest no si sintivin cence voe di cjatâsi, discuti, decidi – a vevin sielt l’ostarie come lôr cenacul. E jere frequentade vie par la setemane di pôcs di lôr, pal plui dopo cene; in particolâr di sabide sere e di domenie al jere scuasit obligatori lâ a bevi un taiut cui amîs. Si cjatavisi par la partidute di cjartis (briscule, tressiet, scove, scaraboç, une sorte di scovon cun 52 cjartis), par zuiâ di more, magari cun discussions e barufis par un pont parât jù dal plui svelt e babio dai zuiadôrs, o par la partide di balis, s’al jere un curtîl dulà fâlis cori. Jentrâ ta l’ostarie al jere il *pass* pai fantaçuts par sei ametûts ta la societât dai grancj, dai oms.

Al jere un ambient di “perdizion” par la glesie, dulà che si praticavin i vizis dal zûc, da lis blestemis, dal bevi e dal fumâ; in chest câs, massime in Unvier, si jessive da l’ostarie duçj impuçâts di fum che si sintive di ca a là! Vietadis lis ostariis alore par lis feminis e pai fruts! Ta l’ostarie si podeve fevelâ di vore, di politiche, di sport e si fasevin ancje i afârs.



Ta lis ostariis dai nestris paîs a restin ta la memorie lis senis gustosis da la domenie di sere, come chê da la femine che, viodint che l'om al intardave a tornâ a cjase par la cene, si presentave su la puarte e, svergognant il puar om, i berlave: "Aio di puartâti chi la cene, cjocheton?". E cuant che il clime e i tais tal stomi a paronavin, si tacavin lis cjantadis plui o mancûl intonadis che si lis sintive di lontan, compagnadis cu lis sunadis da l'armoniche. Tai *wine bars* vuê no si po, ma soledut no je plui la voe. Un segnâl brut co dal cûr no rive plui a vignî sù un cjant, une note, un pocje di ligrie.

**Gotart Mitri**

## Il marketing

**P**ar trasformâ un on ch'al mange par vivi (economie di ufiarte: ti mangis se ch'al ere tal ort, sul granâr o sul marciât) ta un on ch'al vîf par mangiâ o consumâ (economie di domande) bisugne creâ une "culture consumistiche". Al è par chistu che viars un misdi di Primevere, tal 1950, un on dal



*Il bisat (foto Giuliano Borghesan)*

marketing si presente a Frofean ta l'ostarie di siore Nice e, viodint Gelmo sintât a un taulin in compagnie di un disimin di sgnape, ai dîs: "Posso lasciarle un campione di dentifricio? Ripasso fra quindici giorni per conoscere il suo giudizio". Al poe un tubut blanc sul taulin, al tire fôr un notes e al domande: "Come si chiama Lei?". "Si rivolga al Sindaco di Ronchis – al rispunt Gelmo – per sapere come mi chiamo". Si rideve in paîs par chiste risposte, ma vueil soi curvint ch'a fos un segno di alte siviltât. Si rideve ence parsê che Gianni, il nevôt di Gelmo, sinc ains, invessi di ciantâ "Frofean nol è une vile (trê voltis), al è une ponte di sitât", al cianteve come la radio: "Denti bianchi / denti sani / bocca fresca / tutto il giorno"! Al domandarà il nostri letôr consumist: come fasèvino prime dal Chlorodont anticarie? Fueis di mente, di salvie o un milùs. Ma Gelmo al preferive la sgnape par lavâsi i dinç sense spassulin.

**Gianfranco Ellero**

*Furlan di Frofean*



## In Pradès

**I**n Pradès, una borgada di Vil disora, una volta ai avevin la usança da gî in Cual da la Luna a passonâ cu lis fedes dut l'Estât. A metât Estât ai givin sù a tosales par via che la lana a era biela neta e a giva ben a filâla. In chi timps ere da me agna par udala. "Votu gî cu la Nina a tosâ la nuestra feda?" a me disè me agna e jo subit: "Sì, sì!". Na vedeve l'ora da stâ cun jei. A me voleva tant ben ancja parcè ch'a era stada amiga de mê mare, che aveve piardût a cinc agnis, a me contava tantes stories, usances, cançons e a me udava sui lavôrs e cemût sparagnâ lis fadies. A lis cinc a era pronta cul gei su lis spales cun dentre dut ce che ocoreva: fuarfes, cuarda, sacs, sâl, una bocja pa l'aga e il carnirin cun polenta e formai. Partin cul scûr e plan plan a sclaris il cîl: ce spettacul vedei jevâ il sorele, sintî i sussûrs dal bosc, il cjant dai uciei, il sossodrâ dai gjai cedrons e nissun pinsîr, data l'ora, da cjatâ madràs o viperes. Rivades in somp, un biel prat florît dai bieî flôrs profumâts, la Nina a mola dôs sivulades e a saltin fûr un scjap di fedes, jei e clame par non lis sôs e a si visinin cuntun pugn de sâl, a cumincja a saludâles che a sameavin che as capîs. A 'nt cjapa una pa les gjambes, te la rabalta su la schena e jo svelta cu la cuarda la lei a dôs a dôs par ca no se mueve, ancja parcè ogni tant a cjapava via qualche sforfada. Sleada, a je deva una paca. "Va là mo, che adès tu sta pi frescja!". Dopu mangjât, pausât, cjamât i sacs sul gei gevin jù cjantant lis vecjes vilotes. Par mê, ancja s'a è stada una fadia al è stada una biela esperiencja e ai el recuart di chê biela amicizia che na dismentearai mai. Grazie a te Nina!

**Maria Minin Durat**

*Furlan di Tramonç disore*

## *Sunt nomina rerum: le cridince*

**I**l non dal armaron al ven di “cridince”. Ven a stâi il “crodi”. Crodi in alc, o in cualchidun. E no si po mai crodi di bessôi. Bisugne sei insieme, par condividi. Le lenghe francese par definîle, le cridince, e dopre un non che nus jude a capî miôr il so significât ancje jenfri le culture furlane: *créance*. Lu vin ancje no, stes non, e il so leam cul mobilut de cuisine al è cetant fuart e plen di sugestions che si inmanein cu le nestre sensibilitât plui antighe e lontane tal timp.

Te Ete di Mieç le creance e veve a ce fâ cul cerçâ: cussì si definive le prime cerce di un vin, o di un plat, par vê le sigurece ch'al sedi bon, san, cence velens, che nol fasi mâl a di nissun di chei che a varan di mangjâlu insieme, dopo, plui tart, cun ce ch'al reste. E ce che si ere cerçât e validât come bon al vignive conservât intun armaron sigûr, di dulà che si sarès podût cjapâ sù a le bisugne ce ch'al coventave e cence pôre di lâ incuintri a brutis sorpresis. L'armaron de “creance”, plui di un camarin, plui de cantine, al jere il cûr morâl di une cjase: bisugnave ch'al stes intun lûc fresc e sut. Nol veve di vê clâfs, parcè che si basave su le fiducie. Al jere il spiel perfet di ducj chei spazis comunitaris che a àn caracterizât te storie le nestre int contadine. Parcè che le Cridince jenfri le cjase e puarte cun se il stes significât da le Comugne pe comunitât dal paîs, là che ducj a podin menâ a passons il besteam, o lâ a bruscjâ lis fratis. Come il poç de aghe o il for par cuei il pan, le arie, il curtîl, o il sotpuarti, là che a son poiâts i struments di lavôr che si podin cjapâ sù cuant che al covente, cence permès, parcè che a son un ben di condividi insieme.

D'in ch   volte si dopre il m  t di d  : "lass   le creance" tal plat, cuant che le porzion no si le fin  s dute intune volte, ma alc al reste, par dopo, par chei altris, che magari a podaressin zov  si di tante gracie di Diu in gjonde, cence pins  rs, come che o vin fat ancje no. E guai a spa  ale, o pi  s a fisc  le cence preocup  si di nissun, pensant dome ai siei fats. A ognun il so, cence esagjer  , te misure che i covente. Chel che nol condiv  t le s   creance cun chei altris, che nol lasse nie pai siei fradis a l  r disposizion jenfri i scansei de cridince al reste sicheduncje un "screan  t", un ch'al    pierdude par simpri le educazion o pi  s no le    mai cognossude. Un cence culture, spudor  t e cence misure, che nol    fat par condividi insieme a chei altris un progjet di vite. Une sperance. Un ch'al    mi  r no fid  si di lui: band  t, brigant e lari. Viv  n intune societ  t l   che creance e cridince no son plui di mode. Dut al    di sei consum  t a le svelte, tant il timp cuant il vivi, masanant rispiet, fiducie e dignit  t.

Ma al tornar   il timp da lis Cridincis. Magari jenfri di un cualchi vecjo scansel rivar  n a cjat   f  r ancje un tic di ch   Creance che o vin dismente  t tra il pestel dai sav  rs e il masanin dal caf  .

**Angelo Floramo**

## A palpe te fumate

**E**jere une bieles zornade di soreli, chê domenie di fin Novem-bar, cul cîl seren e di un lusôr ch'al da fastidi al voli. La zulgne e je ingrimpade su ogni stec, fros e fueis ch'a lusingrisignidis domandant al soreli di fâ di corse a deliberâlis. La mari di Berto e jere cetant che i ronteave par che le compagnàs jù pe Basse a saludâ i siei. Chest i tignive a fâi il plasê ma, artisan plen di lavôr, nol cjatave mai une zornade interie par jê.

Sô mari, jevade di prin dî e viodût che il timp al faseve la buine voie, e à decidût che e jere la zornade juste. Spietât Berto su la puarte de cusine, lu brinche e cence dâi il bundî, i dîs: "Met in moto la machine che tu mi menis jù dai miei". Berto, cjalantle di traviars dai ocjâi di viodi cui voi spalancâts, sbassant il cjâf, i fâs segn di sì. La femine, viodint chei voi tirâts a plenis lints, penzis come cûi di tadis di bire, si zire vosant: "Vuê si viôt ben, no son scusis". Fat gulizion, tirât jù i imprescj di lavôr de machine, passât un peçot umit su lis sentis par tirâ vie il polvar, si è impirât tun vistît di fieste un pôc stret che al jere un pâr di agns che nol meteve. Montâts in machine, si son inviâts; no jere la strade dal ort, tocjave rivâ fin a Udin, cjapâ vie Palme, passâ la citât stelade e jù fin tal paîs de sô mame; zornade juste par lâ, ancje se il soreli al infastidive Berto.

Biel lant, la mame e preseave il paesaç, ancje se fûr Udin un pocje di fumate e veve cjapât il puest dal soreli. Berto, che za tal soreli al guidave dut indenant, cun chel tic di fumate al veve i voi spalancâts. Man man ch'a lavin in jù, la fumate si impenizeve, i ocjâi di Berto a levin a lenzi il cristal, tant che sô mari i à dit:

“O podìn tornâ indaûr!”. Lui cence rispuindi, piadis lis lûs de machine, al leve indenant. La fumate e stave diventant un mûr, i ferâi a fasevin un gran sflandôr grîs, dibot no si viodevin nancje i lens ch’a jerin di ca e di là de strade. La mame e veve il cûr in bocje e cu la fumate cussì fisse a levin scuasi a palpe. Berto si è sintût salf cuant che devant si è cjatât doi lusoruts ros dal daûr di une machine, tant di concentrâsi a tignî la distance di cheste. Lant a pas di om, lis machinis ch’a vignivin incuintri lis viodeve nome cuant ch’a jerin cuasi a pari.

Dopo un pieç che al tirave i voi par stâ daûr a chei doi lusôrs ros, al viôt ch’a zirin a dret e si fermin di colp. Berto al ponte a sec il pît sul fren, poiantsi intor di chel devant; de machine al smonte un che i ven incuintri e prin che chest al puedi vierzi bocje, al smonte ancje lui e secjât i dîs: “Ise maniere di fermâsi?! Se no stoi atent, ti devi dentri!”. Chel, cjalant la machine di Berto poiade intor de sô, si plee indenant a cjalâ in muse o miôr a cjalâ i ocjâi di Berto e i dîs: “O sarai paron di fermâmi tal gno curtîl!”. Domandât scuse cuntun fîl di vôs, Berto al è montât in machine e cun ce tante fadie al à rivât a tornâ sul stradon.

**Carlo Zanini**

**La vore e je lizere  
cuant che a son in tancj a spartisi la fadie.**

Omero

## Umanitât suicidiarie!?

**n**o passe zornade cence che si sinti a dî di alc, plui o mancul penç, che al rivuarde lis cundizions dal planet Tiere, e dai spazis grandonons che lu involucin. Il fat al è che cheste benedette di Tiere e je la nestre Cjase, ven a stâi la Cjase di ducj chei che a son stâts in cheste mont, di chei che a son in vuê, e di chei che a vignaran e che a varessin dibisugne di cjatâle intun stât che ur permeti di podê vivi in pâs e salût.

E al è propit par chei che a vignaran daûr di noaltris che cheste Cjase e je in pericul, pericul dibot sigûr, di no sei altri vivibile tant che e je stade par nô e par chei prime di nô. Ma ce isal sucedût di tant tragicjic par fâ in maniere che, daspò di un timp incalcolabil che cheste Tiere-Cjase e à podût ospitâ e fa vivi dute chê schirie umane, e dut il ream animâl e vegjetâl, cence numar, che le àn tibiade e doprade par sotet, cumò o sin daûr a scugnî ameti che e je sul pont di colânus a ducj parsore cence pussibilitât di salvece par nissun?

Par cirî di parâ dongje, a la buine e par sigûr misarute, un tic di rispueste a di cheste domande, dibot disperade, mi permet di judâmi cuntune metafore: chê de Creazion. In chê volte al sucedè che il Creadôr al fasè dal nuie il Mont intîr, cun dut ce che al coventave par che al podès diventâ la Cjase pal Om e par ducj i vivents: animâi e vegjetâi. Po, de Tiere, cu lis sôs mans al poleà ancje l'om e dal om al tirà fûr la sô compagne, la femine. Daûr che nus conte il Libri, chestis dôs creaturis, primizie de umanitât, a forin metudis da cjâf de schirie cence fin de umanitât e a riceverin il privileç di sei libars di fâ lis lôr sieltis in chel zardin

straordenari che al jere il “Paradîs in Tiere”, o Eden. O ai a pene dit che i Vons de umanitât a forin fats libars e, daûr di lôr, libare e je vignude incà la umanitât interie, ven a stâi lis unichis creaturis furnidis di sintiment e alore in stât di decidi cun sience e cussience des lôr azions. Ma, chestis creaturis, cemût àno doprât intai timps de lôr esistence, datade di agnorums, dut ce che il Creadôr ur veve metût a disposizion?

A mi mi pâre che no vedin fat altri che copiâ ce che a vevin in chê voltone fat i lôr prins doi vons: si son biel planc inzeugnâts a cirî di stâ simpri miôr, doprant la lôr inteligjence e libertât, fasintsi vê gole di dut ce che la Tiere ur meteve intes mans. A ogni mût ur à volût un timp grandonon prime di rivâ adore di fâ dutis chês scuviertis che, in sostance, a son stadis in stât di fâur gjoldi di un slac di comoditâts: par fâlis stâ miei, par no fâ masse fadie par procurâsi ce che ur coventave par vivi, e vivi ben, par movisi su la Tiere e inaltrò une vore a la svelte, al pont di iludisi di podê tornâ a vê chel “paradîs” che a vevin par un fal dai vons pierdût. Il fat al è che par rivâ a un tant a son ladis a meti man indulâ che nol bisugnave, tant che si pues dî che par ogni conquiste fate, cun chê di stâ plui ben, a àn fat un dam grandonon a la Tiere-Cjase, al pont che, fasint la sume di ducj, a son sul ôr di fâle diventâ invivibile pes gjenerazions di doman. Insume, a àn fat come che se par scjaldâsi a vessin pensât ben di dâi fûc a la Cjase, la sole che a àn, dismenteantsi che a son a stâi dentri, e che no puedin scjampâ fûr. Une operazion stupide, egoiste, suicidiarie, e disoneste, che e gjave la pussibilitât di vite pal avignî: la libertât doprade par fâsi e fâ mâl! Sono, chestis, considerations di un matucel pessimist, o di un che al cjale in muse une realtât che e ven indenant tant che un cjaival ombrît?

**Rem Spicemei**

## L'om da la ploie

**L**'om al jere simpri ben vistîf, la barbeta ben tignude e al puartave simpri la golarine. Al faseve il professôr in cualchi scuele di campagne e, lâf in pension, al veve cjolt un apartament a Codroip, li che al viveve di bessôl. Nol deve confidence a nissun e si e no che al saludave i vicins di cjase. Si lu viodeve di râf pe place, al infûr di cuant che al ploveve. Fin che e durave la ploie al rivave in place ogni dì e al cjapave la coriere par Udin aes vot e mieze. Sot misdì al jere bielzà tornât dongje.

La int, aromai abituade a viodilu nome ta chei dîs, pensant che al fos un pôc tocjât e no savint nuie di lui, lu veve batiât l'om da la ploie. A disin che cualchidun lu veve viodût a Udin tai dîs di ploie, dongje de parte di un supermarcjât, come se al spietàs alc o cualchidun.

Ven a stâi che une dì i vicins di cjase no viodin plui jessî e tornâ dongje il professôr e soledut a sintin la vôs de sô televisione di e gnot, continuât. Pensant che al sedi sucedût alc e no sintintlu rispuindi al campanel, a clamin il 118.

I vicins, jentrâts in cjase cui carabinieri, a restin scaturîts; no tant pal muart, ancjemò sentât sul divan cul telecomant in man e la televisione piade; cuant che la cjase e je plene di ombrenis. A 'nd è 'ne vorone in dutis lis stanziis, in cusine, tai armârs, tai cjantons, su la moblie, sot dai jets, tal bagn, dapardut. A 'nd è plui di trê mil, di dutis lis fatis; gnovis, smavidis e di ducj i colôrs. Cumò si sa ce che l'om da la ploie al leve a fâ a Udin cuant che al ploveve: al leve a puartâ vie ombrenis, ch'al jere il so vizi.

**Pauli Jacus**



## Il divorzi

**A**romai al è un fat comun che lis cubiis di spôs si disseparin. O cognossevi un fûc componût di om, femine e di un cjan, Turo, che al formave part de famee a plen titul. Duncje, vint di disseparâsi, si jerin acordâts sun dut; al restave dome di decidi cun cui che al sarès lât Turo. Stablît che si tratave di un cjan maiôr, e il veterinari lu veve certificât, nol sarès stât just che a decidi a fossin stâts i parons, ma lui, Turo.

E inalore cemût fâ par fâ manifestâ a lui la sô preference? La seguint e someà la soluzion miôr: si saressin metûts ducj i trê te strade, in rie cun Turo tal mieç e, in bande, un di ca e un di là, i doi parons. Si saressin mots, lui e jê, tal timp istès in direzions opuestis mintri che il cjan alì ret al sarès lât daûr dal marît o de femine, sielzint cussì il propi incjasament.

E scomençà la sene, ma Turo, daspò un atim di esitance, al fasè une partence a brene vierte scomparint daûr dal volt di chê altre bande de strade. Grant vuacament compagnât di un gnau-leç feroç. Si jere capît ancjemò une volte che par Turo, di plui che no il fastidi pal propi destin, al veve prevalût l'odi pal gjat. I doi coniugâts si cjalarin un moment in muse, a faserin une grande ridade e si riconciliarin. Turo, finide la scorsonade, al tornà menant la code e cjalant di neri i siei parons che aromai a vevin capide la lezion.

La morâl e je cheste: cuant che la decision e je difficile, fasêtle cjapâ dal cjan.

**Luigi Piredda**

*Cors pratic di lenghe furlane di Cividât*

amicus sui et mecti qz nescit q' mit z' mect potu  
 poetis videlz homero z' alijs q' cu' hinc mecti ut put  
 et Scævola querelari  
 Satis sit michi vulgarium opinione esse tōient  
 hic dic' quale habuit ciceronis suus q' mecti se h  
 p' mectiaz septor nō potuit h' in eo stitit z' id est  
 et delectat' est glideras tps amissum q' mectat re  
 fecti fuit oliz tale aliquid dūz claz labentis tps dicio v  
 en mectissime oīuz fugatissime q' mectat ut tūc q'  
 angustuz d'sunt nō est vagandi loc' iaz mectat v  
 fere p' simone tps est h' tūc vīsus ē cicerō cū i d' r



**L**a "ruminatio" al è ce che al varès di fà ogni bon in-  
 teletuâl che, tant che a fasin lis pioris, daspò di vè  
 passonâr intai prâts dal savè, al à di tornâ a mastiâ  
 ce che al à mangjât biel passonant. Propit cussì il  
 miniaturist al pâr che al vueli cjapâ cumiât, doman-  
 dantnus ançe a noaltris letôrs di fà compagn.

# DICEMBAR

	1	M	S. Eligji vescul	
	2	M	S. Cromazi di Aquilee vescul	
	3	J	S. Francesc Saveri predi	
	4	V	S.te Barbare martare	
	5	S	S. Dalmazi di Pavie vescul	
	6	D	S. Nicolau di Bari vescul	<i>II di Avent</i>
50	7	L	S. Ambrôs vescul	
	8	M	Madone Imacolade	☾
	9	M	S. Sîr vescul	
	10	J	Madone di Laurêt	
	11	V	S. Damâs pape	
	12	S	Madone di Guadalupe	
	13	D	S.te Luzie martare	<i>III di Avent</i>
51	14	L	S. Zuan da la Crôs predi	●
	15	M	S. Venanzi Fortunât di Cenede vescul	
	16	M	S. Everart dal Friûl	
	17	J	S. Lazar vescul	
	18	V	S. Grazian vescul	
	19	S	S. Dario martar	
	20	D	S. Liberât martar	<i>IV di Avent</i>
52	21	L	S. Pieri Canisio predi	
	22	M	S. Flavian martar	☾
	23	M	SS. Vitorie e Anatolie martaris	
	24	J	S.te Irme Badesse	
	25	V	Nadâl dal Signôr	<i>Fieste de famee</i>
	26	S	S. Stiefin martar	
	27	D	Sante Famee di Jesù, Marie e Josef	
53	28	L	SS. Nocents martars	
	29	M	S. Tomâs Becket martar	
	30	M	S.te Anastasie di Aquilee martare	○
	31	J	S. Silvestri pape	

## Nadâl a km zero

**I**l dì da la Madone, in cualchi famee a si cuminçave a pensâ al  
arbol di Nadâl. La canae a zeve cuntun sac a cjapâ sù il musclì  
dulà che al ere pi penç e a lu meteve a suiâ dapiè dal spolert.

Par no taâ un peçut tal bosc, il Carlin al zeve a cirî une bieie mene  
di savût e a la fissave a une rugjele di rep<sup>1</sup> dopo vîe fat un bûs cu la  
foredorie<sup>2</sup> da spargoi. Po al faseve suparente tancj busuts cuntune  
foredoriute. La dì prime al ere za stât cul segaçut e il massanc a taâ  
cualchi dasse<sup>3</sup> di peç davôr Pale o cualchi dasse di tas in Cjanûer,  
intun puest che no par nuie a si clame las Tassaries. Cu las fuarfes  
da cerpî il Carlin al preparave tantes dassutes e cuntune ronceute  
a las spiçave par pudîles impirâ a strent tai busuts. E cussì fasint al  
vignive sù cun dassutes simpri pi piçules fin a rivâ sul pontâl dulà  
che al impirave la cimute di tas pi bieie e pi verde. E po sul pon-  
tâl, cuntun filut di ram, al leave une  
stele comete di carton, piturade di  
un biel zâl gjavât fôr da une çafute  
di solfer in polvere fat distridi in-  
tun gamelut su la plote dal spolert.  
Su las dassutes a si picjave ce che  
a si veve: carameles e cjocolatins,  
tocuts di mandolât e fîs secs, mêi,  
mandarinuts e cocoles. Par picjâles

<sup>1</sup> faggio

<sup>2</sup> trivella

<sup>3</sup> ramo di pino



*Clâf dal volt da la cjase dai Tonis*

a si meteve la ponte dal temperin intala sfissure e a si sfuarçave chel tant che la glagnute dal spali a restàs ben a strent enfre las dôs capes. Il spalut alore al sameave a la codute di une surîs. A si podeve vidîe picjât encje lapis di chei cu la gomute in somp, canucjes e penins, e se par cjase a ere une garzonute, spagnolets di fil di tancj culûers e fuarfutes. In prisintîl, di râr a mancjave une cjocolate rivade dongje intala valîs dal pari o di cualchi barbe tornât dal forest. Sotvie il muscli al podeve jessi semenât di noles e di barbegjigjis. Un an, sot il gno arbolut, come par magjie, a comparî une bielescjatole di bande blu. A ere la scjatole dai culûers Caran d'Ache cun 24 pasteis, che gno pari al mi veve mandât da la France par man di Rino e Angeline dai Tunulins, siei cjârs amîs, che ai sterve a Dijon. Encje in Cuel Sesâr, là da la Mia di Zef, ai faseve l'arbol cul stes sistemes. Al vignive poât dapiè dal seglâr suntun tapîet di muscli che la Gjuliane a veve sgjarfât fôr dal mureon da la Ciriane. Un an siò fradi Rico sul pontâl, al puest de comete, al volè picjâ un murel<sup>4</sup> di luianie, in segnu di bondanze. Ma il gjat, une bieles di, da la cridince al petà un salt sul arbol, al gafà<sup>5</sup> il murel e al s'in fuì. Al ere un osteât di gjat, un peloac<sup>6</sup> di prime cuete, che no dibant al si clamave Onorevole.

**Gianni Colledani**

*Furlan di Clausiet*

### *Ringraziaments*

Par fâ sù un mûr a vòl simpri tancj modons. Tantes grazie a Santina Colledani (Santine dai Bisins), Ida Toneatti (Ide dai Bulos), Luigi e Corrado Zannier (Gjigjuti e Corado di Ongaro), Onorina Zannier (Onorine di Viane), Paolo Fabrici (Paulin di Belete), Dario Colledani (Dario dai Bisins).

---

<sup>4</sup> rocchio

<sup>5</sup> afferrò

<sup>6</sup> sfaccendato

## Misuris furlanis par lavôrs di mecaniche fine

Cence pandi in ce maniere, ma o soi rivât adore a vê il non furlan che si da, o miôr che si dave, aes misuris dopradis tai lavôrs di mecaniche fine: e je une sorte di codiç, in dotazion a chei dal mistîr, cuant che la civiltât di cumò no jere inmò rivade:

Un nuie	mm.	0,001
Une idee	mm.	0,01
Une frise	mm.	0,015
Un vêl	mm.	0,02
Un nep	mm.	0,03
Un blictri	mm.	0,04
Un pêl	mm.	0,075
Un flic	mm.	0,1
Un cencenin	mm.	0,15
Une sclese	mm.	0,2
Un fregul	mm.	0,5
Une scae	mm.	1
Un tic	mm.	3

Ancje se chestis misuris no son plui dopradis tal mont dal lavôr, a fasin simpri part dal nestri patrimoni lenghistic che no vin di pierdi. O stimi, dut câs, che la robe e puedi interessâ a cualchidun.

**Giorgio Cividino**

## Un dispiet meditât

**C**hel timon del ciar, mitût ulî, a j deva propitu fastidi. Toni Blàs al era tant gelous de la so' proprietât, par via ch'a se la veva meretada, 'sint par àis a fâ al stagionâl tal forest. Al partiva da ciasa, a piè, sburtant 'na cariola plena de impresç da muradour de 'na valîs de lenc ch'a pesava pi de chê puòcia muda ch'a veva dentra. Un vias lunc; "un calvariù". Noma de tant in tant al podeva tirâ flât (e noma par cualchi kilometru), prufitant de la bon-tât de cualchi ciaradour ch'a lu vessi fat montâ sù. 'Sualt Sçanpet, invensi, ch'al era cunfinât, a nol veva cugnission dei valours afetivus de la proprietât; al siò tignî, a lu veva redetât; cussì, senza riguardu, al postava ta la griglia de Toni dut chel ch'a i cumudava: pâi pa' li' vîs, frascis e bachès par sciarassâ tal ort, telis e sacs bagnâs a suiâ, e altri. A Toni, dut chistu a no i deva tant fastidi coma chel to' de timon ch'al vigniva four dal davour de la lobia e al 'siva a postâsi sul siò morâr. 'Sualt al veva la lobia curta e s'al varès parât sot al ciar da la banda de la biluga, al timon al sarès restât four, tal curtîf e postât par tiara. "Ulî, a i varès ança intrigât par 'sî a governâ 'l polàn e i cuniçus". Un dì, che là de 'Sualt a erin dus four de ciasa: "A Toni a no i à parût vera"; a la sveltina al è 'sût a tuoi la siea e a i à scurtât al timon: "Just a plomp del cunfin". Pal fatu, nissunc dei doi al à fat verbu; ma... fat al timon nouf, pal timour ch'a i vegni scurtât, 'Sualt al à sempri parât sot al ciar da la banda de la biluga e pal intrigu, al à fat un atressu par ch'al stai alt e passai par sot.

**Adriano Turrin**  
*Furlan di Cordenons*

## Pauli vuardian

**S**cjampât a la muart inte ritirade di Russie, Pauli al è stât cjolt in Comun a fâ la vuardie campestre. La int vuê no crodarà, ma robâ in campagne al jere par tancj un mût par tirâ indenant. Panolis, raps di ue e dut il mangjabil a cjapavin il svol se no si steve atents. Pauli al spietave i laris su lis stradelis che a menavin in paîs par cjapâju sul fat. Dut câs al jere ancje di bon cûr e se cualchidun al jere propit a la fan lu lassave passâ cence dî nuie, par esempi Anute Uciele, vedue cun cuatri fruts di mantignî. Il servizi al jere di dî e di gnot. Di gnot in biciclete cul capovuardie a levin a stâ atents ai pulinârs, parcè che a esistevin ancje i laris di gjalinis. Lant pe strade a vignivin dispès claponâts sperant di fermâju. Une gjaline alore al jere un capitâl. Zirant di gnot a cjatavin un pôc di dut: un cjan, une vacje e, une volte, intun fossâl, ancje un frut scjampât di cjase che al durmive. I vuardians no vevin orari e a jerin simpri a disposizion. La int e leve a cirîju in cjase. “Nol è” a disevin chei di famee, ma la gjachete e la barete picjadis daûr de puarte a disevin il contrari. Cul timp nol à coventât lâ plui in campagne ni pai laris di panolis ni par chei che a robavin l’aghe de irigazion, cussì a àn eliminât lis vuardiis campestris e si è tacât a clamâlis prime vuardiis, po vigjii e cumò agjents. Pauli al è rivât dome a passâ vuardie, anzit, jessint il plui vecjo de compagnie, ancje capovuardie. Chest fat i plaseve, ma al voleve ancje che si viodès che al jere lui a comandâ. Il sindic nol voleve dâi “las greches” che su lis spalîs a jerin il segnâl dal comant. E alore di bessôl al à providût comprant a Udin il necessari ma cun abundance, mostrant al buteghîr la fotografie dal fradi di Andreotti, che al jere sì capovuardie, ma a Rome.

**Roberto Tirelli**



## *Cun vòus di ùa*

*I voi ciantâ cun vòus di ùa,  
s'ciavassant ciamps e timp, 'na canson neta di vin,  
i voi parâ via il sporc ch'al salta fòur  
da la bossa dal mond,  
lavâ i pinseirs a forma di fusìl  
cul savon dal rap.  
Par chistu, amiga me, stasera  
vuardant il tramont viola,  
i ti dis 'sbìcimi inciamò un got  
prima ch'al rivi il malstâ da la not'.*

**Giacomo Vit**

*Furlan di Bagnarola*

*1° premi ex aequo al "Premi Noax / Navuàcs", Cuar di Rosacis 2019*

## Le' sgjaippiis sot il spolert

**I**l Mario Sac di piçul al ere persuadût che le' striis a le esiste-ssin veramentri. Sô mâri a le diseve che par no fâsi striâ al ocoreve o sierâ il poleâr fra l'indice e il deit di mieç opur meti le' cjalcis ladrosis (ma ce fadîe savê quale ch'a l'ere le bande juste, dal moment che le' cjalcis a le vevin cuatri ponts drets e cuatri ladrous!). A si diseve che le joibe di sere, dopo l'Avemarie, le' striis si cjatavin sul Pic di Bâbe o inta Pale da le Uâve e à a le fasevin fieste e a le balavin dute le gnot.

Une dì il Mario e un so amîc, il Bepo, ai vevin vedût sgjaippiis gnovis di fûr di une cjase. Dit e fat, indi vevin cjapadis sù cuatri parom e ai erin scjampâts di corse. Il Mario a le veve puartadis a cjase e a le veve platadis daûr il spolert, inta buse dolà ch'a si metevin i lens. Le sere stesse, sfidant le ploe e cuntun grant sac sul cjâf, a l'ere capitade in cjase, cence domandâ il permès e cence saludâ, le Ucelate, le mâri dal paron da le' sgjaippiis. Le Ucelate, ch'a le passave par strie, a le veve scomençât a vosâ: "Dolà esal il lâri?". Le mâri dal Mario a l'ere restade di stuc: "Ce lâri! Vastu vie di cjâf?". Le Ucelate, voltansi viers il frut: "Lui al è il lâri! Al à robât le' sgjaippiis e a le à platadis daûr il spolert!". Cence dî âtri, svelte, a l'ere lade a recuperâ le' sgjaippiis e a l'ere jessude di cjase bruntulant. Il Mario nol ere rivât a spiegâsi cemût che le Ucelate a le veve savût no dome ch'al ere stât lui a robâ le' sgjaippiis, ma ancje dolà ch'a le veve platadis. Ma al veve savût, però, di vênit cjapadis tantis di sô mâri...

**Antonino Danelutto**

*Furlan di Scluse*

*Il pic ros tai magrêts di Vivâr  
(foto Dario Quattrin)*



## LIS BOTIS PIGURADIS Silvano Spessot

**S**ilvano Spessot (Cormòns 1956) al è un artist autodidate, influençât dal impressionisim astrat di Jackson Pollock che al dopre une materie cromatiche di grant impat. Il titul di cheste opare al è *La caduta dell'ultimo confine*, cun riferiment ae riunificazione de citât di Gurize, cuant che al è stât sdrumât l'ultin mûr de Vuere frede.

Al è l'unic artist, e dîs la restauradore, ch'al dopre une stesure pitoriche tant consistente e ruvide par otignî un efiet de superficie simil ae piture murâl. Il cjâf al riprodûs l'omenut diventât la sigle dal artist, che si disvilupe in tantis formis simpri diversis. Al sintetize la cundizion dal om de societât atuâl indulà che la individualitât e cêt ae serialitât.

A son tancj i quadris di Spessot metûts inte cjantine di Cormòns e a son siei ancje i totem disponûts devant dal pont di vendite, bon esempi de art decorative ricercjade dal pitôr.



*Silvano Spessot,  
bote decorade par memoreâ  
la viertidure dal confin  
di Gurize, 2004,  
dopo dal restaur*

**Gabriella Bucco**

## Il cjampanîl di Mueç e la vacje

Cheste legende a l'è li' sô ladrîs dal 15esim secul. La popolazion di Mueç a l'è comprât une vacje par dâ il lat a chei biâts vecjos ch'a no i vevin nissun par viodi di lôr. Une dì si riunì d'urgjence il consei da la comunitât di Mueç. I ponts di tratâ ai erin doi: cemût risolti il problema dal cjampanîl, masse stret e masse bas e ce dâ di mangjâ a la vacje; dopo variis propuestis a deciderin di lassâ pierdi il problema da la vacje e concentrâsi su la altece dal cjampanîl. A deciderin di cjapâ li' misuris dal cjampanîl dal di dentri e dato che la verdure la cresseve se conci-made, ancje il cjampanîl al sarès cressût se coltât; l'assemblee a si sierà cussì e la int a tacà a portâ ledan sot il cjampanîl par coltâlu. 3 meis dopo l'assemblee si riunì di gnouf e a deciderin di ricjapâ li' misuris dal cjampanîl par viodi se al ere cressût. Cheste volte il sindic al decidè di misurâlu dal difûr, tant i mûrs ai son mûrs; duncje dentri o difûr nol cambie nie. Il cjampanîl al ere pui grant, la popolazion a restà a bocje vierte; a un ciert pont un siôr a l'è vedût che insomp dal cjampanîl a l'ere cressude ancje la erbe pa' la vacje e cussì la int a decidè di portâ sù la vacje par mangjâle. Cussì certe int a tacà a tirâ sù la vacje su pal cjampanîl leade a une lungje cuarde; la biade vacje a tacà a movisi cirint di tirâ flât e une volte rivade sù insomp a l'è tirât l'ultim respîr; a chest pont la int si è slontanade dal plaçâl da l'abazie dute ingo-sside, a si è sparnicade e ognun al è tornât a cjase sô.

*grazie a Marta Moretti e Veronica Franz par la trascrizion*

**Ugo Moretti**  
*Furlan di Mueç*

## UN ARGISTO DAL GRANT CÔR

### Un rituâl

**A**l è il moment da la cene, cuant che la famee si da dongje ator di un taulîr di polente ch'è à chel profumo che magari cussì no no si lu sint plui. Ben in evidence al è il spolert che, ta lis fameis ch'a podevin permetisal, e jere une braûre. Ta la cusine plui puare tal imprin il fûc si faseve intun cjanton, suntune pieres adate, ch'è veve di resisti al grant calôr: la piera fogolâr, che po i a dât il non ancje al ambient. Se po si rivave, tal mieç da la stanza si faseve un cuadrât alt cui modons ch'al veve ancje sot un spazi pai lens. Disore al jere poiât il cjavedâl; dal sufit e vignive jù la nape.

Sul finî dal Votcent al rive il *spolert*, une peraule todescje volgarizade di *spar-herd*, pieres di fogolâr par sparagnâ (tod. *sparren*) il fûc. Sî, par vie che il fûc al podeve sei mantignût cun pôcs lens e si lu doprave par cuei su trê plans: un cui cerclis grancj, doi cui cerclis piçui e, dispès, si rivave ancje a vê une cjalderie par l'aghe cjalde!

Dulintor si veve ce ch'al coventave intun fogolâr: la gratule pai plats e lis tacies, il fier pai cjaldîrs di ram da l'aghe di bevi cul cop e par cuei, la cassele pai lens, il grati pal formadi, il masanin dal caffè, il zei par la farine e il pan; di scjavaç disore dal spolert un filistrin par meti a suîa alc di lavât.

L'aghe di bevi si lave a aurîle tal poç, l'acuedot al jere rivât tai agns Cincuante. Dispès cheste vore i tocjave a la fantacine che, metût su lis spalîs il buinç, i picjave insom tai rimpins doi cjaldîrs di ram. Li dal poç si podeve cjatâ cualchi altre femine e la scuse e jere buine par sgambiâsi la peraule e lis plui "pevarinis" a gjolde-



vin a tirâur jù a cualchidun i peçots! Tal furlan di vuê: fâ gossip! Dongje dal spolert al jere ancje il zei cui cjanôi (scjanassôi, curundui) che a fasevin un biel fûc. La madone e stave atente che a vevin di coventâ pal fier di sopressâ! Lis lôr boris a duravin di plui e no stiçavin tai voi.

Une cene dietetiche: une biele terine di lidric, une luianie che il frutin al à apene dispicjade tal camarin, il salam, il formadi e il cjalderin dal lat di meti a boli par la gulizion tal indoman buinore. Un menù che al ameteve pocjis deroghis...

Insom: almancul, in chê volte, a ore di cene a jerin ducj li a condividi ce che la Providence e mandave.

**Gotart Mitri**

## Un albar di culture

**I**n tanciu paîs dal Friûl si viodin tabelis cu la dople scrite. Cualchi volte la diferense a è minime: Lignano/Lignan, Pordenone/Pordenon, Udine/Udin; di spes a è pi marcade: Fagagna/Feagne, Gemona/Glemone, Osoppo/Osôf, Mortegliano/Mortean, Tricesimo/Tresesin. Ma in cualchi câs il non furlan al è une vere soprese: Aonedis/Savoneles, par esempi, Oleis/Vuelis, Illegio/Dièç, Aielo/Dael, Tolmezzo/Tumieç. Par



*Un pûr (foto Giuliano Borghesan)*

solit la dople scrite a comparîs dome su la strade principâl dai paîs, ma a Udin a àn vulût fâ li' robis in grant: Centro/Centri, Teatro/Teatri, Via/Vie, Autostrada/Autostrade e si po ciatâ ence un "Pôl universitari", par "Polo universitario", in some un albar di culture! Di frut mi recuardi che tanciu foresç a disevin Fraforean par Frofean, e a sbalievî come chei dal *Nuovo Pirona*. Pi voltis i ài proponût ai sorestans di completâ li' tabelis scrivint: "Comun de Patrie dal Friûl", ma fin cumò sense risultât. L'antighe patrie furlane a è di sigûr la fuarte radîs dal albar furlan, e jo soi convint che dome riconossînsi ta une uniche patrie aquileiêse, il Friûl al po sperâ di existi tai secui ch'a vegnaran.

**Gianfranco Ellero**

*Furlan di Frofean*



## Polenta, frico e cjasà

**E**ncja jo a la fin i ai molât e i soi su Facebook. I ai pôs “amîs”, però i mi soi notada ta compania “Friulani in Italia e nel mondo”. Ben po, una maravea! I furlans ai son propi dapardut, basta viodi da indulà ch’a son las fotografias ch’ai met sù: da duta l’Italia, da l’Argjentina, dal Canadà, da Francia e dut il mont. Che âta compania indulà ch’i mi soi notada a è “Achì si scrîf e si rît NOME par furlan e par cjargnel”. I mi gjolt una tassa a lei dutas las varietâts dal furlan ch’i vin. I soi restada a lei cemôt che dai crets al mâr i dijin “buongiorno”: bundì, bondì, buondì, bundè... Una dì, cuant chi ai viodût una fotografia cu la polenta e il frico, i mi soi ingropada e, dal det e dal fat, i mi soi vioduda piçula, sentada tal sofà cun gno fradi, gno von dongja me vava, papà, mama in peis e la polenta ch’a fumava su la taula. Al è stât nomo un moment e i l’ai vivût como ch’al fos cumò; as mi son coladas jù dôs âgrimas, e dopo i ai pensât che par nô cjargnei e furlans, dapardut indulà ch’i sin, la polenta e il frico a nu fâs sintî in cjasà da nô. Nissun frico al è bon como chel di me mâri: a rustîs la civola, a met las cartufulas taiadas finas finas e dopo vê massedât benon a lassa cuei benplan benplan, cul scuierti sôra, “cussì cul tanf as sci cuei las cartufulas cença tacâ ta pagjela”. E dopo a met tocs di çuç di chel ch’a à sotman: di solit a sci fâs il frico cuant ch’a ’nd è çuç sglonf, e no cul Montasio e aitis çuços di lusso!

**Iside Del Fabbro**

*Furlan di Davoussa (Prât di Cjargne)*

## *Sunt nomina rerum: il purcit*

**I**l grêcs antîcs, tal mês di Març, a veneravin le fieste di Dionisos, il Diu de cjoche mistiche, de Primevere ch'è torne a fâ vivi il mont. Un Diu che al mûr e che al torne a nassi, dimostrant ogni an che il spirt de Tiere al è imortâl, e il so destin chel di tornâ simpri come un cercli là che muart e vite si dan di man. Par celebrâlu degnamentri a puartavin ator pe citât, cjase par cjase, un bec. Al varès netât fûr ducj i mâi de int, cjapantju su di se. Ae fin dal percors rituâl e dolorôs lu varessin copât, e cun lui dutis lis magagnis dal mont a saressin stadis purificadis vie. Chel bec alî lu clamavin *tragos* e le sô storie e jere, secont il non, le tragjediè. Il rît al somee jessi cuasi il stes, cun contignûts simbolics antîcs tant cuant l'om. Al cambie dome il timp e il demâl: Autun inoltrât e il purcit. Ma i segnâi culturâi si smicjin une vore dongje. Il purcitur comprât un an prime, cuant che al jere di lat, ae sagre marcjât di sante Lussie, le sante dal solstizi di Invier, la sante de lûs (e no si fasevino lis cjandelis cul gras dal purcit, une volte?) al ven sacrificât intune cerimonie purificatorie là che dut il paîs al dovente teatri dal so maçarizi.

Arlevât come un di famee, al cjape ancje un non, il cjacj. Al dovente amî dai fruts, che a zuin cun lui di cuant che al è picinin. Le sô muart e je publiche, e seguìs un rituâl precîs, simpri compagn, che al va dal avent dal purcitâr e i siei amigos, cun sacs plens di struments di martiri; e po dopo il strissinament de bestie dal cjôt ae bree, il curtis che al fas sanganâ e berlâ: peade pai pîts, netade cu le aghe bolint, vierte e fate a tocs, le sô cjâr e ven lavorade daurman, tal frêt che al fâs fumâ cuarps e cjalderies, cu

le sapience di mans che a san ce tant sâl e mindriculis cjàpâ sù dai sacs, parcè che luianies, sanganeles, palmonaries, pressuts, bafis di ardiel a puedin durâ tal camarin, veglâts de vecje de cja-se, le femine cu le clâf, ch'è varà il compit di dâ a ognun il so, cence mai strassâ. Al finirà l'Unvier. Fin a cuarante dîs de Pasche si podarà fiscâ ce ch'al reste, intun pentolon di ligrie inte prime fieste di viertidure dai cjamps.

Cuant che le antighe dee Maja (di jê e ven il non talian *maiale*) e tornarà a soflâ vite su le tiere. Po dopo, fin che l'ort nol tornarà a florî e lis gjalinis a fâ ûfs, ven a stai le Pasche di Resurezion, a saran di mangjâ jerbis amaris, e sopis di magri, e renghe cence sâl. Ancje pal mont monacâl, che al veve une diete plui di dut vegjetariane, le cjar dal purcit e ven dispensade come medisine pai fradis che si inmalin. Lu si lei te regule di San Benedet.

Une volte copât, il purcit di Sant Antoni al dovente riserve alimentâr di ducj chei che a àn di bisugne. Providence, sparagn, gjenerositât e une vision ecumeniche dal sociâl come une specie di tindince antighe dal popul furlan. Cence mai dismenteâsi di une grampe di ligrie ancje tal mieç dal dolôr. Che il cjacj di famee si lu vai scjafoiant il merum cuntun bon tai in compagnie!

**Angelo Floramo**

## Spetant Nadâl

**M**arino e Guarino a erin in mies di una covada di siet fradis di una famea no propit furtunada. So pari 'l era stât riclamât cun la mobilitasson generâl da la prima guera e 'l era muart tal '17. La Taresa, sô mari, a veva di tirâ indevant la careta coma ch'a podeda. Chel puc di sussidi ch'ai rivava coma vedua di guera al bastava justa par dâ 'na man. A erin fituâi dal predi e par meti alc inta la taula a bisugnava lavorâ ducius. Lassant pierdi i canais pi piçui, chei altris a vevin di fâ la sô part. Par furtuna la pi vecja dai fradis era una femina e a podeda judâ sô mari se no altri a tegni cont i fradis pi picinins. Inutil dîsi che dut chel ch'a si moveva al era bon di mangjâ. In Unvier a tindevin i tramais o il criviel par cjapâ li' passaris e profitant dal flun ch'al era li vissin, a zevin a pescjâ i gufs cun la spironela. Nadâl al si vissinava e par porets ch'a fossin stâts, la Taresa a no voleva fâ mancjâ ai fruts, inmancul ai picinins, l'ussel dal bosc. A Cjasteons i regâi di Nadâl no ju partava Jesù Bambin o *Babbo Natale*. Jesù Bambin lu cognossevin par via ch'a zevin a dutrina, ma *Babbo Natale* no lu vevin nencja mai sintût a nominâ. L'incaricât dai regâi 'l era l'ussel dal bosc. 'L era encja un bon argomint par fâ stâ cuiets i canais. In chel Nadâl, l'ussel dal bosc al veva metût insiemit un pus di bagigi, cualchi stacanassa, doi mandarins par i picinins e cualchi carobula. Coma al solit al varès poiât i regâi tal balcon da la cjamara, che par chê sera al veva di restâ a cop.

I doi fradis intant ch'a spetavin Nadâl a vevin pensât che se par cjapâ li' passaris, i mierlis e incja li' gjais, a zevin ben i tramais, pussibil che no fossin zûts ben encja par l'ussel dal bosc? In fin

dai conts 'l era sempri un ussel. Cussì la visilia di chel Nadâl, a àn tindût tal balcon da la cjamara, dulà ch'al varès poiât i regâi, un tramai cun un biel bocon di polenta. Erin curious di jodi coma ch'al era fat e se ch'al veva tal cos chel benedet ussel. A una certa ora, cuant che la Taresa era sigura che i canais a fossin indurmidît, plan, plan, a è zuda a meti i regâi tal balcon. Apena ch'a à slungjât la man, il tramai al è scatât e ai à fat fâ un salt e molâ un sigon par la paûra ch'a veva cjàpât. I fruts a àn fat un salt tal liet e viduda sô mari cui deiç da la man in tal tramai si son mitûts a ridi. I fradis pi grainç, sintût il sigon, son corêts a jodi se ch'al sussedeva e encja lour si son mitûts a ridi. Ben la Taresa no rideva. No saveva se ch'a veva di fâ. I bagigi erin sparnissâts par cjera e chel tramai ta la man! La prima roba ch'a à vignût tal cjâf è stada di dîghi su di dut e dâ una lesson a chei manigoldi. Coma podevini pensâ di cjàpâ l'ussel dal bosc! Dopo, vidûts i fioi a ridi di gust, si è metuda a ridi e, cjàpadis sù li' carobulis e i bagigi, i à dâts ai fioi.

L'ussel dal bosc nol sarès pi passât.

**Adriano Mariutti**

*Furlan di Cjasteons di Sopula*

**Cjale in muse il soreli  
e lis ombris che ti stan daûr si sfantaran.**

*Joseph Goldstein*

## Unvier di une volte e di cumò

L'Unvier e jere la stagjon plui temude di dutis in cuant la scjarse mangjative, la penurie di vistîts e il frêl pai pôcs lens di brusâ sul fûc a falcetavin vecjos e fruts (*D'Unvier l'infier* al diseve un proverbî). Pe sô latitudin, in Friûl la “brute stagjon” e vignive vierte bielzà cun Sante Catarine (*Sante Catarine il frêl par ogni aîne*) par continuâ cun Sant Nicolò (*Sant Nicolò il frêl al dîs o soi ca cumò*) e Sante Luzie (*Sante Luzie il frêl al scuzie*). Ma al jere Nadâl cul so Missus e i siei Madins a vierzi la grande puarte dal Unvier e dopo Prindalan (*Prindalan frêl di cjan*) e la Pifanie (*Pifanie il grant frêl si invie*) che e sierave lis fiestis dal solstizi cui siei pignarûi (*Pifanie dutis lis fiestis e puarte vie*).

Cumò i segnâi dal calendari no valin plui par mostrâ il svicinâsi dal Unvier, in cuant tor mieç Otubar za ducj i riscjaldaments des nestris cjasis a son vierts e nol impuarte trop frêl che al fâs difûr ni se e rive o no rive la criûre a la fin di Zenâr. L'Unvier di une volte al jere une vore diferent di chel di cumò. Pe maiôr part, ducj lu passavin in cjase a cjalâ fûr pal balcon “il mont” che al consisteve inte place dal paîs cu la fontane inglaçade, l'ostarie e la latorie, o l'androne talpinade des passaris. Lis feminis tabarossadis a jessevin di cjase dome par cori tal negozi a cjoli chel pôc che al coventave a la famee e i oms a stavin a cjase a comedâ imprescj o a fâ cualchi piçul lavôr vicin dal fogolâr, dulà che e bulive la cite che e spandeva il nasebon fin sot l'arie, opûr a lavoravin inte stale riscjaldade dai bûs, de manze e dal cjaal. Dopo la scuele e dopo vê gustât, i fruts a lavin intal rivuat a sgliciâ cui scarpons imbrucjâts o a sbrissâ jù dai rivâi inevâts cu lis slitis di len.

Lis zornadis che biel planc a començavin a slungjâsi (*Nadâl un pît di gjal, Prindalan un pît di cjan, Pifanie un pît di strie, Sant'Antoni une ore e Sant Valentin un dôs*) a someavin cetant plui fredis di cumò, tant che a fossin trasparentis di glace, ruanis di criûre o torgulis di nêf.

In dì di vuê no je plui cussì: lis machinis par movisi (ognidun e 'nd à almancul une) e i gjubots di plumin e di goretex a permetin di lâ dapardut cence pôre di influence e rafredôrs, tant la vaccinazion e sigure i siei bogns efîets. Ma ancjemò vuê il scriç al beche fruçons sul pedrât difûr de puarte e soresere te cjarande ai prins di Fevrâr il mierli al comence a lâ in amôr, segno che la Vierte si svicine simpri di plui. La nature no cambie, o sin nô che o sin cambiâts; ma al bastarès dome gjestî il progrès cun plui capadocie e gjoldi dal eterni bon contat cu la nature e lis stagjons, alçant i voi par rimirâ orizonts e contemplâ ancjemò la tiere e il cîl.

**Mario Martinis**

**Il Giliment nol è il flum dal Friûl: al è il Friûl.**

Furio Honsell

# Gabele

## ZENÂR

Gianni Colledani	Las salmueries dai Zanues . . . . .	12
Celestino Vezzi	Il cjamin dal asîlo. . . . .	14
Roberto Tirelli	Carlut . . . . .	16
Angelo Bertoia	Lûs. . . . .	17
Antonino Danelutto	Racolane prime dal teremot . . . . .	18
Dario Quattrin	Il sghirat a San Zorç de Richinvelde . . . . .	19
Gabriella Bucco	La cantine di Cormòns: l'art dal vin . . . . .	20
Andreina Bulfon	L'orc da la Mariane. . . . .	21
Gotart Mitri	Otto, un om di valôrs morâi e artistics. . . . .	22
Gotart Mitri	Un artist dal grant côr. La stale. . . . .	23
Gianfranco Ellero	La scarrassule. . . . .	24
Anna Podrecca	Cjale ce câs . . . . .	25
Adriano Mariutti	I cjapons . . . . .	26
Roberto Ongaro	Fido . . . . .	28
Alberto De Rosa	'Na pescjada tal lâc inglassât . . . . .	30

## FEVRÂR

Gianni Colledani	L'Argagn da Vît . . . . .	34
Serena Lizzi	Il viaç dal lengaç . . . . .	36
Adriano Turrin	Mai avonde. . . . .	37
Roberto Tirelli	Siôr Bepo . . . . .	38
Giacomo Vit	<i>Mi soi insumiât...</i> . . . . .	39
Antonino Danelutto	Il probarbe Vitôr . . . . .	40
Dario Quattrin	La bolp a Lignan . . . . .	41
A. Bressan e G. Bucco	Il restaur des botis. . . . .	42
Andreina Bulfon	Il riu da li' striis. . . . .	43
Gotart Mitri	Un artist dal grant côr. Copâ il purcit . . . . .	44
Gianfranco Ellero	La liberasion . . . . .	46
Flavio Pellis	Bruno <i>Badilin</i> . . . . .	47
Novella Del Fabbro	Lu gno gjat salvadi. . . . .	48
Benvenuto Castellarin	Cuan' chi Atile al è passât pa li' nostri' bandis . . . . .	50
Italo Scaravetti	Ce dal diau ano? . . . . .	52



## MARÇ

Gianni Colledani	Cu la plume a s'ingrume. . . . .	56
Celestino Vezzi	Tin. . . . .	58
Roberto Tirelli	Tite pitôr . . . . .	60
Ermes Dosso	<i>Un pôc al di</i> . . . . .	61
Antonino Danelutto	Le ferade Pontebane . . . . .	62
Dario Quattrin	Cjavrûi a Codroip . . . . .	63
Gabriella Bucco	Lis botis pituradis. G. Castellani e L. Ceschia . .	64
Agnese Moroldo	Li' strii di Muntisel . . . . .	65
Gotart Mitri	Un artist dal grant côr. Une becjarie vive . . . .	66
Gianfranco Ellero	Il filistrin . . . . .	68
Iside Del Fabbro	I roncjins . . . . .	69
G. Pascoli e P. Chittaro	In chê domenie nol è lâ a servî messe . . . . .	70
Mario Martinis	Primevere di une volte e di cumò . . . . .	72
Raffaele Somma	Emigrâ: une peraule colme di significâts e emozions . . . . .	74

## AVRÎL

Gianni Colledani	Ce bon il moscato di Lison . . . . .	78
Gianna Nobile	L'agnel di Pasche . . . . .	80
Roberto Tirelli	Gusto l'atôr. . . . .	82
Aldo Rossi	<i>L'insium de lisierte</i> . . . . .	83
Antonino Danelutto	Le crous dal Vinars Sant. . . . .	84
Dario Quattrin	Il verdon o cirant tai magrêts di Vivâr . . . . .	85
Gabriella Bucco	Lis botis pituradis. Darko . . . . .	86
Agnese Moroldo	La strie ta pigne . . . . .	87
Gotart Mitri	Un artist dal grant côr. Puliziis da la Vierte . . .	88
Gianfranco Ellero	Pre' Aghe . . . . .	90
Novella Del Fabbro	La civuito . . . . .	91
Daniela Schiavon	Checo, il vuardian de gjave . . . . .	92
Giannino Angeli	Primevere tal ronc. . . . .	94
Danilo Vezzio	La semence dai cavalîrs a no je la semence dal lidric! . . . . .	96

## MAI

Gianni Colledani	Nardin, favri da fin. . . . .	100
Celestino Vezzi	Bepo e Pauli . . . . .	102
Roberto Tirelli	Checo pessâr. . . . .	104
Iside Del Fabbro	<i>Lusôr di lune</i> . . . . .	105
Antonino Danelutto	Prime le fieste cul bec e dopo le fieste al bec. .	106
Dario Quattrin	Il gjalut de bieles creste a San Zorç de Richinvelde. . . . .	107
Gabriella Bucco	Lis botis pituradis. Vincenzo Munaro . . . . .	108
Anna Maria Santarossa	Li' striis di Mujesse . . . . .	109
Gotart Mitri	Un artist dal grant côr. Timp di rogazions . . .	110
Gianfranco Ellero	Il ciaval cu la tos . . . . .	112
Argeo Tomat	<i>Rose di Mai</i> . . . . .	113
Miriam Pupini	Grazie ae musiche . . . . .	114
Amelio Sirch	Presunzion e ignorance . . . . .	116
	Une cartuline di Giovanni Battista Corgnali . .	118
Eleonora Mongiat	<i>Souvenirs du Friûl</i> : la scuola. . . . .	119

## JUGN

Gianni Colledani	I bleons di Sunte . . . . .	122
Silvano Bertolini	La mê grande passion: la montagne . . . . .	124
Roberto Tirelli	Pre Nardin . . . . .	126
Egle Taverna	<i>Il troi pierdût</i> . . . . .	127
Antonino Danelutto	Scaletis e bregons curts. . . . .	128
Dario Quattrin	La masanete a Lignan . . . . .	129
Gabriella Bucco	Lis botis pituradis. I. Crico e A. von Reden. . .	130
Elena Pugnetti	La strie di Cjampiûl . . . . .	131
Gotart Mitri	Un artist dal grant côr. I cavalîrs . . . . .	132
Gianfranco Ellero	La confession curte . . . . .	134
Marina Leonarduzzi	Un ricuart de infanzie dongje il Tiliment . . .	135
Benvenuto Castellarin	Il zovin ch'al à menât a balâ 'ne musse. . . .	136
Mario Martinis	Astât di une volte e di cumò . . . . .	138
G. Pascoli e P. Chittaro	Amôr al è amôr . . . . .	140
Pietro Mazzuchin	Migrant furlan . . . . .	141

## LUI

Gianni Colledani	I cjans di Zanierin . . . . .	144
Celestino Vezzi	Agosto . . . . .	146
Roberto Tirelli	Toni barbîr . . . . .	148
Edi Cudicio	<i>Rolls Royce</i> . . . . .	149
Antonino Danelutto	Il gîr di Patoc . . . . .	150
Dario Quattrin	La craçule tai magrêts di Vivâr . . . . .	151
Gabriella Bucco	Lis botis pituradis. Giovanni Cavazzon. . . . .	152
Ugo Moretti	La glogje e i poleçs d'aur . . . . .	153
Gotart Mitri	Un artist dal grant côr. La trebie . . . . .	154
Gianfranco Ellero	Mans di fari. . . . .	156
Anna Maria Negrini	Fruts tes valadis . . . . .	157
Caterina Tomasulo	L'istrice e il marchês . . . . .	158
M. Cosmo e A. Fantin	I amighi dei rospat . . . . .	160
Anna Madriz	La Blanca . . . . .	161
Galliano R. De Agostini	Viers la Crôs dal Sud . . . . .	162

## AVOST

Gianni Colledani	Il Copari e la Comari . . . . .	166
Stefania Virginio	Nono Duin . . . . .	168
Anna Paravano	La cincent di gno pari . . . . .	169
Roberto Tirelli	Siore Talie. . . . .	170
Anellina Colusssi	<i>Il furmint</i> . . . . .	171
Antonino Danelutto	Il gjal da le nône Ane . . . . .	172
Dario Quattrin	Il mardar a Davian . . . . .	173
Gabriella Bucco	Lis botis pituradis. Giorgio Celiberti . . . . .	174
G. Not e S. Not	Il Vorgnan e i crots. . . . .	175
Gotart Mitri	Un artist dal grant côr. Il curtîl . . . . .	176
Gianfranco Ellero	Furlanisâ . . . . .	178
Ubaldo Muzzatti	<i>Il Strolc dai Strolcs</i> al fa meracui . . . . .	179
Elvia Jacuzzi	Une corse in moto . . . . .	180
Novella Del Fabbro	Lu gjal di mont . . . . .	182
Daniela De Alessi	Grau... ce paradîs . . . . .	184
Martine Celine Crosilla	<i>Balonut</i> . . . . .	185
Alberto De Rosa	Al è stât un miracul si no soi muart di un colp . . . . .	186

## SETEMBAR

Gianni Colledani	Morandini . . . . .	190
Celestino Vezzi	La Costanse. . . . .	192
Roberto Tirelli	Madalene. . . . .	194
Eraldo Ius	<i>Sé ch'al rèsta a Eluana Englaro</i> . . . . .	195
Antonino Danelutto	Ma èsal propi il Vigji? . . . . .	196
Dario Quattrin	La lipare dal riçûl tal Cjanâl da la Ciline . . . . .	197
Gabriella Bucco	Lis botis pituradis. M. Cassetti e M. De Tuoni . . . . .	198
Ugo Moretti	La Bela . . . . .	199
Gotart Mitri	Un artist dal grant côr. Vendemis . . . . .	200
Gianfranco Ellero	La sesule e il martiel. . . . .	202
Lorena Colautti	Il cunin di cjocolate . . . . .	203
Cristina Noacco	Une cimiade . . . . .	204
Carlo Zanini	Ben petade e ben tornade . . . . .	206
Mario Martinis	Autun di une volte e di cumò. . . . .	208
Mario Canciani	I me doi furlans . . . . .	210

## OTUBAR

Gianni Colledani	Il taur di siôr Jacum . . . . .	214
Beppino Pravisani	Ve la conte di vite vivude: "O ai non..." . . . . .	216
Roberto Tirelli	Cornelio stranîr . . . . .	218
Franca Mainardis	<i>Timp passât</i> . . . . .	219
Antonino Danelutto	Curiosant intal archivi parochiâl . . . . .	220
Dario Quattrin	Il cjamoç tal lâf di Dobardò . . . . .	221
Gabriella Bucco	Lis botis pituradis. G. Marizza e S. Ornella. . . . .	222
G. Not e S. Not	La val dai loufs . . . . .	223
Gotart Mitri	Un artist dal grant côr. A cjapâ sù blave . . . . .	224
Gianfranco Ellero	La predice dal Passio . . . . .	226
Paride Radivo	A ere une vôte... . . . .	227
Stefano Fabro	Une zornade fûr dal timp . . . . .	228
Laura Fabro	Lane di gjat . . . . .	229
Angelo Floramo	<i>Sunt nomina rerum: le polente</i> . . . . .	230
Caterina Tomasulo	Atent al Ritmo! . . . . .	232
Irma Marmai	In Nuiârs . . . . .	234
Renato Cella	Il figâr di Angaran . . . . .	235

## NOVEMBAR

Gianni Colledani	Amadio, che al ciscave a las âfs . . . . .	238
Celestino Vezzi	Il sant dai cjocs . . . . .	240
Roberto Tirelli	Cinirine la strie . . . . .	242
Egle Taverna	<i>Vitimis</i> . . . . .	243
Antonino Danelutto	Rangjâsi in tîmps di miserie . . . . .	244
Dario Quattrin	Il çoi a San Zorç de Richinvelde . . . . .	245
Gabriella Bucco	Lis botis pituradis. T. Zancanaro e P. Meneghesso	246
Maddalena Tolazzi	Fûc a Dordole . . . . .	247
Gotart Mitri	Un artist dal grant côr. Oh cjampanis de sabide sere... . . . .	248
Gianfranco Ellero	Il marketing . . . . .	250
Maria Minin Durat	In Pradès . . . . .	251
Angelo Floramo	<i>Sunt nomina rerum</i> : le cridince . . . . .	252
Carlo Zanini	A palpe te fumate . . . . .	254
Rem Spicemei	Umanitât suicidiarie!?. . . . .	256
Pauli Jacus	L'om da la ploie . . . . .	258
Luigi Piredda	Il divorzi . . . . .	259

## DICEMBAR

Gianni Colledani	Nadâl a km zero . . . . .	262
Giorgio Cividino	Misuris furlanis par lavôrs di mecaniche fine . .	264
Adriano Turrin	Un dispiet medità . . . . .	265
Roberto Tirelli	Pauli vuardian . . . . .	266
Giacomo Vit	<i>Cun vous di ûa</i> . . . . .	267
Antonino Danelutto	Le' sgiaipis sot il spolert . . . . .	268
Dario Quattrin	Il pic ros tai magrêts di Vivâr . . . . .	269
Gabriella Bucco	Lis botis pituradis. Silvano Spessot . . . . .	270
Ugo Moretti	Il cjampanîl di Mueç e la vacje . . . . .	271
Gotart Mitri	Un artist dal grant côr. Un rituâl . . . . .	272
Gianfranco Ellero	Un albar di culture . . . . .	274
Iside Del Fabbro	Polenta, frico e cjasà . . . . .	275
Angelo Floramo	<i>Sunt nomina rerum</i> : il purcit . . . . .	276
Adriano Mariutti	Spetant Nadâl . . . . .	278
Mario Martinis	Unvier di une volte e di cumò . . . . .	280

et nō uenit Exptauimus medele tps filiz uitate quēcioni  
utūq; otendenciu pceſſionē celebranda ⁊ ecce turbaco ad  
ūritē hō pnapes xani quib; ē dolor talis tātiq; mēis ecclie  
dissipacio ⁊ tendite insup uob ⁊ vniūso pplo vob sac ponti  
fices in quo posuit uos sps scs Epōs regere eccliaz di quā acq  
siuit sanguin suo ⁊ tendite q; Nolite dissimulat agere ū  
depopulat grege; xpi insuetas moīs tempestas hec leuissima  
hōrendaq; vorago. Exūgat in unū ppl; vniūsus tollere de me  
dio sui hoc defozmissimū h; porentuz vñ fit in obpbrium  
hostib; inceduliz ppis aīab; in dapnacōis cēne disēn  
aptuz decidat ul' inuit' unus aut alt' ymo utq; otēdēcū  
ab occupata sede petri pot' q; vnitas eoz otēcōn deprec  
Nay du; neuf ppl; obedit neuf amplius de pmatu l' feu  
stra otendet neq; audiet ultra uox illa crudelissime femi  
ne Nec m' nec tibi h; diuidat h; illa pie mēis date illi in  
famez uiuiz Nos ūo qui nich; p aīe salutes ita desideram'  
q; uidere sexenū pacis faciez nēis effulgerē t'pib; iudicau  
mus ex pmissoz ⁊ filiu; osidracōe nllm ad pns patē vali  
dius i taz despato malo remediuz q; q; neuf otendenciu  
aut forte sibi successuoz pster demerps obvia a pplō xao  
deficiēte siquidēz fomento tant' ignis infernal' i se tandem  
deficiēs donante deo collatē Cuapp pcedentib; ⁊ hū; sup  
hoc vicib; repetit magnus ⁊ matius delibacōnu; osiliys ē  
sapientib; pū; ⁊ deuoris hōib; deuz ⁊ eoz salutes gerētib;  
p oclis Nos ⁊ ecclia regni nū ac dalphinat' viennē p  
nob ac subditis nū; eozd; egri ⁊ dalphinat' decreuimus  
tales amplecti neutralitate; in festo ascensiois pxim' de  
tue nisi in fca nobis pulcra pax aduenit pceſſuri nichy  
min' ultius assidua sollicitudinē cū alijs pncipib; ⁊ eatho  
licis omib; donec euulso scismate pax plantet Cū mū  
bunē forsan aliqui ex aliē affectat vñ nob ista licet acce  
dat potius q; hanc nob lege; fac ipā que lege; nescit dura  
necessitas ⁊ filialis pietas que p medios etiā ignes ⁊ gladios  
mīez tales ita collaborā; eripe conaret Ecce morb' muerat  
et purdus q; ex fontis leuorib; in defiora q; tidie ueld cancer  
spit Si g; ferramentuz cauterizans adhuc nlls ēē clpauit







Spedizione Poste Italiane S.p.A. A.P. – DL 353/2003 (conv. in L. 27/02/2004 n. 46) art. 1, comma 2.  
Autorizzazione del Tribunale di Udine del 22.05.1982, n. 12/82 – Supplemento al n. 3-4/2019 della rivista  
“Sot la Nape”. In caso di mancato recapito rinviare all’Ufficio di Udine Ferrovia per la restituzione al  
mittente che si impegna a pagare la tariffa in vigore - TAXE PARÇUE – TASSA RISCOSSA – UDINE, ITALY